



NAZIONALE

12

18 A

12

BIBLIOTECA


VITT. EMANUELE


H

~~2-18~~

14-15-A-21









PARISIIS.

Apud GEORGIUM IOSSE uia Iacobæ
 sup signo Coronæ spinæ ANNO. MDLIII

N. 10.

BIBLIOTECA NAZ.
 ROMA
 VITTORIO EMANUELE



~~Manuscript of the~~

etc IDEA *libris*
PHILOSOPHIÆ

PP. MORALIS, *the the*
Collegij SEV *Romani.*
the ETHICA, *the*

Paucis multa complectens de
Beatitudine, de Actibus huma-
nis, & de Virtutibus moralibus.

Pars quarta totius Philosophia.

in Monticellis

Auctore

D. PETRO A SANCTO IOSEPH
Fulienfi.



PARISIIS,

Apud GEORGIVM LOSSE, viâ Iacobâ,
sub signo Coronæ Spinæ.

M. DC. LIV.

Cum Privilegio, & Approbatione

THE
LIBRARY OF THE
MUSEUM OF
ART AND HISTORY
NEW YORK

1000 1000 1000 1000 1000

1000 1000 1000 1000 1000

1000 1000 1000 1000 1000



MONITIO.



ETSI hæc pars secundum marginis consuetum docendi morem post Physicam tradi so-
leat, eaque maximè ratione Metaphysica appelletur, pla-
cet tamen secundum locum inter par-
tes Philosophiæ nostræ illi tribuere, tum
quia cum fuscè tractet, quæ breuiter in
Logica de vniuersalibus & categoriis
perstricta sunt, connexio materiarum
vetat ne ad finem cursus reiiciatur. Tum
quia cum multa tradat de ente, de sub-
stantia, & de accidente in genere, vel eo
titulo præmittenda fuit Physicæ quæ
passim in tractationibus rerum natura-
lium notiones illas vniuersales suppo-
nit. Aliunde verò cum opus non sit hoc
loco repetere quæ de Deo & Angelis in
Idea Theologiæ speculatiuæ à nobis
iamdudum tractata sunt, nullum ex hoc ca-
pite nobis onus incumbit iis morem ge-
rendi qui ideo Physicam Metaphysicæ
præmittunt quia per rerum terrenarum
& visibilium disquisitionem veluti ma-
nu ducimur ad aliqualem rerum coele-



I N D E X

LIBRORVM , CAPITVM, ET ARTICVLORVM.

P R Æ F A T I O.

De ipsa Metaphysica secundum se.

L I B E R I.

De Vniuersali.

C A P. I. De Vniuersali à parte rei.

AR. I. **Q**uid vulgò Philosophi intelligant nomine uni-
uersali. 25

I. Refellitur primus modus sententia statuentis
uniuersalia à parte rei. 28

II. Refellitur secundus modus dicendi eiusdè sententia. 30

IV. Soluuntur nonnullæ obiectiones. 33

V. Refellitur tertius modus dicendi prædictæ sententia. 36

C A P. II. De vniuersali per mentis operam.

AR. I. **P**rimus modus sentiendi excluditur. 39

II. Alius dicendi modus impugnatur. 42

III. Tertius modus dicendi excluditur. 47

IV. Soluuntur nonnullæ obiectiones. 51

V. De nonnullis proprietatibus vniuersali. 54

C A P. III. De Genere.

AR. I. **Q**uidnam sit definitum in definitione generis. 56

II. De genere prædictæ definitionis. 59

III. Angustus necessario requiratur plures species. 62

IV. Quomodo genus se habeat ad species, & ad indi-
dua, de quibus predicatur. 65

LIBER II.

De Actibus, & passionibus humanis.

CAPVT PRIMVM.

De actibus humanis secundum se.

- AR. I. Quid sit propriè actio humana. 102
 II. Quomodo se habeat actio voluntaria ad liberam & humanam. 105
 III. Quomodo se habeat actio voluntaria & libera ad Moralem. 108
 IV. Quomodo violentia se habeat ad actum humanum. 112
 V. Quomodo metus se habeat ad actum humanum. 115
 VI. Quomodo conspiciencia se habeat ad actum humanum. 118
 VII. Quomodo ignorantia se habeat ad actum humanum. 122

CAPVT II.

De libertate humana.

- AR. I. AN ad liberum arbitrium requiratur libertas à necessitate. 126
 II. An Physica prædeterminatio repugnet libertati. 136
 III. Confirmatio prædictorum sigillatim quoad actus bonos. 143
 IV. Idem ostenditur Speciatim quoad actus malos. 148
 V. Generalia quadam Physica prædeterminationis fundamenta conuelluntur. 152
 VI. Soluuntur specialia fundamenta Physica prædeterminationis ad actus bonos. 156
 VII. Refelluntur præcipuæ rationes, quæ pro Physica prædeterminatione ad actus præuos adduci solent. 163

INDEX LIBRORVM,

CAPVT III.

De quibusdam aliis ad notitiam libertatis spectantibus.

AR. I.	DE subiecto libertatis.	162
II.	In qua anima potentia sit libertas.	167
III.	Quomodo intellectus se habeat ad libertatem.	169
IV.	De obiecto liberi arbitrij.	173
V.	Verum liberum arbitrium sit praesentium, an vero tantum futurorum.	177
VI.	In quo consistat libertas actus.	180

CAPVT IV.

De actibus humanis tam elicitis quam imperatis.

AR. I.	DE volitione & fruitione.	185
I I.	De actu voluntatis qui est intentio.	187
III.	De mediorum electione.	190
IV.	De consilio ad electionem praerequisito.	195
V.	De consensu.	198
VI.	De usu.	200
VII.	De actibus imperatis à voluntate.	202

CAPVT V.

De bonitate & malitia actuum humanorum.

AR. I.	AN bonitas & malitia humanorum actuum sumantur ex obiecto.	209
II.	An bonitas & malitia actus sumantur ex circumstantiis.	213
III.	An bonitas & malitia sumantur ex fine.	216
IV.	An bonitas & malitia sumantur per ordinem ad rationem, seu conscientiam.	223
V.	An voluntas nostra debeat esse conformis legi aeternae & voluntati divinae.	231
VI.	De comparatione actus externi cum interno quoad bonitatem & malitiam.	236
VII.	An idem actus possit esse bonus & malus.	241

CAP. ET ART.

CAPVT VI.

De nonnullis aliis ad eandem materiam
spectantibus.

AR. I.	Quid sit formalis bonitas actus.	248
II.	Quid sit formalis malitia actus prau.	252
III.	An dicatur actus aliquis indifferens, seu qui nec sit bonus nec malus.	261
IV.	De proprietatibus actuum bonorum & malorum.	269
V.	De merito bonorum operum.	273

CAPVT VII.

De Passionibus in genere.

AR. I.	De natura passionum.	279
II.	De diuisione passionum.	281
III.	De numero passionum.	284
IV.	De moralitate passionum.	286
V.	De ordine passionum quoad generationem.	289
VI.	De ordine perfectionis inter passiones.	292

CAPVT VIII.

De passionibus in specie.

AR. I.	De amore & odio.	294
I I.	De desiderio & fuga.	305
III.	De delectatione seu gaudio.	309
IV.	De tristitia seu dolore.	317
V.	De spe & desperatione.	322
VI.	De audacia & timore.	328
VII.	De ira.	335

LIBER III.

De virtutibus Moralibus.

CAPVT PRIMVM.

De natura & causis virtutum Moralium.

AR. I.	De nomine, essentia & existentia virtutis Moralis.	342
II.	Quadam corollaria continens.	345
III.	De causis virtutum moralium formali & materiali, seu subiectiua.	347

INDEX LIBRORVM, &c.

IV. De causis virtutum moralium effectiva & finali.

CAPVT II.

De medio virtutum moralium, earumq; connexionione & æqualitate.

AR. I.	A N virtutes Morales in medio consistant.	358
II.	An virtutes intellectuales & infusæ in medio consistant.	362
III.	An virtutes omnes Morales sint inter se connexæ.	364
IV.	De connexionione virtutum supernaturalium, seu infusarum.	367
V.	De æqualitate virtutum.	370

CAPVT III.

De Prudentia.

AR. I.	D E nomine & natura Prudentia.	371
II.	Quanam sint officia Prudentia.	373
III.	Quanam sint partes subiectiva Prudentia, seu species in quas dividitur.	375
IV.	Quanam sint partes integrantes & potentiales Prudentia.	376
V.	Quot modis contra Prudentiam peccari possit.	379

CAPVT IV.

De Iustitia.

AR. I.	D E nomine & natura Iustitia.	382
II.	Quot sint species Iustitia.	384
III.	De partibus potentialibus Iustitia.	385

CAPVT V.

De Fortitudine.

AR. I.	D E nomine & natura Fortitudinis.	390
II.	Quanam sint partes Fortitudinis.	392

CAPVT VI.

De Temperantia.

AR. I.	D E nomine & natura Temperantia.	394
II.	De partibus Temperantia.	395

FINIS.

IDEA



IDEA
PHILOSOPHIÆ
MORALIS,
SEV
ETHICA,

*Paucis multa complectens de beati-
tudine, de actibus humanis, &
de virtutibus Moralibus.*

PROOEMIUM,

De ipsa Ethica secundum se.



HÆC est quarta & postrema pars
nostræ Philosophiæ, quæ tota ad
rectam morum institutionem ten-
dit, adeoque Ethica, seu disciplina
Moralis vulgò appellatur. Ut au-
tè illius natura nobis innotescat,
Quæritur I. quodnam sit illius genus, seu
Ethica. A

sub quo habitus genere collocanda sit, an sub arte, an sub prudentia, an verò sub scientia. Non enim esse sapientiam, vel intellectum, extra controuersiam est: cum non versetur circa altissimas rerum causas; nec circa sola principia per se nota. Omnes etiam concedunt non esse meram opinionem, ac multo magis certum est non esse inter habitus erroneos numerandam, cum plerasque habeat conclusiones veras & certas: Itaque

R E S P O N D E O & dico 1. *Disciplinam Moralem non esse artem propriè dictam.* Ratio est, quia ars propriè dicta per se tendit ad efficienda opera quædam externa & sensibilia, vt manifestè colligitur, ex Arist. 6. Ethic. cap. 4. vbi ait, ædificandi facultatem artem esse, quia est habitus quidam cum ratione effectiuus, & nullam esse artem quæ non cum ratione effectiuus habitus sit; neque vllum talem habitum esse, qui non sit ars: adeoque artem definit habitum cum vera ratione effectiuum, seu ad faciendum idoneum: constat autem Moralem Philosophiam versari per se circa operationes voluntatis, quæ sunt internæ & spirituales, eò quòd illæ propriè sunt Moralis honestatis capaces, & non nisi per accidens occupari circa actiones externas; quatenus scilicet ab internis procedunt, easque manifestant. Quare Philosophia Moralis non est ars propriè dicta.

Dico 2. *Philosophiam Moralem esse verè & propriè scientiam.* Probatur, quia illa est scientia propriè dicta, quæ suas conclusiones probat per veras demonstrationes: atqui Philosophia Moralis hoc præstat; ergo est scientia propriè dicta. Major patet ex Logica, & ab omnibus admittitur: suadetur minor, nam Ethica demonstra-

E T H I C Æ.

tiue probat v. c. virtutem esse laudandam, & amplectendam, quia id rationi consentaneum est; Beatitudinem non esse positam in diuitiis, quia ad aliud ordinantur, nec appetitum satiant; aliaque innumera de quibus in progressu. Quare nihil illi deest ad rationem scientiæ propriæ dictæ.

Obiicies 1. Ethicam agere primario de actibus humanis seu liberis, de quibus, cum sint contingentes, scientia vera esse non potest. Respondeo actus liberos quoad essentiam, & in genere spectatos esse necessarios, & sic de iis dari veram scientiam: esse autem contingentes si spectentur quoad existentiam, & in particulari, quomodo scientia circa illos non versatur.

Obiicies 2. Aristotelem parum nobis fauere cum dicat 1. Ethic. cap. 3. Moralem Philosophiam versari circa res valde incertas, adeoque in illa non esse quærendas probationes demonstratiuas, sed quales rei natura patitur. Respondeo Aristotelem non dubitare quin multa sint principia certissima in Philosophia Morali, ex quibus certissimæ conclusiones deducuntur, qualia sunt illa, Deus est colendus, parentes sunt honorandi, virtus est amplectenda, &c. Quare loco citato vult tantum, non in omnibus rebus moralibus æqualem certitudinem exigendam esse, cum pleraque ad ius humanum spectantia, iuxta locorum, temporum, & personarum varietatem immutentur; & quod in vno loco honestum censetur, in alio probrosum & turpe habeatur.

Dico 3. *Habitus Ethica non distingui realiter à prudentia saltem partialiter, & inadquatè spectata.* Probat, nam Ethica vt scientia morum, versatur tantum circa operationes honestas in ge-

nere, prudentia vero iudicat quid hic & nunc agendum sit in particulari: Potest autem idem habitus ad utrumque hoc munus interdum sufficere, iudicare v. c. honestum esse eleemosynam pauperi in talibus circumstantiis erogare, & tali pauperi hic & nunc occurrenti esse tribuendam.

Confirmatur ex dictis de identitate habitus Logicæ docentis, & utentis: si enim idem habitus qui docet generatim modum conficiendi Syllogismos, sufficit ut fiant Syllogismi in hac, vel illa materia; quidni idem habitus Ethicæ, quo iudicamus v. c. honestum esse in genere tribuere eleemosynam indigenti, sufficiet ut iudicemus subueniendum esse huic pauperi, loco & tempore congruo eleemosynam petenti?

Respondebit aliquis non esse parem rationem, quia illi qui nouit modum conficiendi Syllogismum, nulla superanda restat difficultas ut in hac aut illa materia, cuius perfectam cognitionem habet, Syllogismos conficiat: at quamuis sciam in genere, honestum esse eleemosynam indigenti tribuere, quando tamen pauper occurrit, non ita facile iudico honestum esse illi eleemosynam tribuere: quare ad vincendam, eiusmodi difficultatem habitus distinctus necessarius videtur.

Verum hæc disparitas refellitur, quia negari non potest quin in multis casibus euidenter constet adesse circumstantias, sub quibus agendum esse Ethica præscribit: at tunc non opus est nouo habitu prudentiæ, dictante hic & nunc adesse circumstantias sub quibus agendum est, præter illum generalem qui dictat agendum esse, quando tales circumstantiæ occurrunt. Quia tamen variæ sunt materiæ Morales, in quibus difficile est certum iudicium ferre de circum-

stantiis particularibus, in quibus tale quid fieri, aut non fieri debet, ut etiam viri docti sæpe experiuntur, hinc fit ut præter habitum generalem Ethicæ, requiratur novus aliquis habitus quo eiusmodi difficultas superetur.

Atque ob hanc maximè rationem dixi in assertione, habitum Ethicæ non distingui realiter à prudentia saltem partialiter & inadæquatè spectata. Si enim prudentia adæquatè spectetur, ea includit aliquid ex parte intellectus, quod in habitu Ethicæ non continetur, sicque ab illo distinguitur tanquam totum à parte, aut tanquam includens ab incluso.

Nec tantum ex parte intellectus, sed etiam ex parte affectus, prudentia complectitur aliquid quod in habitu Ethicæ non continetur; saltem si agatur de prudentia, iuxta conceptum vulgarem. Siquidem ille non solet dici prudens, qui pollet notitia requisita ad directionem morum, nisi præterea habeat affectum rectè dispositum ad sequendam eiusmodi directionem. Ista autem recta affectus dispositio ut sic, non spectat ad scientiam Moralem. Et inde fit ut possit quis esse Philosophus Moralis, etsi non sit perfectè & adæquatè prudens.

Quæritur 2. quodnam sit obiectum Philosophiæ Moralis.

Respondeo & dico 1. *Obiectum materiale Philosophiæ Moralis esse actiones humanas.* Probatur, nam illud est materiale obiectum alicuius scientiæ, ad quod omnia quæ in ea tractantur referuntur, vel tanquam principia, vel tanquam partes, vel tanquam proprietates: atqui quæcunque in Philosophiâ Morali tractantur ad humanas actiones eo modo referuntur; ergo actiones humanæ sunt obiectum materiale Philosophiæ Moralis. Maior ab omnibus admittitur,

probatur minor, nam Philosophia *Moralis* tractat in primis de ultimo fine actionum humanarum, & de earum causis efficientibus siue externis, siue internis, eaque occasione agit de Deo, de Angelis, de intellectu, de voluntate, & de appetitu. Tractat deinde de habitibus *Moralibus* qui ad actiones humanas referri possunt, vel tanquam causæ, vel tanquam effectus; cum per actus producantur habitus, & habitus iam producti concurrant effectivè cum potentia ad similes actus. Tractat præterea de variis speciebus actionum humanarum, ut de elicitis & imperatis; de iis quæ versantur circa finem, & circa media; de honestis, & pravis; itemque de passionibus appetitus sensitivi, quæ ut à voluntate imperantur, aut non cohibentur, ad actiones humanas reduci possunt. Spectat denique ad *Moralem Philosophum* inspicere effectus qui ex actibus humanis oriuntur, quales sunt laus, & vituperium, meritum & demeritum.

Dico 2. *Obiectum formale Philosophia Moralis* esse actiones humanas ut dirigibiles ad bonum *Morale*, seu ad honestatem. Probatur 1. ex proportionem quæ communiter assignatur inter Logicam, & Ethicam, quæ in eo consistit, ut sicut Logica considerat actiones mentis, quatenus dirigibiles ad verum cognoscendum, ita Ethica consideret actiones voluntatis ut ad honestatem *Moralem* dirigi possunt.

Probatur 2. Nam cum Ethica per se consideret actiones humanas, neque eas spectet præcisè secundum entitatem naturalem, quia sic earum consideratio spectat ad *Physicam*, consequens est ut illas inspiciat sub ratione *Morali*, seu quatenus ad honestatem per præcepta *moralia* dirigi possunt. Confirmatur, quia cum finis primarius *Ethicæ* sit hominem perducere ad

beatitudinem, per media proportionata quæ alia non sunt quàm operationes humanæ, secundum regulas honestatis elicitæ; nihil congruentius assignari potest pro objecto Ethicæ, quàm operationes humanæ ut sunt dirigibiles proximè ad bonum honestum, & remotè ad beatitudinem.

Neque refert quòd Ethica agat de actibus pravis, qui rectitudinis Moralis sunt incapaces: non enim de iis agit per se, sed per accidens, ut ex eorum oppositione actuum bonorum honestas clariùs elucescat.

Cæterùm ex hætenus dictis nonnulla colligi possunt: Primò Ethicam debere annumerari inter partes Philosophiæ; quia cum vera sit scientia de actibus humanis, ut ostensum fuit, nulla ratio est cur non ponatur inter partes Philosophiæ, quæ aliud nihil est quàm scientia de rebus omnibus quæ lumine naturali cognosci possunt.

Secundò Ethicam esse scientiam practicam, cum versetur circa objectum suum modo practico, seu operabili: & quamvis nonnulla speculatiuè tractet, ut cum agit de intellectu & voluntate, de natura habituum, &c. id non impedit quin absolutè sit practica, quia eiusmodi tractationes adduntur ad maiorem eorum illustrationem quæ proximè ad praxim spectant.

Tertiò hanc Philosophiæ partem reliquis esse longè vtiliorem, adeoque in ea addiscenda enixius incumbendum; cum aliæ in tractandis quæstionibus curiosis, & plerumque inutilibus distineantur; hæc verò doceat modum quo morum honestatem, veramque beatitudinem consequi possimus.

Quarto Philosophiam Moralem posse non incongruè definiiri in hunc modum. *Est scientia*

practica, quæ versatur circa actus voluntatis ut dirigibiles ad bonum Morale.

Quæritur 3. Quomodo Philosophia Moralis diuidatur. Respondeo eam vulgò diuidi in Monasticam, Oeconomicam seu domesticam, & Politicam seu civilem. Cum enim Philosophia Moralis instituta sit ad dirigendas actiones hominis ad bonum Morale, possitque homo tripliciter considerari, nempe vel solitariè & secundum se, ut per proprios actus potest ordinari ad beatitudinem assequendam, vel ut est pars societatis domesticæ, vel ut est membrum Reipublicæ; hinc fit ut singulæ scientiæ morum sint institutæ, ad perficiendum hominem in quolibet ex his statibus. Monastica quidem ad eum perficiendum in primo statu, Oeconomica in secundo, & Politica in tertio. Cumque homo nonnisi in aliquo ex his tribus statibus considerari possit, consequens est disciplinam Moralem adæquatè diuidi in tres partes iam memoratas.

Verùm etsi hæc diuisio Philosophiæ Moralis communissimè sit inter Philosophos recepta, ea tamen à nonnullis recentioribus non probatur, qui contendunt in decem libris Ethicorum quos præ manibus habemus, non proponi præcepta Monasticæ ac solitariæ vitæ propria, sed tantum communia præcepta cuiuslibet hominis vitæ, atque omnibus viuendi modis accommodata; ita tamen ut nulli propria sint, Quod probant quia agitur in his libris de summo bono, non quidem solitariæ vitæ proprio, sed cuiuscunque communi; de Prudentia, de Iustitia, de Fortitudine, de Magnificencia, de liberalitate quæ virtutes hominum sunt in societate viuentium.

Respondeo 1. eos qui sic arguunt non satis

sibi constare, cum ex vna parte dicant, Ethicam quam tractamus, non nisi generalia præcepta ad mores in omnibus vitæ statibus informandos continere; ex alia verò doceant quæ ibi traduntur de plerisque virtutibus, spectare speciatim ad homines in societate viuentes.

Respondeo 2. etsi Aristoteles in libris Ethicorum tradat præcepta generalia morum, quæ omnibus viuendi modis accommodari possunt, id non impedire quin sufficienter docuerit modum quo quisque in seipso potest rectè institui, ita vt vir bonus euadat. Imò cum nemo possit verè esse aliis bonus qui sibi nequam sit, vel ideo debuit Aristoteles tradere præcepta specialia morum ad hominem secundum se spectantia, quòd ex professo docere intenderit, quæ ratione se homo gerere debeat in societate siue domestica, siue ciuili.

Respondeo 3. Quamuis fortè Aristoteles non adeo accuratè tres illos status distinxerit, inde non sequi diuisionem illam trimembrem Philosophiæ Moralis reprobendam esse; cum dubitari nequeat quin separatim possint tractari quæ spectant ad vitam hominis priuatam, sine ordine ad societatem vllam siue Oeconomicam, siue Politicam, quomodo de iis deinceps agemus.





LIBER I.

DE VLTIMO FINE hominis.

*Quia ultimus hominis finis est illius
fœlicitas, & summum bonum, hoc
libro agendum est in primis de bo-
no, ac de fine, ut quæ dicenda sunt
de humana beatitudine facilius per-
cipi possint.*

CAPVT PRIMVM.

DE BONO IN GENERE.

ARTICVLVS PRIMVS.

Quid sit bonum?



VERITVR I. quomodo bo-
num definiatur Respondeo Ari-
stotelem. i. Ethic. cap. i. doc-
re ex sententia veterum, bonum
illud esse, quod omnia appe-
tunt. Est autem difficultas de
quo bono id intelligatur. Nonnulli existimant

A vj

intelligi de summo bono, quod est Deus. Verum id perperam asseri ex ipso textu intelligitur: siquidem Aristoteles generatim pronunciat omnem artem, omnem dicendi viam seu methodum, omnem actionem, omnemque electionem seu consilium, bonum aliquod videri appetere, indeque colligit pulchrè veteres pronunciasse, bonum esse quod omnia appetunt; statimque subiicit, quoniam multæ sunt actiones; artes, & scientiæ, multos quoque esse fines ad quos illæ tendunt, ut medicinæ finis est bona valetudo, artis ædificandarum navium, navis; artis militaris, victoria; & œconomicæ, diuitiæ; & inter illos fines alios aliis esse præstantiores: opus enim est finis nobilior actione, & artium Architectonicarum fines sunt præstantiores finibus artium subiectarum, ut finis militaris est nobilior fine frænofactoriæ, vel equestris. Ista autem stare non possunt cum sententia prædicta, quæ asserit definitionem intelligi de omnium rerum tendentia ad Deum, qui est summum bonum, finisque ultimus rerum omnium.

Non negamus tamen quin aliquo sensu verum sit, res omnes appetere summum illud bonum, quia cum quælibet res naturaliter appetat suam propriam perfectionem, & omnis perfectio creaturæ sit quædam participatio perfectionis diuinæ, hinc fit ut quælibet res appetat implicitè & indirectè summum bonum. Quo sensu docet S. Thomas 1. 2. quæst. 1. art. 6. ultimum finem hoc modo se habere in mouendo appetitum, sicut se habet primum mouens in aliis motionibus, adeoque sicut causæ mouentes non mouent, nisi quatenus mouentur à primo mouente; sic secunda appetibilia non mo-

uere appetitum, nisi in ordine ad primum appetibile, quod est vltimus finis. Et art. 8. hominem, & alias creaturas rationales consequi vltimum finem, cognoscendo, & amando Deum; alias verò creaturas adipisci vltimum finem, in quantum participant aliquam similitudinem Dei, secundum quod sunt, vel viuunt, vel etiam cognoscunt. Quamuis autem hoc ita sit, non tamen eo sensu intelligenda est illa boni definitio à veteribus tradita, & ab Arist. probata, vt ostensum est.

Alij ergo existimant definitionem illam esse accipiendam de bono in communi, vt sensus sit, bonum est quod omnia appetunt, hoc est, bonum est ea rerum ratio & conditio, propter quam omne quod appetitur, appeti dicitur: si quidem ea est generalis conditio boni, quæ omnia ad se allicit, & trahit; singulæ verò rationes singulis rebus alliciendis sunt accommodatæ. Vnde dici posset definitionem prædictam comprehendere etiam bona omnia singularia: vt cum dicitur, bonum esse quod omnia appetunt, sensus sit, illud quod speciatim ab unaquaque re appetitur, esse bonum illius proprium & accommodatum.

Quo loco aduerte, prædictam definitionem plerumque iudicari imperfectam, etiam ab authoribus qui eam admittunt, quia non sumitur ab essentia boni, sed à quadam illius proprietate. Non enim ideo res est bona, quia appetitur, sed potius ideo appetitur, quia est bona; ac proinde appetibilitas supponit bonitatem, & consequitur illam: & quia res non appetitur nisi quia est conueniens, & accommodata appetenti, hinc fit vt ratio formalis & essentialis boni consistere videatur in conuenientia & congruitate. Quare bonum melius definitur, id

quod cuique conueniens est , quàm id quod omnia appetunt.

Dici tamen potest , etsi conuenientia spectet ad essentiam boni , & appetibilitas sit tantum quædam illius proprietas , prædictam definitionem non solum tradi per appetibilitatem , sed etiam aliquo modo per conuenientiam : quatenus illius sensus est , vt supra diximus , bonum esse id cuius ratione appetitur quidquid appetitur: hæc enim ratio nihil est aliud quàm cuiusque rei conuenientia. Verum fatendum est rationem conuenientiae clare non exprimi , & eatenus definitionem non esse satis accuratam.

Quæritur 2. An aliqua detur boni definitio accuratior præcedenti. Respondeo nonnullas posse afferri ex quibusdam antiquis Philosophis qui allatam reprobabant. Prima tribuitur Diogeni Stoico , qui dicebat id esse bonum , quod natura est absolutum ; seu quod est secundum naturæ perfectionem. Verum hæc definitio potius est perfecti quàm boni ; & si bono competit , non competit utili , aut iucundo quæ tamen inter bona ab omnibus peripateticis numerantur , sed tantum honesto , quia illa non semper sunt congrua naturali perfectioni hominis.

Secunda tribuitur Platoni dicenti , id bonum esse quod sibi satis est , nec aliud quippiam expetit , nec aliò refertur. Verum aut hæc definitio nulli bono creato competit , sed tantum Deo qui solus sibi sufficit , nec ad aliud refertur ; vel si quibusdam bonis creatis accommodatur , de utili saltem dici non potest , eo quod ad id respectu cuius est utile , tanquam ad finem refertur.

Tertia tribuitur Plotino , cum ait , bonum esse primi boni participationem , & delibationem :

at neque hæc probatur, tum quia non conuenit Deo, ac proinde non est generalis de omni bono; tum quia non magis explicat rationem boni, quam declararetur ratio substantiæ, vel quantitatis si quis diceret, hæc entia esse primi entis participationem. Itaque cum definitiones illæ, aliæque eiusmodi parum sint accuratæ, non est cur illas vulgari, quæ ante declarata est, præferamus. Pro cuius maiori intelligentia, nonnullæ obiectiones quæ contra illam virgeri possunt, proponendæ & diluendæ sunt.

ARTICVLVS II.

An verum sit, omnia bonum appetere.

QUæritur I. An verum sit omnia omnino bonum appetere. Et ratio dubitandi est, quia cum appetitus sequatur cognitionem, & cognitio non sit in rebus omnibus, ut in Plantis, lapidibus, &c. hinc consequens videtur non omnia simpliciter bonum appetere.

Respondeo in Plantis rebusque inanimatis non esse proprium & formalem appetitum, esse tamen in illis propensionem quandam naturalem qua inclinantur in proprium bonum, quæ à Philosophis appetitus innatus vocari solet: sic plantæ naturaliter appetunt loca pingua, & fecunda è quibus viginem sibi in alimentum aduocare possint; grauius deorsum tendunt, & leuius sursum, quia eiusmodi loca ad eorum conseruationem magis sunt accommodata.

Quod si istes, bonum esse obiectum voluntatis, quæ autem intellectu carent, carere etiam voluntate, adeoque non posse ferri in bonum, cum nihil possit ferri extra obiectum

suum. Respondeo cum S. Thoma I. 2. quæst. 1. art. 2. ad 3. obiectum voluntatis esse bonum & finem in vniuersali, adeoque non posse esse voluntatem in iis quæ carent ratione & intellectu, cum non possint apprehendere vniuersale, sed esse in illis appetitum naturalem, vel sensitium, determinatum ad aliquod bonum particulare.

Quæritur 2. An intellectu & voluntate prædita bonum semper appetant. Et ratio dubitandi est, primò quia interdum videntur appetere malum, vt cum quis sibi mortem consciscit. Respondeo hoc argumento tantum probari, appetitum ferri interdum in rem quæ mala est, non tamen in eam ferri sub ratione mali, sed sub specie boni; quia nemo intendens ad malum operatur, vt docent vulgò Theologi ex Dionysio. Vnde cum vita humana multis malis sit obnoxia, qui vt iis se liberent, sibi manus inferunt, id agunt sub specie boni: quia existimant melius esse & optabilius vita carere, quam vitam ducere miseram & acerbam. Quo referri potest illud Christi de Iuda Matth. 16. *Bonum erat ei si natus non fuisset homo ille.* Accedit quod ille non tam videtur actus amoris & prosecutionis, quam actus odii & fugæ: at quamuis appetitus non feratur in malum vt malum, actu amoris & prosecutionis, in illud tamen vt sic fertur actu odii & fugæ.

Secundò contrariorum appetituum obiecta sunt contraria, at constat dari non modo in diuersis subiectis, sed etiam in eodem, diuerso tempore, contrarios appetitus: ergo eorum obiecta sunt contraria, adeoque si vnus fertur in bonum, alius in malum ferri debet. Respondeo hoc posterius non sequi, quia quando duo appetunt obiecta opposita, quodlibet suum appe-

sit ut est illi accommodatum, adeoque sub ratione boni: quomodo viatores cœlum serenum exposcunt, quo tempore olitores nubilum exoptant. Quando verò idem nunc respuit quod alias auidè exoptabat, hoc ideo fit, quia ob diversas circumstantias res aliter apparet quàm antea; ut in verè pœnitentibus contingit; qui tanquam ingens malum respuunt vitæ huius illecebras & voluptates, quas antea summi boni loco habebant.

Tertiò, ex duobus bonis inæqualibus propositis potest voluntas illud amplecti quod minus est bonum, neglecto maiori, ut infra dicitur, ergo potest voluntas amplecti malum ut sic. Sequela patet, quia minus bonum comparatione maioris habet quandam rationem mali. Respondeo negando consequentiam, & ad illius probationem dico, voluntatem ferri in minus bonum, non quatenus dicit malum, seu priuationem maioris boni, sed quatenus in se vere bonum est & amore dignum.

Quartò, nonne potest voluntas vel ad experiendam suam libertatem, ferri in malum quatenus malum? Respondeo non posse, quia voluntas non potest exercere suam libertatem, nisi circa proprium obiectum, quod non est malum, sed bonum duntaxat. Et quamvis posset, hoc ipsum libertatis exercitium esset aliquod bonum, sub cuius specie malum illud amplecteretur.

Instabis, si voluntas non posset ferri in malum necessariò amplecteretur bonum, adeoque non liberè, nec meritoriè. Respondeo voluntatem amplecti bonum necessariò quoad specificationem, ut aiunt, quatenus non potest illud ut sic odisse, non tamen quoad exercitium, quia potest illud non amare, & hoc ad libertatem

adeoque ad meritum sufficit, vt ex infra dicendis, vbi de libertate, clariùs percipietur.

ARTICVLVS III.

Quotuplex sit bonum.

Bonum variis modis diuidi solet, sed tribus præcipue. In primis bonum aliud est Metaphysicum seu transcendens, aliud Physicum seu naturale, aliud Morale. Bonum transcendens illud dicitur, quod conuenit enti, vt ens est: omne enim ens est bonum, sicut & vnum, & rerum, vt diximus in Metaphysica; adeoque bonum sub ea ratione æquè latè patet ac ens, eoque magis bonitas competit rei, quò meliùs & perfectiùs rationem entis participat.

Bonum Physicum seu naturale dicitur, quod naturis rerum congruit, vt sunt facultates à natura inditæ siue rebus inanimatis, siue animatis, iisque aut anima tantum vegetante, aut sentiente, aut rationali præditis. Hæc enim omnia sunt entia Physica & naturalia, adeoque bonitatem naturalem, iuxta cuiusque naturam, & conditionem participant.

Bonum verò Morale solis rebus intellectuales competit, quatenus per voluntatem liberè operantur iuxta regulas rectæ rationis: hinc enim fit vt actiones ex his principiis procedentes, dicantur bonæ moraliter, & obiecta in quæ tales actus tendunt, dicantur moraliter bonæ; & habitus per eos producti dicantur moraliter boni.

Quo loco aduerte 1. bonitatem naturalem non videri distinctam à transcendentali, nisi quoad voces: cum bonitas quæ dicitur trans-

cendentalis, nihil aliud sit quàm bonitas quæ rebus omnibus est naturalis.

Aduerte 2. bonitatem Moralem distingui à transcendentali seu naturali, vt ex eo patet, quod bonitas transcendentalis est ex principio naturali, adeoque est ex se inuariabilis; at verò bonitas Moralis pendet à libertate, & innumeris modis mutari potest. Vnde etsi homo eadem semper bonitate transcendentali seu naturali præditus sit, non tamen eadem semper bonitas Moralis in eo reperitur, vt nimis perspicuum est.

Secundò bonum diuiditur in honestum, iucundum, & vtile: honestum est quod propter se est expetibile; iucundum quod expetitur propter voluptatem aliquam, & quietem quæ ex illius adeptione oritur; vtile verò quod non expetitur nisi ob aliquem finem per illud assequendum. In primo genere est virtus, quæ propter seipsam est amabilis; in secundo ea quæ delectationem aliquam sensibus afferunt; in tertio medicina, quæ tantum propter sanitatem appetitur, & alia quæcunque quæ vt media assumuntur ad finem aliquem consequendum.

Est autem obseruandum 1. quod etsi hæc diuisio possit competere bono communissime sumpto, ita vt quidquid appetitur propter se, dicatur bonum honestum; quidquid ob delectationem quam affert, dicatur bonum iucundum; quidquid vt conducit ad aliud, dicatur bonum vtile, siue rationes illæ ab appetente cognoscantur, siue non: negari tamen non potest, quin ea magis propriè sit diuisio boni humani, seu quod ab homine appeti potest, cum ille cognoscat bonum non solum materialiter, sed etiam formaliter, sub triplici illa ratione honesti, iucundi, & vtilis; & ex ea cognitione mo-

ueatur ad appetendum quod ipsi magis arridet.

Obseruandum 2. ex S. Thoma 1. p. quæst. 5. art. 6. ad 2. diuisionem prædictam non esse per oppositas res, sed per oppositas rationes; ita scilicet ut rationes illæ honesti, iucundi, & vtilis possint eidem rei competere, ut patet in amore Dei: ille enim secundum se est honestus, & etiam seclusa quacunque mercedis cogitatione, appetibilis; habet adiunctam maximam delectationem, estque medium ad æternam felicitatem comparandam valde idoneum. Propriè tamen, ut monet Sanctus Doctor, ea dicuntur delectabilia, quæ sola voluptate trahunt, cum alioqui sint inhonesta, & noxia, adeoque potius mala, quam bona dicenda sint: vtilia quæ non habent in se honestatem, vel delectationem vnde desiderentur, sed appetuntur solum ut ducunt ad consecutionem alterius, qualis est sumptio medicinæ amaræ: honesta vero quæ in seipsis habent vnde secundum rectam rationem desiderentur.

Obseruandum 3. bona quæ in creatis vocamus honesta, non ita propter se appeti, ut non liceat ea propter aliud appetere: cum enim omnia bona creata ad Deum, ut ad vltimum finem ordinentur, propter illum honestè appeti possunt; imò rationi valde consentaneum est, ut omnis humana appetitio in eum finem tendat: contra verò Deus ut summum bonum, ita est appetibilis, ut etsi eum appetere liceat non modo sub ratione boni honesti, sed etiam sub ratione boni delectabilis, quia beatos ingenti voluptate perfundit; ex communi tamen sententia nefas est eum appetere sub ratione boni vtilis, quia cum ipse sit vltimus rerum omnium finis, repugnat quod possit esse medium ad bonum aliquod ipso perfectius assequendum.

Verum etsi hoc sensu non liceat Deum amare tanquam medium, si tamen medium spectetur quatenus est causa efficiens & productiva finis honesti, non videtur nonnullis sic illicitum Deum appetere, sub ratione boni utilis seu medij; ut dum quis gaudet de existentia Dei, quatenus ab illo accipit vitam, sanitatem, aliaque bona siue corpora, siue spiritualia. Nam ex hypothese quod eiusmodi bona licite amantur, non apparet inquirant, cur non liceat Deum amare quatenus illa tribuit, & conseruat; adeoque sub ratione medij, & boni utilis.

Tertio bonum ita diuiditur ut alia sint bona animi, alia corporis, alia ab extrinseco adueniant: bona animi sunt virtutes. & operationes ex iis manantes; bona corporis sunt sanitas, robur, pulchritudo, &c. externa, quae etiam vulgo bona fortunae appellantur, sunt diuitiae, honor, bona existimatio, amici, &c. Inter haec autem bona duo sunt discrimina, alterum quod a virtute simpliciter boni denominamur, & sumus; non autem ab aliis bonis, siue internis, siue externis. Alterum quod aliis bonis inuiti spoliari possumus, virtus autem a nobis inuitis tolli non potest, iuxta verba illa luculentissima Augustini ser. 12. de Verbis Domini: *Potes aurum perdere & nolens, potes domum, potes honores, potes ipsam carnis salutem: bonum vero quo vere bonus es, nec inuitus accipis, nec inuitus amittis.* Neque id mirum videri debet, cum inter praedicta bona ea sola quae animi dicuntur proprie nostra sint, ut pote nostris laboribus comparata.





CAPVT II.

DE FINE.

ARTICVLVS PRIMVS.

*Quid sit finis, & quomodo se habeat
ad bonum.*

QUÆRITVR I. quid sit finis. Respon-
deo nomen finis esse valde ambiguum,
multaque significare. Interdum enim
idem est ac terminus, quomodo dicimus mor-
tem esse finem vitæ: aliàs significat rei abso-
lutionem, quo sensu dicimus domum esse fini-
tam, id est absolutam; nonnunquam sumitur
pro integra rei ad vsum spectantis v. c. tritici,
aut vini, consumptione; vt plurimum verò sal-
tem apud Philosophos, finis dicitur id quo mo-
uetur agens ad operandum; quo sensu finis de-
finiri solet, *id cuius gratia aliquid fit*, quomodo
sumptionis medicinæ finis est sanitas, eò quòd
æger consequendæ sanitatis gratia potionem
sumit: vt autem hoc clariùs percipiatur,

Quæritur 2. an finis exercent causalitatem
suam circa actum voluntatis quo intenditur &
amatur, an verò tantum circa electionem me-
diorum. Nonnulli existimant non nisi electio-
nem mediorum causari à fine; sed oppositum
verius est, quia id omne causatur à fine quod
fit propter finem; atqui actus quo intenditur
& amatur finis, fit propter finem, ergo talis

actus à fine causatur. Maior perspicua est: probatur minor, quia dubium non est quin actus ille quo intendo sanitatem, & cuius vi sumo medicinam, excitetur in me à bonitate præconcepta ipsius sanitatis: ergo etiam dubium non est quin actus ille fiat propter sanitatem, adeoque ab illa causetur. Confirmatur, quia quidquid habet causam efficientem habet finem, cum causa efficiens non operetur nisi propter finem aliquem; atqui actio de qua agimus, habet causam efficientem, ergo & finem habet; cum nempe qui proximè intenditur & amatur, cum alius assignari nequeat.

Deinde si electio mediorum causatur à fine, certè à fortiori ipse amor & intentio finis ab ipso fine causari debet: at verum prius, ergo & posterius: sequela maioris probatur, quia cum non eligam media, nisi quia finem amo & intendo, sic intentio & amor finis non causaretur à fine; multo minus ab eo causaretur electio mediorum.

Obiicies, finis est id cuius gratia aliquid fit, quibus verbis denotatur tantum causalitas finis, respectu mediorum quæ propter illum eliguntur. Verum id gratis dicitur, quia non tantum electio mediorum, sed etiam ipsa finis intentio est gratia finis: sicut enim eligo medicinam propter sanitatem, ita amo sanitatem propter ipsam.

Instabis, finis est tantum causa illius quod ex eius amore fit, atqui amor finis non causatur ex illius amore, quia sic idem esset causa sui ipsius, vel daretur progressus infinitus inter amores finis: ergo finis non est causa amoris sui, sed tantum mediorum quæ ex illius amore fiunt. Respondeo maiorem falsam esse, est enim finis id cuius gratia aliquid fit: at non

tantum media fiunt gratia finis, sed etiam ipse amor finis; cum à bonitate finis præconcepta excitetur, ut dictum est.

Queritur 3. quænam sit ratio seu vis causandi in fine. Respondeo finem causare sub ratione boni & conuenientis: si enim quæras cur amem sanitatem, eamque per media proportionata obtinere velim, rationem statim afferam, quia sanitas est mihi bona & conueniens; adeoque ratio causandi finis est conuenientia, & bonitas quæ in illo apprehenditur. Confirmatur, nam finis causat quatenus ad se voluntatem allicit, & trahit: at nihil nisi bonum potest ad se voluntatem allicere, & trahere, ut patet ex dictis: quare finis causat tantum quatenus est bonus, ac proinde vis & ratio causandi in fine est illius bonitas.

Quo loco aduerte 1. cum voluntas non feratur in incognitum, eam non trahi à fine nisi apprehendatur sub ratione boni; ita ut cognitio boni sit conditio sine qua bonum in fine inclusum non causaret.

Aduerte 2. iuxta nonnullos, esse cognitum non modò esse conditionem necessariam ad causandum in fine. sed etiam spectare ad illius rationem causandi: cuius oppositum ex Metaphysica colligi potest, ubi ostendimus finem non causare secundum esse intentionale quod habet in mente, sed secundum esse reale quod in se habere potest. vel reipsa, vel iuxta nostram apprehensionem,

Aduerte 3. hoc intelligi de fine à cognitione distincto, ut dum quis appetit diuitias, vel sanitatem. Nam quando appetitur tantum alicuius rei cognitio, ut cum Philosophus naturam Solis, aut Lunæ inuestigat, tunc esse cognitum est obiectum voluntatis, eam mouens ad sui
amorem

amorem sub ratione boni, & conuenientis; sicque non est mera conditio ad causandum necessaria, sed perrinet ad ipsam rationem mouendi & causandi finaliter.

Quæritur 4. an ratio causandi finis cuilibet bono competat. Respondeo 1. dubium non esse quin ratio illa bono honesto, & delectabili conueniat. Priori quidem, quia bonum honestum per se est expetibile, & alia propter illum, adeoque ratio causandi finis illi maximè competit. Posteriori etiam, nam & quod delectabile est propter se appetitur, & alia propter ipsum, vt vel ipsa experientia ostendit. Est autem difficultas de tertia specie boni, quod vtile appellatur, pro quo

Respondeo 2. rationem causandi finis non competere bono utili, vt sic. Ratio est, quia illud tantum mouet voluntatem per modum causæ finalis, quod ratione sui expetitur, & non propter aliud: at medium vt sic, non expetitur ratione sui, sed tantum ratione alterius, nempe finis. Ergo medium vt medium, non mouet voluntatem per modum causæ finalis. Loquor de medio, vt medium est, nam si res illa quæ sub vno respectu est medium ad finem, sit in se sub alio respectu appetibilis, & alia propter ipsam, sic poterit habere rationem boni honesti, aut delectabilis, eoque titulo rationem finis obtinere: verum hoc se habet per accidens ad rationem formalem mediij, vt perspicuum est.

Dices, illud habet rationem finis, quod appetitur ob bonitatem & conuenientiam intrinsecam, & propriam quam habet: atqui medium appetitur ob bonitatem & conuenientiam intrinsecam & propriam quam habet, ergo medium habet rationem finis. Nonnulli negant minorem, existimantes, medium non appeti nisi

extrinsecè ratione finis, eo modo quo paries denominatur tantùm extrinsecè visus, quia est subiectum albedinis, ad quam solam visio terminatur. Verùm hæc responsio non placet, quia in ipso medio est quædam bonitas & conuenientia, ratione cuius terminat actum voluntatis: æger enim vult potionem, eamque eligit propter intrinsecam conuenientiam quam habet cum sanitate: & quamuis eam nolit nisi quatenus ad sanitatem conducit, eam tamen vult quia in se includit vim productiuam sanitatis; quo fit vt cùm plura suppetunt media ad eundem finem assequendum, voluntas illud eligat quod vtilius & congruentius iudicatur ad consecutionem finis intenti. Itaque concessa minori

Major distinguenda est, non enim sufficit ad rationem finis, quod aliquid appetatur ob bonitatem & conuenientiam intrinsecam quam habet, nisi appetitus ibi sistat: at quando appetitur medium ob bonitatem & conuenientiam quam habet appetitus ibi non sistit, cùm medium non appetatur propter se, sed ratione finis, eo quod per se non habet conuenientiam cum appetitu, sed cum fine. Quare medium non habet rationem finis, etsi appetitus in illud feratur, & bonitatem illius attingat.

Hinc autem collige 1. bonum & finem non reciprocari, quia etsi quilibet finis sit bonus, non tamen quodlibet bonum est finis: siquidem bonum vtile inter bona constituitur, sed non induit rationem finis, cùm non propter se, sed propter aliud expetatur.

Collige 2. finem non esse obiectum adæquatum voluntatis terminatiuum & materiale, cùm voluntas feratur etiam circa media: esse tamen adæquatum illius obiectum motiuum

& formale, cum finem velit propter se, & media propter finem, adeoque finis sit illi vnica & æquata ratio volendi.

ARTICVLVS II.

Quotuplex sit finis.

Variæ tradi solent finis diuisiones: prima est in finem cui, & finem cuius gratia: finis cui est persona in cuius commodum aliquid fit, vt æger est finis cui medicinæ: finis verò cuius gratia est id ad quod comparandum aliquid fit, vt sanitas est finis cuius gratia, respectu eiusdem medicinæ.

Vbi aduerte, finem cuius gratia à nonnullis vocari finem qui, quia est id quod expetitur, illudque poni discrimen inter finem cui, & finem qui, quod finis qui amatur amore concupiscentiæ, quia amatur alteri; finis vero cui amore amicitiae seu beneuolentiæ, quia propter se diligitur.

Secunda est in finem qui in sola actione consistit, vt saltatio, cytharizatio, &c. & in eum qui aliquod opus externum relinquit post actionem vt scriptio, domus constructio, &c. Circa hanc autem diuisionem

Notandum 1. ex Arist. 1. Ethic. cap. 1. quorum sunt fines aliqui præter actiones, in iis meliora esse & præstantiora actionibus opera; vt domus constructa est quid nobilius constructione, sicut res genita est perfectior generatione.

Notandum 2. opus hic ab Aristotele non conferri cum qualibet actione, sed tantum cum ea per quam fit, & quæ ipsum antecedit: si enim quæstio sit de actione opus consequente, ea est

nobilior opere, cum sit illius finis: ut et si domus sit melior ædificatione, est tamen minus præstans habitatione, & ab iniuriis aëris defensione, quæ est finis illius.

Tertia est in finem operis, & finem operantis: finis operis ille est in quem opus ipsum per se tendit, ut habitatio respectu constructionis domus: finis verò operantis ille dicitur quem operans pro arbitrio sibi præstituit, ut lucrum respectu Architecti.

Quarta est in finem obtinendum, & faciendum: finis obtinendus ille est qui consistit in re aliqua iam existente, cuius acquisitio intenditur, ut pecunia: faciendus verò ille dicitur qui acquiri non potest nisi producat, ut sanitas.

Quinta est in finem proximum seu intermedium, & remotum seu ultimum: finis proximus ille est propter quem proximè quidem operamur, sed non ultimatè: ut cum quis ludit ex intentione proxima lucrandi pecunias, & remotè equum ex lucro emendi; remotus verò ille est in quo appetitio terminatur.

Sexta est in finem ultimum secundum quid, seu in certo genere, & finem ultimum simpliciter, seu in omni genere: ultimus secundum quid ille est ad quem aliqua actio ultimatè tendit, ut cum studium refertur tantum ad acquirendam scientiam; ultimus verò simpliciter est beatitudo, ad quam omnia alia referuntur, cum ipsa aliò non referatur.

Septima in finem ultimum materiale, & formalem: materialis est res quæ appetitur, ut diuitiæ, voluptates, &c. formalis verò est ipsa communis & formalis ratio ultimi finis.

Octava est in finem obiectiuum, & formalem; obiectiuus est id quod nostræ appetitioni obicitur, ut pecunia, voluptates, Deus: forma-

lis verò est actio nostra, qua tale obiectum attingimus, vt possessio pecuniæ, voluptatum fructio, Dei visio. Atque ad finem formalem referri potest distinctio finis quam nonnulli tradunt, in finem qui, & finem quo, quorum prior significat rem quæ alicui amatur, iuxta antedicta; posterior verò illius vnionem cum persona quæ amatur: quo sensu visio beatifica est finis qui, illius verò vnio cum intellectu, finis quo.

Vbi nota 1. ex Arist. loco citato, in rebus humanis multos esse & varios fines, vt medicinæ valetudo, militaris victoria, &c. inter eos esse tamen aliquam subordinationem, ita vt alij sub aliis contineantur, vt artis conficiendi frenos finis continetur sub fine equestris, & huius finis sub fine militaris: & ita in aliis artibus & facultatibus.

Nota 2. inter eos fines illud esse discrimen, quòd fines artium Architectonicarum seu imperantium sunt præstantiores finibus artium his subiectarum, vt finis equestris est nobilior fine frenofactiæ, & finis militaris vtriusque fine; eò quòd id quod ignobilius est refertur, & ordinatur ad id quod est perfectius, non vice versa.

Nota 3. his non obstare quòd interdum finis artis superioris sit actio, & inferioris opus, vt equestris finis est equi agitatio, frenofacturæ verò opus: quod enim ante dictum est, opus esse finem præstantiorem actione, id de opere quod eandem actionem sequitur intelligi debet, vt ante monuimus. Quare id non impedit quin finis equestris sit nobilior fine frenofacturæ, cum hic ad illum ordinetur.

ARTICVLVS III.

An omnia operentur propter finem.

QUæritur 1. An homini conueniat agere propter finem. Respondet S. Thomas 1. 2. quæst. 1. art. 1. affirmatiuè, quod probat tum quia omnia quæ sunt in aliquo genere, deriuantur à principio illius generis: sed finis est principium in operabilibus ab homine, vt patet per Philosophum 2. Physicorum; ergo homini conuenit omnia agere propter finem. Tum quia omnes actiones quæ procedunt ab aliqua potentia, causantur ab ea secundum rationem sui obiecti; obiectum autem voluntatis est finis, & bonum, vnde oportet quod omnes actiones humanæ sint propter finem.

Vbi nota 1. S. Thomam non concludere omnes actiones humanas esse propter finem, quod putet rationes quas hominis vocat, non esse propter finem: perspicuū enim est eas etiam ad finem ordinari, cum ne quidem brutorum, & inanimatorum operationes fine careant, vt ex illo postea referemus; sed quia illæ præsertim ad finem diriguntur, quatenus sunt ex præcognitione finis, non tantum materialiter, sed etiam formaliter spectati, & ex libero illius amore. Vnde in resp. ad 3. ait actiones indeliberatas, quia non procedunt ex deliberatione rationis, sed ex imaginatione, habere finem imaginatum, non per rationem præstitutum.

Nota 2. non immerito finem dici principium in operabilibus, cum sit omnium causarum prima; siquidem causa efficiens aliquem finem necessario sua operatione intendit, quia vt ait S. Doctor art. 2. si agens non esset determina-

tum ad aliquem effectum, non magis ageret hoc quam illud: ad hoc ergo vt determinatum effectum producat, necesse est vt determinetur ad aliquid certum, quod habet rationem finis. Quare si non esset causa finalis ad agendum efficiens, nulla esset causa efficiens: ablata autem causa efficiente deficeret causa formalis, cum hæc ab efficiente produci debeat ex materia; & si causa formalis non esset, nulla opus esset materia, cum hæc non nisi propter formam sit.

Nota 3. ex resp. ad 2. actionem aliquam dupliciter dici voluntariam, primò quia imperatur à voluntate, vt ambulare, vel loqui; secundo quia elicitur à voluntate, sicut ipsum velle: actum autem elicitum à voluntate non posse esse vltimum finem, quia obiectum voluntatis est finis, sicut obiectum visus est color. Vnde sicut impossibile est quod primum visibile sit ipsum videre, quia omne videre est alicuius obiecti visibilis; ita impossibile est quod primum appetibile, quod est finis, sit ipsum velle. Quare si qua actio humana est vltimus finis, ea debet esse imperata à voluntate, sicque ibi ipsum velle est propter finem. Ex quo colligit S. Doctor quidquid homo faciat, verum esse dicere quod homo agat propter finem, etiam agendo actionem quæ est vltimus finis.

Queritur 2. an etiam irrationalia agant propter finem. Respondeo affirmatiue cum eodem S. Doctore ibid. art. 2. vbi concludit, omnia agentia agere propter finem, idque probat tum ex 2. Physic. vbi Philosophus ait, quod non solum intellectus, sed etiam natura agit propter finem: tum quia cum finis sit prima causa, ea deficiente omnes aliæ deficerent, vt iam dictum est.

Obseruat tamen aliquid sua actione vel

motu tendere in finem dupliciter, primò sicut seipsum ad finem mouens, vt homo; secundò sicut ab alio motum ad finem, ad eum modum quo sagitta mouetur & dirigitur ad determinatum finem à sagittante: illudque esse discrimen inter rationalia, & ratione carentia, quòd illa se mouent ad finem, quia habent dominium suorum actuum per liberum arbitrium, hæc verò tendunt in finem per naturalem inclinationem, tanquam ab alio mota, non autem à seipsis, cum non cognoscant rationem finis; & ideo nihil in finem ordinare possint, sed solum in finem ab alio diriguntur, siue in finem apprehensum vt bruta animalia; siue in finem non apprehensum, sicut ea quæ omnino cognitione carent.

Quo loco aduerte 1. quod ait S. Thomas bruta non se mouere in finem, non ita debere intelligi vt actiue & sponte non se moueant ad finem, sed ita vt non se moueant ad illum libere, seu cum potestate cohibendi actum: hoc enim est proprium creaturæ rationalis & liberæ.

Aduerte 2. finem duobus modis spectari posse, primò materialiter, seu secundum entitatem quam habet; secundò formaliter, seu sub ratione finis, quomodo spectatur quatenus per talia media proportionata acquiri potest. Cum autem S. Doctor ait bruta non cognoscere rationem finis, id intelligendum est de fine formaliter spectato, quia bruta non cognoscunt ordinem & proportionem quam habent media ad finem; hoc enim non fit nisi comparando media cum fine, quod opus est rationis. Verum

Aduerte 3. cum sæpe bruta assumant media ad finem assequendum necessaria, vt quando aues paleas colligunt ad nidum construendum, negari non posse quin tunc assumendo eiusmodi media, cogitent de fine, vt aperte colligitur

ex S. Doctore 1. p. quæst. 78. art. 4. vbi docet primò, ad vitam animalis perfecti requiri vt non modo apprehendat rem præsentem, sed etiam absentem; quia alioqui cum animalis motus & actio sequantur apprehensionem, non moueretur animal ad quærendum aliquid absens, cuius contrarium apparet maxime in animalibus perfectis, quæ mouentur motu progressiuo; ea enim mouentur ad aliquid absens apprehensum.

Docet secundò, necessarium esse animali vt quærat aliqua vel fugiat, non solum quæ sunt conuenientia vel non conuenientia ad sentiendum, sed etiam propter aliquas alias utilitates vel nocumenta; sicut ovis videns lupum venientem fugit, non propter indecentiam coloris, vel figuræ, sed quasi inimicum naturæ; & similiter auis colligit paleam, non quia delectet sensum, sed quia est utilis ad nidificandum.

Ne autem quis putet hoc fieri per collationem vnius cum alio, addit S. Thomas quantum quidem ad formas sensibiles, seu quæ sensu percipiuntur, non esse discrimen inter hominem & alia animalia, quia similiter immutantur à sensibilibus exterioribus; sed quantum ad intentiones illas quæ sensu non percipiuntur, esse differentiam; nam alia animalia eas solum percipiunt naturali quodam instinctu, homo autem per quandam collationem.

Quæritur 3. an Deus operetur propter finem. Respondeo cum distinctione, nam in operatione Dei duo sunt considerata, nempe ipse actus internus diuinæ voluntatis, & opus externum ab eo procedens: si agatur de opere externo, certum est illud tendere vltimò ad Deum, vt ad causam suam finalem, siquidem vt habetur Prouerb. 16. *Vniuersa propter semetipsum operatus est Dominus.*

Si verò quæstio sit de actu Dei interno, sic duo statuenda sunt, primò Deum non agere propter finem, vt finis sumi solet pro causa, ea-que ab efficiente realiter distincta: perspicuum enim est volitionem Dei esse Deum ipsum, adeoque posse illius esse causam propriè dictam.

Secundò Deum improprie agere propter finem, siquidem Deus vt volens & agens distinguitur virtualiter à seipso vt est summe bonus, quomodo habet rationem finis: quare etsi bonitas Dei non sit causa realis volitionis diuinæ, dici tamen potest ratio & causa virtualis illius; ad eum modum quo omnes Theologi fatentur, immutabilitatem esse rationem & causam virtua-lem æternitatis in Deo.

ARTICVLVS IV.

De ultimo fine.

QUÆRITUR I. an detur aliquis finis vltimus humanarum actionum. Respondeo cum distinctione, nam duplici sensu dici potest esse finem aliquem vltimum humanarum actionum, primò ita vt in qualibet serie actionum assignari possit aliquis finis vltra quem non tendatur, qui dicitur vltimus negatiuè. Secundò ita vt omnes omnino actiones, cuiuscunque generis sint, referantur ad eundem finem vltimum, qui proinde sit vltimus positiuè.

Si agatur de fine vltimo priori modo, certum est dari finem vltimum humanarum actionum; ratio est, quia cum finis sit prima causa à qua appetitus agentis excitari debet, si nullus esset finis vltimus actionum, in quo hominis intentio quiesceret, neque homo aliquid appeteret, ne-

que actio vlla ab eo manaret. Cùm ergo homo multa appetat, & ex appetitione alicuius rei operari incipiat, hinc manifestum est in qualibet serie actionum sibi esse propositum finem aliquem vltimum, vltra quem non tendit. Confirmatur, nam experientia, satis ostendit nos, quoties operamur, in infinitum non excurrere, appetendo vnam rem propter aliam, sed ex aliquo certo fine proposito, in quo nostra intentio sistit, ad opus procedere, v. c. potionem sumere ex intentione consequendæ sanitatis.

Si verò quæstio procedat de fine vltimo, in sensu posteriori, distinguendum est: nam finis vltimus sumi potest vel materialiter, vel formaliter, vt supra explicatum est: si sumatur materialiter, sic certum est omnes hominis actiones non tendere ad eundem finem vltimum, cùm non modo distincti homines, sed etiam idem homo diuersos eiusmodi fines, saltem successiue habere possit, vt contingit cùm quis è statu peccati mortalis emergit, in quo creaturam pro fine vltimo aliquatenus habebat, & transit ad statum gratiæ, in quo elicit varios actus bonos quos refert in Deum, qui verus est & vltimus rerum omnium finis.

Si autem finis vltimus sumatur formaliter, sic dicendum est actiones humanas ad illum non quidem actu formali & explicito, sed virtualiter & implicite referri: ratio est, quia cùm homo nunquam operetur nisi vt bonum aliquod comparet, & bona quælibet particularia sint quidam effluxus & participationes summi boni, quod est vltimus finis, rectè dici potest hominem quoties operatur, saltem implicite operari propter vltimum finem, spectatum sub ea generali & confusa ratione summi boni seu beatitudinis. Quod autem non semper explicitè,

quoties operatur, de eo fine cogitet, id vel ipsa experientia compertissimum est.

Quæritur 2. an homo possit operari propter plures fines ultimos. Respódeo negativè, quod probatur ex S. Thoma 1. 2. quæst. 1. art. 5. quia cum vnumquodque appetat suam perfectionem, illud appetit aliquis vt ultimum finem, quod appetit vt bonum perfectum, & completium sui ipsius; quare de ratione ultimi finis est vt ita impleat totum hominis appetitum, quòd nihil extra ipsum appetendum relinquatur: sic autem perspicuum est non posse plures fines ultimos eidem homini simul esse propósitos, cum repugnet appetitum in re aliqua quiescere, vt nihil aliud expetat, & simul illum rem aliam expetere.

Obiicies 1. homo potest simul in pluribus rebus ultimum finem constituere, vt si quis putet beatitudinem in bonis animi, corporis, & fortunæ simul sumptis positam esse; adeoque non repugnat quòd quis propter plures fines optimos operetur. Verùm id non sequitur, quia aliud est quòd plures res simul concurrant ad vnum finem ultimum integrandum, aliud quòd quis simul plures & adæquatos ultimos fines habeat; hoc autem posterius non euincitur ea obiectione, sed tantum illud prius, quod à nobis minime negatur.

Obiicies 2. mortaliter peccans auertitur à Deo vt ab ultimo fine, & conuertitur ad creaturam tanquam ad ultimum finem: fieri autem potest vt homo committat plura peccata mortalia circa materias diuersas; ergo & vt plures fines ultimos extra Deum sibi constituat. Minor probatione non indiget, maior autem suadetur, quia eo ipso quòd homo peccat mortaliter, creaturam plus diligit quàm Deum, cuius

amicitiam spernit, & præceptum violat; adeoque cum creatura sit ipsi loco Dei, vt grauitè monet Apostolus 3. ad Philippenſes verbis illis, *Quorum Deus venter eſt*, hinc fit vt etſi non actu formali & expreſſo, virtualiter tamen finem vltimum in creatura ſibi conſtituere cenſeatur.

Reſpondeo totum hoc argumentum à nobis admitti; non enim negamus quin homo ſucceſſiue plures fines vltimos ſibi conſtituere poſſit, aut ſimul vnum ex pluribus rebus conſtantem; hoc autem tantum eo argumento concluditur, quia ſi homo diuerſa peccata mortalia ſucceſſiue committit, hinc ſolum ſequitur eum ſucceſſiue habere plures vltimos fines indebitos: ſi verò ſupponas eum ſimul plura diuerſi generis peccata patrare, inde ad ſummum euinces, eum ferri eodem tempore circa plures partes eiufdem finis totalis & adæquati.

Quæritur 3. an idem ſit rerum omnium finis vltimus. Reſpondeo 1. omnes homines habere eundem finem vltimum generatim, & formaliter ſpectatum, non verò ſpeciatiim, & materialiter. Probatur, omnes enim in eo conueniunt, quod appetant ſuam vltimam perfectionem; & velint eſſe felices: verum alij in honoribus, alij in diuitiis, alij in voluptatibus, alij in rebus aliis ſuum vltimum finem conſtituunt; ſicut & omni guſtui, inquit Doctor Angelicus 1. 2. quæſt. 1. art. 7. delectabile eſt dulce, ſed quibuſdam maximè delectabilis eſt dulcedo vini, quibuſdam dulcedo mellis, aut alicuius talium, illud tamen dulce oportet ſimpliciter eſſe melius delectabile, in quo maximè delectatur qui habet optimum guſtum; & ſimiliter illud bonum oportet eſſe completiſſimum, quod tanquam vltimum finem appetit habens affectum bene diſpoſitum. Itaille.

Respondeo 2 eundem esse hominis, & aliarum creaturarum finem vltimum, quantum ad rem, non autem quantum ad consequutionem, & adeptionem. Prior pars probatur, nam Deus est verus finis vltimus non modo hominum, sed etiam aliarum omnium creaturarum; cum vniuersa propter semetipsum operatus sit Dominus, vt supra aduertimus.

Posterior pars ostenditur, nam homo consequitur suum finem vltimum per cognitionem, & amorem Dei: at creaturæ irrationales eo modo Deo coniungi non possunt, ac proinde nec beatæ dicuntur, sed eatenus suum finem consequi censentur, quatenus participant aliquam similitudinem Dei, secundum quod sunt vel viuunt, vel etiam cognoscunt, vt egregiè obseruat S. Thomas quæst. citata art. 8. sicque per alias & alias perfectiones quibus præditæ sunt, sui creatoris potentiam, sapientiam & bonitatem infinitam vtcunque manifestant, ob quem maximè finem creatæ sunt.



CAPVT III.

DE BEATITVDINE

hominis obie&tiua.

ARTICVLVS PRIMVS.

Refertur sententia Aristotelis de hac re.

ARISTOTELES lib. I. Ethic. cap. 5. docet tres esse magis insignes & notas vitæ formas, quæ omnes non sine ratio-

ne in eo conueniunt, vt beatitudinem collocandam putent in re aliqua ad vitam humanam spectante, etsi in re illa designanda inter se non consentiant.

Prima vitæ forma est vulgaris, quæ tota in confectandis corporis voluptatibus versatur: secunda est ciuilis, seu politica, quæ in rebus gerendis ad Rempub. spectantibus, occupatur: tertia denique in contemplatione posita est.

Et quidem primum vitæ genus beatitudinem in voluptate constituit, quam sententiam his verbis refellit Philosophus; *Plerique igitur omnino mancipiorum similes videntur, pecudum vitam eligentes*: ac si diceret, eiusmodi homines voluptuarios & adipales, qui mancipiorum more seruiunt voluptatibus, vix à brutis distare; cum non aliâ quàm brutorum felicitàtem sectentur.

Monet tamen eiusmodi homines propterea existimare beatitudinem in voluptatibus sitam esse, quòd videant plerosque ex iis qui in summis imperiis constituti sunt, vt Sardanapalum & similes, delicias & voluptates studiosissimè confectari. Ex quo intelligitur quàm necesse sit vt Reges, Principes, Magistratus, omnesque superiores suis subditis morum honestate præluceant.

Alterum vitæ genus ponit beatitudinem in honore, qui rebus bene gestis in Republica acquiritur. Sed hoc refellit dupliciter, primò quia beatitudo debet esse in eo qui dicitur beatus, non quomodolibet, sed permanenter; ac honor magis est in honorante quàm in honorato, potestque facile deperdi.

Secundò quia illud non est beatitudo, quod propter aliud expetitur; ac honor propter aliud expetitur, nempe propter virtutem: quia enim sola virtus honorem meretur, qui honorem

appetunt, propterea appetunt, vt aliis persuadeant se bonos esse, & virtute præditos; quo ipso ostendunt virtutem à se pluris fieri, quàm honorem, adeoque summum bonum in honore non consistere.

Quòd si quis fortè putet beatitudinem in virtute consistere, id duplici etiam ratione euerit, quarum prior est, quia fieri potest vt qui virtutis est compos, dormiat, aut nihil agat; at dici non potest dormientem, aut nihil agentem esse beatum, cum beatitudo sit summa hominis perfectio.

Posterior est, quia fieri potest, & plerumque euenit, vt homo virtute præditus malis conflitetur, aduersaque fortuna vtatur; eum autem qui ita se habet, esse fœlicem, nemo existimaret nisi qui aliquid paradoxum, seu à communi hominum sensu alienum, defendere voluerit.

Sequebatur dicendum de tertio hominum genere, qui scilicet in rerum contemplatione versantur, & in ea beatitudinem ponunt: verùm, de hoc se in consequentibus acturum pollicetur. Addit tamen quartum vitæ genus, nempe eorum qui beatitudinem in diuitiis collocant, quos refellit, tum quia diuitiæ per vim & iniuriam sæpe acquiruntur, & deperduntur; tum quia vtilis quidem sunt, & aliorum gratia comparantur, non autem propter se. Imò existimat eos qui ita sentiunt, magis esse reprehendendos quàm illos qui in honore aut voluptate fœlicitatem collocant, eò quòd hæc interdum propter se expetuntur, diuitiæ verò non nisi propter aliud.

Porro cum Aristoteles cap. citato nihil dixerit de tertio vitæ genere, quod fœlicitatem in contemplatione constituit, de eo ex parte tractat sequenti capite 6. vbi latè disputat contra

Ideas Platonicas, duoque præter alia ostendit; primò nullam esse boni communis ideam', qualem Plato affingebat, à qua scilicet omnia quæ bona sunt delibata, & decerpta fuerint. Secundò quamuis talis Idea gratis admitteretur, foelicitatem in ea nequaquam esse constituendam.

Primum probat, tum quia ex Platonis mente, communis Idea boni vniuocè communicatur, adeoque non est in iis in quibus est prius; & posterius, vt in numeris: at in bonis creatis reperitur prius & posterius, vt patet: nam substantia, & accidens sunt bona, & illa est natura prior, & perfectior quocunque accidente: quare idea boni communis non potest omnibus bonis æqualiter, & vniuocè conuenire.

Tum quia Idea illa communis dicitur esse ratio, & essentia rerum omnium quæ bonæ dicuntur; at omnia entia sunt bona, nempe substantia, quantitas, qualitas, & cætera; quæ tamen essentia, & definitione inter se distinguuntur.

Tum quia quæ vnā Ideam habent, ad eandem spectare scientiam dicuntur; at non modo quæ ponuntur in diuersis Categoriis, sed ea etiam quæ ad eandem Categoriā reducuntur, ad diuersas scientias interdum pertinent, vt occasio seu tempus aliter consideratur ab Imperatore, dum ducit exercitum, aliter à medico dum curat ægrotum.

Secundum verò ostendit, quia per foelicitatem intelligimus bonum aliquod quod sub actionem cadere, & à nobis comparari possit: at Idea illa communis boni ita ponitur separata, vt neque in actionem cadere, neque à nobis obtineri possit. Quare etsi gratis admitteretur, in ea foelicitas ponenda non esset.

Cæterum dimissa vltiori disputatione de

foelicitate contemplationis, ad eam tandem regreditur lib. 10. Ethicorum, vbi postquam latè disputauit de voluptate, & ostendit eam non esse per se bonam, adeoque foelicitatem in ea ponendam non esse; itemque eos falli qui summum bonum in ludo constituunt, concludit tandem cap. 6. foelicitatem in actione virtutis sitam esse; & quia inquirendum supererat, cuius virtutis, addit statim initio capitis 7. id de optima virtute optimæ facultatis intelligendum esse, nempe de contemplatione facultatis intelligentis.

Quod probat, tum quia foelicitas hominis in perfectissima illius operatione ponenda est, at contemplatio est actio hominis perfectissima, cum sit partus mentis, quæ vel est quid diuinum, vel certè inter ea quæ in homine sunt, diuinissimum: & præterea in obiectum nobilissimum tendat, nempe in res æternas & diuinas.

Tum quia cum foelicitas ex se durabilis esse debeat, ea in actione maxime perpetua poni debet; at inter hominis actiones nulla est quæ facilius continuari possit quàm contemplatio; cum aliæ exerceantur per membra corporis, quæ diu laborem ferre non possunt, nisi identidem opus intermittatur.

Tum quia foelicitas in actione iucundissima constitui debet; at omnium actionum humanarum suauissima est contemplatio, quæ ab habitu sapientiæ proficiscitur, cum sit de rebus ab omni commercio materiæ alienis, adeoque puris, sinceris, & firmissimis: quarum proinde consideratio non potest non esse valde pura, sincera, & stabilis.

Tum quia foelicitas in ea actione constituenda est, ad quam exercendam homo magis per se sufficiens est, minusque rebus externis indi-

get: talis est contemplatio veritatis, vt enim homo fit liberalis, debet abundare pecuniis, easque in alios effundere; vt sit iustus, debet habere erga quos æquitatem exerceat, &c. at homo etiam solus diuinorum contemplationi vacare potest. Ex quibus omnibus non obscure intelligitur, Deum ipsum esse obiectum humanæ felicitatis, iuxta mentem Philosophi. Idque euidenter confirmatur ex Procemio Metaphysicæ, vbi ait sapientiam versari in contemplatione causarum altissimarum, maxime illius cuius gratia omnia sunt, quæque bonum omnium est perfectissimum & optimum; quæ sanè est Deus.

ARTICVLVS II.

An beatitudo consistat in bonis externis.

CUm tria sint, ex supra dictis bonorum genera, nempe externa, corporis, & animi, inquirendum est sigillatim an felicitas in eorum aliquo consistat, & quia non modo diuitiæ, sed etiam potentia, gloria, & honor sub bonis externis numerantur, quoniam modo hæc ad beatitudinem se habeant hic primò expendendum occurrit. Itaque

Respondeo & dico 1. *Beatitudinem obiectiuam non posse consistere in diuitiis externis.* Quod vt intelligas, aduerte, diuitias esse duplicis generis ex Arist. 1. Polit. cap. 6. & ex S. Thoma 1. 2. quaest. 2. art. 1. quarum aliæ dicuntur naturales, aliæ artificiales: naturales dicuntur illæ quæ per se ad naturalem vitam fouendam & conseruandam iuuant, quales sunt cibus, potus, vestes, domus, & similia ad vsum humanum necessaria;

artificiales verò sunt pecuniæ quæ per se naturam non iuuant, sed arte humana inuentæ sunt vt sint mensura rerum venalium, iisque ad vitam necessaria comparari possint.

Hoc posito probat S. Thomas loco citato, beatitudinem non posse consistere in diuitiis siue naturalibus, siue artificialibus; quia beatitudo est vltimus finis hominis, seu ad quem homo refertur; at homo non refertur ad diuitias, vt ad vltimum finem, quin potius diuitiæ ad hominem referuntur, tanquam ad finem propter quem institutæ sunt; siquidem naturales per se ordinantur ad sustentandam naturam humanam: artificiales verò ad naturales acquirendas.

Idem etiam ostendi potest, tum quia proprium est beatitudinis, satiare appetitum, siquidem iuxta Philosophum lib. 10. Ethic. cap. 6. *foelicitas nullius rei indiga est, sed ex seipsa sufficit*: at quis nescit appetitum humanum nullo quantumuis ingenti diuitiarum cumulo perfectè satiari posse, vt intelligitur ex verbis illis Eccl. 5. *Auarus nunquam impletur pecunia*. Tum quia nulla est foelicitas, nisi cum actu possideatur; at diuitiæ nullum homini commodum afferunt, nisi cum actu expenduntur. Tum quia cum beatitudo sit status omnium bonorum aggregatione perfectus; ridiculum est existimare vel ob solas diuitias hominem posse esse beatum, cum nullus sit quantumuis diues, qui multis bonis & corporis, & animi non careat, sine quibus cumulata foelicitas esse non potest. Tum denique quia diuitiis bene aut malè vti possumus, at beatitudo est summum hominis bonum, quo nemo malè vti potest.

Dico 2. *Beatitudinem non consistere in potestate, gloria, honore, aliisque eiusmodi bonis externis*. Non quidem in potestate, tum quia etiam omnium

potentissimi multis indigent, quorum priuatio non finit eos esse verè felices. Tum quia potentia externa de qua loquimur, exiguis limitibus siue loci, siue temporis coercetur, multisque laboribus & incommodis obnoxia est, quæ à vera beatitudine abhorrent. Tum quia potestas se habet indifferenter ad bonum & malum, adeoque bene aut malè ea quis vti potest: quare si beatitudo in potestate consisteret, ea potius in bono illius vsu, qui est per virtutem, ponenda esset, quàm in ipsa potestate in actu primo spectata, vt obseruat S. Thomas quæst. citata art. 4.

Non etiam in gloria, nam gloria nihil est aliud quàm clara notitia cum laude, iuxta August. lib. 83. qq. quæst. 31. ea autem notitia & claritas hominem beare non potest; tum quia plerumque contingit nos ab ignotis & absentibus in aliquo pretio haberi & laudari, quod ad beatitudinem sufficere nequit, vt perspicuum est. Tum quia beatitudo est verum, solidum, & permanens bonum: at gloria humana plerumque est falsa, neque aliquid habet soliditatis aut constantiæ, cum ab humano arbitrio adulationi, errori, & mutationi obnoxio tota pendeat.

At neque in honore, siquidem honor est exhibitio reuerentiæ externæ, in testimonium excellentiæ quæ in aliquo esse intelligitur: at quamuis obiectum talis reuerentiæ sit, vel putetur esse in eo qui honoratur, ipse tamen honor est subiectiuè in honorante, quatenus est quædam actio ab eo elicitæ: quare beatitudo potius collocanda esset in obiecto honoris, quàm in honore ipso.

Confirmatur, nam honor refertur ad excellentiam illam ob quam exhibetur, & est tantum quoddam illius testimonium externum, id autem

in quo beatitudo consistit est bonum quoddam præstantissimum, ad quod alia reduci debent, cum ipsum ad aliud non referatur. Accedit quod honor plerumque exhibetur indignis, negaturque dignis, & ut non nisi dignis & bene meritis deferretur, id bonum adeo vanum & leue est, ut ne quidem umbra veræ beatitudinis in eo iure constitui possit.

Nota prædictis non officere, quod aliqui tanto studio diuitias inquirant, alij ad summas dignitates tanto ardore inhiant, alij gloriam humanam adeo insanè aucupentur, ut in iis summum bonum constitui videantur: non enim hic quærimus quid sentiendum sit de beatitudine, iuxta deprauatum huius, vel illius affectum, sed secundum præscriptum rectæ rationis, quam certum est à bonis illis externis planè futilibus, & pene momentaneis veram beatitudinem quam longissimè ablegare, ut ostensum est.

ARTICVLVS III.

An beatitudo consistat in bonis corporis, vel animi.

Respondeo & dico I. *Beatitudinem non consistere in bonis corporis.* Probatur, nam præcipua corporis bona sunt pulchritudo, sanitas, & robur, itemque delectationes sensuum; at in iis beatitudo consistere nequit. Non quidem in pulchritudine, tum quia etiam non pulchri possunt esse beati, tum quia pulchritudo & bonis & malis competit, at beatitudo non potest competere nisi bonis, cum excludat omnem miseriam, præsertim peccati, quæ omnium maxima est. Tum quia pulchritudo esto in se

mala non sit, negari tamen nequit quin mala innumera ex ea plerumque originem trahant, quod de summo bono ne cogitari quidem potest. Tum denique quia ut cætera incommoda abessent, quæ cum beatitudine stare nequeunt, pulchritudo corporis paulatim deperditur, & intra paucos annos imo plerumque dies & horas omnino extinguitur, ut absurdum planè sit beatitudinem in ea constitutam velle.

Non etiam in valetudine & robore, quia præterquam quod exquisita illa humorum temperies, ex qua valetudo & robur procedit, innumeris casibus est obnoxia, certe bona illa corporea sunt communia bonis & malis; imò plerumque videmus homines scelestissimos firmiori valetudine frui, quàm viros eximia virtute præditos, eaque in multorum perniciem abuti: at iam diximus summum bonum in malis hominibus, nedum in pessimis locum non habere, neque eo quemquam abuti posse. Deinde si beatitudo in robore corporis consisteret, pleraque bruta animalia essent perfectè beata, cum omnes homines robore & viribus longo intervallo excedant.

At neque in delectationibus sensuum, primò quia eiusmodi delectationes sunt communes hominibus & brutis, quare si beatos homines efficerent, nulla ratio esset cur etiam pecudes non beatæ dicerentur. Imò pleraque animalia perfectiùs quàm homines beatitudinem participarent, cum habeant sensus perfectiores & acutiores, si vera sunt quæ duobus illis versibus vulgariis comprehenduntur.

Nos aper auditu, lynx visu, simia gustu.

Vultur odoratu, præcellis aranea tactu.

Secundò idem ex eo manifestè suadet, quòd non potest summum hominis bonum in iis re-

luptatibus constitui, quarum anima rationalis, quæ & præcipua & longè nobilior hominis pars, per se capax non est, quæque ex consequenti in Angelos cadere nequeunt, ac multò minùs in Deum: alias enim dicendum esset veram beatitudinem neque animæ rationali, neque spiritualibus intelligentiis, neque ipsi Deo competere posse, sed tantùm brutis animalibus, & homini qua parte ex corpore animali compactus est.

Mitto voluptatum sensibilibium fœditatem, inconstantiam, vanitatem, & malorum cateruam quam ex iis procreari nemo ignorat: hæc enim & similia vel cæcis ipsi perispiciuè ostendunt, non aliam quàm porcorum, & canum fœlicitatem in voluptatibus corporis sitam esse.

Dico 2. *Beatitudinem in naturalibus animi bonis nequaquam consistere.* Probatur, duplicia enim sunt naturalia animi bona, nempe scientiæ, & virtutes quæ naturæ viribus comparantur; at in scientiis eiusmodi aut virtutibus summum bonum cōsistere non potest, non quidem in scientiis, tum quia hæ valde incertæ sunt, multisque erroribus obnoxia, vt constat vel ex innumeris diffentionibus quæ de plerisque rebus inter Philosophos oriuntur.

Tum quia paucissima sunt quæ cognoscimus, si cum iis comparentur quorum cognitionem assequi non possumus, cùm enim tota nostra cognitio naturalis ortum habeat ex sensibus, & per sensus neque Deum, neque Angelos, neque substantias creatas, neque facultates rerum internas perspectas habeamus, hinc sanè fit vt nostræ omnes scientiæ naturales angustis admodum terminis concludantur, valdeque absint à ratione summi boni, cùm sint adeo diminutæ, neque vllò modo appetitum illum
sciendi,

sciendi, qui in animis nostris viget, explere possint.

Tum denique quia scientiæ non nisi magno labore acquiruntur, & cum sunt acquisitæ variis casibus amitti possunt, ac plerumque cum grauissimis huius vitæ molestiis, pessimisque moribus coniunctæ sunt; adeo vt fieri nequeat summum bonum in iis consistere.

Non etiam in virtutibus naturaliter comparatis, quæ Morales appellantur, tum quia et si eiusmodi virtutes per se sint magnum animi ornamentum, non tamen sufficiunt vt omnem illius appetitum naturalem expleant, quia earum perfectio ad intellectum non se extendit, ita vt Patres non immerito censeant, hominem scientia carentem, & virtute præditum lusco aut monoculo comparandum, notumque sit ex Hieronymo epist. 105. sanctam rusticitatem solum sibi prodesse, & quantum ædificat ex vitæ merito, tantum plerumque nocere per ignorantiam.

Tum quia ea est felicitatis conditio, vt sit stabilis & firma, habeatque rationem finis ultimi, qui nempe ad aliquid vltius non ordinetur; ista autem in virtute Morali non reperiuntur, nam in primis plerosque videmus e virtute excidere quam aliquanto tempore coluerunt, constat etiam virtutem omnem habitualem ad actum tendere, & actuaalem in suum obiectum ferri; quò fit vt beatitudo obiectiua, de qua nunc agimus, in virtutis obiecto potius quam in ipsa virtute constituenda sit.

Tum denique quia proprium est felicitatis eum qui illa potitur summè beare, eius animum ingenti lætitia perfundere, omnemque ab eo miseriam excludere; at virtus Moralis non hæc omnia per se præstat, cum videamus eos qui

virtutem colunt, non raro anxietatibus, doloribus, & calamitatibus grauissimis premi, quæ cum vera felicitate stare non possunt.

ARTICVLVS IV.

An beatitudo obiectiua in Deo, eoque solo posita sit.

Respondeo & dico I. *Beatitudinem obiectiuam in Deo constituendam esse.* Probat, quia in Deo reperiuntur cumulatissime conditiones omnes quæ ad obiectum essentialis beatitudinis iure exigi possunt. Si enim obiectum beatitudinis est finis vltimus ad quem res omnes collimant, iam supra ostensum est Deo rationem finis vltimi respectu omnium rerum competere. Si obiectum illud debet esse summum bonum, in Deo bonitatem esse infinitam nemo negauerit. Si illius possessio necessaria est ad formalem beatitudinem, quidni Deus quatenus ens verum & bonum, ab intellectu & voluntate creata si non comprehenditur, saltem videri, diligere & eatenus possideri possit? Si possessio obiecti beatifici summam suauitatem adiunctam habet, quam non conferet delectationem Dei fruitio, cuius vel sola cogitatio piorum mentes interdum extra se rapit? Denique si obiectum veræ & solidæ beatitudinis firmum ac stabile esse debet, hoc etiam ex capite Deus, cum sit æternus & immobilis, quam aptissimus est ut sit obiectum veræ beatitudinis.

Verum contra hanc assertionem obiicies I. Obiectum beatitudinis debet esse intra ipsum beatum, at Deus est extra hominem, ergo non est obiectum beatitudinis humanæ. Respondeo I. maiorem non videri veram, quia etsi bea-

titudo formalis ipsum beatum intrinsecè afficere debeat, non tamen apparet cur obiectum talis beatitudinis necessario debeat illi esse intrinsecum, cum homo sit formaliter beatus per actus intellectus & voluntatis, qui in obiectum non realiter præsens ferri possunt.

Respondeo 2. ad maiorem, Deum quidem ob immensitatem suam esse extra hominem, essetamen etiam totum intra illum, sicque sufficienter ei præsentem esse ut possit ab illo consideri.

Obiicies 2. inter beatitudinem formalem & obiectiuam debet esse proportio, atqui nulla est proportio inter actus finitos & limitatos, quibus homo est formaliter beatus, & Deum qui est obiectum infinitum & illimitatum; ac proinde Deus non est obiectum humanæ beatitudinis, sed potius aliquid creatum. Respondeo inter beatitudinem formalem & obiectiuam requiri proportionem quandam habitudinis seu ordinis, non in ratione entis; atqui inter actus humanos; in quibus formalis beatitudo consistit, & Deum, est quædam proportio habitudinis seu ordinis, in eo consistens, quod cum Deus sit ens summè intelligibile & amabile, ab homine cognosci & amari potest: imò tanta est humanæ mentis capacitas, ut non nisi obiecto illo infinito repleti & satiari possit, iuxta illud celebre dictum Augustini, *Fecisti nos Domine ad te, & inquietum est. cor nostrum donec requiescat in te.*

Neque dicas prædictam habitudinis proportionem melius reperiri v. c. inter hominem & Angelum, quàm inter hominem & Deum, sicque Angelum potius esse obiectum beatitudinis humanæ, quàm Deum: non enim ita est, quia cum Deus vniuersa propter semetipsum creauerit, hinc fit ut homo intimam habeat con-

junctionem cum Deo, vt cum prima causa, & fine vltimo, qualem cum nulla creatura habere potest: vnde fit vt instinctu quodam & pondere naturali homo in cognitionem Dei, illiusque amorem feratur; neque integra pace fruatur, donec obiectum illud infinitum & summè amabile consequutus sit.


Dico 2. *Obiectum beatitudinis in solo Deo consistendum esse.* Probat ex dictis, nam conditiones quas ante tribuimus obiecto beatitudinis, nulli quàm Deo competere possunt; ergo solus Deus est beatitudinis obiectum. Declaratur, quia quidquid est, vel est Deus, vel creatura; at nulla creatura quantumuis eximia, appetitum humanum satiare potest, vt ostensum fuit.

Quod adhuc confirmatur, quia obiectum intellectus humani est vniuersale verum, & obiectum voluntatis humanæ vniuersale bonum, vt optimè docet S. Thomas 1. 2. quæst. 2. art. 8. quare cum in nulla creatura reperiatur veritas, aut bonitas vniuersalis, sed tantum in Deo; hinc fit vt solus Deus sit adæquatum obiectum intellectus, & voluntatis humanæ; adeoque beatitudo obiectiua in eo solo posita sit.

Idem rursus suaderetur, nam vel beatitudo supremi Angeli in solo Deo obiectiue consistit, vel simul in aliqua creatura; at hoc posterius dici non potest, cum omnes creaturæ sint illo Angelo inferiores, ergo prius dicendum est: vnde sic arguo, si Deus solus est obiectum beatitudinis supremi Angeli, quidni & aliorum Angelorum, omniumque hominum? quod enim Angelus ille sit reliquis perfectior, id nihil refert, cum nihilominus inter illum & Deum distantia perfectionis sit infinita.

Obiicies, non potest homo esse perfectè beatus, nisi multis bonis corporis & animi potia-

ur; ergo Deus solus non est obiectum beatitudinis. Respondeo id non sequi, quia etsi bona la requirantur ad statum completum beatitudinis, non tamen propriè sunt obiectum beatitudinis essentialis: cum in Deum vt in vltimum nem ordinentur. Imò ad beatitudinem essentialem absolutè non requiruntur, cum animæ xutz corporibus essentialiter sunt beatæ, ob idam possessionem Dei.



CAPVT IV.

DE BEATITVDINE
hominis formali.

ARTICVLVS PRIMVS.

An formalis beatitudo sit constituenda in quodam illapsu diuina substantia in beatum.

QUVM Deus sit obiectum nostræ beatitudinis, & formalis beatitudo consistat in intima vnione beati cum obiecto beatifico, explicandum superest in hoc & sequentijs articulis, per quid homo constituatur formaliter beatus. Itaque hic inquirimus an vera sententia Henrici Gandauensis, qui olim docuit beatitudinem, etsi non totaliter, saltem præpue consistere in quodam illapsu diuinæ substantiæ in ipsum beatum.

Respondeo, ex communi sententia, beatitudinem formalem non consistere in illapsu præicto. Probatur, quid enim per eiusmodi illap-

sum intelligi potest? vel per illum intelligitur intima coniunctio localis substantiæ diuinæ cum beato, ita vt Deus illi realiter præsentissimus sit, eumque totum ambiat, & penetret; at hoc nequaquam sufficit ad beatitudinem, cum Deus non modo beatis, sed etiam non beatis, imò miserrimis, rebusque omnibus per suam substantiam localiter præsentissimus sit.

Vel intelligitur per illapsam vis illa qua Deus solus immediatè conseruat beatum, illiusque intellectum docet, & voluntatem impellit: at quis putet formalem beatitudinem in his rebus positam esse, cum etiam homines scelestissimi, qui à vera foelicitate longè absunt, immediatè à Deo conseruari, doceri, & impelli possint?

Accedit quòd illapsus ille, cum excogitatus videatur ad euertendam sententiam communem, quæ formalem beatitudinem constituit in operatione, est tantum quidam actus primus, quouis modo explicetur: at quòd actus primus per se non possit constituere aliquem formaliter beatum, inde constat, tum quia alias nihil agēs, imò dormiens posset esse beatus, quod omnes ridiculum esse, cum Aristotele superiùs relato, existimant. Tum quia beatitudo formalis debet poni in perfectissima vnione beati cum obiecto beatifico, ea autem vnio non fit per solum actum primum, sed maximè per secundum.

Tandem sententia illa nullo modo cohæret cum Scriptura sacra, & Patribus qui vno ore statuunt beatitudinem formalem in Dei visione, & fruitione positam esse, vt infra explicabitur.

Obiicies 1. beatitudo formalis non tantum debet poni in potentiis animæ, sed maximè in illius essentia, cum hæc sit perfectior potentiis, & principium illarum; at si consisteret in qua-

dam operatione, esset tantum in aliqua potentia animæ, nimirum in illa, cuius esset eiusmodi operatio: ergo ponenda est maxime in animæ essentia, quod fit per illapsum Dei in illam. Respondeo 1. minorem falsam esse, nam eo ipso quod beatitudo formalis est in quadam animæ potentia, ob illius operationem qua Deo intime vnitur, est etiam in ipsa animæ essentia, siue quia potentia animæ ab anima non distinguuntur, ut multi existimant, siue quia cum potentia sint organa quibus anima utitur ad operandum, adeoque anima sit præcipuum operationum principium, hinc fit ut perfectio quæ potentiis animæ communicatur ob aliquam earum operationem, in ipsam animam tanquam in præcipuum earum principium redundet: aliàs dicendum esset neque ipsas potentias esse beatas ratione operationum, cum ab iis realiter distinguantur.

Respondeo 2. falsum esse quod inferitur, scilicet beatitudinem constituendam esse in essentia animæ, per illapsum Dei in illam: nam quidquid sit eiusmodi illapsus, intelligi nequit animam esse beatam per illum, nisi accedat aliqua operatio qua Deo sibi vnito fruatur, ut dictum est.

Obiicies 2. gratia est in ipsa essentia animæ, non in potentiis illius, ergo & gloria seu beatitudo formalis in eadem esse debet. Antecedens supponitur ex dictis in tract. de gratia, sequela verò probatur, quia gloria nihil est aliud quam gratia consummata; sicut vice versa gratia est gloria inchoata, ut Theologi communiter loquuntur. Confirmatur, nam nobilissima perfectio debet esse in subiecto nobilissimo, atqui essentia animæ est nobilior potentiis illius, ergo in illa debet esse beatitudo, quæ est perfectio omnium nobilissima.

Respondeo negando consequentiam, & ad probationem illius dico, ideo gloriam dici gratiam consummatam, quia beatitudo est vltima perfectio ad quam gratia tendit; gratiam verò dici gloriam inchoatam, quia est veluti semen gloriæ, cuius vi ad beatitudinem peruenire possumus. Inde autem non bene colligitur, formalem beatitudinem debere esse immediatè in ipsa essentia animæ, sed potius in potentiis illius, cum vltima animæ perfectio in quadam illius operatione consistat. Et quamvis eo argumento concluderetur, beatitudinem esse in ipsa animæ essentia, inde non sequeretur eam consistere in illapsu prædicto, sed in gratia ipsa consummata, quæ est accidens aliquod creatum à Deo realiter distinctum.

Vnde ad confirmationem dicimus, nobilissimam perfectionem debere esse in subiecto nobilissimo, si illius capax sit; essentiam autem animæ non esse per se capacem beatitudinis actualis, quia cum hæc sit operatio, immediatè à potentiis animæ profluere debet. Aliàs æquè dicendum esset lumen gloriæ, quo beati eleuantur ad videndum Deum, esse in ipsa essentia animæ, non in eorum intellectu, quod planè absurdum est: sequela patet, quia ex communi sententia, inter qualitates à Deo creatas lumen illud primum perfectionis locum obtinet.

ARTICVLVS II.

An formalis beatitudo consistat in visione increata quæ Deus seipsum contemplatur.

Altera est opinio antiqua quæ docet, formalem beatitudinem consistere in visione ipsa increata quæ Deus seipsum videt;

Ita vt hæc visio communicetur hominī, & per illam fiat formaliter beatus. Ita quidam Ioannes de Ripa, vt nonnulli Scholastici vetustiores referunt.

Verum hæc opinio iamdiu è scolis ablegata est, potestque breuiter refelli 1. quia intelligi non potest, quomodo quis possit esse beatus per visionem quā Deus seipsum videt, cum eiusmodi visio neque ab homine elici possit, neque in ipso recipi, adeoque neque illum ita afficere, vt sit propria illius prout requiritur vt per illam sit formaliter beatus. Confirmatur, nam formalis beatitudo est vita actualis, quæ non nisi à principio vitæ coniuncto profluere potest.

Refellitur 2. nam vel ita visio increata communicatur hominī, vt ipse Deum videndo aliquid operetur, vel ita vt nullam operationem eliciat; posterius dici non potest, quia si beatus nullam operationem elicit, nihil agit, adeoque est otiosus; at quis credat beatum nihil agere, & in otio versari? si autem prius verum est, ergo beatitudo formalis non consistit in visione Dei increata, quam constat esse improductam, sed in operatione creata ab ipso beato elicitā.

Refellitur 3. quia si homines formaliter sunt beati per visionem increatam Dei, ergo omnes æqualiter sunt beati: at consequens est absurdum, & repugnans Scripturæ sacræ, vt patet ex dictis in Idea Theologiæ speculatiuæ, vbi de visione Dei: ergo & antecedens. Sequela verò ostenditur, quia sicut in sententia communi, si omnes æquæ sunt beati qui habent æquale lumen gloriæ, ita si conceditur omnes beatos non aliter esse beatos, quàm per visionem increatam Dei, consequenter eos omnes æquæ esse beatos credendum est; imò à fortiori id sequitur, cum hæc visio in omnibus beatis debeat

esse vnica numero , & se habeat per modum actus secundi; lumen verò gloriæ tot distinctiones numericas subeat, quot sunt homines beati, habeatque rationem potentiæ & actus primi.

• Obiicies 1. beatitudo est summum bonum, ergo est aliquid increatum, adeoque ipsamet visio increata Dei. Antecedens à nobis suprà admissum est, & à nemine negari potest, prior sequela manifesta est, cum nihil creatum possit habere rationem summi boni, vt patet ex supradictis: posterior verò ostenditur, quia si beatitudo est aliquid increatū, ea in nullo congruentius constitui potest quā in visione Dei increata. Respondeo distinguendo antecedens, beatitudo enim duplex est, ex suprà dictis, obiectiua, & formalis; vtraque est summum bonum, sed cum discrimine, prior siquidem est summum bonum absolute, cum sit Deus ipse cuius perfectio & bonitas est simpliciter infinita; at posterior est tantum summum bonum secundum quid, quatenus inter bona creata principem locum habet: vnde non potest esse visio increata Dei.

Obiicies 2. Deus immediate per suam substantiam gerit vices speciei intelligibilis in intellectu beatorum: cur ergo non poterit similiter supplere defectum visionis creatæ per suam visionem increatam? Respondeo esse discrimen; nam cum species intelligibilis se habeat vt causa efficiens partialis, concurrens cum intellectu ad visionem, mirum non est quòd illius defectus ab ipsa essentia diuina suppleri possit: at verò actualis intellectio est operatio vitalis, quæ necessario à viuente produci debet, & in eo recipi, vt ante diximus: quare cum repugnet visionem Dei increatam profluere ab intellectu creato, & in illo recipi ad modum formæ ei inexistentis;

hinc fit vt Deus nequeat supplere defectum visionis creatæ, esto gerat vices speciei intelligibilis.

Obiicies? si Deus esset color, & alicui subiecto vniretur, nonne illud efficeret formaliter coloratum? quare ergo cum sit formaliter visio, non efficit intellectum creatum, cui intime coniunctus est, formaliter videntem? Respondco causam discriminis esse, quia eo ipso quod color afficit subiectum, denominat illud formaliter coloratum: at visio non potest denominare intellectum creatum videntem, nisi ei inhareat, & ab eo efficienter profluat, vt dictum est.

ARTICVLVS III.

An beatitudo formalis consistat in aliqua operatione ipsius beati.

Responso affirmatiua est communis, breuiterque probatur ex ante dictis. Nam in primis beatitudo formalis includit vitam actualem ipsius beati, at vita actualis non potest intelligi sine actione aliqua ipsius beati; ergo beatitudo formalis actionem aliquam beati includit. Maior perspicua est, tum quia beatum esse idem est ac feliciter viuere, tum quia nomine vitæ æternæ communiter intelligitur formalis beatitudo, vt patet ex variis locis Scripturæ sacræ, & ex communi Christianorum sensu: minor verò probatione non indiget, cum aperte repugnet actu viuere, sine actu vel operatione aliqua.

Deinde beatitudo formalis dicit perfectissimam coniunctionem beati cum obiecto beatifico, at talis coniunctio necessario inuoluit ac-

tionem aliquam ipsius beati; ergo, &c. Maior suadetur, quia nullus censi potest beatus nisi obiectum suæ beatitudinis perfecte possideat, illiusque possessione sit planè satiatus, quod non fit quamdiu ei perfecte & intimè coniunctus non est: minor autem ostenditur, quia si beatitudo formalis nullam diceret actionem beati, vel ea ponenda esset in quodam actu primo beati, quod ridiculum est, quia actus primus ex se tendit ad secundum, tanquam ad ultimum suum complementum; vel in quadam receptione, quod etiam absurdum est; quia sic beatus non apprehenderet, nec possideret summum bonum, sed potius ab illo apprehenderetur, & possideretur.

Tandem sententia opposita non satis cohæret cum Scriptura sacra, quæ beatitudinem formalem in cognitione, & visione Dei constituit. Nec cum Concilio Viennensi sub Clemente V. habito, ubi statuitur lumen gloriæ ad videndum Deum esse necessarium. Nec cum autoritate Benedicti XII. qui in extrauan. *Benedictus*, statuit animam esse beatam visione & fruitione Dei: hæc enim aperte ostendunt, non modo beatitudinem formalem consistere generatim in aliqua operatione beati, sed etiam in tali operatione specifica, de qua postea.

Verum obiicies I. cum nonnullis nominibus, beatitudo formalis nihil est aliud quam possessio obiecti beatifici, possessio autem rei alicuius non est operatio circa illam, ergo beatitudo formalis non est operatio aliqua circa obiectum beatificum. Maior ab omnibus admittitur, minor verò suadetur, quia rem possidere est habere ius operandi circa illam, seu utendi illa, adeoque possessio non dicit operationem actualem, sed tantum facultatem ope-

randi. Respondeo cum distinctione maioris, & minoris, beatitudo enim formalis non est possessio in actu primo obiecti beatifici, sed in actu secundo; talis autem possessio non consistit in quodam iure operandi circa obiectum, sed in actuali operatione: ex quo sequitur beatitudinem formalem in aliqua operatione constituentem esse.

Obiicies 2. si beatitudo formalis consistit in aliqua actione beati, ergo homo seipsum beatificat, & non à Deo beatificatur, quod dici non potest. Respondeo non sequi, licet enim formalis beatitudo consistat in aliqua actione beati, id non sufficit ut homo dicatur seipsum beare, cum talis actio necessario producat ab intellectu beati, lumine gloriæ, cuius solus Deus auctor est, informato. Imò quamvis beatus ad talem actionem liberè concurreret, id non sufficeret ut simpliciter diceretur seipsum beare, quia beatitudo formalis etiam in eo casu, à Deo ut à causa præcipua penderet, sed tantum secundum quid, & in ratione instrumenti vel causæ secundæ: quemadmodum homo dicitur eo sensu se sanctificare, quatenus ad propriam sanctificationem, sub Deo præcipue operante, liberè concurrat.

Obiicies 3. præmium non esse producendum ab eo qui illo donatur, sed tantum recipiendum, cum consistat in actione præmiantis erga bene meritum: ergo beatitudo formalis, cum detur per modum præmij, non debet consistere in operatione aliqua eorum qui tali præmio donantur, sed potius in receptione alicuius doni. Respondeo præmium non semper consistere in actione præmiantis, sed interdum in actione illius qui præmio donatur, ut patet si cui in præmijum detur visio alicuius obiecti pulcherrimi,

vel suauissimi cantus auditio, vel cibi delicia-
tissimi comestio. Vnde quod beatitudo forma-
lis in operatione ipsius beati constituatur, id
non impedit quin rationem præmij habere pos-
sit: quod non obscure indicatur verbis illis
Christi, Lucæ 22. *Dispono vobis, sicut disposuit mi-
hi Pater meus regnum, ut edatis & bibatis super
mensam meam in regno meo.*

ARTICVLVS IV.

In quo genere operationis formalis beatitudo posita sit.

Respondeo & dico 1. *Beatitudinem forma-
lem non consistere in ulla operatione sensitiua
partis.* Probatur manifeste ex supra dictis,
nam in primis cum beatitudo hominis sit ma-
xima illius perfectio, repugnat eam consistere in
operatione aliqua partis sensitiuæ: siquidem
pars intellectiua & rationalis longè nobilior est
sensitiua, quæ communis est hominibus & bru-
tis, ideoque operationes habet perfectiores, in
quibus congruentius est veram beatitudinem
constituere.

Deinde si beatitudo formalis consisteret in
operatione aliqua partis sensitiuæ, consequen-
ter obiectiua beatitudo in re aliqua externa &
sensibili constituenda esset, quod præcedenti
capite reiectum est: sequela patet, quia per par-
tem sensitiuam nullum nisi externum & sensi-
bile bonum complecti possumus, ut notum est.

Dices hinc ad summum sequi, Deum non
posse per sensus externos cognosci naturaliter,
non tamen repugnare quod oculus corporeus
supernaturaliter eleuetur ad videndum Deum
ipsum, qui est obiectum nostræ beatitudinis.

Verùm hæc obiectio dupliciter peccat, primo quia gratis supponit oculum corporeum posse eleuari ad videndum Deum, hoc enim repugnat communi sententiæ Theologorum, & maxime S. Thomæ 1. p. quæst. 12. art. 3. quia cum potentia visiva sit organo corporeo affixa, non potest elicere nisi operationes materiales & corporeas, quæ cum obiecto spirituali nullam proportionem habent. Confirmatur, nam si fieri nequit ut per oculum corporeum percipiatur sonus, vel odor, multò sanè magis repugnat quòd per illum Deus ipse, qui est ens summè spirituale, percipiatur.

Nec refert quòd intellectus noster, etsi creatus & finitus, ad Deum videndum eleuari possit, hoc enim non adeo mirum est, cum ex se sit potentia spiritualis, cuius obiectum est quodcunque verum, adeoque & ipse Deus, ut vel ex eo manifestè intelligitur, quod per vim suam naturalem, sine alia eleuatione, Dei ipsius cognitionem aliquam consequi potest.

Secundò quamvis gratis id totum quod hac obiectione intenditur, concederemus, inde sequeretur aut nullam esse in hoc vitæ statu hominum beatitudinem, cum certum sit sensus nostros siue externos, siue etiam internos, quamdiu hic viuimus, extra obiecta materialia nunquam excurrere; & nemini hætenus inter mortales concessum esse, ut Deum oculo corporeo clarè intueatur: aut beatitudinem huius vitæ in nulla operatione partis sensitivæ consistere, sed potius in operatione aliqua partis intellectivæ.

Hic tamen aduertendum est ex S. Thomæ 1. 2. quæst. 3. art. 3. aliquid posse ad beatitudinem pertinere tripliciter, nempe essentialiter, antecedenter, & consequenter; operationem autem sensus non posse ad beatitudinem pertinere

essentialiter, quia hominis beatitudo essentialiter consistit in coniunctione ipsius ad bonum increatum, quæ per sensus fieri nequit, sed tantum per partem intellectiuam: pertinere tamen ad illam tum antecedenter, secundum beatitudinem imperfectam huius vitæ, quia nihil hic intelligimus nisi prævia operatione sensus; tum consequenter in perfecta futuræ vitæ beatitudine, quia etsi tunc coniunctio ad Deum facienda sit sine dependentia intellectus a sensibus, gloria tamen ex anima redundabit in corpus & in sensus corporeos, ut in suis operationibus perficiantur.

Dico 2. *Formalem beatitudinem consistere in operatione aliqua partis intellectivæ.* Sequitur ex dictis, nam cum beatitudo formalis consistat in aliqua hominis operatione, ut ostensum est, neque ullus adeo absurdè senserit, ut dicat eam consistere in operatione aliqua vitæ vegetativæ, quæ nobis communis est cum plantis; probatum etiam sit eam non posse constitui in operatione partis sensitivæ, ex his omnino consequens est eam ponendam esse in operatione aliqua vitæ rationalis & intellectivæ, cum nihil sit aliud in quo constitui possit.

Vnde cum solus Deus sit obiectum nostræ beatitudinis, ut supra etiam ostensum est, hinc fit ut beatitudo formalis consistat in actu aliquo partis intellectivæ, qui hominem perfectissimè cum Deo coniungat. Restat autem non levis difficultas, cuinam actui partis intellectivæ id muneris concedendum sit, an intellectioni, an volitioni seu amorì, an gaudio seu delectationi, an verò duobus ex his actibus, aut omnibus, qua de re quid statuendum sit sequenti articulo dicetur.

ARTICVLVS V.

In qua operatione partis intellectiua formalis beatitudo essentialiter consistat.

Pramoneo 1. Beatitudinem formalem duobus modis spectari posse, primò essentialiter vt comprehendit tantum eum actum qui est de essentia illius, & quo intellecto subsistit essentialis beatitudo, etsi de aliis nihil cogitetur. Secundò integraliter & completiue, prout includit quidquid ad fœlicitatem hominis integrandam concurrat, quomodo definiri solet, *status omnium bonorum aggregatione perfectus.*

Pramoneo 2. dubium non procedere de beatitudine formali secundo modo spectata, cum sic perspicuum sit de ratione illius esse non modo intellectionem summi boni, sed etiam amorem illius, & quietem in illo, ac vno verbo quidquid siue ex parte animi, siue ex parte corporis cum formali beatitudine coniunctum est. Tota ergo difficultas versatur circa beatitudinem priori modo spectatam, aliis cum S. Thoma grauiter contendentibus eam constitui tantum in actu intellectus, aliis cum Scoto in actu voluntatis, aliis verò in solo gaudio vel delectatione eam constituentibus, aliis denique in omnibus prædictis actibus tam intellectus quam voluntatis. In qua controuersia quæ magis sanè ad voces quam ad rem ipsam spectare videtur,

Respondeo & dico 1. *Formalem beatitudinem in actu intellectus consistere.* Probatur 1. nam in eo actu consistit formalis beatitudo, qui est adeptio & consequutio summi boni: atqui adeptio & consequutio summi boni, quod est Deus,

consistit in actu intellectus, ergo formalis beatitudo consistit in actu intellectus. Maior à nemine negari potest, cum per se evidens sit, ut beatitudo obiectiua in summo bono, seu in Deo consistit, ita formalem beatitudinem in talis boni adeptione & consequutione ponendam esse. Minor verò suadetur, quia ille actus est adeptio & consequutio summi boni, quo summum bonum apprehendimus, nobisque præsens sistimus in ratione obiecti beatifici; hoc autem fit per actum intellectus, ut notum est: ergo actus intellectus est adeptio summi boni, adeoque beatitudo formalis in eo consistit.

Probatur 2. nam ideo intellectus creatus eleuatur in alia vita per lumen gloriæ, ut formali beatitudine perfruatur: at eleuatur ut videat Deum, ergo beatitudo formalis in Dei visione consistit. Confirmatur, nam cum quidquid aliis potentiis siue animæ, siue corporis beatitudinis communicatur, id totum ex visione Dei, ut ex fonte procedat; profectò negari non potest quin visio illa sit essentialis beatitudo: eo modo quo illud dicitur essentialiale in aliquare, à quo perfectiones omnes illius originem ducunt.

Dico 2. *Formalem beatitudinem non consistere siue totaliter siue partialiter in actu aliquo voluntatis.* Non quidem totaliter, cum iam ostensum sit formalem beatitudinem consistere in actu intellectus; quod ut minimum de partiali beatitudine intelligi debet.

Non etiam partialiter, quia ideo beatitudo formalis consistit in intellectu, quia per illam possidemus & consequimur summum bonum, ut dictum est; ergo similiter ut aliquis alius actus formalem beatitudinem constituat, ille debet esse summi boni apprehensio, & consequutio: at hæc ratio apprehensionis & consequutionis

summi boni non potest cadere in vllum actum voluntatis, quia cum voluntas sit potentia cœca, illius non est obiectum amabile apprehendere, sed apprehensum ab intellectu diligere, & in illius possessione delectari: quo fit vt formalis beatitudo in nullo actu voluntatis consistere possit.

Confirmatur, nam duo sunt actus voluntatis, de quibus dubitari potest an spectent ad formalem consequutionem summi boni; alter est amor, alter delectatio: at neuter istorum actuum ad id spectat: non quidem prior, quia hic Deum amamus eadem specie charitatis qua diligitur in cœlo, necdum tamen illam possidemus, aut consequimur, quia aliàs formaliter & essentialiter beati essemus in hoc statu, idque beatitudine alterius vitæ, quod absurdum est. Non etiam posterior, quia delectatio non est consequutio, & possessio boni, sed quidam motus ex consequutione, & præsentia boni in voluntate excitatus: quare tantum abest vt beatitudinem formalem constituat, quin potius eam vt constitutam supponit.

Dico 3. *Formalem beatitudinem in solo actu intellectus consistere.* Sequitur ex dictis, nam cum ea consistat in actu intellectus, vt prima assertione probatum est; neque constitui possit in actu voluntatis, vt in secunda assertione probatum fuit; sequitur eam totaliter ad intellectum spectare, ac proinde in solo actu intellectus ponendam esse. Sequela patet, quia beatitudo formalis spectat ad partem rationalem, in qua nullæ sunt facultates præter intellectum, & voluntatem, in quarum operationibus beatitudo formalis verisimiliter constitui possit.

Obiicies 1. Formalis beatitudo in pace consistit vt colligitur ex illo Psalmi 147. *Qui posuit*

fines tuos pacem, sed pax ad voluntatem pertinet, ergo beatitudo consistit in actu voluntatis. Respondeo pacem ad beatitudinem spectare, non quidem essentialiter, sed consequenter, quatenus homo adepto ultimo fine, nihil amplius cum anxietate desiderandum habet, atque adeo pace & quiete perfecta interius potitur. Quare pax illa est effectus beatitudinis formalis, quæ in ultimi finis assequutione posita est; sicut quies lapidis in loco naturali est effectus resurgens ex consequutione talis loci.

Obiicies 2. beatitudo formalis constitui debet in operatione perfectissima, atqui amor est perfectior cognitione: ergo beatitudo formalis in amore, non in cognitione constituenda est. Maior constat ex supra dictis, minor verò ostenditur, quia non qui Deum cognoscit, sed qui illum amat præmium meretur apud eum. Confirmatur, nam voluntas est potentia perfectior intellectu, cum per se sit libera, eumque ad agendum moueat: ergo & amor, qui est actus voluntatis, est nobilior cognitione quæ est actus intellectus.

Respondeo 1. Maiorem argumenti non videri necessariam, quia dici posset, dum quæritur in qua actione formalis beatitudo posita sit, frustra inquiri quænam sit operatio quoad entitatem omnium nobilissima, sed illud tantum inuestigandum esse, quænam operatio talis sit ut summi boni consequutio, & possessio ei competere possit: quia quæcunque sit, cui hæc ratio conuenit, in ea haud dubie beatitudo formalis constitui debet, esto fortè omnium perfectissima non sit, quantum ad propriam entitatem spectata.

Respondeo 2. Admissa maiori propositione, negandam minorem, & ad probationem illius dico, esto amor in genere moris sit perfectior

cognitione, hæc tamen in genere naturæ est perfectior amore : quatenus amor ex præuia cognitione oritur, & nobilius est Dei similitudinem in se exprimere, sicque Deum ad se quodammodo trahere, quod fit per cognitionem; quam cæco modo ad Deum impelli, & veluti ab eo trahi, quod fit per amorem.

Ad confirmationem verò respondeo, per illam tantum probari voluntatem esse secundum quid præstantiorem intellectu, id tamen non impedire quin intellectus simpliciter sit voluntate præstantior; quatenus voluntas, cum ex se sit potentia cæca, absolutè nihil velle potest nisi præuia intellectus luce dirigatur: at intellectus non in omni sua operatione à voluntate pendet, maximè in vita beata in qua visio diuina erit summè necessaria. Imò amor ipse beatificus à voluntate tunc elicitus erit absolutè necessarius, neque ad illum non eliciendum vlla erit per totam æternitatem libertas in beato.

Obiicies 3. Beatitudo, formalis in ea operatione constituenda est, per quam magis accedimus ad Deum: atqui magis accedimus ad Deum per amorem, quam per cognitionem; ergo beatitudo formalis magis debet constitui in amore, quam in cognitione. Maior videtur per se euidens & certa, minor verò ostenditur, quia primi ordinis Angeli dicuntur Seraphini ab ardore charitatis, cum tamen ij qui sunt in secundo ordine, Cherubini à scientia dicantur; ex quo patet amorem potiores partes habere in beatitudine, quam cognitionem.

Respondeo negando minorem, & ad illius probationem dico, dubium non esse quin Seraphini, vt intensissima erga Deum charitate ardent, ita perfectissima illius visione, ex qua eiusmodi ardor procedit, perfruantur. Quare quod

illis nomen ab ardore concessum sit, hoc factum est ut distinguerentur ab Angelis secundi ordinis, qui non immerito Cherubini dicti sunt, ob eximias illustrationes quas ab iis recipiunt.

Obiicies 4. si formalis beatitudo consistet solum in intellectu, aut solum in voluntate, homo non esset vndequeque fœlix: quid enim ad fœlicitatem prodest, nosse summum bonum nisi ames, vel amare nisi noscas? Respondeo negando id sequi, nam etsi formalis beatitudo non sit nisi in intellectu, beatitudo tamen adæquatè spectata, secundum statum suum perfectum, occupat & replet alias animæ potentias, imo & totum corpus, saltem si sermo sit de perfecta beatitudine alterius vitæ. Vnde sicut corpus potest esse beatum, etsi formalis & essentialis beatitudo in nulla illius operatione consistat; ita voluntas potest esse beata, licet formalis beatitudo in nulla illius operatione posita sit.

Obiicies 5. si beatitudo formalis in solo intellectu posita esset, posset aliquis esse beatus, etsi voluntatem à Deo per peccatum mortale auersam haberet, quod ridiculum est. Respondeo non sequi, quia ut aliquis simpliciter dicatur beatus, non tantum requiritur ut habeat formalem beatitudinem, sed etiam ut possideat beatitudinem integram & completam qua excluditur omnis miseria, maxime peccatum; alias æquè argui posset contra aduersarios, si beatitudo formalis consisteret in intellectu, & voluntate, hominem posse esse absolute fœlicem, etsi corpus illius innumeros cruciatus perferret, quod absurdum est.

ARTICVLVS VI.

De beatitudine huius, & alterius vitæ.

QUÆRITUR 1. in quo consistat formalis beatitudo huius vitæ. Respondeo eam consistere in ea cognitione quam de Deo in hoc statu assequi possumus. Sequitur ex dictis, nam cum Deus solus sit nostræ beatitudinis obiectum, vt probatum est, & aliunde obiectum illud nequeat comprehendi seu teneri, & possideri nisi per actionem intellectus, vt etiam ostensum fuit; hinc manifestum est formalem huius vitæ beatitudinem in cognitione Dei positam esse.

Vbi aduerte 1. duplicem beatitudinem huius vitæ posse assignari, alteram naturalem, alteram supernaturalem; naturalis est quæ consistit in cognitione quam de eo naturæ viribus consequi possumus, supernaturalis verò quæ in supernaturali Dei cognitione, quam per fidem habemus, posita est.

Aduerte 2. posteriorem beatitudinem, quæ solis Christianis competit, esse longè perfectiorem priori, quæ omnibus hominibus ratione vtentibus communis est; tum quia per fidem cognoscimus Trinitatem personarum diuinarum, quam per lumen naturale assequi non possumus. Tum quia etiam ea quæ de Deo naturaliter cognoscuntur, melius & certius per fidem cognoscuntur, vt sapienter monet S. Thomas 1. p. quæst. 1. art. 1. vbi necessitatem scientiæ reuelatæ ex eo probat, quod veritas de Deo per rationem inuestigata à paucis, & per longum tempus, & cum admixtione multorum errorum acquiritur.

Aduerte 3. non modo beatitudinem naturalem huius vitæ esse valdè imperfectam, sed etiam supernaturalem; tum quia etsi fides sit cognitio certissima, est tamen inevidens & obscura, potestque cum peccato mortali subsistere, & ob mutabilitatem subiecti facile deperdi. Tum quia hominum hic degentium beatitudo, tota quanta est, tot ærumnis, laboribus, & miseriis siue animi, siue corporis circumsepta est, vt vix nomen beatitudinis mereatur.

Quæritur 2. in quo consistat formalis beatitudo alterius vitæ. Respondeo eam in clara Dei visione consistere. Hoc variis auctoritatibus Patrum probatur à Theologis, sed iis dimissis, quia propriè non sunt huius instituti, id sufficienter ex dictis videtur posse concludi. Nam cum generatim formalis beatitudo hominis consistat in cognitione Dei, itemque imperfecta beatitudo huius vitæ in imperfecta & obscura Dei cognitione posita sit, consequens est beatitudinem perfectam, qualis est vitæ futuræ, in perfecta Dei cognitione, seu in clara illius visione collocandam esse.

Confirmatur, nam vt arguit S. Thomas. 1. 2. quæst. 3. art. 8. homo non est perfectè beatus quamdiu restat sibi aliquid desiderandum & quærendum; at quamuis cognoscat effectus creatos, illi aliquid desiderandum, & quærendum restat, donec clarè cognoscat quidditatem & essentiam causæ ipsorum, nempe Dei: licet enim intellectus humanus per creaturas cognoscat Deum, quoad an est, nondum tamen quietatur illius appetitus, quia vltima perfectio alicuius potentiæ attenditur secundum rationem sui obiecti, obiectum autem intellectus est quod quid est, seu essentiare, vt dicitur in 3. de anima: quare ad perfectam illius beatitudinem requiritur,

requiritur, non tantum vt cognoscat Deum existere, sed etiam vt clarè & perspicuè essentiam illius cognoscat. Ad maiorem autem tam huius quam præcedentis quæsitæ intelligentiam,

Nota 1. claram Dei visionem excedere statum huius vitæ, viresque naturales, nec nisi virtute aliqua extraordinaria & supernaturali obtineri posse. Et sanè cum ipsa experientia satis ostendat, hominem non nisi valde imperfectam Dei cognitionem in hac vita assequi, vel hinc sufficienter intelligi potest, claram Dei visionem nemini per vires naturæ obtingere posse.

Nota 2. ad claram Dei visionem assequendam non sufficere remotionem impedimentorum, quæ ex parte corporis obstant ne animus humanus ad illam assurgere possit, vt putat Durandus, sed præterea requiri vt animus positivè iuuetur ad videndum Deum, per auxilium aliquod ordinis supernaturalis: quò fit vt neque animæ separatæ, neque Angeli ipsi etiam perfectissimi, per vires naturæ perspicuam Dei cognitionem consequi possint.

Nota 3. his non obstare quod docet S. Thomas 1. p. quæst. 12. art. 1. in homine esse appetitum naturalem videndi Deum, non enim appetitus ille eo sensu dicitur naturalis, quod per vires naturæ effectum obtinere possit, sed quia in ipsa natura hominis est quædam capacitas obedientialis, vt ad visionem Dei per auxilium supernaturale eleuetur: quo sensu Augustinus tribuit naturæ hominum posse habere fidem, gratiæ autem actu habere.

ARTICVLVS VII.

An potuerit Deus creare hominem sine ordine ad clarā ipsius visionem.

Certum est hominem de facto creatum esse ob æternam beatitudinem, quæ in visione clara Dei consistit. Dubitatur autem an potuerit Deus sine iniustitia, hominem non creare ad illum finem.

Nonnulli negant, sed oppositum, cum communi sententia, tanquam certum tenendum est. Primò, quia cùm duplex sit hominis beatitudo, ex S. Thoma 1. 2. quæst. 62. art. 1. aliisque pluribus locis, altera naturalis, quam homo assequi potest per vires suæ naturæ; altera supernaturalis ad quam non nisi mediis supernaturalibus pertingere potest, nulla ratio est cur non potuerit Deus creando hominem, illum tantum ordinare ad beatitudinem suam naturalem.

Confirmatur, nam ex eodem S. Thoma 1. p. quæst. 62. art. 1. Angelus fuit creatus beatus, quantum ad beatitudinem illam naturalem, quam viribus suæ naturæ assequi potest; non autem quantum ad aliam supernaturalem, quæ facultatem naturæ excedit. Ergo quamuis Angelus fuerit creatus ea intentione ut beatitudine supernaturali frueretur, non tamen necesse erat ut ad illam ordinaretur, cùm potuerit Deus in priori beatitudine illum relinquere: unde à pari, vel à fortiori idem dici potest de homine.

Secundò, quia potuit Deus hominem creare, cum iis tantum perfectionibus quæ illius naturæ debentur: at visio beatifica non debetur naturæ hominis, cùm sit ordinis supernaturalis;

ergo potuit Deus hominem creare, non ordinando illum ad visionem beatificam, in qua perfecta beatitudo consistit, sed tantum ad beatitudinem quandam naturalem, qualis in hoc vitæ statu per vires naturæ, & adiutoria proportio- nata haberi potest.

Confirmatur, nam si non posset Deus crea- re hominem, nisi ob finem visionis beatificæ, consequenter non posset illum creare, nisi auxi- liis supernaturalibus ad visionem illam affe- quendam necessariis, instructum, vt Aduersarij fatentur. At hoc dici non potest, siquidem ex omnium Catholicorum sententia, proprius gra- tiæ character est vt detur gratis, & non ex de- bito, si autem nõ posset homo sine gratia quoad suam naturam creari, iam gratia deberetur illi saltem ex debito connaturalitatis, quemadmo- dum debentur homini intellectus, voluntas, aliæque facultates naturales etiam corporeæ, & quidquid ad earum finem consequendum ne- cessarium est, sicque gratia non magis esset do- num gratuitum, quàm facultates illæ, aliæque iis adiuncta, quod sine aperta hæresi affirmari nequit.

Potestque refelli ex S. Thoma 1. 2. quæst. 11. art. 1. ad 2. vbi docet primò duplex esse de- bitum, vnum quidem ex merito proueniens, quod refertur ad personam, cuius est agere ope- ra meritoria; aliud secundum conditionem na- turæ, puta si dicamus debitum esse homini quod habeat rationem, & alia quæ ad humanam per- tinent naturam. Secundò illud esse discrimen inter dona naturalia & supernaturalia, quod priora carent primo debito, non autem secundo: posteriora verò, vtroque. Vnde aduersarij de- struunt rationem gratiæ, quia etsi dicant eam non dari ex debito meriti, fundato in opera-

tione personæ, contendunt tamen eam dari in creatione hominis innocentis, ex debito connaturalitatis, ita ut homo non possit sine illa creari modo connaturali.

Dices 1. non potest Deus creare hominem, nisi propter ultimum finem in quo quiescat; at ille finis non est alius nisi Deus clarè visus, ergo Deus non potest hominem creare nisi ut illius visione potiatur, & beatus sit. Respondeo 1. hoc argumento æquè concludi contra aduersarios, hominem in hoc statu naturæ lapsæ non posse creari nisi propter Deum clarè visum, cum Deus nequeat creare hominem siue peccatorem, siue innocentem, nisi ob quendam finem ultimum, nec alius sit finis ultimus hominis siue peccatoris, siue innocentis quam Deus clarè visus.

Respondeo 2. Distinguendo maiorem, non potest Deus creare hominem nisi propter ultimum finem, in quo illius appetitus innatus quiescat, transeat in quo illius appetitus elicitus quiescat, negatur. Et ad minorem dicimus, Deum clarè visum non esse finem ultimum appetitionis innatæ, & naturalis hominis, sed ad summum appetitionis illius elicite. Vnde non sequitur quod Deus non possit hominem creare nisi propter beatitudinem supernaturalem, quæ in clara illius visione consistit. Quia in aliqua inferiori appetitus innatus quiescere potest, cum alia viribus naturæ non sit possibilis.

Instabis, hominem non posse quiescere in beatitudine naturali huius vitæ, cum valde imperfecta sit, & morte finiatur, saltem quoad corpus: adeoque debere creari propter beatitudinem supernaturalem. Respondeo id non sequi, quia cum homo nequeat per vires naturæ meliorem assequi beatitudinem quam naturalem,

debet sua sorte contentus esse; neque vlla ratio est cur naturaliter appetat esse beatus, aliter quam ex natura sua petit existere. Quare cum naturaliter sit mortalis quoad corpus variis casibus obnoxium, & immortalis quoad animam, ad connaturalem illius beatitudinem sufficit, quod in hoc statu beatitudine aliqua temporali, qualem humana mortalitas patitur, quoad se totum perfruatur, & post mortem sit perpetuo beatus quoad solam animam. Quæ ratio est cur Aristoteles 1. Ethic. cap. 10. doceat nos posse esse beatos, tamen vt homines, id est quantum fert conditio & status naturæ humanæ variis defectibus subditæ: vnde dici nequit quod Deus ex prouidentia sua naturali teneatur hominem extrahere è statu illo imperfecto illius naturæ prorsus consentaneo, eumque ad finem supernaturalem ei planè indebitum eleuare.

Dices 2. non potest homo creari in beatitudine naturali sine auxiliis supernaturalibus, ergo nec sine ordine ad visionem beatificam: sequela patet, quia auxilia supernaturalia sunt media destinata ad finem illum. Antecedens ostenditur, quia non potest homo creari quin teneatur Deum diligere super omnia, ad hoc autem requiruntur auxilia ordinis supernaturalis.

Respondeo 1. Hoc argumentum posse retorqueri contra arguentes, cum ipsi putent hominem in statu isto teneri Deum diligere super omnia, etsi careat auxiliis necessariis ad ea seruanda. Nec dicant hominem per peccatum amisisse ius ad illa auxilia; Cum enim existiment ius illud in ipsa rei natura constitutum esse, per peccatum deperdi non potest, sicut per illud non deperditur ius ad facultates naturales, earumque operationes.

Respondeo 2. Negando antecedens, & ad

illius probationem dico, auxilia supernaturalia requiri ad amorem Dei supernaturalem, non autem ad naturalem, qualis esset in statu de quo agimus. Quod si instes nullam dari amorem Dei naturalem, refelleris primò ex S. Thoma 1. 2. quæst. 109. art. 3. vbi docet, diligere Deum super omnia esse quiddam connaturale homini, & in resp. ad 1. vbi, charitas, inquit, diligit Deum super omnia eminentius quàm natura, natura enim diligit Deum super omnia, prout est principium & finis naturalis boni, charitas autem secundum quod est obiectum beatitudinis. Ita ille.

Secundò ex Bullis Pontificiis contra Michaëlem Baium latis, quibus damnatur hæc propositio, Distinctio illa duplicis amoris, naturalis quo Deus amatur vt autor naturæ, & gratuiti quo Deus amatur vt beatificator, vana est & commentitia, & ad illudendum sacris literis, & pluribus veterum testimoniis excogitata. Et ita, Amor Dei naturalis qui ex viribus naturæ exoritur, ex sola Philosophiâ, per elationem præsumptionis humanæ, cum iniuria crucis Christi, defenditur à nonnullis Doctoribus.

Respondeo 3. Quamuis antecedens gratis admitteretur, consequentiam negari posse, quia ex hypothesi quòd auxilia supernaturalia essent necessaria ad beatitudinem naturalem, non opus esset ea vltèrius ordinari ad visionem beatificam; posset enim Deus illa homini conferre ea tantùm intentione, vt per illa opera fœlicitati naturali consentanea edere posset, esto iam de facto per illa iuuetur homo ad visionem beatificam consequendam. Hæcque responsio eo maiorem habet vim contra aduersarios, quòd illi existimant auxilia gratiæ dari non prædestina-

tis, sine vlllo ordine ad beatitudinem illam supernaturalem.

Ex his autem omnibus colligi potest, possibilem esse statum illum quem vocant puræ naturæ, in quo scilicet homo producat sine gratia & peccato, & cum iis tantum perfectionibus, aut defectibus qui illi naturaliter competunt, siue ex parte animæ, siue ex parte corporis; cuiusmodi sunt intellectus, voluntas, sensus internus, & externus, appetitus sensitivus, ægrotudo, mors, & similia: adeo vt ad beatitudinem tantum naturalem, qualis sine auxilio supernaturali, & indebito obtineri potest, ordinetur.



CAPVT V.

DE IIS QVÆ REQVIRVNTVR
ad beatitudinem, vt quædam
adiuncta illius.

ARTICVLVS PRIMVS.

De delectatione beatitudinem comitante.

QUæritur 1. An delectatio requiratur ad beatitudinem. Respondeo affirmatiue, quod vt intelligatur obseruandum est ex S. Thoma 1. 2. quæst. 4. art. 1. quadrupliciter aliquid requiri ad aliud, 1. sicut præparatorium & præambulum ad illud, qua ratione disciplina requiritur ad scientiam. 2. sicut perficiens aliquid, quomodo anima requiritur ad vitam corporis. 3. sicut coadiuuans extrinsecus, quomodo

anima requiritur ad aliquid agendum. 4. *Sicut* concomitans, qua ratione calor requiritur ad ignem; & hoc ultimo modo ait Sanctus Doctor delectationem requiri ad beatitudinem, delectatio enim causatur ex hoc quod appetitus requiescit in bono adepto, unde cum beatitudo nihil aliud sit quam adeptio summi boni, non potest esse beatitudo sine delectatione concomitante.

Vbi nota 1. delectationem nihil aliud esse quam quietem in bono adepto; quare cum ait S. Thomas loco iam citato, delectationem causari ex quiete, id non est intelligendum de causalitate in genere causæ efficientis, sed in genere causæ formalis; sicut si quis diceret, rationalitatem in Petro causari ex eo quod anima humana præditus sit.

Nota 2. quantum est discrimen inter beatitudinem huius & futuræ vitæ, tantum esse inter utriusque delectationem: cum enim hic Deus imperfectè à nobis cognoscatur, imperfecta etiam est delectatio quæ ex tali cognitione profuit: at cum beati in cælo visione Dei clara perfruantur, hinc eorum mentes ingenti delectatione & gaudio perfunduntur: quia scilicet quidquid appetitui humano iucunditatem asferre potest, in Deo eminentissimè continetur.

Nota 3. ex clara Dei cognitione sequi necessariò amorem illius etiam quoad exercitium, & ex amore gaudium seu delectationem; ita ut qui Deum videt non possit se impedire quin illum actu diligat, & in eius possessione suauiter conquiescat, ut sentiunt communiter Theologi cum S. Thoma, contra Scotum. Etsi enim voluntas sit ex se potentia libera & indifferens ad utrumlibet, ut tamen est natura quædam, tanto pondere fertur in ultimam suam perfe-

tionem, quæ in summi boni possessione consistit, ut ea adepti non possint non illam amare, & in ea conquiescere.

Quæritur 2. de quo obiecto delectetur Deum videntes: an de Deo tantum, an de sola Dei visione, an verò de Deo, & visione Dei simul.

Respondeo & dico 1. *Delectari de Deo ipsa immediatè.* Probatur contra Durandum, nam illud immediatè delectat, quod per se & immediatè est obiectum beatitudinis, atqui Deus est per se & immediatè obiectum beatitudinis, ergo Deus immediatè delectat. Minor, & consequentia perspicua sunt, maior verò suadetur, quia repugnat quòd illud nobis non summopere placeat, quod est summum bonum nostrum, & cuius possessione beati sumus.

Confirmatur, nam sicut auarus delectatur de pecuniis quas possidet, intemperans delectatur de cibo, & potu quibus utitur, ita beatus delectatur de Deo ipso, cuius fruitione beatus est. Nec dicas intemperantem non delectari immediatè de cibo & potu, sed tantum de eorum usu; hoc enim falsum est, cum usus ille non sit ratio formalis ob quam cibus & potus appetuntur, sed tantum coniunctio & possessio rei, per se & immediatè delectabilis.

Obiicies 1. in hac vita non desideramus, nec speramus Deum, sed visionem Dei, ergo non Deus immediatè, sed visio tantum illius est obiectum delectationis alterius vitæ. Respondeo antecedens falsum esse, ut vel ex eo manifestè colligitur, quod si spes nostra non ferretur immediatè in Deum ipsum, sed tantum mediante visione, ea non esset virtus Theologica, ut patet, quia omnium consensu Religio non est virtus Theologica, licet in Deum ipsum mediatè feratur, nempe mediante cultu Dei quem proximè respicit.

Obiicies 2. opposita versantur circa idem, atqui damnati non tristantur immediatè de Deo, sed de priuatione visionis Dei; ergo beati non delectantur proximè de Deo, sed de visione Dei. Respondeo maiorem veram esse, quando cætera sunt paria, quod hic non contingit: Deus enim non est per se malus damnatis, sed ratione pœnæ quam iis infligit: est autem per se bonus beatis, cùm per suam substantiam immediatè se illis communicet: quare esto damnati non tristantur immediatè de Deo, inde non sequitur beatos de illo non gaudere immediatè.

Dico 2. *Beatos delectari etiam de ipsa visione immediatè.* Probatur, nam visio est veluti ipsa Dei possessio, at delectamur non tantùm de bono possessio, sed etiam de illius possessione, vt patet exemplo auari qui non modo gaudet de pecuniis quas possidet, sed etiam de earum possessione; ergo & beati delectantur non modo de Deo, sed etiam de visione Dei. Confirmatur, nam non tantùm desideramus & speramus Deum, sed etiam ipsius Dei visionem in qua formalis beatitudo nostra consistit: Ergo qui visione Dei fruuntur, non tantùm de Deo, sed etiam de ipsa Dei visione delectantur.

Obiicies 1. qui ex charitate erga Deum delectatur de perfectionibus illius, non delectatur de cognitione Dei, sed tantùm de Deo cognito: ergo similiter beatus qui ex Dei visione percipit delectationem, non delectatur de illa visione, sed de Deo ipso. Respondeo negando consequentiam, & ratio discriminis est, quia in priori casu perfectiones diuinæ considerantur, tantùm vt bonum diuinum, quod nullo modo habent per talem considerationem, quæ est solum earum repræsentatio: at in posteriori bonum diuinum non tantùm spectatur vt ad Deum

pertinet, sed etiam ut est quodammodo bonum nostrum, quod non habet nisi per visionem: quare hæc visio non est tunc mera conditio representans in beato perfectiones diuinas, sed etiam est pars obiecti amati, & appetitum quiescentis.

Obiicies 2. spem huius vitæ, & delectationem alterius versari circa idem obiectum: at spes non versatur circa visionem Dei, sed tantum circa Deum visum, quia alias non esset virtus Theologica; ergo nec delectatio est de visione Dei, sed tantum de Deo viso. Respondeo egendo minorem, spes enim est circa Deum ipsum, & circa Dei visionem; versatur circa Deum tanquam circa obiectum beatitudinis, circa visionem verò Dei tanquam circa possessionem talis obiecti. Neque hinc sequitur spem non esse virtutem Theologicam, quia ut non esset, deberet versari immediatè circa visionem, & tantum mediatè circa Deum, quod non ita habet: quia cum Deus sit finis qui, & visio finis quo, ex utroque integratur vnus finis qui proximè & immediatè respicitur: ad eum modum quo pecunia, & illius possessio constituunt unum & integrum finem, qui totus proximè & immediatè desiderium hominis avari terminat.

Obiicies 3. qui delectatur intuendo picturam aliquam, non delectatur de visione picturæ, sed de ipsa pictura: ergo similiter beatus intuendo Deum, delectatur quidem de ipso Deo, non autem de visione Dei. Respondeo antecedens falsum esse, ut vel ipsa experientia ostendit: si enim quis delectationem quam ex pictura percipit, verbis exprimere velit, illico dicet se ex visione picturæ non exiguam delectationem recepisse. Et ratio est, quia pictura ipsa secundum se placere non potest, sed tantum quatenus

per visionem coniungitur, & aliquo modo possidetur: quare non illa sola per se spectata, sed ut possessa placet, adeoque & illius visio grata est.

Et quamvis antecedens admitteretur, neganda esset consequentia, quia cum Deus ut obiectum beatificans, sit bonum nostrum, nec tale sit nisi quatenus possidetur per claram suæ essentiae visionem, hinc fit ut non possit beatus gaudere de Deo viso, quin simul aliquo modo reflectatur supra illius visionem, & de ea gaudeat: esto quid simile non reperiatur in visione materiali, qua pictura percipitur.

ARTICVLVS II.

An ad beatitudinem requiratur rectitudo voluntatis.

SANCTUS THOMAS 1. 2. quæst. 4. art. 4. docet rectitudinem voluntatis requiri ad beatitudinem perfectam alterius vitæ, idque probat quia beatitudo vltima consistit in visione diuinæ essentiae, quæ est ipsa essentia bonitatis, & ita voluntas videntis Dei essentiam ex necessitate amat quicquid amat, sub communi ratione boni quam nouit, & hoc ipsum est quod facit voluntatem rectam. Vnde manifestum est quod beatitudo non potest esse sine recta voluntate. Ex quo discursu intelligitur, tum rectitudinem voluntatis esse effectum beatitudinis, tum etiam talem effectum ex beatitudine necessario profluere, ita ut qui videt essentiam diuinam non possit Deum non amare, & consequenter non habere rectam voluntatem.

Est autem non levis difficultas circa id quod docet S. THOMAS, voluntatem beati necessario

amare quidquid amat, sub ordine ad Deum, & consequenter ex vi ipsius visionis diuinæ beatum non posse peccare: quia etsi constet inter Theologos beatos peccare non posse, quidam tamen cum Scoto existimant, eam impeccabilitatem non oriri intrinsecè ex ipsa visione Dei, sed extrinsecè ex prouidentia diuina ita beatis assistente, vt eos à peccato immunes conseruet: quatenus in Deum videntibus conseruat amorem diuinum, cum quo peccatum stare non potest: quare si beatus sibi ipsi relinqueretur, etiam posita visione posset ex eorum mente, Deum non amare, sicque in peccatum impingere.

Verùm communis Theologorum sententia statuit, ex vi visionis beatificæ oriri necessariò actualem Dei amorem, eumque intensissimum: quia cum voluntas non nisi in bonum feratur, nec aliquid nisi sub ratione mali refugiat, nulla ratio est cur videns clarè essentiam diuinam, in qua bona omnia modo perfectissimo, & eminentissimo continentur, possit non amare tale obiectum; cum nec in illius fruitione aliquam mali rationem deprehendere valeat, nec ob eam se aliquo maiori, vel æquali bono priuari cogitare possit.

Dico maiori, vel æquali, nam extra Deum non sunt nisi bona creata quæ à perfectione bonorum diuinorum infinitè distant, quæque longè nobiliori modo, & ad satiandum appetitum congruentiori in essentia diuina includuntur, quare incredibile est quod ob priuationem eiusmodi bonorum, quæ vix nomen boni merentur, visio Dei apprehendi possit à beatis sub ratione minoris, vel æqualis boni, aut quod propter illa actualem Dei amorem suspendere possint.

Obiicies 1. idem est habitus charitatis in via,

ac in patria, atqui actus talis habitus in via est omnino liber, potestque suspendi, ergo & in patria eo modo suspendi potest. Confirmatur, quia habitibus utimur cum volumus. Respondeo hoc argumento tantum concludi, ex vi habitus charitatis præcisè actum amoris Dei non esse in patria necessarium, sed eo non probatur talem actum non esse aliunde necessarium, ex ipsa nativa inclinatione voluntatis, quæ posita clara Dei visione adeo efficaciter rapitur ad amandum obiectum illud infinite amabile & delectabile, ut non possit illud actu non diligere, etiam secluso habitu charitatis.

Ad confirmationem dico nos quidem in hac vita habitibus uti cum volumus, non tamen in altera, ut ex eo manifestum est, quod lumen gloriæ est habitus alterius vitæ quo beati non possunt non uti, ut fert communis Theologorum sententia. Nec refert quod maneat in alia vita idem charitatis habitus quo nunc possumus uti, vel non uti; cum enim voluntas ipsa licet hic indifferens ad amandum, vel non amandum Deum, in alia vita ex vi visionis determinetur ad eum diligendum; non mirum est quod etiam habitus charitatis in voluntate residens, ad eundem amorem determinetur.

Obiicies 2. quod Deus clarè, aut obscurè videatur id non mutat amoris obiectum, sed tantum variat applicationem illius: at varia obiecti applicatio non sufficit ut potentia ex se circa illud feratur modo liberè, modo necessariò: ergo cum voluntas liberè feratur in Deum obscurè cognitum, non potest per se & ex propria inclinatione ferri necessariò in Deum clarè visum. Respondeo maiorem absolute non esse veram, nam varia Dei applicatio quæ fit per intellectum, Deum ipsum in ratione obiectuali-

quo modo variat ; quatenus Deus clarè cognitus obicitur sub ratione boni adeo perfecti & cumulati, vt vel minima cessatio ab illius amore actuali nullam speciem boni habere possit: hoc autem non habet locum quando Deus modo imperfecto, & obscuro cognoscitur in hac vita per species creaturarum.

Nota ex hætenus dictis probari tantum certitudinem voluntatis oriri ex visione Dei, mediante illius amore, superesse autem dubitationem, an etiam immediatè ex illa necessario produere possit ; adeo vt etiam ex hypothesi quòd Deus non concurreret cum beato ad actum amoris, adhuc tamen ille ex vi visionis immediatè esset impeccabilis. Verum hoc etiam modo beatum esse impeccabilem asserimus cum communi sententia ; quia cum per visionem clarè Dei beatus perspicuè cognoscat Deum esse summum bonum, finemque vltimum ad quem se suaque omnia referre debet, sicut prior iudicio intrinsecè determinatur ad amandum Deum, ita posteriori determinatur ad omnia in illum referenda, in quo consistit rectitudo voluntatis.

ARTICVLVS III.

In ad beatitudinem requiratur consortium corporis.

Ertum est beatitudinem huius vitæ haberi non posse sine corpore, quia cum consistat in cognitione Dei, quæ in hac vita nulla esse potest saltem naturaliter, sine vsu tantasmòdum quæ organo corporeo affixant, hinc euidenter sequitur beatitudinem in hoc statu consortium corporis exigere : sed du-

bium est quid sentiendum sit de beatitudine alterius vitæ.

Respondeo & dico 1. *Nihil repugnare ex rei natura, quin anima humana a corpore separata beatitudine perfrui possit, si aliunde non impediatur.* Ratio est, quia si ad beatitudinem ex natura rei consortium corporis requiritur, hoc ideo est quia beatitudo haberi non potest sine usu phantasmatum: at hoc falsum est, quia beatitudo consistit in clara visione diuinæ essentiae, hæc autem visio non potest iuari per phantasmata, quin potius per illa impediretur, cum non nisi res materiales & corporeæ, à quarum entitate essentia diuina infinitè distat, per phantasmata representari possint.

Dico 2. *De facto animas iustorum post mortem frui clara visione diuinæ essentiae, neque earum beatitudinem essentialem usque ad corporum resurrectionem differri.* Hæc assertio vt ex fide certa communiter defenditur à Theologis cum S. Thoma 1. 2. quæst. 4. art. 5. quia tantum abest vt Deus animas separatas ab omnibus peccatis liberet, iamque proximè aptas ad beatitudinem velit felicitate essentiali priuare, donec in comuni resurrectione suis corporibus iunctæ sint; quin potius Ecclesia, quæ est interpretis voluntatis diuinæ, conceptis verbis statuit in Concilio Florentino, sessione vltima, animas plenè à peccatis purgatas in cælum mox recipi, & intueri clarè ipsum Deum Trinum & vnum, sicuti est, pro meritorum tamen diuersitate aliam alia perfectiùs.

Supponit etiam apertè iustos post mortem beatitudine perfrui, cum illos inuocet, in beatorum numerum adscribat, in eorum honorem templa construat, festa instituat, eorumque reliquias veneretur: hæc enim & similia pietatis

officia sanctis exhibita satis ostendunt, Ecclesia sensum esse eos frui in cœlo visione diuina, nosque eorum apud Deum intercessionibus iuari posse.

Obiicies 1. non redditur merces operariis in vinea laborantibus nisi ad Vesperam, vt traditur Matth. 20. at per Vesperam intelligitur mundi finis, vnde cum hæc parabola significet beatitudinis cœlestis retributionem, ea indicatur non tribui iustis beatitudinem nisi post diem iudicij. Respondeo per Vesperam in ea parabola non intelligi finem mundi, sed finem vitæ; vel si id ad finem mundi extenditur, de publica retributione intelligendum esse, aut certè de retributione omnino completa, quæ solum obtinebitur in fine mundi, & de qua intelligitur illud Christi Matth. 25. *Venite benedicti Patris mei, percipite regnum, &c.*

Obiicies 2. innumeros Patres, qui apertè affirmant animas non fore beatas nisi post resurrectionem, & interim in aliquo loco extra cœlum seruari. Maximè verò noster Bernardus in eam sententiam propendet ser. 3. de omnibus Sanctis cum ait animas iustorum in illam beatissimam Dei domum nec sine nobis ingressurus, nec sine corporibus suis. & ser. 4. dicens, eas quiescere sub altari, donec veniat tempus quando super altare exaltentur: id est, vt aliqui explicant, donec in cœlum euehantur, & beatitudine essentiali perfruantur.

Respondeo 1. Negari non posse quin plerique Patres apertè faueant sententiæ quam impugnamus, & frustra nonnullos laborare vt eos omnes in bonum sensum trahant. Verùm hæc Patrum authoritates non debent officere comuni sententiæ, postquam saltem ab Ecclesia aut definita: at neque vitio verti debet Patri-

bus illis, quod sententiam à fide alienam sequenti sint, cum nondum res esset definita.

Respondeo 2. Quod speciatim ad Sanctum Bernardum spectat, cum plerisque locis aperte favere nostræ sententiæ. Nam in primis serm. in festiuitate S. Malachiae ita scribit, *Non immerito hodie Malachias in consortium Angelorum recipitur, & adeptus quod nomine dicebatur: & ante quidem Angelus erat, non minus puritate, quam nomine; sed nunc felicius gloriosi in eo interpretatio nominis adimpletur, quando pari cum Angelis gloria & felicitate latatur.*

Deinde in ser. de obitu Humberti, ait illius animam volasse ad creatorem suum, eum coram se iam habere fontem illum puritatis quem tanto ardore sitiebat, immersumque esse in illam diuinæ pietatis abissum, cuius memoriam abundantiae suauitatis tam deuotè cructare solebat; temporalia fuisse quæ in Humberti morte visa sunt, sed iam obtinere gaudium & læticiam in perpetuas æternitates, eumque maiori nunc charitate præditum esse, cum illi summæ charitati, quæ Deus est, inhæret.

Rursus epist. 266. ad Abbatem Sugerium, *Quid tibi, inquit, & terrenis exuniis, qui ad cælum iturus, stola gloria mox indui habes, præstio est, sed vestito non dabitur.* Et post pauca, *Te expectat pax illa quæ exuperat omnem sensum, te expectant iusti donec retribuatur tibi, te expectat gaudium Deitui.* Et rursus, *tantum memento nostri cum peruenieris quo nos præuenis, ut & nobis citò detur venire post te, & ad te peruenire.* Ex quibus omnibus, aliisque permultis quæ breuitatis causa prætereo, luce clarius est Bernardum in quæstione proposita nullo modo à communi Ecclesiæ sensu dissentire, siue quoad beatitudinem, siue quoad locum beatitudinis. Itaque

Respondeo 3. S. Bernardum priori loco in

iectione citato, nihil aliud velle quam animas sanctas non recepturas beatitudinem consummatam, nisi postquam corporibus unitæ erint in resurrectione generali. Cuius rationem affert his verbis, *Neque enim præstari decet egram beatitudinem, donec sit homo integer cui deus, nec perfectione donari Ecclesiam imperfectam.* sequitur enim, ut liquet, de integra seu consummata beatitudine, quæ necessario exigit consortium corporis, cum in illud ab anima sit fundenda. Vnde statim addit, *Acceperunt ianuas stolas, sed non vestientur duplicibus, donec stiamur & nos, &c.* Stola enim prima, ipsa est am diximus felicitas, & requies animarum, secunda verò immortalitas & gloria corporum. Nam per secundam stolam intelligat solam immortalitatem & gloriam corporis, consequens vel eum nullam beatitudinem essentialem imabus iustorum, etiam post resurrectionem buere, quod nimis absurdum est; vel per stolas animabus collatas post mortem, eiusmodi beatitudinem intelligere.

Vnde cum ait, animæ iustorum in beatissimam Dei domum non ingressuras sine nobis, domum beatissimam intelligit beatitudinem consummatam, quæ consortium corporis requirit. Distinguit enim triplicem statum animarum, primum in tabernaculis, seu in corpore, secundum in atriis, tertium in domo Dei; & ista vocat statum animarum, beatitudinem secundum consummatam possidentium; domum vero Dei statum earum quæ perfecta beatitudine perfruuntur. Vnde addit, *sed quoniam in ipso quoque atriis nonnullus ut auditu defessus est, beati vno qui habitant in domo tua Domine, ubi defessus ille atriorum in eo consistit, quod in iis non omnimoda, seu vndeque perfecta beati-*
o.

Et sane quod Mellifluus noster Doctor velit etiam animas iustorum post mortem recipi in cœlum, inde perspicue colligitur, quod ser. 4. sequenti illud ponit discrimen inter sinum Abrahamæ, & locum eiusmodi animarum, quod ille in tenebris, hic in luce multa, in inferno ille fuerit, iste in cœlo. Et ser. 5. ait celebrari festiuitatem omnium Sanctorum siue cœlestium, siue teriestrium; *Sunt enim*, inquit, *Sancti de cœlo, & sunt sancti de terra, itemque eorum qui de terra sunt, quidam adhuc in terra, alij iam in cœlo.* Unde postea ait eos specialiter honorandos, qui post multos agones iam nunc triumphant in cœlis coronati, quoniam legitimè certauerunt.

Respondeo 4. Locum posteriorem in objectione propositum non ita faciliè explicari posse, non quod putet Bernardus animas non esse in cœlo, vt ex verbis illius perperam deducitur, hoc enim apertè falsum esse iam ostensum est; sed quia explicans quo sensu animæ iustorum quiescant sub altari, & in mundi fine super altare sint exaltandæ, per altare intelligit humanitatem Christi, docetque animas sub illa foeliciter quiescere, donec super eam exalten-
tur, non quidem prælatione, sed visione & contemplatione; quia filius se nobis ostendet, non in forma serui, sed in forma Dei. Quibus verbis sentire videtur, animas iustorum post mortem videre solam Christi humanitatem, & tantum post resurrectionem ad visionem ipsius diuinitatis eleuandas. Quia tamen hæc sententia nullo modo potest cohærere cum testimoniis allatis, quibus perspicue ostendimus animas iustorum, ex mente huius beatissimi Patris, frui nunc visione Dei, quidam fatentur eum parum hac in re consequenter loquentum, alij verò putant ita debere intelligi, vt tantum velit animas

iustorum nunc solam Christi humanitatem perfectè cognoscere, post resurrectionē verò etiam illius diuinitatem perfectè visuras, eoque sensu super altare seu humanitatem exaltandas: quia perfectè intuebuntur etiam diuinitatem, quæ humanitate longe altior & præstantior est. Atque hæc pro defensione S. Bernardi dicta sufficiant, si quis solidiorem aliquam verborum illius expositionem suggererit, eam non grate amplectemur.

ARTICVLVS IV.

*An beatitudo anima augeatur, vel potius minuat
ex consortio corporis.*

IN hac difficultate tres sunt sententiæ, Prima est eorum qui putant beatitudinem animæ ex corporis consortio minui; Secunda eorum qui dicunt è contra eam intensiue perfici; Tertia verò, quàm sequuntur communiter Theologi, eorum qui docent beatitudinem intensiue quidem eandem manere, sed extensiue perfici.

Respondeo & dico I. *Essentialem animæ beatitudinem non minui ex consortio corporis.* Probatur I. quia essentialis beatitudo est operatio intellectus à corpore omnino independens, vt supra dictum est: Ergo non minùs perfectè elici poterit intra corpus, quàm extra illud; sequela patet, quia etiam intra corpus erit omnino independens à corpore: quomodo ergo ex consortio corporis impediri poterit?

Confirmatur, nam anima determinatur necessario ad tantam visionem Dei, quantum est lumen gloriæ illi infusum; hanc autem determi-

nationem minui non posse per consortium corporis, vel ea ratione ostenditur, quia ne ipsa quidem beati anima eam tantillum minueret, vel retardare potest.

Probatur 2. quia si beatitudo animæ minueretur ex consortio corporis, sequeretur Christum minus fuisse beatum quoad animam, quamdiu hic vixit, imò nunc esse minus beatum in cælo, quam fuerit illius anima in triduo mortis; quod sanè absurdum est, & sine temeritate, ne quid grauius dicam, affirmari nequit.

Obiicies, quando anima vnita est corpori, varias operationes exercet quas in statu separationis non eliciebat, sicque non videtur posse tanta intensione in Deum ferri, quanta cum est separata. Respondeo negando consequentiam, quia omnes illæ operationes sunt longè inferioris ordinis, neque vllam vim habent impediendi actum, ab intellectu lumine gloriæ informato, elicitum. Aliàs dicendum esset, Angelos hominum custodes minus esse beatos, quam si nostra non curarent, solique Deo intenti essent. Imò non possent Sancti pro nobis apud Deum intercedere, sine iactura aliqua suæ felicitatis, quod quàm ridiculum sit existimare, nemo non videt.

Dico 1. *Beatitudinem anima non augeri intensiue ex consortio corporis.* Probatur, nam beatitudo animæ non potest augeri intensiue, nisi augeatur lumen gloriæ, nec lumen gloriæ nisi augeantur merita: atqui merita non augentur præcisè ex consortio corporis, ergo neque lumen gloriæ, neque beatitudo animæ propterea augetur quoad intensiorem. Confirmatur, nam anima separata non est amplius in statu merendi, aut demerendi, sed tantum recipiendi præmium, aut pœnam, pro iis quæ egit in corpore, siue bene, siue malè.

Obiicies 1. anima non habet esse perfectum extra corpus, sed tantum in corpore; ergo neque habet operationem perfectam extra corpus, sed tantum in corpore; quia operari sequitur esse. Quare cum formalis beatitudo consistat in operatione animæ, consequens est animam esse perfectius beatam in corpore, quam extra corpus. Respondeo distinguendo antecedens: anima non habet esse perfectum extra corpus, si consideretur ut est forma corporis, concedo; si verò spectetur ut est capax beatitudinis, nego: est enim capax beatitudinis quatenus habet potentiam intellectiuam, per lumen gloriæ ad visionem diuinæ essentiae, etiam extra corpus, eleuabilem. Vnde neganda est consequentia, quia beatitudo non consistit in operatione animæ, ut est forma corporis, sed ut habet esse intellectuale, supra totam naturam corpoream eleuatam.

Obiicies 2. Illa operatio est perfectior & intensior, quæ non est impedita, quam ea quæ est impedita, atqui beatitudo animæ separatæ est impedita, non autem beatitudo animæ coniunctæ corpori, ergo hæc illa est perfectior & intensior. Maior perspicua videtur, minor autem probatur ex S. Bernardo serm. 3. de omnibus Sanctis ubi ait, naturale desiderium ad corpus in animabus Sanctorum adeo vigere, ut tota earum affectio non tendat in Deum. Respondeo negando minorem, & ad probationem illius dico desiderium illud elicitum quo animæ feruntur in propria corpora, non esse coniunctum cum anxietate aliqua, neque villo modo posse impedire, retardare, aut minuere visionem Dei claram, vel amorem illius beatificum, vel delectationem summam ex visione & amore tantæ boni ortam, ut satis patet ex dictis.

Idque vlteriùs confirmatur, quia negari non potest quin summa tristitia efficacius impediatur perfectam beatitudinem, quam appetitus ille naturalis ad corpus; & tamen summa tristitia qua Christus in passione vexabatur, non impediebat, aut minuebat beatitudinem essentialem qua in parte animi superiore fruebatur, vt omnes Theologi fatentur; ergo multò minùs eam impedit, aut retardabit appetitus ille naturalis quò animæ propriis corporibus vniri cupiunt. Eò vel maximè quia etsi desiderium illud sit naturale, est tamen omnino subordinatum visioni beatificæ, quò fit vt non magis visionem illam impediatur, quam in communi sententia, motus Lunæ primi mobilis cursum impedire possit.

Nec refert quod Bernardus ait, desiderium illud impedire ne tota animarum affectio in Deum tendat, duo enim in illa affectione spectari debent, primò quod est in ea præcipuum & essentialiale, secundò quod in ea est minùs præcipuum, & veluti accidentarium seu consequens. Itaque non vult Bernardus eum affectum primo modo spectatum, non habere totam suam perfectionem in anima separata, sed tantum secundo modo, quatenus anima beata, cum optet ita Deum per se possidere & amplecti, vt ex ea possessione resultet gloria in proprium corpus primum quidem cumulatissimè obtinet, non secundum, adeoque illius beatitudo habet totam suam perfectionem intensiuam, quam haberet in corpore, non extensiuam, de qua iam dicitur.

Dico 3. *Beatitudinem anima augeri extensiuè ex coniunctione cum corpore.* Probatur, quia post resurrectionem totus homo beatus erit, & non tantum ex parte; hoc autem fiet quia beatitudo animæ in corpus redundabit, adeoque extensiuè perficietur. Tunc etiam omnino exple-

tum

tum erit desiderium illud naturale quo anima appetit corpus, non qualecunque, sed suo statui proportionatum, ac proinde gloriæ particeps. Quare dubium non est quin magnum gaudium ex illius consortio sit perceptura; ac proinde quin ipsius gloria maior futura sit, saltem extensivè.

Quo loco aduerte ex S. Thoma 1. 2. quæst. 4. art. 6. bonam corporis dispositionem requiri ad beatitudinem omnibus modis perfectam, tum antecedenter, quatenus etsi beatitudo essentialis in sola anima reperiatur, ad omnimodam tamen beatitudinem requiritur perfecta omnis appetitionis satietas, quæ in corpore non bene affecto obtineri non potest: tum consequenter, quatenus ut docet Augustinus epist. 56. ad Dioscorum, tam potenti natura Deus fecit animam, ut ex eius plenissima beatitudine redundet in inferiorem naturam incorruptionis vigor. Ex quibus refellitur insanus error Porphyrii, qui existimabat non modo nullam corporis dispositionem ad beatitudinem esse necessariam; sed etiam animam intra corpus non posse esse beatam. Caterum ut quæ de dotibus gloriosis, cum quibus beati resurgent, clarius à Theologis tradi solent, percipias,

Nota 1. homines resurrecturos cum nativa effigie, ita ut quilibet facile discernere possit ex vultu eos quos hic novit, etsi in beatis futuri non sint defectus corporis quos à natiuitate, vel aliunde contraxerunt.

Nota 2. beatos resurrecturos in ea ætate in qua Christus resurrexit, & singulos habituros eam corporis quantitatem quam, natura non errante, habuissent: unde sicut inter illos erit vultuum dissimilitudo, ita & quantitatis inæqualitas; quia hæc ad maiorem pulchritudi-

Etica.

E

nein & venustatem beatæ illius Reipublicæ conducent. Ibi etiam erit sexuum diuersitas, etsi nulla eorum commixtio futura sit, nulla-que libido ad eam impellens.

Nota 3. beatos omnes resurrecturos cum quatuor eximiis dotibus, nempe claritatis, impassibilitatis, agilitatis, & subtilitatis; sicut etiam Christus cum iis resurrexit. In corporibus vero damnatorum erit passibilitas, ponderositas actu deorsum trahens, opacitas, similesque defectus ex principiis naturæ profluentes, non tamen alij quibus in hac vita obnoxij fuerunt, vt cum S. Thoma multi docent.

Nota 4. claritatem corporum beatorum non consistere in puro eximio colore se clarè oculis intuentium manifestante, neque in politura qua instar speculi crystallini soli exposti luceant, sed in vera luce corporea qua interiùs, & exteriùs ad modum astrorum splendebunt.

Nota 5. impassibilitatem communicari corpori glorioso eo ipso quòd Deus, cuius potentia est infinita, vult efficaciter continuare influxum illum quo intimè conseruat illud corpus, eiusque qualitatuum Symmetriam, partium vniionem, ac omnem internam & externam dispositionem. Sic enim fieri nequit vt corpus gloriosum ab aliqua re creata alteretur, corrumpatur, aut diuidatur. Non tamen alienæ erunt ab eorum statu alterationes perfectiuz, quales requiruntur ad operationes visus, auditus, aliorumque sensuum.

Nota 6. agilitatem corporum beatorum non esse habilitatem ad se mouendum motu progressiuo, beati enim non tantum hoc modo se mouebunt, sed etiam motu simplici, quo totum corpus vno impetu instar globi feretur. Neque ad eam sufficere naturalem virtutem

animæ, etsi supponatur ponderositatem corpori detrahendam, sed requiri qualitatem aliquam supernaturalem animæ inditam, qua corpus proprium incomprehensibili celeritate, in quamcunque partem voluerit, impellat.

Nota 7. dotem subtilitatis non in eo consistere, quod corpora beatorum futura sint spiritalia, aut tenuissima in modum aëris, sed in eo quod ab illis diuinitus tollatur modus quidam naturalis quo res quantitativæ & extensæ ita locum occupant, ut ab eo omne aliud corpus excludant. Quare eo modo ablato, poterunt beati corpora omnia, quantumvis solida, summa facilitate peruadere; qua ratione Christus lapidem sepulchri in resurrectione, & cœlos omnes in Ascensione penetrauit.

ARTICVLVS V.

Utrum ad beatitudinem bona externa requirantur.

R Espondeo & dico 1. *Ad beatitudinem huius vita requiri bona externa.* Ita S. Thomas 1. 2. quæst. 4. art. 7. Probat, quia nemo propriè felix dici potest, nisi pace & quiete interna potiatur: at qui bonis necessariis ad vitam commodè transigendam caret, quique cum egestate, aliisque incommodis luctatur, pace interna non fruitur: ergo ille felix dicendus non est.

Confirmatur, quia cum felicitas sit status omnium bonorum aggregatione perfectus, ut omnes concedunt, certè ridiculum est existimare, eum integrè potiri beatitudine qui iis subsidiis priuatus est, sine quibus vita non potest non illi esse molesta, & acerba.

Vnde refelluntur Stoici, qui contra Peripateticos existimabant beatitudinem in sola virtute consistere, adeoque hominem in summis angustiis & doloribus, imo & in ipso Phalaridis tauro perfectè beatū esse posse. Refelluntur inquam, quia dici nō potest eum esse omnino & completè beatum, cuius media pars, nempe corpus acerrime torquetur, esto fortè alia pars scilicet animus, magno perfundatur gaudio. Alias dici posset Christum in vita, & morte fuisse cōpletè fœlicem quoad animam, & corpus, quod à communi Catholicorum sensu abhorreret.

Obiicies ex Euangelio constare, beatitudinem huius vitæ in paupertate, luctu, dolorum perpeffione, aliisque incommodis positam esse; vnde sequitur bona aliaque commoda externa ad beatitudinem illam non esse necessaria. Respondeo prædicta non constituere beatitudinem huius vitæ, sed potius illam impedire; spectare tamen ad beatitudinem vitæ alterius, tanquam dispositionem ad illam, aut meritum illius: quia Deus non vult coronam vitæ æternæ nisi iis largiri, qui illam per varias tribulationes, exemplo Christi, promeriti fuerint.

Dico 2. *Cum S. Thoma ibid. bona externa non requiri ad beatitudinem alterius vitæ.* Probatur, quia beatitudo illa duobus modis spectari potest, vel ut competit animæ separatae, vel ut tribuitur animæ corpori coniunctæ: at perspicuum est ad beatitudinem priori modo spectatam, non requiri bona externa, cum ne quidem corpus ad eam requiratur. Certum etiam est non exigi ad illam, sub posteriori consideratione, corpus enim resurget immortale, adeoque non indigebit bonis externis, quæ ad vitam animalem hic sustentandam sunt necessaria.

Obiicies 1. Sanctis promitti cibum & po-

rum, aliaque bona externa, vt constat ex Euangelio: ergo eiusmodi bona requiruntur ad completam beatitudinem alterius vitæ. Respondeo in hoc argumento fundari opinionem Millennariorum, seu eorum qui olim docebant beatos post Resurrectionem regnuros cum Christo per mille annos in vrbē Hierusalem, qualis describitur in Apocalypsi, ibique deliciis corporalibus, omniumque bonorum externorum copia potituros. Verum error adeo pinguis iamdiu à Sanctis Patribus damnatus est, & ab Ecclesia proscriptus, quia vt patet ex Matth. 22. *In Resurrectione neque nubent, neque nubentur, sed erunt sicut Angeli Dei in cælo.* Et ex Roman. 14. *Non est regnum Dei estia & potus, sed iustitia, & pax, & gaudium in Spiritu Sancto.* Quare verba quæ obijciuntur Metaphoricè sunt accipienda, ita vt per cibum & potum significetur summa delectatio quæ beatitudinem comitatur, per diuitias rerum abundantia, quæ in Deo bonorum omnium fonte percipietur, &c.

Obiicies 2. si in alia vita non sunt futura bona externa, ergo nullus in ea futurus est sensuum externorum vsus: at consequens est absurdum, quia sequeretur inutilem fore corporum Resurrectionem, ergo & id vnde sequitur. Respondeo negando sequelam maioris, nam etsi nullus in cælo ciborum & voluptatum carnalium vsus futurus sit, negari non potest quin beati maximam & purissimam voluptatem percepturi sint, tum oculis corporis intuendo corpora beatorum, maximè Christi; ac beatæ Virginis; tum auribus suauissimum cantum, quo beati continuo in diuinas laudes effundentur, percipiendo; tum aliis sensibus obiecta singulis pro eo statu proportionata, quæ in loco illo summæ felicitàtis minimè credendum est de futura, amplectendo.



LIBER II.

DE ACTIBVS, ET passionibus humanis.

Cum actus humani sint media quibus beatitudinem comparamus, rectus ordo postulat ut postquam actum est de beatitudine, de actibus humanis differamus, & quia passionibus sunt etiam quidam actus humani, quatenus à voluntate reguntur, de iis etiam, propter connexionem materie, hoc loco agendum erit.

CAPVT PRIMVM.

DE ACTIBVS HVMANIS, secundum se.

ARTICVLVS PRIMVS.

Quid sit proprie actio humana.



RESPONDEO, ex S. Thoma 1.2. quæst. 1. art. 1. actionum quæ ab homine fiunt, eas proprie dici humanas quæ sunt propriæ hominis, inquantum est homo. Differt autem homo à creaturis irrationalibus, in eo quod est suorum actuum dominus; vnde

illæ solæ actiones vocantur propriè humanæ, quarum homo est dominus; cumque homo sit dominus suorum actuum per rationem & voluntatem, seu per liberum arbitrium quod est facultas voluntatis & rationis, hinc sequitur eas actiones dici propriè humanas, quæ ex voluntate deliberata, seu ex libero arbitrio procedunt: si quæ autem aliæ actiones homini conveniunt, eas possunt quidem dici actiones hominis, sed non propriè humanæ, cum non sint hominis, in quantum est homo. Verum ad maiorem huius doctrinæ illustrationem,

Obiicies 1. Eæ sunt actiones hominis, ut homo est, quæ soli homini competunt: at multæ actiones non liberæ, soli homini competunt, ut primæ cogitationes quæ voluntatem omnem anteuertunt, & motus primi voluntatis qui omnem deliberationem rationis præcedunt: ergo falsum videtur solas actiones liberæ esse proprias hominis, ut homo est. Respondent aliqui eiusmodi actiones, etsi solius hominis proprias, non dici actiones hominis, ut homo est, quia non conveniunt homini, nisi ex aliqua parte, nempe vel intellectus, vel voluntatis: homo enim est totum aliquod constans ex ratione & voluntate, adeoque quod illius est proprium ut homo est, debet illi competere ex toto, seu secundum rationem & voluntatem; quomodo illi solæ actiones liberæ conveniunt.

Verum simplicius, magisque ad mentem S. Thomæ dici potest, actionem aliquam duobus modis dici posse propriam hominis, ut homo est, vno modo secundum entitatem seu substantiam, qua ratione actus illi primi intellectus & voluntatis sunt proprii hominis ut homo est; alio modo secundum modum agendi hominis proprium, qui est per libertatem, qua ra-

tione solæ actiones liberæ dicuntur humanæ, & propriæ hominis in quantum homo. Aliæ enim actiones, etsi soli homini competant, fiunt cum determinatione ad vnum; qui agendi modus non est proprius hominis, sed omnibus rebus naturalibus competit.

Obiicies 2. non rectè dici actiones humanas esse illas quarum homo dominus est, cum serui multas actiones humanas seu liberas eliciant, quarum tamen ipsi dominium non habent, sed ij quorum sub potestate sunt. Respondeo duplex esse dominium, aliud ciuile; aliud naturale: ciuile competit dominis in opera seruorum, naturale verò ipsis seruis competit, quatenus possunt aliquid facere, vel non facere: & hoc posterius dominium sufficit vt eorum actiones dicantur liberæ & humanæ.

Obiicies 3. visio clara Dei qua beati in cœlo perfruuntur, amor ex ea visione ortus, & gaudium ex utroque procedens sunt actiones propriæ humanæ, quamuis non fiant liberè, sed necessariò. Respondent aliqui, cum diximus actionem humanam esse liberam, nos agere de actionibus illis humanis in quibus nos ipsi in hac vita mortali exercemus, non autem de actionibus humanis alterius vitæ. Verùm hæc responsio refellitur, quia cum actiones illæ beatificæ fiant modo naturali, seu ad vnum determinato, non est potior ratio cur debeant dici actiones humanæ, quam actiones illæ intellectus & voluntatis quæ in hac vita fiunt cum determinatione ad vnum. Quare negandum quod in obiectione gratis, & sine fundamento supponitur.

Obiicies 4. in pueris & amentibus est libertas agendi vel non agendi, & tamen in iis non est propriè actio humana, ergo actio humana

non est idem ac libera. Respondeo pueros & amentes non habere nisi libertatem valde imperfectam, cum non tam ratione deliberante, quam sensu & appetitu ducantur: unde neque in illis est proprie actio humana, sed vt summum, actio voluntaria.

ARTICVLVS II.

Quomodo se habeat actio voluntaria ad liberam & humanam.

Nonnulli has actiones confundunt, distinctione tamen opus est. Nam voluntarium à voluntate dicitur, voluntas autem sumitur tum improprie pro appetitu sensitivo, qua ratione bruta interdum dicuntur habere voluntatem; tum proprie pro solo appetitu rationali, qui præcedente cognitione intellectus obiectum suum amplectitur.

Rursus voluntas hoc posteriori modo accepta, sumitur dupliciter, primò pro appetitu rationali operante per modum naturæ, seu cum determinatione ad vnum. Secundò pro eodem appetitu vt operatur per modum principij liberi, seu cum indifferentia ad vtrumlibet.

Iam si voluntas sumatur primo modo, prout significat appetitum sensitivum, voluntarium à voluntate hoc modo sumpta dependens, nihil est aliud quam actio quæ fit à principio intrinseco, præcedente sensus cognitione: qua ratione actiones brutorum dicuntur voluntariæ, seu spontaneæ.

Vbi nota spontaneum sumi pro eo quod non fit inuite, illud autem dicitur fieri inuite, vel quod fit per violentiam, renitente appetitu,

vel quod fit per ignorantiam. Vnde ad spontaneum seu voluntarium requiritur vt fiat ex interna appetitus inclinatione, & cum rei cognitione.

Quòd si voluntas secundo modo accipiatur, nimirum pro appetitu rationali operante per modum naturæ, voluntarium ab ea vt sic dependens nihil est aliud quàm actus procedens à principio intrinseco, præcedente intellectus cognitione. Qua ratione voluntarium non competit brutis, vt perspicuum est, cùm appetitu rationali & intellectu careant. Nō etiam voluntarium eo sensu dici potest de omnibus hominis operationibus, cùm pleræque ex illis, nimirum liberæ, non pendeant à voluntate, vt operante per modum naturæ, sed de iis tantum quæ fiunt sine libertate, quales sunt primi motus voluntatis, amor quo beati Deum diligunt, & similes actus qui præuia cognitione intellectus necessariò à nobis fiunt. Et eodem sensu dici debet voluntarius amor quo Deus seipsum diligit, cùm ab illius voluntate, præcedente cognitione suæ bonitatis necessariò procedat; itemque amor quo Pater, & Filius producant Spiritum sanctum.

Tandem, si voluntas accipiatur tertio modo, seu pro appetitu rationali vt operante ex indifferentia, voluntarium à voluntate sic considerata dependens, coincidit cum libero; adeo vt omnis actus liber sit voluntarius, & nullus actus sit voluntarius qui liber non sit. Quare voluntarium hoc modo acceptum rectè describitur à nonnullis, quod positis omnibus ad agendum requisitis potest fieri, vel non fieri; quæ est vulgaris definitio libertatis, de qua sequenti capite agendum erit.

Atque hoc sensu sumitur voluntarium apud

Augustinum lib. de vera relig. cū ait, peccatum vsque adeo esse voluntarium malum, vt non sit peccatum, nisi sit voluntarium: siquidem ad peccatum non sufficit voluntarium illud quod cum necessitate coniunctum est, quis enim peccat in eo quod nullo modo caueri potest, peccatur autem, caueri igitur potest, vt ait idem Aug. lib. 3. de libero arb. cap. 18. sed requiritur voluntarium hoc vltimo modo acceptum, pro actu qui sit ex indifferentia & libertate. Vnde & Pio V. & Gregor. XIII. damnata est aliās hæc propositio Michaelis Baij, *Homo peccat etiam damnabiliter, in eo quod necessario facit.*

Ex his autem colligi potest 1. eos falli qui liberum confundunt cum voluntario, ita vt velint ad libertatem actionis sufficere quod voluntarie seu sponte facta sit, etsi fiat necessario: sic enim libertas infantibus & stultis competere, cū in iis sit voluntarium, seu spontaneum vt omnes fatentur.

2. Eos etiam hallucinari, si qui sunt qui voluntarium vice versa confundunt cum libero, adeo vt nullum voluntarium admittant præter id quod perfectè liberum est, id est quod sit cum indifferentia ad vtrumlibet. Nulla enim est ratio cur illæ actiones non dicantur voluntariæ, quæ ab intrinseca voluntatis inclinatione procedunt, esto sint necessariae, & eatenus non liberae.

3. Voluntarium ita comparari cum libero, vt latius pateat, licet enim actus liber possit dici voluntarius, quatenus à voluntate realiter profuit, non tamen debet dici voluntarius, quatenus voluntarium dicit dependentiam à voluntate sumpta siue pro appetitu sensitivo, siue pro rationali operante per modum naturæ. Et similiter ij actus voluntarij qui fiunt ex necessitate,

non possunt dici liberi, libertate propriæ dictæ quæ est ad vtrumlibet: licet alio sensu interdum dicantur liberi, quatenus nempe liberum illud dicitur quod libenter seu sponte, & non coactè fit.

4. Cum ad actum humanum requiratur libertas propriè dicta, imò actus humanus & liber reciprocè dicantur, eodem modo actum voluntarium se habere ad actum liberum.

ARTICVLVS III.

Quomodo se habeant actio voluntaria, & libera ad moralem.

R Espondeo & dico 1. *Non omnem actionem voluntariam posse dici moralem.* Probatur, nam illa actio dicitur *Moralis*, à qua homo denominatur moraliter bonus, aut malus: at homo sic non denominatur à quacunque actione voluntaria, siquidem actiones voluntariæ quæ fiunt ex impulsu naturæ, & ex necessitate, non denominant hominem moraliter bonum, vel malum, sed illæ tantum quæ cum libertate coniunctæ sunt: alias actiones puerorum, & stultorum essent moraliter bonæ vel malæ, cum sint voluntariæ.

Dico 2. *Non esse idem formaliter actionem esse Moralem, & esse liberam.* Probatur, tum quia dantur aliqui actus quoad speciem indifferentes, seu qui nec sunt moraliter boni, nec mali, etsi ex ratione sua sint liberi. Hoc autem falsò diceretur, si idem esset formaliter actum aliquem esse *Moralem*, & esse liberum.

Tum quia si moralitas actus ab illius libertate formaliter sumenda esset, sequeretur eundem

actum quoad libertatem immutatum manentem, non posse variari quoad moralitatem; cuius tamen oppositum contingit, ut cum ille qui ignorans prohibitionem, incipit comedere cibos vetitos, eandemque comestionem prosequitur postquam prohibitionis conscius est: tunc enim est eadem comestio & Physicè & libere spectata, non tamen moraliter, cum in ea ut sic duæ partes distingui possint, quarum una est moraliter mala, non alia.

Obiicies 1. actus dicitur *Moralis* à more seu assuefactione, atqui assuefactio non nisi in actibus liberis locum habet; ergo esse *Morale* & esse liberum idem sunt. Respondeo 1. maiorem falsam esse, actus enim siue boni siue mali dicuntur *Morales*, etsi rarissimè fiant; quare moralitas non sumitur ab assuefactione, sed à conditione aliqua actus qua quis denominatur *moratus*, illiusque operationes dicuntur *mores*, siue boni siue mali. 2. Minorem quoque falsam esse, quia etsi assuefactio non habeat locum in rebus sensu expertibus, negari tamen non potest quin reperiatur in brutis; cum hæc ut experientia constat, assuefactionem quandam & facilitatem ad promptius operandum comparent.

Obiicies 2. actus *Moralis* non distinguitur ab humano, nec humanus à libero; ergo nec *Moralis* à libero distinguitur. Et confirmatur id sententia communi Theologorum qui actum liberum, humanum, & *Moralem* passim pro eodem sumunt. Respondeo in hac obiectione peti principium, si enim humanum idem est ac liberum, ut supponitur, & nos art. 1. ostendimus, eo ipso quod negamus actum *Moralem* esse idem formaliter ac liberum, negamus etiam eum idem esse ac actum humanum. Ad confirmationem verò dicimus auctores qui sic lo-

quantur, non velle actum vt liberum & humanum esse formaliter Moralem, sed tantum eundem actum qui est liber & humanus, esse etiam realiter saltem, plerumque Moralem.

Dico 3. *Actum Moralem constitui in ratione Moralis, per ordinem ad suum obiectum moraliter spectatum.* Probat, nam per illud, proportionem seruata, constitui debet actus Moralis in genere, per quod constituuntur actus Morales in specie; atqui actus Morales in specie constituuntur per ordinem ad obiectum; ergo idem de actu Morali in genere statuendum est. Maior ostenditur, nam sicut actus liber in genere eodem modo constituitur quo actus liberi in specie constituuntur, nempe per ordinem ad potentiam indifferentem, quæ prius quam agat, potest agere, vel non agere: ita actus Moralis generatim spectatus, eodem modo constituendus est quo actus Morales speciales constitui solent. Minor suadet, nam actus Morales quoad speciem spectati vel sunt boni, vel mali, vel indifferentes: atqui omnes hi actus in iis speciebus constituuntur per ordinem ad obiecta, bonus quidem per ordinem ad obiectum bonum, malus per ordinem ad obiectum malum, & indifferens per ordinem ad obiectum indifferens: vnde sequitur conclusio.

Vbi aduerte x. me dixisse actum vt Moralem, constitui per ordinem ad obiectum moraliter spectatum: si enim obiectum spectetur præcisè quoad suam entitatem, illud vt sic, non potest moralitatem actui conferre, vt ex eo patet, quod idem esse potest obiectum materiale actus non Moralis, & Moralis. Vt si quis inculpabiliter nihil cogitans de honestate, aut turpitudine actus, carnes comedat die prohibito, alius verò contra prohibitionem scienter, & sine legitima

causa eodem cibo vtatur: prior enim actus ex ratione sua specifica, et si liber sit, non est Moral-
lis, cum nec sit bonus, nec malus; posterior ve-
rò est Moralis, cum sit in specie malitiæ. Quod
manifesto indicio est moralitatem actus non
profluere præcisè ab obiecto materialiter spe-
ctato, sed quatenus moralitati subternitur.

Aduerte 2. obiectum actus accipi moraliter,
quatenus intelligitur vt substans regulis mo-
rum, seu quatenus ab operante ex libertate co-
gnoscitur vt honestum, aut turpe; vt amplecten-
dum, aut fugiendum. Sic enim obiectum induit
rationem moralitatis, quam in ipsum actum re-
fundere potest; ita vt actus ille sit moraliter bo-
nus, qui amplectitur obiectum quod honestum
iudicatur, ille verò sit moraliter malus, qui fer-
tur in obiectum quod ab ipso operante malum
iudicatur.

ARTICVLVS IV.

Quomodo violentia se habeat ad actum humanam.

QVæritur 1. an voluntati possit vis seu
violentia inferri. S. Thomas 1. 2. quæst.
6. art. 4. respondet cum hac distinc-
tione. Duplex est actus voluntatis, vnus ab ipsa
immediatè elicitus, vt velle; alius ab ea impe-
ratus, & mediante alia potentia exercitus, vt
ambulare, & loqui. Quantum ergo ad actus im-
peratos voluntas violentiam pati potest, qua-
tenus exteriora membra impediri possunt ne
imperium voluntatis exequantur: sed quantum
ad actus elicitos, non potest ei violentia infer-
ri, quia actus voluntatis nihil est aliud quam in-
clinatio quædam procedens ab interiori prin-

cipio cognoscente, quod autem est coactum vel violentum est ab exteriori principio. Vt autem hanc resolutionem clariùs percipias,

Nota 1. violentum illud communiter dici, quod est à principio extrinseco, vim non conferente passo, sed potiùs per internam inclinationem renitente. Ex quo patet 1. illud à quo vis infertur, esse agens extrinsecum. 2. subiectum quod violentiam patitur, nihil posse intrinsece conferre ad id quod in illo, aut per illud violententer fit. 3. imò per internam inclinationem ad id reniti, quia aliis si ad violentiam sufficeret mera non repugnantia, sequeretur v. c. gratiam animæ cui infunditur, esse violentam; quod ridiculum est.

Nota 2. omnino per accidens esse, à quocunque agente extrinseco oriatur violentia: si enim impulsus talis est vt res moueatur contra propriam inclinationem, motus ille est verè violentus, vndecunque oriatur. Quare ij audiendi non sunt, qui docent Deum non posse violentiam inferre creaturæ, etsi illam moueat contra internam illius renitentiam. Hoc enim non minùs absurdum est, quàm si diceres calorem à Deo in aqua productum, non esse illius statui violentum, nec frigori contrarium; eundem tamen calorem, vel omnino similem, si ab igne in aqua producat, esse illi violentum. Eò vel maximè quia non idèo calor est aquæ violentus, quia producit ab igne; sed quia repugnat naturali illius frigori: quare cum à Deo productus eandem repugnantiam cum illo habeat, non minùs violentus respectu aquæ censi debet.

Nota 3. posse aliquid violentiam pati tam quoad vim actiuam, quàm quoad passiuam: & quidem quoad vim actiuam dupliciter, primò positiuè, si nimirum cogatur agere contra pro-

priam inclinationem, ut cum quis ab aliquo violenter impulsus, alium propulsat; secundò priuatiuè, ut contingit si cum res est in proxima dispositione ad agendum, Deus illi concursus naturaliter debitum denegat; quomodo denegauit igni Babilonico, ne pueros infornacem iniectos, læderet. Quoad potentiam verò passiuam illud dicitur violentiam pati, quod priuatur forma connaturali, aut oppositam recipit, ut quando aqua ex frigida fit calida: cum enim hæc mutatio sit contra naturam aquæ inclinationem, dubium non est quin aliquam ei violentiam inferat.

Atque ex his collige 1. quod ait S. Thomas, non posse voluntati violentiam inferri, quoad actus elicitos, id de violentia positiua, qua quid impellitur ad agendum, accipiendum esse. Si enim agatur de violentia priuatiua, omnes fatentur voluntatem à Deo ei subiici posse, quatenus potest illi concursus, sine quo agere nequit, denegare, quando iam ex se, & in actu primo est proximè disposita ad agendum; ut si videnti Deum denegaret influxum necessarium ad eum amandum. Illa enim denegatio debiti concursus, contra internam inclinationem ad actum, aliquam haud dubiè infert violentiam priuatiuam.

Nec idem dicendum est de defectu obiecti, quia cum voluntas non possit ferri in incognitum, ea non est constituta in actu primo ad agendum completo, sine cognitione obiecti; adeoque nondum ita est inclinata ad agendum, ut ob absentiam obiecti violentiam pati censeatur. Secus autem res habet in concursu Dei, eo quod non se tenet ex parte motus primi, sed ex parte actus secundi, seu actualis operationis.

Collige 2. quod ait S. Thomas, voluntatem

posse vim pati in actibus imperatis, id non sic esse accipiendum, ut actus aliquis possit esse simul & à voluntate imperatus, & voluntati violentus. Hoc enim apertè repugnat, quia si est imperatus, est ex propria voluntatis inclinatione; si autem est voluntati violentus, est contra propriam voluntatis inclinationem. Sensus ergo est, actus illos posse fieri per violentiam, qui aliàs à voluntate imperari solent; ut si quis violenter alicui brachium moueat, contra illius inclinationem.

Quæritur 2. an violentia causet inuoluntarium. Respondeo affirmatiuè, ex S. Doctore quæst. citata art. 5. ubi id probat hac ratione. Commune est enim voluntario, sicut & naturali, quod sit à principio intrinseco, violentum autem est à principio extrinseco; vnde sicut in rebus quæ cognitione carent, violentia aliquid facit contra naturam, ita in cognoscentibus facit aliquid esse contra voluntatem. Quod autem est contra naturam, dicitur innaturale, & quod est contra voluntatem, dicitur inuoluntarium; vnde violentia inuoluntarium causat.

Quod si obiicias 1. Martyres ad mortem violenter tractos esse, non tamen inuoluntariè. Respondeo tractionem illam fuisse violentam, respectu appetitus innati, at verò respectu elicti, non fuisse violentam, sed maximè optatam, & voluntariam, cum fieret consentaneo ad illius inclinationem, non contra illam. Ad eum modum quo motio illius qui inflectit propria membra, contra natiuam eorum inclinationem, est violenta respectu membrorum quæ sic mouentur, non autem respectu hominis mouentis, ut tradit S. Thomas in resp. ad 3.

Si obiicias 2. stuprum interdum ad culpam imputari puellæ, etsi per vim deflorata sit, sic-

que non omne violentum esse inuoluntarium. Respondeo hoc tantum verum esse quando puella vel interiùs consensit, vel si non directè consensit, tamen non restitit vt potuit, & debuit: sic enim saltem indirectè aliquid contulit ad peccatum, quod proinde non omnino per violentiam patratum fuit. Vt autem hoc clariùs percipias.

Aduerte ex S. Thoma quæstionis citatæ art. 3. voluntarium illud dici quod est à voluntate, primò directè, quod scilicet procedit ab ea, in quantum est agens, vt velle, amare. Secundò indirectè, quod habet locum quando quis non agit, cùm agere tenetur; sicut submersio navis tribuitur Nauclero, in quantum clauum abiicit quando potest, & tenetur nauem gubernare. Et hoc posteriori modo stuprum censetur voluntarium respectu puellæ, quæ non resistit cum potest, & debet, etsi interiùs non consentiat.

ARTICVLVS V.

Quomodo metus se habeat ad actum humanum.

Respondet S. Thomas quæst. citata art. 6. ea quæ ex metu fiunt, esse mixta ex voluntario, & inuoluntario. ita tamen vt simpliciter sint voluntaria, secundum quid verò inuoluntaria. Ratio est, quia vnumquodque dicitur esse simpliciter, secundum quod est in actu; secundum quid verò, quatenus est in apprehensione, vt patet in eo qui metu naufragij proiicit merces in mare, hæc enim actualis proiectio est illi hic & nunc, seu in talibus circumstantiis voluntaria, quatenus assumitur vt medium quod necessarium iudicatur, ad cauenda-

dum longè maius damnum. Est autem inuoluntaria tantum, quatenus consideratur pro circumstantiis quæ non sunt nisi in apprehensione, nimirum si non existeret periculum quod verè præsens est: quare quod per metum agitur, est simpliciter voluntarium, inuoluntarium autem secundum quid.

Dices 1. qui ex metu proiicit merces in mare, id facit inuitè, vt constat ex communi vsu loquendi: at quod fit inuitè, non est voluntarium; ergo metus tollit voluntarium. Respondéo projectionem illam non esse inuitam simpliciter, cum nec fiat per vim ab agente extrinseco immisssam, nec per ignorantiam, sed per actum à voluntate proiicientis scienter volitum, & imperatum ad cauendum grauius damnum impendens. Est ergo inuita ad summum secundum quid, quatenus mercator etsi malit merces amittere quàm vitam, sicque mercium eiectio sit illi simpliciter voluntaria, magno tamen dolore afficitur, quòd in eas angustias reductus sit, vt sibimet ipsi tam grane damnum inferre teneatur. quod aliàs diligenter cauisset.

Dices 2. qui ex graui metu, carnes comedit diebus prohibitis, non peccat, ergo talis comestio non est illi simpliciter voluntaria: sequela patet, quia transgressio simpliciter voluntaria imputatur ad culpam. Respondéo dato antecedenti, quando esus carnum non vergit in contemptum Ecclesiæ, vel fidei Catholicæ, negandam esse consequentiam. Et ad probationem illius dicendum, præceptum Ecclesiæ quo esus carnum vetatur, in eo casu non obligare, adeoque illum qui vescitur carnibus peccare, esto operetur voluntariè & liberè, quia nullum præceptum transgreditur.

.. Vbi nota, non tantum præcepta Ecclesiæ non

obligare in gravi metu exteriùs incusso, sed ne quidem naturalia, aut diuina affirmatiua, vt præceptum naturale dandi eleemosynam egen-
ti, vel peccantem coram se corripienti, item præceptum diuinum confitendi, aut sumendi Eucharistiam, &c. Dico affirmatiua, nam quod spectat ad negatiua, ea obligant in omni casu; quia quæ iis prohibentur, sunt intrinsecè mala, nec ex vlla causa honestari possunt; qualia sunt adulterium, sacrilegium, blasphemia, &c. Quare qui ex metu mortis ipsi intentato, aliquod ex his præceptis violaret, peccaret mortaliter. Quia tamen ea transgressio esset aliquatenus inuoluntaria, inde etiã peccatum aliqua ex parte minueretur.

Dices 3. si ea quæ ex metu etiã graui fiunt, sunt, simpliciter voluntaria, sequeretur omnes contractus qui ex tali metu fiunt, vt emptio-
nem, venditionem, locationem, &c. esse simpliciter voluntarios, & consequenter iure naturæ validos; quod tamen absurdum videtur, cum ab Ecclesia irritari soleant. Respondeo negando posteriorem sequelam maioris, quia etsi contractus aliquis sit simpliciter voluntarius, inde non sequitur eum iure naturæ esse validum, cum ad illius valorem eo iure exigì possit non modo simpliciter voluntarium, quod cum inuoluntario subsistit, sed omnino liberum, nullaque iniuria extortum, quod proinde omne inuoluntarium excludat. vt patet in donatione quæ iure ipso naturæ plenam libertatem exigit, adeoque nulla censetur; si graui metu extorta sit.

Instabis, hunc saltem sequi alios contractus qui tantam libertatem non exigunt, qualis est venditio metu extorta, pro iusto tamen pretio, ex iure naturæ esse validos, ac proinde auctori-

tate humana irritari non posse. Respondeo hoc posterius non bene inferri, quia cum damna innumera & grauissima ex eiusmodi contractibus oriri possint, ius ipsum naturæ exigere videtur, vt ad auertenda à Republica hæc mala, irritari possint.

Dices 4. absurdum videri quod absolutè ait S. Thomas, id quod metu fit, esse ex parte inuoluntarium; hinc enim sequitur illius pœnitentiam esse inuoluntariam qui ex metu inferni de peccatis suis dolet. Respondeo sanctum Doctorem non velle, id quod metu fit esse semper inuoluntarium, sed quod ita fit, vt etsi voluntas in illud consentiat, ægrè tamen fert quod consensum præstare cogatur, vt patet exemplo proicientis merces in mare. Vnde si ille qui ob inferni metum pœnitentiam agit, ita affectus est vt nollet pœnitentiam suscipere, nisi metus ingrueret, sane illius dolor est ex parte inuoluntarius. Erit autem omnino voluntarius, si eiusmodi nolitio, quæ oritur ex amore voluptatum quibus pœnitentia priuat, per inferni metum plane extinguatur.

ARTICVLVS VI.

Quomodo concupiscentia se habeat ad actum humanum.

SANCTUS Thomas 1. 2. quæst. 6. toties citata art. 7. docet concupiscentiam non causare inuoluntarium sed magis facere aliquid voluntarium. Dicitur enim aliquid voluntarium ex eo quod voluntas in illud fertur, per concupiscentiam autem voluntas inclinatur ad volendum id quod concupiscit; & ideo concupiscentia magis inquit vt aliquid sit

voluntarium, quam inuoluntarium. Vt autem
ec doctrina melius intelligatur,

Observandum 1. ex eodem sancto Doctore
2. quæst. 77. art. 6. passionem appetitus sen-
sitiui se habere ad liberum arbitrium, & ante-
cedenter, & consequenter; antecedenter qui-
em, secundum quod passio appetitus sensitiui
trahit, vel inclinat rationem & voluntatem.
Consequenter verò, quatenus, motus superio-
rum virium, si sint vehementes, redundant in
inferiores; non enim potest voluntas intensè
noueri in aliquid, quin excitetur aliqua passio
in appetitu sensitiuo.

Observandum 2. non esse hic quæstionem de
concupiscentia consequente, quia, cum sequa-
tur actum voluntatis, non potest illum augere
vel minuere, sed de antecedente qua voluntas
excitatur ad agendum. Et de ista S. Thomas
duo statuit articulo illo 7. initio huius articuli
citati, 1. eam non causare inuoluntarium. 2. imò
magis facere aliquid voluntarium, id est auge-
re voluntarium, vt Interpretes communiter in-
telligunt. Verùm contra hanc doctrinam,

Dices 1. metus causat inuoluntarium, ergo
& concupiscentia. Antecedens supra probatum
est, sequela ostenditur, quia sicut motus ideo
causat inuoluntarium, quia impellit vt fiat ali-
quid quod alias displicet; ita concupiscentia
causat inuoluntarium, cum voluntatem impel-
lat ad actum ipsi quodammodo ingratum. Res-
pondeo negando consequentiam, & ad illius
probationem dico, ideo metum causare inuo-
luntarium, quia mouet ad faciendum aliquid
quod repugnat voluntati, etiam cum fit: at con-
cupiscentia mouet voluntatem ad actum qui
tunc illi non displicet, etsi antequam accederet
concupiscentia ei fortè gratus non esset.

Dices 2. illud quod minuit cognitionem, minuit voluntarium: atqui concupiscentia minuit cognitionem; ergo minuit voluntarium. Maior probatur, quia voluntarium illud est ex supradictis, quod fit à principio intrinseco, præcedente cognitione, Minor ostenditur, quia concupiscentia inflammatus parum considerat quod agendum est. Respondeo maiorem esse veram, si ille defectus aliunde non suppleatur: at suppletur in casu de quo agimus, quia etsi aliquo modo cognitio minuat, operatio tamen voluntatis multum augetur, & intenditur. Quare cum in actu voluntario habenda potius sit ratio volitionis, quam præviæ cognitionis, ut perspicuum est; hinc fit ut voluntarium per concupiscentiam simpliciter augeatur.

Dices 3. non potest augeri voluntarium, per id quo minuitur liberum; at liberum minuitur per concupiscentiam, ergo per illam non augeatur voluntarium. Maior probatur, quia actus liber radicitur in voluntario, eumque intrinsecè supponit. Minor verò suadetur, quia quod fit per concupiscentiam, fit cum maiori impetu, & ad vnum determinatione, adeoque cum minori libertate. Confirmatur, quia cum concupiscentia minuat cognitionis indifferentiam, consequenter minuit indifferentiam voluntatis, ut ex infra dicendis, ubi de libertate, intelligi poterit. Respondeo maiorem falsam esse, & ad illius probationem dico, etsi idem actus qui est liber, sit etiam aliquo sensu voluntarius, quatenus nempe à voluntate efficienter procedit, id non impedire quin diuersas sortiatur conditiones; sicque fieri posse ut eadem re qua minuitur actus ut liber, augeatur ut voluntarius. Unde ad minorem dico, ea euidenter probari quod intendimus, siquidem concupiscentia eo ipso quod

quod facit ut voluntas agat cum maiori determinatione ad vnum, minuit liberum; & quatenus simul efficit ut idem actus voluntatis fiat cum maiori intensiōe, & delectatione, augeat voluntarium. Ad confirmationem verò dicendum est, ea quidem probari per concupiscentiam minui liberum, non tamen minui voluntarium: eo quod voluntarium ex se non exigit indifferentiam iudicij, sed perfectè subsistit cum cognitione siue indifferenti, siue determinata soli obiecti, quam manere supponimus.

Instabis, quod minuit peccatum, minuit voluntarium, at concupiscentia minuit peccatum, ergo & voluntarium. Respondeo negando maiorem, quia cum ad peccatum non sufficiat voluntarium, sed requiratur liberum proprie dictum, ex eo quod concupiscentia minuat peccatum, non rectè colligitur eam minuire voluntarium, sed liberum. Vnde quod ait S. Thomas 1. 2. quæst. 77. art. 2. passionem minuere peccatum, quia minuit voluntarium, ibi voluntarium, pro libero sumendum est.

Dices 4. intelligi non posse quomodo illud non sit minus voluntarium, quod simul fit à voluntate, & à concupiscentia, quam quod à sola voluntate profluit: quia cum concupiscentia non possit causare actum voluntatis, nisi ut principium extrinsecum, consequenter aliquid minuit de voluntario, tantum abest ut illud augeat. Respondeo falsum esse id non posse intelligi, quia sicut rectè intelligimus actum amoris dei, qui fit cum maxima intensiōe & suauitate, per impulsu gratiæ efficacis, non esse minus voluntarium, quam alium quemcumque tum à voluntate sine tali auxilio elicitum; ita obè intelligi potest actum à voluntate per concupiscentiam adacta, elicitum, non esse minus

Ethica.

E

voluntarium, quàm illum qui à sola voluntate producitur.

Imò hoc posterius longè faciliùs concipi potest, quia cum concupiscentia indirectè tantum moueat voluntatem ad aliquem actum, vt docet S. Thomas 1. 2. quæst. 9. art. 2. quatenus scilicet ita hominem afficit, vt ei bonum & conueniens videatur aliquod obiectum, quod aliàs ipsi non arrideret; sanè talis causandi modus valde improprius nullo modo impedit, quin actus per concupiscentiam in voluntate excitatus, à sola voluntate totus realiter profluat, ac proinde sit perfectè voluntarius: cùm tamen actus bonus non modo à voluntate, sed etiam ab auxilio gratiæ totus directè & Physicè producatur.

ARTICVLVS VII.

Quomodo ignorantia se habeat ad actum humanum.

P Ræmoneo 1. ex S. Thoma 1. 2. quæst. 6. art. 8. ignorantiam eatenus causare inuoluntarium, quatenus priuat cognitione quæ præexigitur ad voluntarium, vt supra dictum est, non tamen quamlibet ignorantiam huiusmodi cognitionem tollere.

Præmoneo 2. ignorantiam tripliciter se habere ad actum voluntatis, primò antecedenter, quando non est voluntaria, & est causa volendi id quod, si adesset scientia opposita, non fieret: vt cùm aliquis adhibita diligentia ejaculatur sagittam in amicum, putans esse feram; eumque interficit, quem aliàs non vellet interficere.

Secundò concomitanter, quando aliquid fit

cum ignorantia, ita tamen ut quamvis ignorantia abesset, id nihilominus fieret: ut cum quis inimicum interficit, putans esse feram, quem nihilominus æque interfecisset, etsi nouisset.

Tertio consequenter, quando ipsa ignorantia est voluntaria, quod duobus modis contingere potest, 1. ita ut actus voluntatis directe & expresse feratur in ignorantiam; ut cum quis ignorare vult præcepta quò liberius peccet, iuxta illud Iob. 22. *Scientiam viarum tuarum nolumus*, & hæc ignorantia vocatur affectata. 2. ita ut ignorantia indirectè sit volita, ut dum quis notitiam quam potest & debet habere, non curat acquirere; & hæc plerumque vocatur ignorantia crassa, qualis in multis esse solet qui ignorant articulos fidei. Quibus positis

S. Thomas tria docet 1. Ignorantiam antecedentem causare inuoluntarium simpliciter, cuius ratio ex dictis perspicua est, quia quod fit ex tali ignorantia neque est volitum in se, cum non sit cognitum, neque in sua causa seu in ignorantia, cum hæc etiam non sit volita. Aliunde verò voluntas ab eo habitualiter auersa est, modo & actualiter illud refugeret, si sciret quid agatur.

Vbi nota 1. quod agitur per eiusmodi ignorantiam antecedentem, cum plane sit inuoluntarium, nullo modo imputari ad culpam: unde non peccauit Iacob accedens ad Liam, quia inenibiliter putabat esse Rachelem.

Nota 2. id quod fit per ignorantiam antecedentem, esse inuoluntarium secundum eam tantam rationem qua causatur ab illa, non secundum aliam. Quo fit ut si quis scienter occidat minem, quem tamen nescit esse clericum, illa ratio sit voluntaria respectu hominis, non respectu clerici. Ex quo vterius sequitur, occiso-

rem esse quidem reum homicidij, non tamen excommunicationis in Clericorum interfectores latae.

Docet 2. ignorantiam comitantem non causare inuoluntarium, quia ut ait Philosophus 3. Ethic. cap. 1. non causat aliquid repugnans voluntati, sed causare non voluntarium, quia non potest esse actu voluntarium quod ignoratur.

Quo loco aduerte 1. ignorantiam comitantem non causare actum, sed tantum illum comitari, ut supra diximus: quod duobus modis intelligi potest, 1. ita ut talis ignorantia non potuerit impediri, adeoque sit antecedens & inuincibilis. 2. ita ut potuerit adhibita diligentia impediri, ac proinde sit consequens & vincibilis.

Aduerte 2. assertionem secundam S. Thomæ intelligendam esse de ignorantia comitante, siue sit antecedens, siue consequens, quatenus ait per illam non causari inuoluntarium: quia cum ignorantia comitans qualiscunque sit, non causet actum, adeoque non efficiat ut actus displiceat voluntati, hinc sequitur actum illum non esse villo modo inuoluntarium.

Aduerte 3. quod ait S. Doctor, ignorantiam comitantem causare non voluntarium, id intelligendum esse de illa ignorantia ut est antecedens, & omnino inuoluntaria; siquidem actio facta cum tali ignorantia, neque in se est voluntaria ob ignorantiam, neque in sua causa, cum adhibita prudenti diligentia ut supponimus, facta sit. Vnde qui cum eiusmodi ignorantia interficit inimicum, non peccat, esto ita habitualiter affectus sit, ut si sciret esse inimicum, æquè occideret: illa enim voluntas habitualis non influit actu in homicidium, sed tantum influe-

et si ignorantia abesset, quo casu ad peccatum imputaretur.

Aduerte 4. si ignorantia comitans sit voluntaria, & consequens, actum cum ea elicitum esse voluntarium. Vnde mortaliter peccat qui, non adhibita sufficienti diligentia, catapultam exodit in hominem quem putat esse ceruum, umque interficit. Licet enim ea occisio non sit voluntaria in seipsa, est tamen voluntaria in sua causa, quatenus occisor eo ipso quod voluntarie omisit sufficientem diligentiam, censetur saltem implicite & indirecte velle interfectionem quæ inde sequuta est.

Docet 3. ignorantiam consequentem, cum sit voluntaria, non causare inuoluntarium simpliciter, causare tamen inuoluntarium secundum quid, in quantum præcedit motum voluntatis ad aliquid agendum, qui non esset, scientia præsentem.

Quibus verbis duo continentur, alterum, ignorantiam consequentem, quæ est causa operis, non causare inuoluntarium simpliciter; quia cum hæc ignorantia sit volita, quod ex ea sequitur censetur simpliciter voluntarium, non videm directe, sed indirecte; ut omissio sacri sit voluntaria illi qui scire neglexit, an esset præceptum audiendi Missam.

Alterum, eandem ignorantiam causare inuoluntarium secundum quid, illa enim ommissio sacri, etsi simpliciter sit voluntaria, censetur involuntaria secundum quid, quatenus homo ita affectus est ut sacrum audiuisset, si præceptum non ignorasset.

Vbi observandum est hoc procedere de ignorantia consequente non affectata, si enim sit affectata, eo sensu ut velit quis ignorare præcepta quo liberius peccet, sic non minuit, sed

arget voluntarium, ut docet S. Thomas 1. 2. quæst. 76. art. 4. Et ratio est, quia si fiat comparatio inter deos peccantes, quorum alter cum scientia præcepti simpliciter peccat, alter data opera vult præceptum ignorare, ne illius forte consideratione vltimo modo retardetur à peccato, negari non potest quin iste ex maiori affectu & impetu voluntatis peccet quam ille, adeoque magis voluntarie.

Si tamen ignorantia affectetur non ad libere peccandum, sed ne cum tanto Dei contemptu peccetur, hoc modo dicendum est ignorantiam affectatam minuere voluntarium: siquidem ea quæ fiunt ex maiori contemptu, censentur magis voluntaria, quam quæ fiunt ex minori: vnde etiam hæc ignorantia minuit peccatum.



CAPVT II.

DE LIBERTATE HVMANA.

ARTICVLVS PRIMVS.

An ad liberam arbitrii requiratur libertas à necessitate.

PRæmoneo 1. cum liberum illud sit quod aliquo vinculo exsolutum est, tot esse libertates quot sunt vincula à quibus homo liberari potest: vnde alia est libertas à seruitute legis Mosaicæ, quæ Christianis; alia libertas à peccato, quæ iustis; alia libertas à corruptione, quæ beatis; alia libertas naturalis quæ omnibus

hominibus indita est à natura, & per quam maxime in suis operationibus à modo agendi prutorum distinguuntur.

Præmoneo 2. non hic agi de libertate à feruitute legis Mosaicæ, nec de libertate à peccato; nec de libertate à corruptione, quia libertas hæc impropria est & metaphorica, sed de libertate naturaliter omnibus hominibus indita; & difficultas in eo consistit, an ad libertatem hominis sufficiat quod sit liber à coactione, an verò requiratur quod etiam sit liber à necessitate.

Præmoneo 3. illud dici liberum à coactione, quod etsi necessario agat, sponte tamen seu voluntarie, adeoque ex principio intrinseco operatur; liberum verò à necessitate, quod non modo sponte agit, sed etiam cum indifferentia ad vtrumlibet, ita vt antequam agat possit agere, vel non agere. Itaque

Recentiores Hæretici grauiter contendunt hominem in statu innocentiae fuisse prædium libertate perfecta, vt dicit exsolutionem non modo à coactione, sed etiam à necessitate. post peccatum primi parentis hominem poni quidem libertate à coactione, non tamen à necessitate, saltem in rebus ad salutem spectantibus; ita vt in eorum sententia idem nunc agere liberè; & agere sponte seu voluntariè.

Verum sententia Catholica statuit in homine, etiam post peccatum primi parentis, mansisse arbitrium non modo à coactione, sed etiam à necessitate agendi liberum. Probatur 1. ex illo celeberrimo Ecclesiastici 15. *Deus ab initio constituit hominem, & reliquit illum in manu consilij sui. Adiecit mandata & præcepta sua, si uoueris mandata seruare, conseruabunt te, &c. Apposuit tibi ignem & aquam, ad quod uolueris porrigere manum tuam.* Quibus verbis indifferentia vo-

dum longè maius damnum. Est autem inuoluntaria tantum, quatenus consideratur pro circumstantiis quæ non sunt nisi in apprehensione, nimirum si non existeret periculum quod verè præsens est: quare quod per metum agitur, est simpliciter voluntarium, inuoluntarium autem secundum quid.

Dices 1. qui ex metu proiicit merces in mare, id facit inuitè, ut constat ex communi usu loquendi: at quod fit inuitè, non est voluntarium; ergo metus tollit voluntarium. Respondeo projectionem illam non esse inuitam simpliciter, cum nec fiat per vim ab agente extrinseco immisam, nec per ignorantiam, sed per actum à voluntate proiicientis scienter volitum, & imperatum ad cauendum grauius damnum impendens. Est ergo inuita ad summum secundum quid, quatenus mercator etsi malit merces amittere quàm vitam, sicque mercium electio sit illi simpliciter voluntaria, magno tamen dolore afficitur, quòd in eas angustias reductus sit, ut sibimet ipsi tam graue damnum inferre teneatur. quod aliàs diligenter cauisset.

Dices 2. qui ex graui metu, carnes comedit diebus prohibitis, non peccat, ergo talis comestio non est illi simpliciter voluntaria: sequela patet, quia transgressio simpliciter voluntaria imputatur ad culpam. Respondeo dato antecedenti, quando esus carnum non vergit in contemptum Ecclesiæ, vel fidei Catholicæ, negandam esse consequentiam. Et ad probationem illius dicendum, præceptum Ecclesiæ quo esus carnum vetatur, in eo casu non obligare, adeoque illum qui vescitur carnibus peccare, esto operetur voluntariè & liberè, quia nullum præceptum transgreditur.

Vbi nota, non tantum præcepta Ecclesiæ non

igare in graui metu exterius incusso, sed ne
dem naturalia, aut diuina affirmatiua, vt
ceptum naturale dandi eleemosynam egen-
vel peccantem coram se corripienti, item
ceptum diuinum confitendi, aut sumendi
charistiam, &c. Dico affirmatiua, nam quod
etat ad negatiua, ea obligant in omni casu;
ia quæ iis prohibentur, sunt intrinsecè mala,
ex vlla causa honestari possunt; qualia sunt
alterium, sacrilegium, blasphemia, &c. Qua-
qui ex metu mortis ipsi intentato, aliquod
his præceptis violaret, peccaret mortaliter.
uia tamen ea transgressio esset aliquatenus in-
luntaria, inde etiam peccatum aliqua ex par-
minueretur.

Dices 3. si ea quæ ex metu etiam graui fiunt,
ut, simpliciter voluntaria, sequeretur omnes
tractus qui ex tali metu fiunt, vt emptio-
nem, venditionem, locationem, &c. esse sim-
pliciter voluntarios, & consequenter iure na-
turæ validos; quod tamen absurdum videtur,
nam ab Ecclesia irritari soleant. Respondeo ne-
gando posteriorem sequelam maioris, quia et si
tractus aliquis sit simpliciter voluntarius,
de non sequitur eum iure naturæ esse vali-
dum, cum ad illius valorem eo iure exigì possit
non modo simpliciter voluntarium, quod cum
voluntario subsistit, sed omnino liberum,
nullaque iniuria extortum, quod proinde om-
niu involuntarium excludat. vt patet in dona-
tione quæ iure ipso naturæ plenam libertatem
igit, adeoque nulla censetur; si graui metu
extorta sit.

Instabis, hunc saltem sequi alios tractus
qui tantam libertatem non exigunt, qualis est
conditio metu extorta, pro iusto tamen pretio,
iure naturæ esse validos, ac proinde auctori-

tate humana irritari non posse. Respondeo hoc posterius non bene inferri, quia cum damna innumera & grauissima ex eiusmodi contractibus oriri possint, ius ipsum naturæ exigere videtur, vt ad auertenda à Republica hæc mala, irritari possint.

Dices 4. absurdum videri quod absolutè ait S. Thomas, id quod metu fit, esse ex parte inuoluntarium; hinc enim sequitur illius pœnitentiam esse inuoluntariam qui ex metu inferni de peccatis suis dolet. Respondeo sanctum Doctorem non velle, id quod metu fit esse semper inuoluntarium, sed quod ita fit, vt etsi voluntas in illud consentiat, ægrè tamen fert quod consensum præstare cogatur, vt patet exemplo proiicientis merces in mare. Vnde si ille qui ob inferni metum pœnitentiam agit, ita affectus est vt nollet pœnitentiam suscipere, nisi metus ingrueret, sane illius dolor est ex parte inuoluntarius. Erit autem omnino voluntarius, si eiusmodi nolitio, quæ oritur ex amore voluptatum quibus pœnitentia priuat, per inferni metum plane extinguatur.

ARTICVLVS VI.

Quomodo concupiscentia se habeat ad actum humanum.

SANCTUS THOMAS 1. 2. quæst. 6. toties citata art. 7. docet concupiscentiam non causare inuoluntarium sed magis facere aliquid voluntarium. Dicitur enim aliquid voluntarium ex eo quod voluntas in illud fertur, per concupiscentiam autem voluntas inclinatur ad volendum id quod concupiscit; & ideo concupiscentia magis inuat vt aliquid sit

ntarium, quàm inuoluntarium. Vt autem doctrina melius intelligatur, obseruandum 1. ex eodem sancto Doctore quæst. 77. art. 6. passionem appetitus sensitiui se habere ad liberum arbitrium, & antea, & consequenter; antecédenter quidem, secundum quod passio appetitus sensitiui, vel inclinat rationem & voluntatem. sequenter verò, quatenus, motus superiorum, si sint vehementes, redundant in inferiores; non enim potest voluntas intensè eriri in aliquid, quin excitetur aliqua passio appetitu sensitiuo.

obseruandum 2. non esse hic quæstionem de concupiscentia consequente, quia, cum sequatur actum voluntatis, non potest illum augere minuere, sed de antecedente qua voluntas determinatur ad agendum. Et de ista S. Thomas statuit articulo illo 7. initio huius articuli 1. eam non causare inuoluntarium. 2. imò, non posse facere aliquid voluntarium, id est augere voluntarium, vt Interpretes communiter inveniunt. Verùm contra hanc doctrinam, respondes 1. metus causat inuoluntarium, ergo et concupiscentia. Antecedens supra probatum sequela ostenditur, quia sicut motus ideo causat inuoluntarium, quia impellit vt fiat aliquid quod alias displicet; ita concupiscentia causat inuoluntarium, cum voluntatem impellit ad actum ipsi quodammodo ingratum. Respondeo negando consequentiam, & ad illius rationem dico, ideo metum causare inuoluntarium, quia mouet ad faciendum aliquid quod repugnat voluntati, etiam cum sit: at concupiscentia mouet voluntatem ad actum qui illi non displicet, etsi antequam accederet concupiscentia ei fortè gratus non esset.

Dices 2. illud quod minuit cognitionem, minuit voluntarium: atqui concupiscentia minuit cognitionem; ergo minuit voluntarium. Maior probatur, quia voluntarium illud est ex supradictis, quod fit à principio intrinseco, præcedente cognitione, Minor ostenditur, quia concupiscentia inflammatus parum considerat quod agendum est. Respondeo maiorem esse veram, si ille defectus aliunde non suppleatur: at suppletur in casu de quo agimus, quia etsi aliquo modo cognitio minuatur, operatio tamen voluntatis multum augetur, & intenditur. Quare cum in actu voluntario habenda potius sit ratio volitionis, quam præviæ cognitionis, ut perspicuum est; hinc fit ut voluntarium per concupiscentiam simpliciter augeatur.

Dices 3. non potest augeri voluntarium, per id quo minuitur liberum; at liberum minuitur per concupiscentiam, ergo per illam non augeatur voluntarium. Maior probatur, quia actus liber radicitur in voluntario, eumque intrinsece supponit. Minor verò suadetur, quia quod fit per concupiscentiam, fit cum maiori impetu, & ad vnum determinatione, adeoque cum minori libertate. Confirmatur, quia cum concupiscentia minuat cognitionis indifferentiam, consequenter minuit indifferentiam voluntatis, ut ex infra dicendis, ubi de libertate, intelligi poterit. Respondeo maiorem falsam esse, & ad illius probationem dico, etsi idem actus qui est liber, sit etiam aliquo sensu voluntarius, quatenus nempe à voluntate efficienter procedit, id non impedire quin diuersas sortiatur conditiones; sicque fieri posse ut eadem re qua minuitur actus ut liber, augeatur ut voluntarius. Unde ad minorem dico, ea euidenter probari quod intendimus, siquidem concupiscentia eo ipso quod

mod facit vt voluntas agat cum maiori determinatione ad vnum, minuit liberum; & quatenus simul efficit vt idem actus voluntatis fiat in maiori intensiōe, & delectatione, auget voluntarium. Ad confirmationem verò dicendum est, ea quidem probari per concupiscentiam minui liberum, non tamen minui voluntarium: eo quod voluntarium ex se non exigit differentiam iudicij, sed perfectè subsistit cum cognitione siue indifferenti, siue determinata ius obiecti, quam manere supponimus.

Instabis, quod minuit peccatum, minuit voluntarium, at concupiscentia minuit peccatum, ergo & voluntarium. Respondeo negando maiorem, quia cum ad peccatum non sufficiat voluntarium, sed requiratur liberum proprie dictum, ex eo quod concupiscentia minuat peccatum, non rectè colligitur eam minuere voluntarium, sed liberum. Vnde quod ait S. Thomas 1. quæst. 77. art. 2. passionem minuere peccatum, quia minuit voluntarium, ibi voluntarium, pro libero sumendum est.

Dices 4. intelligi non posse quomodo illud non sit minus voluntarium, quod simul fit à voluntate, & à concupiscentia, quam quod à voluntate profluit: quia cum concupiscentia non possit causare actum voluntatis, nisi vt principium extrinsecum, consequenter aliquid auget de voluntario, tantum abest vt illud auget. Respondeo falsum esse id non posse intelligi, quia sicut rectè intelligimus actum amoris, qui fit cum maxima intensiōe & suauitate, per impulsu gratiæ efficacis, non esse minus voluntarium, quam alium quemcumque actum à voluntate sine tali auxilio elicitum; ita rectè intelligi potest actum à voluntate per concupiscentiam adacta, elicitum, non esse minus

Ethim.

E

voluntarium, quàm illum qui à sola voluntate producitur.

Imò hoc posterius longè faciliùs concipi potest, quia cum concupiscentia indirectè tantum moueat voluntatem ad aliquem actum, vt docet S. Thomas 1. 2. quæst. 9. art. 2. quatenus scilicet ita hominem afficit, vt ei bonum & conueniens videatur aliquod obiectum, quod aliàs ipsi non arrideret; sanè talis causandi modus valde improprius nullo modo impedit, quin actus per concupiscentiam in voluntate excitatus, à sola voluntate totus realiter profluat, ac proinde sit perfectè voluntarius: cum tamen actus bonus non modo à voluntate, sed etiam ab auxilio gratiæ totus directè & Physicè producatur.

ARTICVLVS VII.

Quomodo ignorantia se habeat ad actum humanum.

Præmoneo 1. ex S. Thoma 1. 2. quæst. 6. art. 8. ignorantiam eatenus causare inuoluntarium, quatenus priuat cognitione quæ præexigitur ad voluntarium, vt supra dictum est, non tamen quamlibet ignorantiam huiusmodi cognitionem tollere.

Præmoneo 2. ignorantiam tripliciter se habere ad actum voluntatis, primò antecedenter, quando non est voluntaria, & est causa volendi id quod, si adesset scientia opposita, non fieret: vt cum aliquis adhibita diligentia ejaculatur sagittam in amicum, putans esse feram; eumque interficit, quem aliàs non veller interficere.

Secundò concomitanter, quando aliquid fit

n ignorantia, ita tamen vt quamuis ignoran-
abesset, id nihilominus fieret: vt cum quis
micum interficit, putans esse feram, quem
nihilominus æque interfecisset, etsi nouisset.

Tertiò consequenter, quando ipsa ignoran-
est voluntaria, quòd duobus modis contin-
te potest, 1. ita vt actus voluntatis directè &
pressè feratur in ignorantiam; vt cum quis
norare vult præcepta quò liberius peccet, iux-
illud Iob. 22. *Scientiam viarum tuarum nolu-*
is, & hæc ignorantia vocatur affectata. 2. ita
ignorantia indirectè sit volita, vt dum quis
titiam quam potest & debet habere, non cu-
acquirere; & hæc plerumque vocatur igno-
ntia crassa, qualis in multis esse solet qui igno-
nt articulos fidei. Quibus positis

S. Thomas tria docet 1. Ignorantiam ante-
dentem causare inuoluntarium simpliciter,
ius ratio ex dictis perspicua est, quia quod
ex tali ignorantia neque est volitum in se,
m non sit cognitum, neque in sua causa seu in
ignorantia, cum hæc etiam non sit volita. Aliun-
verò voluntas ab eo habitualiter auersa est,
ò & actualiter illud refugeret, si sciret quid
atur.

Vbi nota 1. quod agitur per eiusmodi igno-
ntiam antecedentem, cum plane sit inuolun-
tium, nullo modo imputari ad culpam: vnde
n peccauit Iacob accedens ad Liam, quia in-
cebibilitè putabat esse Rachelem.

Nota 2. id quod fit per ignorantiam antece-
ntem, esse inuoluntarium secundum eam tan-
n rationem qua causatur ab illa, non secun-
m aliam. Quo fit vt si quis scienter occidat
minem, quem tamen nescit esse clericum, illa
isio sit voluntaria respectu hominis, non re-
ctu clerici. Ex quo vltèrius sequitur, occiso-

rem esse quidem reum homicidij, non tamen excommunicationis in Clericorum interfectione lata.

Docet 2. ignorantiam comitantem non causare inuoluntarium, quia ut ait Philosophus 3. Ethic. cap. 1. non causat aliquid repugnans voluntati, sed causare non voluntarium, quia non potest esse actu voluntarium quod ignoratur.

Quo loco aduerte 1. ignorantiam comitantem non causare actum, sed tantum illum comitari, ut supra diximus: quod duobus modis intelligi potest, 1. ita ut talis ignorantia non potuerit impediri, adeoque sit antecedens & inuincibilis. 2. ita ut potuerit adhibita diligentia impediri, ac proinde sit consequens & vincibilis.

Aduerte 2. assertionem secundam S. Thomæ intelligendam esse de ignorantia comitante, siue sit antecedens, siue consequens, quatenus ait per illam non causari inuoluntarium: quia cum ignorantia comitans qualiscunque sit, non causet actum, adeoque non efficiat ut actus displiceat voluntati, hinc sequitur actum illum non esse ullo modo inuoluntarium.

Aduerte 3. quod ait S. Doctor, ignorantiam comitantem causare non voluntarium, id intelligendum esse de illa ignorantia ut est antecedens, & omnino inuoluntaria; siquidem actio facta cum tali ignorantia, neque in se est voluntaria ob ignorantiam, neque in sua causa, cum adhibita prudenti diligentia ut supponimus, facta sit. Vnde qui cum eiusmodi ignorantia interficit inimicum, non peccat, esto ita habitualiter affectus sit, ut si sciret esse inimicum, æquè occideret: illa enim voluntas habitualis non influit actu in homicidium, sed tantum influe-

et si ignorantia abesset, quo casu ad peccatum imputaretur.

Aduerte 4. si ignorantia comitans sit voluntaria, & consequens, actum cum ea elicitum esse voluntarium. Vnde mortaliter peccat qui, non prohibita sufficienti diligentia, catapultam exilodit in hominem quem putat esse ceruum, umque interficit. Licet enim ea occisio non sit voluntaria in seipsa, est tamen voluntaria in sua causa, quatenus occisor eo ipso quod voluntariè omisit sufficientem diligentiam, censetur saltem implicite & indirectè velle interfectionem quæ inde sequuta est.

Docet 3. ignorantiam consequentem, cum sit voluntaria, non causare inuoluntarium simpliciter, causare tamen inuoluntarium secundum quid, in quantum præcedit motum voluntatis ad aliquid agendum, qui non esset, scientia præsentem.

Quibus verbis duo continentur, alterum, ignorantiam consequentem, quæ est causa operis, non causare inuoluntarium simpliciter; quia cum hæc ignorantia sit volita, quod ex ea sequitur censetur simpliciter voluntarium, non videm directè, sed indirectè; ut omissio sacri sit voluntaria illi qui scire neglexit, an esset præceptum audiendi Missam.

Alterum, eandem ignorantiam causare inuoluntarium secundum quid, illa enim ommissio sacri, etsi simpliciter sit voluntaria, censetur inuoluntaria secundum quid, quatenus homo ita affectus est ut sacrum audiuiisset, si præceptum non ignorasset.

Vbi obseruandum est hoc procedere de ignorantia consequente non affectata, si enim sit affectata, eo sensu ut velit quis ignorare præcepta quo liberius peccet, sic non minuit, sed

auget voluntarium, vt docet S. Thomas 1. 2. quæst. 76. art. 4. Et ratio est, quia si fiat comparatio inter duos peccantes, quorum alter cum scientia præcepti simpliciter peccat, alter data opera vult præceptum ignorare, ne illius fortè consideratione vlllo modo retardetur à peccato, negari non potest quin iste ex maiori affectu & impetu voluntatis peccet quam ille, adeoque magis voluntariè.

Si tamen ignorantia affectetur non ad liberius peccandum, sed ne cum tanto Dei contemptu peccetur, hoc modo dicendum est ignorantiam affectatam minuere voluntarium: siquidem ea quæ fiunt ex maiori contemptu, censentur magis voluntaria, quàm quæ fiunt ex minori: vnde etiam hæc ignorantia minuit peccatum.



C A P V T II.

DE LIBERTATE HVMANA.

ARTICVLVS PRIMVS.

An ad liberam arbitrium requiratur libertas à necessitate.

PRæmoneo 1. cum liberum illud sit quod aliquo vinculo exsolutum est, tot esse libertates quot sunt vincula à quibus homo liberari potest: vnde alia est libertas à seruitute legis Mosaicæ, quæ Christianis; alia libertas à peccato, quæ iustis; alia libertas à corruptione, quæ beatis; alia libertas naturalis quæ omnibus

hominibus indita est à natura, & per quam maxime in suis operationibus à modo agendi prutorum distinguuntur.

Præmoneo 2. non hic agi de libertate à servitute legis Mosaicæ, nec de libertate à peccato; nec de libertate à corruptione, quia libertas hæc impropria est & metaphorica, sed de libertate naturaliter omnibus hominibus indita; & difficultas in eo consistit, an ad libertatem hominis sufficiat quod sit liber à coactione, an verò requiratur quod etiam sit liber à necessitate.

Præmoneo 3. illud dici liberum à coactione, quod etsi necessario agat, sponte tamen seu voluntarie, adeoque ex principio intrinsecò operatur; liberum verò à necessitate, quod non modo sponte agit, sed etiam cum indifferentia ad utrumlibet, ita ut antequam agat possit agere, vel non agere. Itaque

Recentiores Hæretici graviter contendunt hominem in statu innocentie fuisse prædium libertate perfecta, ut dicit exsolutionem non modo à coactione, sed etiam à necessitate. post peccatum primi parentis hominem poni quidem libertate à coactione, non tamen à necessitate, saltem in rebus ad salutem spectantibus; ita ut in eorum sententia idem nunc sit agere liberè; & agere sponte seu voluntariè.

Verum sententia Catholica statuit in homine, etiam post peccatum primi parentis, mansisse arbitrium non modo à coactione, sed etiam à necessitate agendi liberum. Probatur 1. ex hoc illo celeberrimo Ecclesiastici 15. *Deus ab initio constituit hominem, & reliquit illum in manu insulij sui. Adiecit mandata & precepta sua, si vo-ueris mandata servare, conservabunt te, &c. Apposuit tibi ignem & aquam, ad quod volueris porrigere sanum tuum.* Quibus verbis indifferentia vo-

luntatis humanæ ad mandata seruanda, vel non seruanda, adeo perspicuè stabilitur, vt nihil illustrius dici potuerit.

Nec dicas ea verba intelligi tantum de primis parentibus pro statu innocentiae, hoc enim euidenter falsum est, tum quia etsi detur priora de illis tantum intelligi, certè sequentia illa, *si uolueris, &c. apposuit tibi, &c.* ad primos parentes, qui longè ante è uiuis excesserant, dirigi non possunt, vt perspicuum est. Tum quia eodem illo testimonio plerique Patres libertatem hominis probant, ac præter alios Augustinus lib. de gratia & libero arbitrio cap. 2. ubi ex eo ita concludit; *Ecce apertissimè videmus expressum liberum humana voluntatis arbitrium.*

Probatur 2. ex Patribus. Hieronymus lib. 2. aduersus Iouin. *Liberi arbitrij*, inquit, *nos condidit Deus, nec ad virtutes, nec ad vitia necessitate trahimur; alioqui ubi necessitas, nec corona est.* Et in epist. 146. hæc habet, *Solus Deus est in quem peccatum non cadit, cetera cum sunt liberi arbitrij, iuxta quod homo ad imaginem & similitudinem Dei factus est, in utramque partem suam possunt flectere voluntatem.* Ex quibus constat adeo verum esse hominis libertatem esse exsolutam agendi necessitate, & potiri indifferentia ad vtrumlibet, vt in hoc consistat Dei imago homini impressa.

Augustinus præter quàm quòd lib. de natura & gratia cap. 65. valde probat testimonium Hieronymi priori loco allatum, ita scribit lib. 2. contra Faustum cap. 5. *Et nos quidem sub fato stellarum nullius hominis genesim ponimus, ut liberum arbitrium voluntatis quo vel bene, vel malè uiuitur, propter iustum iudicium Dei ab omni necessitatis vinculo vindicemus.* Quibus verbis & apertè negat voluntatem agere ex necessitate, siue bene siue malè operetur, & rationem affert, quia iustè à

Deo non iudicaretur, si ex necessitate ageret. Et in Psal. 113. ad illud, *Omnia quacunq; voluit fecit: Immemus aliquid*, inquit, quod libera voluntate faciamus? immemus planè, cum ipsum Deum amando laudamus, hoc enim libera voluntate facis, quando amas quod laudas, non enim ex necessitate, sed quia placet.

Bernardus lib. de gratia & libero arbitrio: Est verò, inquit, data ratio voluntati ut instruat illam, non ut destruat, destrueret autem si necessitatem illi ullam imponeret, quo minus liberè pro arbitrio sese volueret, siue in malum consentiens appetitui, &c. siue ad bonum gratiam sequens. Et postea, ceterum quod illi liberum non esse cognoscitur, quo pacto vel bonum illi, vel malum imputatur? Excusat nempe utrumque necessitas, porro ubi necessitas, ibi libertas non est, ubi libertas non est, nec meritum, ac per hoc nec iudicium. Ex quibus testimoniis patet per agendi necessitatem tolli libertatem, meritum, & iudicium; quia actus ex necessitate elicited neque est licet, neque bonus aut malus, adeoque nec præmio nec pœna dignus. Vide plura de libertate indifferentiæ ex Bernardo in consensu Orbis ap. 10. ex quo perspicuum fit, eandem omnino transisse indifferentiam in homine post peccatum, quæ fuit in illo ante peccatum.

Probatur 3. ex antiquis Scholasticis. Master 2. sent. dist. 15. Iam verò, inquit, ad propositum redeamus, scilicet ad liberi arbitrij tractatum. Quod Philosophi definiendo dixerunt, liberum de voluntate iudicium, quia potestas & ipsa habilitas, voluntatis & rationis, quam supra diximus esse liberum arbitrium, libera est ad utrumlibet, quia liberè potest moveri ad hoc, vel ad illud. Et postea docet, liberum Dei arbitrium omni agendi necessitate care, ac tandem generatim libero arbitrio tribuit potentiam agendi, non modo coactione,

sed etiam necessitate solutam, quia, inquit, sine coactione & necessitate valet appetere, vel eligere quod ex ratione decreuerit.

S. Bonaventura 2. dist. 25. parte 2. quæst. 2. accipit liberum arbitrium duobus modis 1. ut est liberum, seu quatenus opponitur coactioni, ut explicat Gabriel eadem dist. quæst. vnica. 2. ut est deliberans, seu quatenus est principium operationum moralium, & quæ fiunt ex deliberatione; ac priori modo fatetur liberum arbitrium esse posse non solum respectu contingentis, sed etiam respectu necessarij, ut patet in Deo, & beatis. Posteriori vero fatetur necessitatem repugnare libertati: Si autem loquamur, inquit, de libero arbitrio secundum quod deliberans, utrum hoc fiat, vel non fiat, sic actus eius de quo deliberat est contingens, nullus enim deliberat de necessario, & impossibili.

S. Thomas agendi necessitatem à libertate locis innumeris excludit, ut 1. p. quæst. 19. art. 10. cum ait, *Liberum arbitrium habemus respectu eorum quæ non necessario volumus, vel naturali instinctu.* Et 1. 2. quæst. 10. art. 4. Quia, inquit, voluntas est principium non determinatum ad vnum, sed indifferenter se habens ad multa, sic Deus eam mouet quod non ex necessitate ad vnum determinat, sed manet eius motus contingens & non necessarius, nisi in his ad quæ naturaliter mouetur. Quibus verbis aperte refelluntur qui ideo putant voluntatem ad agendum debere determinari, & necessitari, quia est indifferens ad multa, cum potius è contra S. Doctor ob talem indifferentiam, agendi necessitatem à voluntate excludat. Tandem ut plura præteream quæ in Defensione S. Thomæ videri possunt, quæst. 6. de malo art. vnico ait esse hæreticam eorum sententiam qui docent, voluntatem hominis, ex necessitate quidem moueri

aliquid agendum, non tamen cogi, eo quod ex illam tollitur ratio meriti, & demeriti in humanis actionibus. Ait etiam esse numerandam inter extraneas Philosophiæ opiniones, uia non solum repugnat fidei, sed etiam subertit omnia principia Philosophiæ Moralis.

Rursus quatuor sequentes propositiones à Facultate Parisiensi damnatæ fuerunt. **Liberum arbitrium non est dominus actuum** 1. **Liberum arbitrium hominis non habet potestatem ad opposita, nec illi conuenit eadem potestas ex illius natura & intrinseca ratione.**

Libertas & necessitas eodem conueniunt, 2. **specu eiuſdem, & sola uolentia repugnat libertati naturali hominis.** 3. **Liberum arbitrium liberè uult quidquid sponte sua uoluntariè uult, ita ut quod necessariò uult, idem liberè uelit.**

Probatur 4. auctoritate Pij V. & Gregor. XIII. in Bulla contra Michaellem Baium, ubi uincitur propositio illa, quod uoluntariè fit, iam si necessitate fiat, liberè tamen fit: & ista, sola uolentia repugnat hominis libertati. Item auctoritate Urbani VIII. in eadem Bulla contra Iansenium renouata, & à Facultate Parisiensi quoad doctrinam recepta anno 1644. die 15. in quo die prohibuit tam Doctoribus, quam accalauereis ne probent uel sustineant propositiones per Bullas Pij V. Gregorij XIII. & Urbani VIII. summorum Pontificum damnatas. Accedit constitutio Innocentij X. nouissime lata contra quinque propositiones eiusdem Iansenij, quarum tertia qua statuitur, ad erendum & demerendum in statu nature læe non requiri in homine libertatem à necessitate, sed sufficere libertatem à coactione, ut hæretica est damnata. Quæ quidem Constitutio

non modo ab Episcopis Galliæ, sed etiam à prædicta Facultate Parisiensi magno Doctorum consensu & applausu 1. Augusti huius anni 1653. recepta fuit.

Probatur 5. ratione ex dictis auctoritatibus desumpta, nam si homo agit ex necessitate, tolluntur virtus & peccatum, præmia & poenæ, consilia & præcepta, obiurgationes aliaque eiusmodi quæ ad bonum ex se inducunt, & à malo deterrent. Constat enim vel ipso lumine naturali; non essetribuendum laudi, vel vituperio quod caueri non potest, & frustra adhiberi inductiones Morales, vbi voluntas ad alteram partem ex necessitate alligata est.

Confirmatur, nam alioqui infantes, stulti, imò & bruta animalia cum sponte & sine coactione operentur, agerent liberè, & consequenter eorum operationes essent capaces honestatis & turpitudinis Moralis, meriti & demeriti, quod absurdissimum est. Ex quibus tandem concluditur, per liberum hominis arbitrium propriè dictum intelligi facultatem illius naturalem agendi necessitate solutam, adeoque indifferentem ad agendum & non agendum: quod ex infra contra Physicam prædeterminationem dicendis ampliùs confirmari poterit.

Contra allatam resolutionem Catholicam hæretici nonnulla obiicere solent ex Augustino, quæ iamdiu à Controuersiarum tractatoribus solata fuerunt. In primis obiiciunt illud ex lib. 5. de Ciuit. cap. 10. *Si illa definitur necessitas secundum quam diximus necesse esse ut ita sit aliquid, vel ita fiat, nescio cuream timeamus ne nobis libertatem auferat voluntatis.* Verùm antequam respondeatur,

Aduerte 1. duplicem esse necessitatem, aliam antecedentem, aliam consequentem, prior ne-

ecessitas est illa quæ oritur ex aliqua suppositione à libertate independente, vt est in beatis necessitas amandi Deum supposito lumine gloriæ; posterior verò illa dicitur quæ oritur ex suppositione à libertate pendente, vt est in me necessitas scribendi, ex hypothesi quod scribam; quia quidquid est necesse, est esse quamdiu est, vt alias ex Philosopho retulimus vbi de futuris contingentibus.

Aduerte 2. priorem necessitatem repugnare libertati propriè sumptæ, vt dicit indifferentiam ad vtrumlibet: qui enim tali aliqua necessitate præuenitur, adeo potenter adigitur ad vnā partem, vt alteram amplecti non possit, adeoque non maneat indifferens ad hoc vel illud agendum; posteriorem verò non pugnare cum libertate, quia illius vsum sine impedimento exercitum supponit. His positis

Respondeo Augustinum loco citato nullam admittere necessitatem in voluntate nostra nisi consequentem, vt perspicuum est ex his verbis. *Sic etiam cum dicimus, necesse esse ut cum volumus libero velimus arbitrio, & verum procul dubio dicimus, & non ideo ipsum liberum arbitrium necessitati subiungimus, quia adimit libertatem.* Non enim aliam admittit necessitatem vt libertatis amicam, præter illam qua necesse est nos velle quando volumus, quæ haud dubiè est consequens, vt explicatum est. Vnde ostendit postea necessitatem eccandi ex præscientia diuina ortam, non offere libertati; siquidem Deus præsciuit hominem peccaturum, quia verè peccaturus est, cum esset non peccare.

Secundò obiiciunt illud eiusdem Augustini i. Enchir. cap. 105. *Postea verò sic erit ut male ille non possit, nec ideo libero carèbit arbitrio, multo libere erit arbitrium, quod omnino non poterit*

servire peccato. Quibus verbis docet per impossibilitatem peccandi quæ beatis competit, adeoque per necessitatem non peccandi non modo non tolli, aut minui libertatem, quin potius augeri.

Responderi potest 1. Augustinum loqui hoc loco de libertate illa impropria & Metaphorica, quæ in gratia, & peccati exclusionem consistit: cum enim hoc modo sit liber qui in hac vita non est subditus peccato, multo magis eodem sensu ille liber dicendus est, qui in peccatum labi non potest; quod proprium est beatorum.

Respondeo 2. Augustinum posse intelligi de libertate quatenus sumitur pro eo quod libenter fit, seu pro spontaneo & voluntario; beati enim ex vi ipsius visionis beatificæ, tanto amoris impetu feruntur in Deum, tantoque gaudio ex ea visione, & ex eo amore perfunduntur, ut nihil ipsis gratius, libentius, magisque voluntarium obtingere possit, quam obiectum illud infinitè bonum & suave in perpetuas æternitates complecti, atque adeo summo studio quidquid illi displicet cauere.

Respondeo 3. beatos etsi peccare nequeant, esse liberiores libertate propriè dicta, non quidem in ipsa peccati vitiatione, sed in electione bonorum quæ necessariam cum beatitudine connexionem non habent. Certi sunt enim se eiusmodi actus sine errore, sine culpa, & sine aliis defectibus, quibus actus humani in hac vita obnoxii sunt, elicere posse, adeoque liberius eos operari possunt. Atque eo sensu S. Thomas 1. p. quæst. 19. art. 10. ad 2. libertatem Dei cum necessitate non peccandi coniunxit dicens, *Et tamen ad opposita se habet, in quantum potest velle hoc esse, vel non esse; sicut & nos non peccando possu-*

nus velle sedere, & non velle sedere. Quæ verba con-
sentanea sunt conclusioni quam S. Doctor tra-
lit in corpore eiusdem art. in hunc modum,
Sic igitur Deus ex necessitate suam bonitatem velit,
licet verò non ex necessitate, respectu illorum quæ non
ex necessitate vult, liberum arbitrium habet.

Tertio vrgent illud Augustini eodem loco,
Neque enim aut voluntas non est, aut libera dicenda
non est, quæ beati sic esse volumus, ut esse miseri non
olum nolumus, sed nequaquam prorsus velle possu-
mus. Respondeo 1. ex Durando 2. dist. 24.
quæst. 2. libertatem hic sumi latè, ut compre-
hendit omnem actum voluntarium, ad liberta-
tem autem arbitrij requiri indifferentiam ad
trumlubet, exclusa non modo coactione, sed
etiam quacunque necessitate absoluta, seu ante-
cedente. Et confirmatur ex S. Thoma loco ci-
tato ubi ait, non pertinere ad liberum arbi-
trium quod volumus esse fœlices, sed ad natu-
ram instinctum.

Respondeo 2. duplicem esse libertatem, aliam
 specificationis seu contrarietatis, aliam contra-
 dictionis seu exercitij: prior in eo consistit ut
 possimus aliquid velle, vel illius oppositum, ut
 amplecti virtutem, aut vitium; posterior verò
 in eo posita est ut possimus aliquid velle, aut
 non velle, ut peccare, aut non peccare. Itaque
 verba Augustini sic debent intelligi, ut volun-
 tas nostra non possit non velle beatitudinem,
 et velle miseriam quantum ad specificationem,
 esse tamen quoad exercitium ut vel experien-
 ti constat, cum non semper actu cogitemus de
 beatitudine, & eatenus esse liberam. Quæ di-
 strictio traditur a S. Thoma quæst. 6. de malo,
 c. unico ad 7. his verbis, *Bonum perfectum quod*
beatitudo, voluntas non potest non velle, ita sci-
et quod velit eius oppositum, potest tamen non velle

actum, quia potest auertere cogitationem beatitudinis.
 Alias obiectiones prætereo, vel quia alterius
 sunt loci, vel quia ex dictis facile solui possunt.

ARTICVLVS II.

An Physica prædeterminatio repugnet libertati.

Nonnulli recentiores contendunt voluntatem nostram in nullum actum prodire posse, quin à Deo ut à prima causa ad illum præuia quadam motione reali & Physica determinetur, sicque Physicè prædeterminetur. Quod si accuratius inquiras, in quo posita sit ratio totalis eiusmodi motionis, scito eam in eo consistere, ut fuse ostendimus in suavi Concordia disp. 2. sect. 1. quod sit entitas aliqua realis, recepta in voluntate antecedenter ad operationem illius, cuius positio non sit in nostra potestate, sed à sola Dei voluntate pendeat eam dare, vel non dare cui voluerit, quæ sit planè necessaria ad omnes actus siue bonos, siue malos materialiter spectatos; & qua posita necesse sit voluntatem operari actum illum particularem ad quem impellitur, non quidem necessitate consequente, vel infallibilitatis fundata in præscientia operationis futuræ, sed in necessitate antecedente orta ex naturali & intrinseca vi ipsius motionis prædeterminantis, independenter à quacunque præscientia operationis futuræ.

Verùm communis sententia Philosophorum, & Theologorum statuit prædeterminationem Physicam ita intellectam, repugnare libertati, adeoque ad liberum arbitrium requiri exsolutionem à prædeterminatione Physica. Proba-

tur 1. ex dictis, nam si necessitas agendi repugnat libertati, consequenter illi repugnat prædeterminatio Physica; sequela ostenditur, quia hæc in conceptu suo includit necessitatem agendi. Confirmatur, nam omnis necessitas vel est antecedens, vel consequens, & illa repugnat libertati, non hæc: at necessitas inclusa in Physica prædeterminatione non est consequens, sed antecedens, cum actum non supponat, sed illud efficiat; ergo repugnat libertati.

Respondent aliqui necessitatem antecedentem non repugnare libertati, quando se tenet ex parte primæ causæ, quia Deus cum sit omnipotens, potest efficaciter applicare voluntatem creatam ad actum in particulari, secundum modum libertatis. Verum hoc refellitur, quia necessitas antecedens ex se & natura sua omnino repugnat libertati, ad cuius rationem requiritur indifferentia ad vtrumlibet, ut art. præcedenti probatum est: quare Deus etsi sit omnipotens, efficere non potest ut idem actus voluntatis fiat ex necessitate antecedente, simulque fiat liberè: sicut efficere non potest ut homo simul sit cæcus, & videns; aut quod ær simul sit lucidus, & tenebrosus. Imò necessitas antecedens orta ex omnipotentia Dei multò efficacius ligat voluntatem ad vnam partem, quam quæ oritur ex causis creatis; adeoque magis repugnat libertati seu indifferentiæ ad vtrumlibet.

Respondent 2. necessitatem quidem absolutam repugnare libertati, non autem necessitatem ex suppositione, & in sensu composito, qualis est necessitas orta ex motione Physica prædeterminante: at hoc etiam gratis asseritur, nam necessitas quæ vocatur ex suppositione, & in sensu composito, duplex est, alia quæ oritur ex suppositione antecedente, ut necessitas amā-

di Deum ex suppositione visionis diuinæ, quæ etiam verè est necessitas absoluta; alia ex suppositione consequente, vt necessitas scribendi ex hypothesi quod scribo, quæ etiam dici potest necessitas conditionata: prior autem repugnat libertati, non posterior; quare cum necessitas orta ex Physica prædeterminatione oriatur ex suppositione antecedente, vt perspicuum est ex dictis, negari iure non potest quin ea sit à parte rei necessitas absoluta, &, quidquid sit de hac voce, quin libertati aduersetur.

Probatur 2. ex vulgari definitione libertatis apud Philosophos, & Theologos receptissima; nam liberum illud dicitur quod positis omnibus prærequisitis ad agendum potest agere, vel non agere; at posita Physica prædeterminatione, quæ dicitur esse vnum & maximè necessarium ex prærequisitis ad agendum, voluntas non manet in eo statu vt possit agere, vel non agere: ergo prædeterminatio illa tollit libertatem. Maior ostenditur, quia vt docet Capreolus Princeps Thomistarum 1. dist. 6. quæst. vnica, art. 3. illud est discrimen inter agens naturale, & liberum, quod agens naturale, positis omnibus requisitis ad agendum, & ablato omni impedimento, necessario agit, neque est in eius potestate non agere; at agens liberum, positis omnibus ita vt possit agere, non necessario agit, sed in potestate eius est vt agat, vel non agat. Minor ostenditur, quia posse agere, vel non agere est esse indifferens seu indeterminatum ad agendum, vel non agendum; hæc autem indeterminatio tollitur per determinationem ad agendum, vt perspicuum est.

Respondent aliqui definitionem illam non ita debere intelligi, vt ad libertatem necessarium sit, quod cum omnibus requisitis ad agendum

voluntas possit coniungere carentiam operationis, sed tantum quod cum illis habeat potentiam ipsam non agendi; at hæc potentia non destruitur per Physicam prædeterminationem. Verum hoc refellitur, tum quia bruta etsi ad vnum determinata, retinent ipsam potentiam radicalem non agendi, nec tamen agunt liberè: tum quia ille non dicitur liber ad agendum, vel non agendum, qui habet potentiam ipsam remotam, per quam posset secundum se agere vel non agere, si alia adessent, sed tantum qui præditus est potètia proxima & expedita ad vtrumlibet, ita vt facillimè possit hanc potentiam executioni mandare siue ad hanc, siue ad aliam partem vt voluerit. Vt vel ex eo patet, quòd omnino absurde diceret eum esse liberum ad currendum, aut non currendum, qui ob impedimentum aliquod ne quidem pedem mouere potest, esto potentiam ipsam motricem secundum se habeat perfectè sanam & integram. Quare licet motio illa prædeterminans non destruat entitatem ipsam potentiæ liberæ, cum tamen eam efficaciter & ineluctabiliter adigat ad vnam partem, per illam tollitur facultas proxima & expedita ad vtrumlibet, quæ includitur in definitione liberi arbitrii.

Instabis, posito decreto absoluto quo Deus statuit ab æterno creare mundum in tempore, non potuit Deus non creare mundum, cum sit immutabilis, & tamen mundum creauit liberè, ergo falsum est quod ad actum liberum requiratur, vt positis omnibus requisitis possit non fieri. Respondeo hoc argumentum apertè nobis fauere, quia omnium Theologorum consensu, creatio mundi non fuit in se formaliter libera, cum supposito decreto Dei æterno & absoluto vitari non potuerit, sed tantum denominatiuè

per ordinem ad decretum illud , quod in se fuit liberum , quatenus Deus prius ratione quàm decreuerit mundum creare , potuit à tali decreto abstinere , vt abstinuit à decreto creandi alium mundum , quem aequè creare poterat. Quòd si decretum creandi mundum non fuisset in se liberum , nullo modo fuisset libera actualis mundi creatio , quia tunc neque in se , neque in alio libera fuisset. Hinc autem euidenter collige , si quid agimus ex Physica prædeterminatione , id nullo modo esse nobis liberum , non quidem in se , cùm posita illa prædeterminatione , à nobis vitari non possit ; non etiam per denominationem ab illa prædeterminatione , cùm hæc in potestate nostra non sit.

Probatur 3. nam proprium est potentiaæ liberæ se ipsam determinare ad agendum , cùm aliæ res potius aliunde determinentur , quàm seipsas determinent , vt omnes fatentur : at potentia libera non potest seipsam ad agendum determinare , si à Deo Physicè prædeterminatur ad singulos actus , vt volunt aduersarij : ergo eiusmodi prædeterminatio non cohæret cum modo agendi potentiaæ liberæ. Minor patet ; tum quia ideo alia agentia non se determinât , quia aliunde sunt determinata ; tum quia quod se determinat , transit à statu indifferenti ad statum fixum & determinatum , at quod iam est Physicè prædeterminatum non est in statu indifferenti , sed in statu fixo & determinato ; ergo impossibile est quod se determinet.

Confirmatur , nam cùm posita Physica prædeterminatione ad actum v. c. amoris , voluntas prius natura quàm operetur , sit iam determinata ad eliciendum actum amoris , adeo vt per nullam potentiam fieri possit vt ab ea determinatione se subducatur , solum dici potest eam , cùm

actu agit, exequi determinationem sibi iam à Deo impositam, non autem se ad actum determinare: siquidē vt quis se determinet ad actum, non sufficit quod per motionem alterius transeat à carentia actus ad actum, sic enim bruta & insensibilia se ad agendum determinarent, & consequenter agerent liberè, cum à carentia actus ad actum transeant; sed maximè requiritur vt à statu indifferenti & indeterminato transeat ad statum fixum & determinatum, quod certè fieri non potest, si iam à Deo præuentus est Physica illa prædeterminatione, quæ agendi necessitatem includit.

Vnde refelluntur qui dicunt, non requiri ad libertatem, quod voluntas sit simpliciter primum se determinans, sed satis esse quod sit secundum se determinans. Hoc enim verum est, sed quæstio manet ipsis soluenda, quomodo voluntas se verè determinet vt secundum determinans, si iam est à Deo Physicè prædeterminata ad talem actum in specie, & in indiuiduo; cum sic nihil illi determinandum supersit.

Dicent, voluntatem se determinare quoad actum secundum, cum tantum à Deo sit prædeterminata in actu primo. Sed contra, nam cum ita sit prædeterminata in actu primo, vt nequeat sustinere actum secundum, sed necessario illum ex vi illius prædeterminationis eliciat, profectò repugnat quod propriè se determinet ad actum secundum, cum etiam respectu illius sit iam à Deo determinata.

Probat 4. nam ille non agit liberè, qui non agit cum dominio in proprium actum, at qui mouetur ad agendum per Physicam prædeterminationem, non agit cum dominio in proprium actum; ergo non agit liberè. Maior ab omnibus admittitur, suadetur minor, quia ille

agit cum dominio in proprium actum, in cuius potestate est ut illum eliciat, vel non eliciat: Qui autem impellitur ad agendum per Physicam prædeterminationem, non ita se habet, cum necessario agat, & actum quem elicit nequeat sustinere: ergo non agit liberè.

Confirmatur ex S. Thoma 1. p. quæst. 82. art. 2. ad 3. ubi ait, nos esse dominos nostrorum actuum, secundum quod possumus hoc, vel illud eligere. Et 2. sicut dist. 25. quæst. 1. art. 1. ad 3. ubi docet, determinationem actionis & finis in potestate liberi arbitrij constitui. sicque sibi remanere dominium sui actus. Et ibid. ad 1. docet ea propria ratione liberum arbitrium esse in Deo, quia determinatio sui actus non est sibi ab alio, sed à seipso, & ideo ipsum verissime sui operis dominum esse. Et dist. 39. quæst. 1. art. 1. affirmat voluntatem nostram esse ex se indifferentem ad plura, & quod determinatè exeat in hunc actum, vel in illum, non esse ab alio determinante, sed ab ipsa voluntate. Vnde art. sequenti probat, rationem culpæ in actu deformi esse, ex eo quod procedit ab habente dominium sui actus; hoc autem esse in homine secundam illam potentiam quæ ad plura se habet, neque ad aliquid eorum determinatur nisi ex se ipsa, quod tantum voluntati competit. Quæ & similia aliàs à nobis relata, adeo euidenter Physicam prædeterminationem iugulant, ut nunquam capere potuerim qua mente ij Thomistæ audiri velint, qui eiusmodi prædeterminationem defendunt.

ARTICVLVS III.

Confirmatio prædictorum sigillatim quoad actus bonos.

PRæcedenti articulo ostendimus prædeterminationem Physicam repugnare libertati in genere, vnde manifestè sequitur eam non posse conciliari cum vilo actu libero in specie, cuiuscunque conditionis sit. Ad maiorem tamen prædictorum cōfirmationem, placet hoc, & sequenti art. sigillatim demonstrare voluntatem nostram non prædeterminari à Deo ad actus bonos, nec ad malos.

Et quidem quod non prædeterminetur Physicè ad actus bonos, probatur tum ex August. lib. de spiritu & littera cap. 34. vbi ait, *Visorum suasionibus agit Deus ut velimus, & credamus, &c. Sed consentire, vel dissentire propria voluntatis est.* Et infra, *Profecto ipsum velle credere Deus operatur in homine, & in omnibus misericordia eius præuenit nos, consentire autem vocationi Dei, vel dissentire ab ea, sicut dixi, propria voluntatis est.* Et lib. 2. contra Petilianum, *Si tibi proponam quæstionem, quomodo Deus pater attrahat ad filium homines quos in libero dimisit arbitrio, fortassis eam difficile soluturum es; quomodo enim attrahit, si dimittit ut quis quod voluerit eligat, & tamen utrumque verum est, sed intellectu hoc penetrare pauci valent.* At gratia illa attrahens, omnium consensu, est gratia efficax; ex quo euidenter sequitur gratiam efficacem non habere vim prædeterminandi voluntatem ad actus bonos, cum ei relinquat facultatem eligendi quod libuerit. Quod etiam apertè sumitur ex loco illo celebri tract. 26. in Ioan. Videtur

quomodo trahit pater, docendo delectat, non necessitatem imponendo, ecce quomodo trahit; erunt omnes docibiles Dei, trahere Dei est. Pleraque alia in variis tractatibus retulimus ex eodem Aug. quæ manifestè ostendunt, positâ gratia voluntatem nostram manere indifferentem ad consentiendum, & dissentiendum.

Tum ex Prospero lib. 2. de vocat. gentium cap. 12. ubi sic scribit, *Sed multis qui iam iudicio rationis utuntur, ideo liberum est discedere, ut non discessisse sit præmium, & ut quod non potest nisi cooperante Dei spiritu fieri, eorum meritis deputetur quorum id potuit voluntate non fieri.* Et cap. 28. *Ipsamque gloriam, inquit, ijsdem quibus eam impertit, adscribit, ut quamvis auxilio Dei steterint, tamen quia in se habebant unde caderent, ipsorum sit meritum quod steterunt.* Quibus verbis Prosper manifestè ostendit, gratiam ita mouere ad opus bonum, ut relinquat voluntati libertatem non obsequendi; imò sine hac ad agendum indeterminatione sub gratia mouente, nullum esse meritum. Quod etiam euidenter colligitur ex verbis illis sequentibus. *Igitur sicut illi qui crediderunt, iuuantur ut in fide maneant, sic & qui non crediderunt, iuuantur ut credant. Et quemadmodum illi in sua habent potestate ut excant, ita & isti in sua habent potestate ne veniant.* Hinc enim patet gratiam illam qua homines actu iuuantur ad credendum, & in fide perseverandum, repudiari posse; adeoque non habere vim prædeterminandi eorum voluntatem, siue ad fidem, siue ad perseverantiam.

Tum ex Richardo Victorino tract. 1. de statu interioris hominis cap. 13. quo loco ait, *Libertati verò est quod consensus eius extorqueri, vel cohiberi non potest, potest enim consentire, vel non consentire inspirationi diuina, similiter & suggestioni diabolica.*

etica. Quæ verba non maiorem tribuunt determinandi vim inspirationi diuinæ, quam suggestioni diabolicæ, cui nullus concedit virtutem Physicè prædeterminandi voluntatem ad pus malum.

Tum ex S. Thoma quodlibeto I. art. 7. ad vbi ait, *Deus mouet omnia secundum modum eorum, & ideo diuina motio à quibusdam participatur in necessitate, à natura autem rationali cum libertate, propter hoc quòd virtus rationalis se habet ad op- sita, & ideo sic Deus mouet mentem humanam ad vnum, quod tamen potest huic motioni resistere.* Et I. quæst. 62. art. 3. ad 2. vbi ita habet, *Dicendum quod omnis forma inclinat suum subiectum secundum modum nature eius, modus autem naturalis intellectus naturalis est ut liberè feratur in ea qua vult.*

ideo inclinatio gratia non imponit necessitatem, sed bens gratiam potest ea non uti, & peccare. Ex quibus verbis manifestum est reiici ab operibus bonis per gratiam elicitis, vt libertati contrarium, quamcunque necessitatem & determinationem ad vnum, qua voluntas adigatur ad eundem.

Tum ex Concilio Senonensi decreto 15. de sacro arbitrio, vbi ait; *Neque tamen tanta gratia cessitas libero præiudicat arbitrio, cum illa semper sit prompta, nec momentum quidem prætereat in quo quis non stet ad ostium & pulset, cui si quis aperuerit ianuam, intrabit ad illum, & cœnabit cum illo.* Nec igitur tale sit huiusmodi trahentis Dei auxilium, cui isti non possit. Quoties enim Dominus voluit congregare pullos suos sub alas, & noluit? Frustrà certe Dominus Iudæos dura cervice & incircumcisi cordis arre- ret, qui semper Spiritum sancto resisterent; frustrà etiam Thessalonicenses admoneret Spiritum ne ex- uerent, si diuini inspirationibus homines inenita- ter raperentur. Ex quibus verbis patet I. auxi-

lium trahens seu efficax non effe tale cui refifti non poffit. 2. homines non rapi ineuitabiliter diuinis inspirationibus. 3. veritatem iftam colligi ex locis fcripturæ, quibus conftat gratiam interdum repudiari, & effectui carere.

Tum ex Concilio Trid feff. 6. cap. 5. vbi fic loquitur; *Ita vt tangente Deo cor hominis per Spiritus fancti illuminationem, neque homo ipfe nihil omnino agat, inspirationem illam recipiens, quippe qui illam & abicere poteft.* Vnde can. 6. fic ftatuit; *Si quis dixerit liberum arbitrium hominis à Deo motum & excitatum, nihil cooperari affentiendo Deo excitanti atque vocanti, quo ad obtinendam gratiam iuftificationis fe difponat ac praparet, neque poffe diffentire fe velit, anathema fit.* Quibus verbis damnatur hærefis tum Lutheri, qui docuit hominem ita à Deo moueri per gratiam, vt illius voluntas in conuerfione mere paffiuè fe habeat; tum Caluini, qui exiftimauit eam quidem agere, fed ita ad agendum determinari, vt non poffit non agere.

Dices, prædictas auctoritates non probare gratiam poffe reiici in fenfu composito, fed tantum in fenfu diuifo, ita fcilicet vt auxilium efficax & diffenfus poffint effe in voluntate, non quidem fimul & coniunctim, fed diuifim, feu diuerfis temporibus. Verum hæc refponfo refellitur, tum quia testimonia adducta pro repudiabilitate gratiæ, fi penitus infpiciantur, manifefte oftendunt gratiam efficacem adeo effe attemperatam voluntati, vt nullo modo eam determinet ad vnam partem, fed eam relinquat indifferentem ad coniungendum cum ipfa vel actum bonum, vel negationem illius, & confequenter eam poffe repudiari etiam in fenfu composito.

Confirmatur, nam pleraq; testimonia osten-

ant hominem eadem facilitate posse dissentire gratiæ, & illi assensum præbere; at nemo dubitat quin ea intelligantur de assensu gratiæ in sensu composito, ergo etiam intelligi debent de assensu in sensu composito. Alia verò testimonia excludunt necessitatem consentiendi, adeoque loquuntur de potestate dissentendi etiam in sensu composito; quia si nulla est necessitas consentiendi, facile excluso consensu, gratia cum dissensu in eadem voluntate coniungi potest.

Tum quia Patres ideo affirmant gratiam posse repudiari, ut libertatem voluntatis seruent inolumem; at certè intentum non assequerentur, si tantum vellent gratiam posse repudiari in sensu diuiso, non autem in sensu composito; quia si hoc sufficeret ad libertatem, sequeretur norem beatificum esse perfecte liberum, cum possit beatus in sensu diuiso Deum non amare, nihilque sit adeo necessarium & ineluctabile, quod eo modo non possit non fieri, ut perspicuum est.

Tum quia Calvinus, ut alios libertatis hostes præteream, non adeo erat demens ut existimaret, gratiam efficacem & dissensum non posse poni in eadem voluntate diuisim, seu diuersis temporibus, sed in ea erat sententia ut putaret, gratiam illam non posse simul poni in voluntate cum dissensu. Quare cum ab Ecclesia ut male sentiens de libertate damnatus fuerit, proptereaque in Concilio Trid. contra illum statutum sit, hominem posse gratiam abiicere, eadem dissentire si velit, hinc manifestissimum videtur eiusmodi definitionem intelligendam esse de repudiabilitate gratiæ, etiam in sensu composito.

ARTICVLVS IV.

Idem ostenditur speciatim quoad actus malos.

IAm verò quòd voluntas hominis non prædeterminetur Physicè ad actus malos, probatur tum ex August. lib. 3. de libero arbitrio cap. 18. his verbis, *Quæcunque ista causa est voluntatis, si non ei potest resisti, sine peccato ei ceditur; si autem potest, non ei cedatur, & non peccabitur: an forte fallit incautum? ergo caueat ne fallatur: an tanta fallacia est ut cauere omnino non possit, si ita est, nulla peccata sunt: quis enim peccat in eo quòd nullo modo cauere potest? peccatur autem, cauere igitur potest.* Vnde cap. 4. eiusdem libri, *sicut tu, inquit, quædam qua fecisti meministi, nec tamen qua meministi omnia fecisti; ita Deus omnia quorum ipse auctor est, præscit, nec tamen omnium qua præscit, ipse auctor est; quorum autem non est auctor, iustus est ultor.* Ex quibus constat nullam esse causam qua voluntas determinetur ad actum peccati, & ideo Deum iustè de peccatis vindictam sumere, quia hominem ad illa non impellit: quæ sanè falsa essent, si homo ad singulos actus malos à Deo Physicè prædeterminaretur, ut volunt aduersarij. Et in horum confirmationem proferri possunt innumera testimonia Augustini, quibus in Consensu orbis cap. 11. ostendimus, homini paratum esse ex parte Dei auxilium necessarium & sufficiens ad præcepta implenda, tentationes superandas, peccata cauenda, & salutem consequendam: ea enim stare non possunt cum illa prædeterminatione Physica ad singulos actus malos, ut per se notum videtur, & postea demonstrandum erit.

Tum ex Prospero in resp. ad II. Gallorum obiectionem, cum ait; *Nullus Catholicorum dixit, aut dicit, quòd Deus homines piè rectèque viuentes per potentiam in peccata compellat, & innocentia humana potestas diuina vim faciat, ut eam à proposito bona conuersationis excutiat; non sunt Dei opera ista, sed diaboli, cuius gaudium est ruina Sanctorum.* Et ad 18. *si Deus hominem sibi obedientem à pietate deturbat, & benecurrentem cadere facit; ergo pro bonis mala retribuit, & iniuste punit, quod ut fuit impellit: quid tam peruersum, quid tam insanum dici aut cogitari potest?* At quid quæso aliud dicunt, quid aliud cogitant ij qui docent, Deum præmouere, impellere, imò Physicè & ineluctabiliter prædeterminare voluntatem nostram ad omnes & singulos actus prauos quos elicit?

Tum ex Concilio Arausc. 2. can. 28. vbi sic statuitur; *Aliquos ad malum diuina potestate prædestinatos esse, non solum non credimus, sed etiam si sunt qui tantum malum credere velint, cum omni detestatione in eos anathema dicimus:* at quid aliud volunt illi qui docent; Deum ab æterno decreuisse, ante præuisionem operum, maximam hominum partem damnare, & ex vi talis decreti eos in tempore ad actus prauos prædeterminare, ut decretum illud fixum sit & immobile?

Tum ex S. Thoma locis innumeris in nostra illius defensione collectis, quibus docet Deum non iaducere voluntatem nostram ad malum inclinando, sed non impediendo, impossibile esse quod Deo agente aliqui auertantur ab ultimo fine, Deum non impellere directè ad actum peccati, quia aliàs esset causa peccati; actum malum homini non imputari, si illum vitare non potuit, homini non deesse gratiam per quam peccatum possit cauere si velit, & similia quæ planè ostendunt prædeterminationem Phy-

ficam ad actus malos ab illius mente esse alienissimam.

Ad hæc aliave testimonia variis modis respondent Aduersarii, qui omnes eò reducuntur, vt ex vna parte homo non prædeterminetur à Deo ad peccatum formaliter, sed tantum ad illius entitatem, quæ bona est; ex alia verò cum eiusmodi prædeterminatione ad entitatem actus mali, homo habeat auxilium sufficiens cum quo ad bonum inclinetur, & peccatum absolute cauere possit, sicque Deus non sit auctor peccati. Verum hæc responsio nullo modo satisfacit. Nam in primis quamuis Deus non dicatur prædeterminare nisi ad entitatem actualem peccati, id non sufficit vt non debeat censerī causa peccati, quia vt docet S. Thomas 1. 2. quæst. 80. art. 1. cum peccatum actus quidam sit, qui est directè causa actus, est directè causa peccati. vnde addit illud esse directè causam actus, quod principium illius actus mouet ad agendum, & quia voluntas est principium actus peccati, nihil esse directè causam peccati, nisi quod potest mouere voluntatem ad agendum. Quare si Deus voluntatem Physicè prædeterminaret ad actum peccati, id non impediret quin esset vera & directā causa peccati.

Confirmatur, tum quia S. Doctor ibid. tradit voluntatem hominis ideo esse directè causam peccati, quia seipsam interiùs mouet & inclinat ad actum peccati, quod non potest intelligi nisi de actu entitatiuè seu materialiter spectato, cum voluntas nunquam feratur in actum malum formaliter, seu sub ratione mali & peccati. Ergo si Deus voluntatem directè mouet & determinat ad actum peccati entitatiuè spectatum, dubitari non potest quin propriè & directè sit causa peccati; imò magis propriè quàm voluntas ipsa.

Tum quia idem Doctor Angelicus 1. 2. qu. 75. art. 4. docet, vnum peccatum esse causam per se alterius peccati, quando ex vno actu consimilem facilius committat; ex actibus enim causantur dispositiones, & habitus inclinantes ad similes actus: si ergo illud est per se causa peccati, quod disponit ad habitum inclinantem ad actum peccati, Deus haud dubie potiori iure causa per se peccatorum omnium dicendus erit, si voluntatem humanam ad omnes actus prauos Physicè prædeterminat. Sequela ostenditur 1. quia priori modo non causatur actus prauus nisi remotè & mediate, posteriori verò causatur proximè & immediatè. 2. quia etsi causetur habitus prauus, non illico sequitur actus malus, quia habitibus vtimur cum volumus: at Physica prædeterminatio coniunctionem adeo necessariam habet cum actu prauo, vt ea posita impossibile sit talem actum, imò & peccatum ipsum formale cauere.

Secundò, posita prædeterminatione Physica ad actum prauum, intelligi non potest quomodo possit homo peccatum vitare, & quo iure peccatum ineuitabile ei imputari possit: quod enim dicitur, eum præditum esse gratia sufficienti ad peccatum vitandum, id apertè falsum est, & ridiculum: quia illa gratia non potest dici sufficiens ad peccatum vitandum, quæ longè debilior est ea motione qua voluntas trahitur ad actum peccati: at nulla est gratia in homine ad actum malum prædeterminato, quæ non sit longè debilior motione prædeterminante: cum hæc motio nulla virtute creata effectum suo frustrari possit, gratia verò, si quæ cum illa coniuncta est in eadem voluntate, nullum effectum habere possit.

Confirmatur, nam vel illa gratia est sufficiens

ad impediendum actum realem, vel ad impediendam illius malitiam; at neutrum dici potest, non primum ut iam ostensum est, non etiam secundum, quia sicut nihil impedire potest quin posita motione prædeterminante sequatur actus, ita nulla vi fieri potest ut posito actu, non sequatur illius malitia: quare impossibile est quod Physicè prædeterminatus ad actum peccati, ipsius peccati malitiam impediat adeoque quod habeat gratiam sufficientem ad peccatum cavendum.

ARTICVLVS V.

Generalia quadam Physica prædeterminationis fundamenta conuelluntur.

Obiicitur I. Illud non nocet libertati, quod non immutat modum agendi naturalem libertatis: at prædeterminatio Physica illum non immutat, ergo non nocet libertati. Maior clara est, & probatione non indiget: minor suadetur, quia tamdiu manet modus agendi naturalis voluntatis, quamdiu intellectus repræsentat obiectum cum indifferentia, ita ut ostendat non esse necessario amplectendum, sed posse amari, vel non amari; hæc autem indifferentia intellectus vel obiecti, non tollitur per prædeterminationem Physicam. Respondeo negando minorem, illiusque probationem, modus enim naturalis agendi voluntatis, ut est potentia libera, quomodo hic consideratur, non in eo consistit tantum ut obiectum ab intellectu repræsentetur sub indifferentia, sed in eo maxime ut ipsa voluntas sit indifferens ad tale obiectum amplectendum, vel non amplectendum; qualis non est sub prædeterminatione Physica.

Et sanè quid magis à recto sensu alienum est, quàm eum pronunciare liberum respectu obiecti, quod ob immixtam prædeterminationem non potest non diligere, esto intellectus iudicet eiusmodi obiectum ex proprio merito non esse necessariò diligendum? Id perinde est ac si quis diceret, eum esse liberum ut possit si velit effugere è carcere, qui videt ostium apertum quo salutis suæ consulere possit, nisi catenis, & compedibus constrictus esset.

Obiicitur 2. etsi sit de ratione liberi arbitrij creati ut se determinet, non tamen ut sit primum se determinans, sicut neque ut sit primum liberum, aut primum se mouens: at esset primum se determinans, nisi priùs à Deo determinaretur; ergo debet à Deo priùs determinari, & consequenter prædeterminari. Respondeo 1. minorem absolutè negari posse, quia ut voluntas non sit primum se determinans ad aliquem actum, non est necesse quod priùs à Deo determinetur ad talem actum, quàm ea se ad illum determinet; sed sufficit quod nequeat se determinare ad vllum actum, sine influxu cooperatiuo primæ causæ.

Respondeo 2. si aliqua præuia determinatio requiritur ex parte Dei ad actus omnes voluntatis, eam sufficere qua voluntas est determinata à Deo ad bonum in communi: postea enim hac generali determinatione, illa se determinat ad hoc, vel illud bonum particulare, ut patet ex loco illo luculentissimo S. Thomæ 1. 2. quæst. 9. art. 6. ad 3. *Deus mouet voluntatem hominis sicut vniuersalis motus ad vniuersale obiectum voluntatis, quod est bonum, & sine hac vniuersali motione homo non potest aliquid velle; sed homo per rationem determinat se ad volendum hoc vel illud quod est vere bonum, vel apparens bonum.*

Respondeo 3. aduersarios eo ipso quò fatentur hominem se determinare, saltem vt secundum se determinans, teneri concedere, si consequenter loqui velint cum non prædeterminari Physicè ad actus suos in speciali: quia si à Deo ad illos prædeterminaretur, ipsi nihil determinandum relinqueretur, sed tantum suarum esset partium determinationem à Deo sibi impostam exequi per modum meri instrumenti, qui modus agendi libertati omnino repugnat.

Obiicitur 3. ab eo quod est indeterminatum & indifferens ad vtrumlibet, non potest oriri effectus determinatus, nisi ab aliquo extrinseco determinetur, vt sæpe docet S. Thomas: atqui voluntas creata est indeterminata & indifferens ad vtrumlibet; ergo ab ea non potest oriri effectus determinatus, nisi ab aliquo extrinseco determinetur, nempe à Deo. Respondeo 1. ex Ferrar. lib. 1. contra gent. cap. 82. §. *ad primum horum*, maiorem esse veram de eo quod est ad vtrumlibet per modum materiæ, & potentiæ passiuæ, non autem de eo quod se habet ad vtrumlibet per modum agentis liberi: hoc enim non est necesse ab aliquo extrinseco determinari, sed seipsum ratione suæ libertatis determinare potest.

Respondeo 2. ex S. Thoma quæst. 3. de malo art. 3. ex eo quod voluntas est ad vtrumlibet, tantum sequi eam per aliquid determinari ad vnum, nempe per consilium rationis, non tamen requiri quod hoc fiat per agens aliquod extrinsecum, aut per motionem quandam Physicè prædeterminantem, & ineluctabilem.

Respondeo 3. distinguendo maiorem, iuxta ante dicta, ad summum enim probat, vt voluntas se determinet ad aliquem actum specialem, prærequiri ex parte Dei præuiam determinatio-

nem ad bonum in communi, & ad motus indeliberatos, qui vsum libertatis præcedunt: non tamen per nouam prædeterminationem ad singulos actus, hæc enim propriam voluntatis determinationem, adeoque & ipsius libertatem penitus destrueret.

Obiicitur 4. Deus voluntatem nostram Physicè prædeterminat, non tantum vt operetur, sed etiam vt operetur liberè; ergo illa prædeterminatio non nocet libertati, quin potius illam causat & fouet. Confirmatur, quia voluntas Dei est efficax, non tantum vt fiat quod vult, sed etiam eo modo quo vult: at Deus mouendo voluntatem nostram vult vt ea operetur liberè, ergo agit liberè. Respondeo maiorem absurdam esse, & pugnantia inuoluere, cum enim Physica prædeterminatio essentialiter repugnet libertati, vt ostensum est, non potest Deus qui est infinite sapiens, velle prædeterminare voluntatem creatam ad agendum libere: quia vt agat liberè, omnino requiritur vt prius ratione quam agat, sit indifferens & indeterminata ad vtrumlibet; quæ indifferentia & indeterminatio tollitur per prædeterminationem ad vnum.

Vnde ad confirmationem dicimus, ideo voluntatem Dei esse efficacem, vt fiat quidquid vult, & eo modo quo vult, quia applicat media apta ad effectus quos intendit, & ad modum quo illos vult producere. At prædeterminatio Physica non est medium aptum, vt actus voluntatis fiat liberè: quare tantum abest vt ex efficacia diuinæ voluntatis debeat concludi, Deum prædeterminare voluntatem nostram vt operetur liberè, quin potius ex ea optimum sumitur argumentum, ad amouendam Physicam prædeterminationem ab actibus liberis.

Obiicitur 5. concursus Dei ad actus volun-

tatis, non destruit eorum libertatem, & tamen illo concursu posito voluntas non potest non operari: ergo similiter Physica prædeterminatio non officit libertati, etsi ea posita necesse sit voluntatem operari. Respondeo negando sequelam, & ratio discriminis est, quia concursus Dei ad actum aliquem, cum illo identificatur; quare etsi eo concursu posito, non possit non esse actus, id non magis nocet libertati, quam quod posito actu, non possit non esse actus: vtrumque enim spectat ad necessitatem consequentem, quæ usum libertatis supponit. At motio prædeterminans est quædam entitas ab actu voluntatis realiter distincta, unde infert necessitatem agendi antecedentem quæ libertati repugnat.

ARTICVLVS VI.^o

Soluntur specialia fundamenta Physica prædeterminationis ad actus bonos.

Obiicitur I. Decretum æternum quo Deus vult aliquos conuertere, vel saluare, est ex se efficax & immutabile: at non esset, nisi per motiones Physicè prædeterminantes executioni mandaretur; quia alias ob vertibilitatem voluntatis creatæ effectui frustrari posset: ergo motiones illæ admittendæ sunt ad actus bonos, quibus homo conuertitur, & salutem consequitur. Respondeo maiorem falsam esse in sensu arguentium, contendunt enim decretum Dei circa conuertendos, vel saluandos, esse ex se efficax omnino independentem à voluntate illorum, etiam tanquam à conditione præuisa, quod à veritate alienum existimamus. Deus.

enim neminem statuit absolute conuertere, vel saluare per auxilia gratiæ, nisi præuia scientia qua nouit eum conuertendum & saluandum, si per talia auxilia alioqui repudiabilia vocetur. Vnde ad probationem dicimus, non esse timendum ne decretum Dei corruat, cum innitatur scientiæ omnino euidenti & infallibili.

Obiicitur 2. nemo potest resistere voluntati Dei efficaci, quia alias non esset omnipotens; at quodlibet opus bonum à nobis elicitum est effectus voluntatis Dei efficaci; ergo non possumus non operari eiusmodi bona, sicque ad illa Physicè prædeterminamur. Respondeo in voluntate efficaci qua Deus aliquid vult à nostra libera voluntate obtinere, duo considerata esse. 1. totam vim realem & effectiuam qua nos ad agendum impellit. 2. præuiam lucem qua dirigitur, vt nobis immittat motionem proportionatam ad effectum quem intendit. Et quidem si voluntas Dei priori modo accipiatur, certum est nos posse illi resistere, quod nequaquam Deo est iniuriosum, cum ipsemet vt locum libertati & merito relinquat, adeo suauiter nos moueat, vt facultatem resistendi nullatenus tollat vel impediat. Si verò voluntas Dei sumatur posteriori modo, sic fatemur nos illi non posse resistere, ac proinde non posse non operari ea bona quæ à nobis fieri vult. Vnde infertur solum necessitas consequens, non autem antecedens, adeoque nec prædeterminatio Physica.

Obiicitur 3. Deum immutare, flectere, verte-
re quo voluerit corda hominum; hæc autem
indignant prædeterminationem Physicam. Re-
spondeo negando minorem, nam interdum ora-
tores, & mulieres corda hominum flectunt quo
volunt; quod tamen fit sine ulla prædetermina-

tione Physica, Ergo etsi Deus similem immutationem operetur in cordibus hominum, id non sufficit vt dicamus eum illam operari per Physicam prædeterminationem. Et sanè si vel sola exterior suasio sæpe sufficit vt cor hominis infallibiliter mutetur, quis neget Deum posse illud inflectere vt libuerit, excitando interiùs cogitationes & affectus congruos, quibus nouit voluntatem infallibiliter inflectendam, etsi nulla adhibeatur Physica prædeterminatio?

Obiicitur 4. si gratia efficax non determinat voluntatem nostram ad actum bonum, sed eam relinquit indifferentem vt agat, vel non agat, ergo expectat illius consensum vt cum illa operetur: at dicere gratiam expectare consensum nostrum, est error Semipelagianorum ab Ecclesia damnatus. Respondeo esse errorem dicere, primam gratiam expectare consensum naturalem nostræ voluntatis, qui illam aduocet & mereatur; non tamen esse errorem, sed Catholicam doctrinam, affirmare gratiam qua homo iam misericorditer præuentus est, & excitatus ad opus bonum, expectare consensum liberum voluntatis, vt simul cum illa tale opus edat. Hoc enim manifestè colligitur ex verbis illis Isa. 5. *Expectanti vt faceret vias, & fecit labruscas*, & ex illis Apocal. 3. *Ecce sto ad ostium & pulso, si quis aperuerit mihi ianuam, intrabo ad illum & cenabo cum illo*. Neque aliò tendunt innumera testimonia quæ pro gratia sufficiente, non bene operantibus collata, tum ex Sanctis Patribus, tum ex præstantissimis Theologis in consensu orbis attulimus.

Obiicies 5. vel gratia determinat voluntatem, vel voluntas gratiam; at hoc posterius dici non potest sine iniuria gratiæ, ergo prius illud affirmari debet. Respondeo maiorem fal-

sam esse si intelligatur de determinatione proprie dicta, qua aliquid effectiue impellitur ad actum iniecta agendi necessitate: sic enim nec gratia voluntatem determinat, vt ostensum est, nec voluntas gratiam, vt ex eo manifestum est, quod cum gratia voluntatem præueniat, & excitet ad actum, & aliunde sit ordinis supernaturalis, repugnat quod voluntas creata illam effectiue impellat & applicet ad actum, ac multo magis quod eam ad agendum necessitet. Quidam tamen concedunt gratiam à voluntate determinari in alio sensu valde improprio, quatenus scilicet gratia non influeret ad opus bonum, nisi voluntas se sponte & liberè ad illum determinaret. Quod vt liquet non tam spectat ad gratiam efficacem, quæ est propriè excitans & præueniens, quam ad adiuantem & cooperantem, de qua obiectio non videtur procedere.

Obiicitur 6. gratia subiicit voluntatem, & non voluntas gratiam, vt fides docet: ergo gratia voluntatem determinat: sequela pater, nam si voluntas à gratia determinatur, ipsa se determinat, simulque gratiam ad actum trahit: ex quo sequitur manifestè gratiam subiici voluntati, & esse pedissequam illius. Respondeo gratiam tribus modis spectari posse. 1. quoad suam entitatem & vim agendi. 2. quantum ad impulsum quo voluntatem mouet, eam præueniendo. 3. quoad cooperationem quam voluntati operanti exhibet. Gratia primo, & secundo modo nullatenus subiicitur voluntati, neq; ab ea pendet; tertio verò modo, seu quoad vsum voluntati subiicitur, eo sensu quod gratia non cooperaretur nisi voluntas operaretur. Nec dicas gratiam facere vt voluntas operetur, sicque eam sibi subiicere quoad vsum: nam hoc ita facit vt nihilominus voluntati liberum sit

non operari, adeoque impedire influxum gratiæ in opus. Quare cum agat potens non agere, neque agat sine gratia, negari non potest quin actualis influxus seu usus gratiæ ab illa aliquo modo pendeat. Et hoc aperte confirmat quidquid in libro citato pro gratia in vacuum recepta, ex Doctoribus Catholicis protulimus.

ARTICVLVS VII.

Refelluntur præcipue rationes quæ pro Physica prædeterminatione ad actus prauos adduci solent.

QUamuis hæc prædeterminatio longè sit præcedenti deterior, eò quòd non tantum libertatem lædit, & gratiam sufficientem excindit, sed etiam sanctitati & iustitiæ diuinæ non parum est iniuriola, patronostamen nonnullos nacta est doctrinâ & pietate celebres, qui eam totis viribus defendunt.

Fundantur 1. quia scriptura sæpe docet malos homines esse velut instrumenta, quibus Deus vtitur ad debellandos & affligendos impios, vt paret ex verbis illis Isa. 10. *Assur virga furoris mei & baculus ipse est, ad gentem fallacem mittam eum, & contra populum furoris mei mandabo illi aliisque similibus.* Respondeo ex iis locis non debere colligi, Deum homines impellere & prædeterminare Physicè ad actus prauos, sed tantum permissiue, quatenus non impedit quin, quod in aliorum perniciem conceperunt, exequantur. Sicut ille dicitur canem in leporem immittere, qui funem laxat quo tenebatur. Videnda responsio ad obiect. 3. quâ etiam hæc confirmatur.

Fundantur 2. in verbis illis Aug. ex lib. 2. de libero arb. cap. 20. *Omne bonum ex Deo, nulla ergo natura est qua non sit ex Deo. Motus ergo ille auersionis, quem fatemur esse peccatum, quoniam defectiuus motus est, omnis autem defectus ex nihilo est, vide quo pertineat, & ad Deum pertinere ne dubites.* Respondeo hæc verba mala fide referri, siquidem in Augustino sic legitur, *& ad Deum non pertinere ne dubites*: quod series ipsa textus satis demonstrat: nam ex eo quod actus peccati est motus defectiuus, & omnis defectus ex nihilo est, inde manifestè sequitur actum illum non esse à Deo.

Fundantur 3. in aliis locis Augustini, cum ait Deum inclinare voluntates hominum ad mala. Verùm S. Thomas cap. 9. ad Rom. lect. 7. ad hanc obiectionem respondet dicens, Deum ex Augustino aliter homines inclinare ad bonum, aliter ad malum. Nam ad bona, inquit, inclinat hominum voluntates directe, & per se tãquam auctor bonorum, ad malum autem dicitur inclinare, vel suscitare homines occasionaliter, in quantum scilicet Deus homini aliquid proponit vel interiùs, vel exteriùs quod quantum est de se est inductiuum ad bonum, sed homo per suam malitiam peruersè vtitur ad malum.

Fundantur 4. in hac ratione ex S. Thoma desumpta: Omne ens per participationem debet reduci in ens per essentiam, tanquam in primum agens simpliciter: sed actus peccati in quantum actus, est ens per participationem, ergo sub hac ratione debet reduci in ens per essentiam; scilicet in Deum tanquam in primum agens simpliciter. Respondeo hoc argumento nihil contra nos concludi, quia non est de ratione primæ causæ, vt hominem impellat.

& prædeterminet ad actum peccati, sed potius ut à tali impulsu abstineat, ne illius libertatem lædat; tantumque cum illo concurrat quoties ad actum malum se lubens & volens determinauit. Vnde dicimus actum peccati non debere reduci in Deum, ut in causam Physicè prædeterminantem, sed ut in causam intimè cooperantem.

Instabis, Deus ut prima causa debet prius influere in effectum, quàm causa secunda, quia si simul concurreret, essent iam duo prima principia. Respondeo hoc gratis affirmari, quia influxus Dei ad operationes causarum secundarum ita attemperatus est, ut nonnisi cum earum influxu coniunctus, quidquam producere possit. Vnde non potest concipi quòd Deus prius concurrat ad illuminationem à sole ortam, quàm sol ipse, & multò minùs quòd prius influat ad actus vitales siue bonos, siue malos voluntatis creatæ, quàm voluntas ipsa. Neque inde sequitur esse plura prima principia, quia quod nulla creatura possit agere sine concursu Dei, inde satis colligitur nullam creaturam esse primum principium. Contrà verò cum Deus multa, imò infinita se solo & sine ullius creaturæ concursu agere possit, hinc manifestum est rationem primæ causæ, seu primi principij illi perfectissimè competere.

Fundantur 5. quia cum nos fateamur Deum concurrere ad totam entitatem peccati, quæ inseparabiliter cum malitia coniuncta est, non minùs ex tali concursu quàm ex Physica prædeterminatione sequi videtur Deum esse auctorem peccati. Respondeo falsam esse hanc consequentiam, & ratio discriminis est, quia si Deus hominem proprio motu præmouet & prædeterminat ad actum malum, intelligi non

potest eum non esse primum, imò vnicum peccati auctorem; quòd verò Deus homini se sponte & libere ad actum malum determinanti, ex munere primæ causæ cooperetur, inde nullo modo sequitur eum esse peccati auctorem; cum exhibitione talis concursus non efficiat, vt homo peccet: sed tantum permissiue se habeat ad illius peccatū, ei concursum necessarium quem exhibere tenetur, non denegando. Eò vel maxime quia si Deus talem concursum denegaret peccanti, illius peccatum non permetteret, sed potius efficaciter impediret: quare ex eo quòd cum illo concurrat, hinc tantum colligi debet eum non impedire, seu permittere illius peccatum.



CAPVT III.

DE QVIBVSDAM ALIIS AD
notitiam libertatis spectantibus.

ARTICVLVS PRIMVS.

De subiecto libertatis.

Præmoneo 1. duplex esse subiectum libertatis, remotum, & proximum: remotum sunt res libertate præditæ, proximum verò est potentia illa in qua immediatè libertas residet.

Præmoneo 2. non esse difficultatem de subiecto remoto libertatis, cum apud omnes constet ea quæ cognitione carent, vt lapides, &

plantas carere libero arbitrio ; itemque bruta animalia , cùm ad vnum sunt naturaliter determinata , positis omnibus ad agendum prærequiritis. Constet etiam ob contrariam rationem Deum , Angelos , & homines libertate potiri. Itaque cùm hic speciatim agamus de humana libertate ,

Quæritur 1. quodnam sit proximum illius subiectum , an actus , an habitus , an potentia aliqua. Respondeo libertatem , seu liberum hominis arbitrium non dicere actum , sed aliquid per modum permanentis. Probatur tum quia libertas nobis indita est à natura , & à nobis separari non potest , quod de actu dici nequit ; tum quia Patres non raro docent imaginem Dei nobis in creatione impressã , nihil aliud esse quàm liberum arbitrium ; quo ipso indicant libertatem nobis inesse per modum alicuius potentiae , vel habitus ante quamcumque operationem : tum quia cùm homo innumeros actus specie distinctos elicere possit , vel liberum arbitrium in iis omnibus cõsisteret , quod dici non potest , vel si tantum in nonnullis , alij non essent liberi , quod etiam absurdum est : tum denique quia homo non minùs libertate quàm intellectu & voluntate præditus est , quando nihil agit : quare sicut falsum est eum tunc carere intellectu , & voluntate , ita & carere libertate.

Neque refert quòd liberum arbitrium idem sit ac liberum iudicium , aut libera electio , iudicium autem & electio actum dicant , non potentiam , vel habitum. Respondetur enim interdum nomine actus intelligi potentiam , quæ est principium illius , vt monet S. Thomas. 1. p. quæst. 83. art. 2. & patet , quia nomine sensualitatis ipse appetitus sensitivus communiter intelligi solet.

Quæritur 2. an libertas sit quidam habitus, vel potius potentia. Respondeo 1. non esse habitum. Probatur 1. quia cum libertas nobis sit indita à natura, si est habitus, est habitus naturalis nobis à natura impressus: at hoc dici non potest, quia ut docet S. Thomas loco citato, habitus naturalis naturaliter inclinatur & determinatur ad suos actus, ut patet ex habitu intellectus quo assentimur primis principiis, ea autem ad quæ naturaliter inclinamur & determinamur, non subsunt libero arbitrio: quare contra propriam rationem liberi arbitrij est, quod sit habitus naturalis.

Probatur 2. quia quilibet habitus est ex natura sua determinatus ad vnam speciem actionis, ut habitus bonus ad actus bonos, malus ad malos: at liberum arbitrium non est determinatum ad hanc, vel illam actionum speciem, sed ex se est indifferens ad omnes, etiam si inter se sint oppositæ; quare non est habitus. Quod si interdum ita vocatur, id latè accipiendum est, quatenus potentia actiua ut dicit quandam habitudinem ad actum, eatenus habitudo dici potest: aut etiam dici potest improprie habitus, quia est quid permanens post actum, sicut & habitus.

Respondeo 2. libertatem dicere potentiam, eamque simpliciter actiuam. Primum probatur ex dictis, si enim liberum arbitrium non est actus, nec habitus, superest ut sit potentia: secundum ostenditur, quia liberum arbitrium est inditum homini à natura, ut operationes liberas exerceat; ergo est potentia agendi non minus quam intellectus, visus, aliæque facultates siue spirituales, siue corporeæ homini inditæ, ad operationes sibi proportionatas exercendas.

Confirmatur, nam ex communi Patrum, &c

Theologorum sententia, proprium liberi arbitrij est habere dominium in suos actus, posse agere vel non agere, habere vim se determinandi ad agendum vel non agendum; quo ipso manifeste supponitur liberum arbitrium esse absolute potentiam actiuam.

Obiicies 1. nulla potentia naturalis amissa est per peccatum primi parentis, naturalia enim integra remanserunt, vt fert commune Theologorum proloquium; at ex Augustino liberum arbitrium per peccatum amissum est, ergo liberum arbitrium non est potentia. Respondeo ad minorem per peccatum primi parentis amissam esse libertatem Metaphoricam & impropriam, quæ est libertas à peccato, & à miseria, non autem libertatem propriam & naturalem, quæ est libertas à necessitate, de qua tantum hic agimus.

Obiicies 2. potentiæ naturales ex æquo omnibus hominibus conueniunt, non autem secundum magis & minus; at liberum arbitrium competit hominibus secundum magis & minus, ergo non est potentia naturalis. Minor ostenditur, quia dubitari nequit quin iusti vt plurimum sint liberiores in bonorum operum exercitio quam peccatores. Respondeo maiorem veram esse de potentiis naturalibus secundum se spectatis, quo sensu minor negari debet, & ad illius probationem dicendum, quod vnus homo sit liberior alio ad aliquod opus, id oriri ex variis circumstantiis. Quare sicut oculus corporeus est potentia naturalis, etsi ob aliquas circumstantias vnus alio acutiùs videat, ita quod vnus alio liberiùs operetur, id nõ impedit quin liberum arbitrium sit potentia naturalis. Accedit quod iustus non est liberior in exercitio bonorum operum, propter potentiam naturalem

maiolem aut vegetiorem, sed propter auxilia gratiæ efficaciora & frequentiora, illi præ peccatore collata.

ARTICVLVS II.

In qua anima potentia sit libertas.

QVaritur 1. An libertas sit formaliter in intellectu. Respondeo negatiuè ex communi sententia, contra Durandum. Probatur 1. quia illud est formaliter liberum, quod positis omnibus prærequisitis ad agendum potest agere, vel non agere: at intellectus positis omnibus prærequisitis ad agendum, non potest agere, vel non agere; ergo intellectus non est formaliter liber. Maior perspicua est ex definitione libertatis communiter probata, minor verò suadetur, quia intellectus non potest non assentiri veritati clarè propositæ, vt vel ipsa experientia compertum est.

Probatur 2. quia si intellectus esset formaliter liber, sequeretur operationes illius etiam ante consensum voluntatis esse bonas vel malas, meritorias vel demeritorias, adeoque qui post fœdam cogitationem cui voluntas non consensisset, è viuis excederet, pœnis tartareis addiceretur, quod fidei Catholicæ repugnat.

Obiicies 1. arbitrari spectat ad rationem seu intellectum, ergo liberum arbitrium est formaliter in ratione seu intellectu. Respondeo 1. arbitrari interdum sumi pro actu voluntatis, vt manifestum est in illo vulgari modo loquendi, in tuo arbitrio est hoc vel illud facere; vnde nulla est consequentia. Respondeo 2. etsi arbitrari spectet ad rationem, inde non sequi libertatem esse formaliter in ratione, sed esse coniunctam

cum ratione; quatenus nemo agit liberè, nisi ratione aliqua ad agendum moueatur.

Obiicies 2. potentia rationales sunt ad opposita, at intellectus est nobilior potentia rationalis, ergo maximè se habet ad opposita, adeoque est maximè liber. Respondeo potentias rationales duobus modis posse dici esse ad opposita, primò ita vt secundum se in hoc vel illud obiectum ferri possint, qua ratione intellectus se habet ad opposita, quatenus potest iudicare hoc obiectum esse verum, & illud falsum. Secundò ita vt positis omnibus prærequisitis ad agendum, possint agere vel non agere, quomodo intellectus non se habet ad opposita; siquidem cum primum videt apertè obiectum verum, illico iudicat illud esse verum, nec potest non iudicare esse verum, aut iudicare esse falsum. Contrà verò statim atque obiectum falsum illi clarè representatur, necessariò iudicat esse falsum, nec tale iudicium suspendere potest, vel oppositum elicere. Quare intellectus etsi se habeat ad opposita, ad vnum est determinatus, caretque illa indifferentia quæ essentialiter ad libertatem requiritur.

Quæritur 2. an libertas sit formaliter in voluntate. Respondeo affirmatiuè, vt ex dictis sufficienter colligitur, cum nemo adeo desipiat vt putet libertatem spectare ad partem hominis sensitivam, nisi dependenter à rationali, & multo minùs ad vegetatiuam.

Verùm eadem veritas adhuc probatur, tum communissimo Sanctorum Patrum, Theologorum, Philosophorum, omniumque fere hominum sensu, qui per liberum arbitrium hominis aliud nihil intelligere solent, quàm facultatem illam qua homo facit quod vult.

Tum ex eo quòd quæ de libertate dicuntur,

vt

ut quod sit facultas domina suorum actuum, quod se ad agendum determinet, quod sit indifferens ad utrumlibet, quod excludat necessitatem antecedentem, & prædeterminationem Physicam, quod illius proprium sit eligere media ad finem propositum conducentia, hæc inquam aliaque eius generis voluntati propriissime competunt, adeoque dubitari non potest quin libertas sit formaliter in voluntate.

Quo loco aduerte, etsi formalis libertas sit tantum in voluntate, radicem tamen libertatis esse in ipso intellectu. Nam cum intellectus in eadem re possit apprehendere rationem aliquam boni & mali, hinc oritur in voluntate libertas quam vocant contrarietatis, qua potest illud obiectum amare, quatenus bonum est, aut odisse sub ratione mali. Item cum possit intellectus rem in qua nihil malitiæ deprehendit, concipere ut non necessario diligibilem, hinc sequitur in voluntate libertas contradictionis, qua potest rem illam amare, vel non amare. Quæ ratione in hac vita amamus beatitudinem, ex se enim adeo amabilis est, ut nemo possit eam odisse; non tamen nos ita rapit in sui amorem, quin possimus illam actu non amare, ut patet experientia. Verum ad maiorem horum intelligentiam sit

ARTICVLVS III.

Quomodo intellectus se habeat ad libertatem.

QUÆRITUR I. An ad libertatem voluntatis sufficiat, quod obiectum proponatur illi ab intellectu sub prædicta indifferentia. Nonnulli putant id sufficere, adeoque existi-

Ethica.

H

mant ne quidem Deum efficere posse, vt voluntas obiectum sic propositum amplectatur non liberè.

Hæc tamen sententia facilè refelli potest primò, quia gratis conficta est vt saluet libertatem voluntatis cum Physica prædeterminatione illi immissa, quod absurdum est & impossibile, cum ad veram libertatem requiratur, præter illam iudicij indifferentiam, ipsius voluntatis indifferentia ad amandum, vel non amandum obiectum ab intellectu propositum, vt supra fusè ostendimus.

Secundò illud valde ridiculum videtur, & omnipotentia Dei iniuriosum quod prædicti auctores affirmant, voluntatem non posse à Deo necessitari ad agendum, quamdiu manet iudicij indifferentia. Quamvis enim intellectus meus non iudicet v. c. actum contritionis hic & nunc esse necessariò eliciendum, quid vetat quominus Deus, qua est potentia, possit mihi immittere necessitatem eliciendi eiusmodi actum? sane si id non potest, à pace dicam, eum non posse vinculis inuisibilibus me huic loco affixum tenere, quamdiu oculos habeo apertos, & varias circumspicio vias quibus iudico me hinc abire posse.

Tertiò auctores illi cum in eo ponant prædictam iudicij indifferentiam, quòd intellectus iudicet bonum quod proponit voluntati, non esse necessariò connexum cum bono in communi, ad cuius amorem illa naturaliter est determinata, consequenter supponunt tum voluntatem necessariò diligere bonum in communi, quod falsum est, quia etsi non possit illud odio habere, non tamen necesse est vt illud actu diligat: tum nos non posse non diligere illud quod iudicamus habere necessariam connexionem cum

bono in communi, quod etiam falsum est, quia si ipsum bonum commune non necessario diligimus quoad exercitium, quid necesse est ut media cum ipso connexa diligamus?

Quarto etsi intellectus non mihi proponat obiectum sub indifferentia, sed ut determinatè & necessario amplectendum, id non impedit quominus possim illud liberè amplecti, ut iam ostendam: ergo similiter quamvis intellectus mihi proponat obiectum sub indifferentia, id non obstat quin saltem diuina virtute tale obiectum necessario, seu non liberè amare possim.

Quæritur 2. an ad quamcunque volitionem requiratur præuium iudicium practicum intellectus dictans talem volitionem esse eliciendam. Nonnulli affirmant, & addunt iudicium illud adeo esse efficax, ut eo posito voluntas non possit non operari. Oppositum tamen longè videtur probabilius, quod ut explicetur,

Respondeo & dico 1. *Ut voluntas aliquid velit, non esse necessarium actum præuium intellectus, quo iudicet hic & nunc spectatu circumstantiis, absolute esse volendum.* Probatur 1. quia etsi voluntas cum sit potentia cæca, non possit operari nisi præuia cognitione intellectus, non tamen ad hoc requiritur iudicium practicum quo ad agendum determinetur, cum iudicium speculatiuum & indifferens quo ostèditur quid boni, vel quid mali sit in aliquo obiecto prorsus sufficiat ut voluntas illud amplecti, vel respuere possit. Et hoc vel ipsa experientia satis confirmat, qua videmus multa à nobis quotidie fieri cum magna cognitionis, seu potius obiecti cogniti indifferentia. Imò voluntatem nostram sæpe trahi ad amorem obiecti quod iudicamus non esse amandum, sed potius detestandum.

Probatur 2. quia si iudicium illud, absolute

expedit ut hoc faciam, deberet præcedere quamcunque volitionem, sequeretur neminem unquam peccare nisi ex iudicio hæretico, cum constet ex fide nunquam esse expediens ut quis peccet, adeoque iudicium illud, expedit ut ego tale peccatum perpetrem, sit hæreticum. Confirmatur, nam iudicium illud practicum tale esse dicitur, ut ostendat non modo bonum esse elicere actum prauum, sed etiam id esse necessarium, nec aliter fieri posse; sic autem manifestè est hæreticum, cum malum sit peccare, nulla que sit peccandi necessitas.

Vnde quod obiicitur, voluntatem esse appetitum rationalem seu intellectuum, neminem posse amare incognitum, voluntatis obiectum esse bonum apprehensum, & iudicatum conueniens, quidquid homo agit, agere propter finem, ac proinde nos non moueri ad eligendum aliquid, nisi ratio dicat illud esse medium conueniens ad propositum finem: Hæc inquam, & alia id genus nullius sunt momenti, cum tantum concludant, quod omnes vtrò admittunt, nempe voluntatem non agere nisi præuia intellectus luce dirigatur, neque obiectum ali- quod amplecti nisi cognitum sub ratione boni.

Dico 2. *Non debere admitti ad actus voluntatis, iudicium aliquod prauum adeo efficax, ut eo posito voluntas non possit non operari.* Ratio est, quia cum liberum illud dicatur, quod positis omnibus ad agendum prærequisitis potest agere, vel non agere, si voluntas posito aliquo præcedenti iudicio non posset non agere, ea non ageret liberè. Idque confirmatur luculentissimo testimonio S. Bernardi supra cap. 2. art. 1. relato, quo ait destruendam libertatem, si ratio ei ullam agendi necessitatem imponeret.

Nec dicas 1. posito eo iudicio voluntatem

- *possent non operari in sensu diuiso, hæc enim possibilitas agendi non saluat libertatem, vt patet ex supradictis, potestque confirmari exemplo belluarum, quæ etsi per iudicium determinatum rapiantur ad suos actus, possunt non operari in sensu diuiso, & consequenter dicendæ sunt liberæ, si modus ille agendi ad libertatem in nobis sufficit.*

Nec dicas 2. iudicium illud esse in potestate nostræ voluntatis, sicque illius libertati nequaquam officere. Qui enim fieri potest vt illud iudicium sit in potestate voluntatis, quod prærequiri dicitur tanquam omnino necessarium ad singulos actus voluntatis? Ista sanè inter se non bene coherere videntur.

Accedit quòd ex ea responsione sequitur, nullum actum voluntatis esse in se formaliter liberum, sed tantum extrinsecè per denominationem ab eo quod non impedit iudicium illud cum posset. At quis credat actum v. c. amoris Dei non esse in se bonum, nec meritorium, actum odij Dei non esse in se malum, nec demeritorium? &c.

ARTICVLVS IV.

De obiecto liberi arbitrij.

QUæritur 1. An liberum arbitrium feratur tantum in bonum. Respondeo affirmatiue vt patet ex supradictis. Cum enim potentia liberi arbitrij non distinguatur a voluntate, vt ostensum est art. 2. & voluntas non feratur nisi in bonum, vt probatum fuit lib. 1. cap. 1. art. 2. hinc manifestum relinquitur liberum arbitrium non ferri nisi in bonum. Ratio.

H ij

nem affert S. Thomas 1. 2. quæst. 8. art. 1. quia voluntas est appetitus rationalis, omnis autem appetitus est tantum boni, siquidem appetitus nihil est aliud quam quædam inclinatio appetentis in aliquid; at nihil inclinatur nisi in id quod sibi bonum & conueniens est. Vide plura de hac quæst. loco citato.

Quæritur 2. an liberum arbitrium non tantum sit de mediis, sed etiã de fine. Respondeo 1. à nemine negari quin liberum arbitrium versetur propriè circa media, quia proposito aliquo fine spectat ad voluntatem eligere media quæ ad illum assequendum conducunt, electio autem est actus proprius liberi arbitrij.

Respondeo 2. non etiam negari posse quin liberum arbitrium versetur aliquo modo circa finem. Probatur nam etsi non ignoremus Deum esse finem nostrum vltimum, quamdiu tamen in hoc peregrinationis statu versamur, sumus liberi ad eum amandum, vel non amandum, vt experientia satis ostendit; ratioque id ipsum suadet, quia aliàs actus amoris erga Deum non esset meritorius.

Respondeo 3. absolutè dici posse liberum arbitrium non esse finis formaliter spectati, sed tantum mediorum ad finem illum assequendum. Non enim consultamus v. c. an velimus esse fœlices, sed hac supposita intentione inquirimus tum de fine materiali, seu de re in qua vera fœlicitas consistit, quæ se habet vt medium ad formalem beatitudinem, tum de aliis mediis quæ ad fœlicitatem obtinendam magis conducunt.

Quæritur 3. an voluntas eodem actu feratur in finem, & in media. S. Thomas 1. 2. quæst. 8. art. 3. respondet per distinctionem, sed prius aduertit finem secundum se esse volitum, id aut-

tem quod est ad finem, inquantum huiusmodi, non esse volitū nisi propter finem: vnde colligit voluntatem posse ferri in finem vt finem, et si non feratur in ea quæ sunt ad finem; sed in ea quæ sunt ad finem inquantum huiusmodi, non posse ferri nisi feratur in ipsum finem. Hoc posito

Docet 1. esse vnum & eundem motum seu actum voluntatis quo fertur in finem, vt est ratio volendi media, & in media ipsa. 2. alium esse actum quo voluntas fertur in ipsum finem absolute, imò aliquando præcedere tempore, sicut cum aliquis primò intendit sanitatem, postea verò deliberans quomodo possit sanari, vult conducere medicum vt sanetur. Eo modo quo aliquis primò intelligit ipsa principia secundum se, post modum verò intelligit ea in ipsis conclusionibus, quatenus assensum præbet conclusionibus propter principia.

Vnde idem S. Doctor infra quæst. 12. art. 4. inquirens, vtrum intentio finis sit idem actus, cum voluntate eius quod est ad finem, Respondet motum voluntatis in finem, & in id quod est ad finem, posse considerari dupliciter, vno modo secundum quod voluntas in vtrumque fertur absolute & secundum se, & sic ait esse simpliciter duos motus voluntatis in vtrumque. Alio modo secundum quod voluntas fertur in id quod est ad finem, propter finem, & sic ait esse vnum & eundem motum voluntatis tendentem in finem, & in id quod est ad finem. Cum enim dico, volo medicinam propter sanitatem, non designo nisi vnum motum voluntatis, quia finis est ratio volendi ea quæ sunt ad finem; idem autem actus cadit super obiectum, & super rationem obiecti, sicut eadem est visio coloris, & luminis. Et confirmatur exemplo

intellectus, quia si absolute principium & conclusionem consideret, diuersa est consideratio vtriusque, in hoc autem quod conclusioni propter principia assentit, est vnus actus intellectus tantum.

Verum contra hanc doctrinam obiiciunt 1. aliqui cum Gregorio Ariminensi, volitio finis est causa volitionis mediorum, ergo non potest esse idem cum illa. Antecedens probatur, quia ideo vult infirmus sumere potionem, quia desiderat sanitatem, sequela ostenditur, quia nihil est causa suiipsius. Respondeo antecedens esse verum, quando quis fertur in finem directe & secundum se, postea verò deliberat de mediis ad illum acquirendum accommodatis; tunc enim formalis volitio finis est actus realiter distinctus à formali volitione mediorum, & est causa illius. At hoc non impedit quin simul, & vnico actu possit voluntas ferri in media propter finem, vt dum quis cogitans de sanitate recuperanda, & de necessitate potionis, vult hanc sumere sanitatis causa: ad eum modum quo quis cogitans de Deo, & de proximo, potest vnico actu amare proximum, propter Deum. Et quamuis non cogitet quis expressè de fine, tamen eo ipso quòd vult media, censetur implicite seu virtualiter velle finem ipsum; cum media vt media, non nisi propter finem appetantur.

Obiiciunt 2. ex doctrina prædicta sequi, non esse discrimen inter intentionem, quæ est volitio finis, & electionem, quæ est volitio mediorum; quod tamen absurdum videtur, cum actus illi distinguantur specie. Respondeo ex dictis tantum sequi, non esse semper distinctionem realem inter intentionem, & electionem, quod absurdum videri non debet; quia illa identitas realis potest reperiri cum distinctione specifica,

ut patet ex actione, & passione quæ specie, imo genere distinguuntur, etsi reipsa inter se non distinguantur.

Quæritur 3. an possit dari actus aliquis voluntatis neuter, id est qui nec sit circa finem, nec circa media. Responsio communis est negatiua, quia voluntas non vult nisi bonum, at bonum est tantum triplex, nempe honestum, delectabile, & vtile: primum & secundum sunt bona propter se, adeoque habent rationem finis, saltem materialiter, & in actu primo; tertium verò est bonum propter aliud, adeoque habet rationem medij: quare quidquid voluntas vult, habet rationem finis, aut medij.

Vnde soluitur illa obiectio: amare aliquid sub ratione finis, est illud amare ut per media acquiri potest; at possumus aliquid amare absque ullo respectu ad media, ob solam bonitatem quæ in illo est. Respondetur enim rem sic amatam habere rationem finis, tum quia voluntas ibi sistit, tum quia cum res illa per suam bonitatem mouere possit ad media eligenda, quæ ad illius acquisitionem sunt necessaria, eatenus habet rationem finis materialiter, & in actu primo.

ARTICVLVS V.

Vtrum liberum arbitrium sit præsentium, an verò tantum futurorum.

Seu, ut alij proponunt, Vtrum liberum arbitrium habeat in sua potestate actiones præsentis, an verò futuras duntaxat.

Nonnulli nominales, post Magistrum sententiarum existimant, actiones tantum futuras,

non autem præsentēs esse in potestate liberī arbitrij : quia futuræ possunt esse , vel non esse ; præsentēs verò non possunt non esse. . . .

Verùm hæc sententia communiter reiicitur. I. quia omnes Theologi docent , Christum meruisse in ipso instanti Incarnationis , & Angelos in momento quo fuerunt creati ; quod indicio manifesto est liberum arbitrium non esse tantum futurorum , cùm Christus , & Angeli non extiterint ante illud instans quo libertatem primò exercuerunt.

Confirmatur , nam si liberum arbitrium non nisi futuras actiones in sua haberet potestate , sequeretur Deum non fuisse liberum ab æterno , quoad decreta quæ de creatione mundi , de verbi Incarnatione , de hominum prædestinatione edidit ; cùm dici nequeat eiusmodi decreta fuisse aliquando futura respectu Dei.

Reiicitur 2. quia nullum relinquit locum vsui libertatis , voluntas enim antequam agat , potest quidem dici libera in actu primo , non tamen in actu secundo , seu quoad vsum , vt perspicuum est ; cùm ad hanc libertatem requiratur vsus , seu actualis operatio : at neque dici potest voluntatem eo modo esse liberam postquam egit , sed ad summum fuisse liberam ; si ergo talis libertas volūtati non competit , quando actu operatur , vt voluntaduersarij , sequitur euidenter eam nunquam esse liberam quoad vsum , seu exercitium.

Reiicitur 3. quia consequenter tollit omne meritum , & demeritum. Non enim homo mereri , aut demereri potest nisi vel per actus futuros , vel per præteritos , vel per præsentēs : at non meretur per futuros , neque per præteritos , vt omnes sentiunt ; ergo si non meretur per præsentēs , nullo modo meretur. Quod cùm absurdum

dum sit, imò hæreticum, fatendum est hominem mereri per actus presentes: vnde sequitur actus præsentēs verè esse liberos, cùm ad meritum requiratur libertas.

Obiicies 1. voluntas non est libera, nisi respectu temporis quo potest impedire actionem; at non potest impedire actionem respectu temporis quo est præsens, quia quidquid est, quamdiu est necesse est esse, sed respectu illius quo futura est; quia qui nondum aliquid fecit, potest pro arbitrio illud non facere: ergo voluntas non est libera nisi pro tempore futuro. Respondeo negando minorem, quia eodem puncto temporis, & prius natura quàm voluntas operetur, potest non operari, adeoque pro sua libertate impedire potest ne existat operatio, eo ipso temporis momento quo esse incipit. Imò non potest id prius impedire, siquidem non possum nunc impedire operationem post aliquod tempus, etsi brevissimum futuram, nisi per decretum tunc non operandi: at sic illam impedire nequeo, cùm tale decretum mutare possim. Ad probationem autem minoris dico, ex hypothesi quòd actio voluntatis est in tali momento temporis, eam non posse tunc non esse; posse tamen non esse simpliciter, quia prius natura quàm eliciatur potest non elici.

Obiicies 2. liberum arbitrium versatur tantùm circa actus de quibus præcedit consultatio, at consultatio non fit de actibus præsentibus, sed tantùm de futuris; ergo liberum arbitrium non est de actibus præsentibus, sed tantùm de futuris. Respondeo maiorem veram esse de actibus diuerso modo spectatis, nam consultatio quidem est de actibus vt per libertatem futuris, libertas verò est de iisdem vt præsentibus.

Nec dicas consultationem esse de actibus sy-

uris & liberis; non enim sensus est, actiones futuras de quibus consultamus, esse liberas, quamdiu sunt futuræ; sed eas futuras esse liberas, quia quando à voluntate fient, liberè fient.

A R T I C V L V S V I.

In quo consistat libertas actus.

EX hætenus dictis in hoc, & in præcedenti capite satis constat quid sit libertas potentialis, seu in actu primo. Nunc superest ut aliquid dicamus de libertate actuali, seu in actu secundo. Itaque cum non tantum voluntatem dicamus esse liberam, sed etiam actum ab ea elicitum vocemus liberum, dubium est quid sit hæc libertas actus, an aliquid intrinsecum actui quo essentialiter differat ab omni actu non libero, an verò mera denominatio extrinseca à potentia libera à qua elicitur.

Nonnulli priorem dicendi modum sequuntur, alij verò, quibus libenter adhæreo, posteriorem. Probatur 1. quia eo ipso concipimus actum aliquem esse liberum, quo intelligimus eum proire à potentia libera; ergo libertas actus non dicit aliquid ipsi intrinsecum, sed meram denominationem extrinsecam à causa libera à qua producitur. Antecedens manifestum videtur, quia seclusa per intellectum quacunque alia formalitate ab actu, dummodo intelligas voluntatem ita eum elicuisse, ut potuerit non elicere, iam concipis voluntatem operatam esse liberè, atque adeo ipsius actum fuisse liberum. Sequela verò non minus perspicua est, quia per se notum videtur ad constitutionem actus liberi, ut liber est, non posse spectare id

sine quo perfectè liber esse potest; sicut ad constitutionem actus, ut vitalis, aut sentientis, pertinere non potest id sine quo perfectè vitalis, & sentiens esse potest.

Probatur 2. nam idem actus, quoad entitatem intrinsecam immutatus manens, potest modò esse liber, modò necessarius; ergo libertas non est quid intrinsecum & essentialè actui: sequela manifesta est, quia si libertas esset quid intrinsecum & essentialè actui, non magis posset actus liber realiter immutatus manens, fieri necessarius, quàm possit homo, sine vlla sui variatione intrinseca, fieri equus. Antecedens verò ostenditur, quia actus voluntatis in se manere potest immutatus, siue procedat à cognitione indeterminata, siue à determinata; cum hæc cognitio sit illi omnino extrinseca: & tamen si procedat à cognitione indeterminata, est liber, si à determinata, est necessarius, ergo actus in se intrinsecè manens immutatus potest modò esse liber, modò necessarius: ex quo evidenter sequitur libertatem non esse quid actui intrinsecum, sed meram denominationem à causa liberè operante.

Obiicies 1. actus liber, si bonus sit, est Deo gratus, & meritorius; si verò sit malus, est Deo exosus & demeritorius, ergo in actu libero ut sic, est aliquid quod non reperitur in actu non libero. Sequela patet, quia alias idem actus non liberæquè esset meritorius, aut demeritorius. Repondeo in actu libero nihil reperiri reale, quod non possit esse in actu non libero, reperiri tamen aliquid Morale, nimirum quod ad meritum vel demeritum imputari possit: hoc autem habet præcisè ex eo quod pendet à causa libera, à qua potuit fieri, vel non fieri, ut patet ex verbis illis luculentissimis mellisui nostri

Bernardi ser. 81. in Cant. *Omne quod feceris bonumve malumve, quod quidem non facere liberum sit, merito ad meritum reputatur. Et ut merito laudatur non ita tantum qui potuit facere mala, & non fecit, sed & qui potuit non facere bona, & fecit: ita malo non caret merito, tam is qui potuit non facere mala, & fecit, quam qui potuit & facere bona, & non fecit.*

Obiicies 2. illi actus essentialiter differunt, qui non nisi à diuersis potentiis produci possunt; & actus liber & necessarius non nisi à diuersis potentiis produci possunt, ille quidem à potentia libera, non à necessaria: hic verò à potentia necessaria, non à libera. Respondeo minorem falsam esse, & ad illius probationem dico, eandem voluntatem esse principium actus liberi, & necessarij; liberi quatenus ita illum producit, vt non necessitetur ad illius productionem; necessarij verò quatenus ita illum producit, vt nequeat non producere.

Quod si instes, repugnare quod eadem potentia præcisè modo sit indifferens ad agendum, modò non sit indifferens, sicque actum liberum & necessarium non posse procedere ab eadem omnino potentia: Respondeo eandem voluntatem sine nulla variatione interna habere duplicem illum modum agendi, iuxta varium modum quo obiectum ei ab intellectu repræsentatur. Quare cùm illa repræsentatio non spectet intrinsecè ad potentiam agendi, hinc fit vt actus liber, & necessarius possunt produci ab eadem potentia realiter inuariata.

Obiicies 3. voluntas alio modo agit quando operatur liberè, alio quando operatur necessario; ergo aliquid est in ipsa operatione libera, quod non reperiatur in necessaria. Respondeo ad antecedens, voluntatem quando operatur liberè, agere alio modo Morali, quam dum ope-

ratur necessario : quatenus tunc operatur ex indifferentia ad vtrumlibet. Vnde sequitur tantum in actione libera esse aliquid Morale, quod non reperitur in necessaria.



CAPVT IV.

DE ACTIBVS HVMANIS
tam elicitis . quàm imperatis.

ARTICVLVS PRIMVS.

De volitione , & fruitione.

Praemoneo 1. duplices esse actus voluntatis, alios elicitos, alios imperatos; eliciti dicuntur ij qui ab ipsa voluntate immediate prodeunt, vt volitio, nolitio; imperati verò qui ex voluntatis imperio ab aliqua alia potentia oriuntur, vt loqui, ambulare.

Praemoneo 2. cum voluntas feratur in finem, & in media ad finem consequendum necessaria, alios esse actus elicitos quibus fertur in finem, nempe voluntatem seu volitionem, fruitionem, & instructionem; alios quibus fertur in media, nempe electionem (quam praecedit consilium seu consultatio, vel deliberatio quæ est opus rationis) consensum, & vsum, de quibus omnibus sigillatim in hoc, & sequentibus articulis dicendum est.

Hic ergo quaeritur 1. quid sentiendum sit de voluntate, seu volitione. Respondeo volitionem esse actum quo amplectimur finem simpliciter, quatenus est nobis bonus, & conueniens.

Potest autem dubitari cur hic actus vocetur voluntas, non autem alij, esto omnes à voluntate procedant. Cui difficultati respondet S. Thomas 1. 2. quæst. 8. art. 2. dicens, voluntatem quandoque vocari potentiam qua volumus, quandoque autem ipsum voluntatis actum; & quidem voluntatem priori modo acceptam se extendere ad finem, & ad media, quia in iis reperiri potest ratio sui obiecti, quod est bonum; sicut visus se extendit ad omnia quæ participant rationem coloris. Sumptam verò posteriori modo, ferri tantum in finem, quia omnis actus denominatus à potentia, dicit simplicem actum illius potentiae, sicut intelligere dicit simplicem actum intellectus; at simplex actus potentiae est in id quod est secundum se obiectum potentiae, id autem quod est propter se bonum & volitum, est finis; quo fit ut voluntas propriè sit ipsius finis.

Quæritur 2. quid dicendum sit de fruitione. Respondeo S. Thomam 1. 2. quæst. 11. de ea agere per quatuor articulos, quorum primo inquit, an fruitio sit actus potentiae appetitiuae, & respondet affirmatiuè, quod probat, quia nomen fruitionis à fructibus sensibilibus derivatum videtur, fructus autem sensibilis est id quod ultimum ex arbore expectatur, & cum quadam suavitatem percipitur: quare fruitio pertinere videtur ad amorem, vel delectationem quam aliquis habet de ultimo expectato, quod est finis: finis autem & bonum est obiectum appetitiuae potentiae, unde manifestum est quod fruitio est actus appetitiuae potentiae.

Vbi observandum est quod ait S. Thomas, fruitionem pertinere ad amorem, vel delectationem, non ita debere intelligi ut fruitio sit æqualiter amor, & delectatio: etiam enim amor

ad fruitionem requiratur, non tamen est formaliter fruitio, cum multa amemus, quorum non fruimur, ut absentia; sed tantum causaliter, quatenus fruitio dicit quandam voluntatis inhaerentiam, quæ ex amore nascitur. At delectatio est formaliter fruitio, frui enim aliud nihil est quam ex præsentia rei amatæ voluptatem capere, ut frui cibus est ex eorum esu delectari.

Art. 2. quærit an frui conueniat tantum naturæ rationali, ad quod tria respondet 1. fruitionem conuenire naturæ rationali secundum rationem perfectam. 2. conuenire brutis secundum rationem imperfectam. 3. aliis creaturis nullo modo conuenire. Rationem assignat, quia frui non est actus potentiae peruenientis ad finem, sicut exequentis, sed ut imperantis executionem, nimirum potentiae appetitiuæ, ut dictum est: at insensibilia cum careant appetitu sensitivo, non habent potentiam pertingentem ad finem per modum imperantis, sed tantum per modum exequentis; sicut graue tendit deorsum & leue sursum. Bruta verò habent quidem appetitum sensitivum, non liberè imperantem, sed ex naturali instinctu mouentem ad bonum, & finem particularem quem apprehendunt: at natura intellectualis habet appetitum rationalem & liberum, quo fertur in rationem vniuersalem boni, & finis per intellectum apprehensi. Vnde qui dicunt frui esse solummodo hominum, intelligendi sunt de fruitione perfecta; qui verò aiunt frui etiam brutis competere, de imperfecta fruitione sunt explicandi.

Nota cum insensibilia finem suum non cognoscant, eo propriè non frui, neque delectationem ex illius possessione percipere, sed dici tantum in eo quiescere: bruta verò quia per

sensum tantum finem suum materiale agnoscunt, ex illius adeptione delectationem sensibilem capere; at homines quia etiam per rationem finem suum agnoscunt, non modo de eo delectari, sed etiam gaudere, ut aduertit S. Thomas 1. 2. quæst. 31. art. 3.

Art. 3. iuxta, an fruitio sit tantum ultimi finis, & respondet affirmatiue, quia ad rationem fructus duo pertinent, scilicet & quod sit ultimum, & quod delectationem afferat: potest autem aliquid dupliciter esse ultimum, vel secundum quid, vel simpliciter; priori modo dicitur ultimum, ad quod aliqua referuntur, & in se delectationem quandam habet, & hoc aliquo modo dicimur frui, non tamen perfecte cum voluntas aliquid ulterius expectet. Posteriori vero modo ultimum dicitur quod ad aliud non refertur, & in hoc consistit perfecta quies & fruitio, cum appetitui nihil ultra sperandum obiciatur. Præter illa vero reperitur aliquid quod neutro modo est ultimum, sed tantum appetitur in ordine ad aliud, ut potio amara, & hoc nullo modo fructus dici potest.

Aduertendum autem hoc loco posse inquiri, an in vita beata obiectum fruitionis immediatum sit Deus, an vero visio beatifica, & non immerito Durandum reprehendi quod contendat non Deum, sed visionem Dei esse immediatum fruitionis obiectum. Quia ut alia præteream, quæ ex dictis libro 1. cap. 5. art. 1. repeti possunt, S. Thomas monet in resp. ad 3. rem & possessionem rei non esse duos fines, sed vnum in se consideratum, & alteri applicatum; quo fit ut eadem fruitione & Deo, & visione Dei potiamur.

Art. 4. inquit, an fruitio sit tantum finis habiti. Respondetque cum distinctione, nam

fruitio dicit respectum ad ultimum finem, prout habetur à voluntate, finis autem ultimus dupliciter haberi potest, vno modo perfecte, nempe quando habetur in re, alio modo imperfecte, cum scilicet habetur solum in intentione: quare fruitio perfecta est finis realiter habiti, imperfecta vero habiti tantum in intentione.

ARTICVLVS II.

De actu voluntatis, qui est intentio.

DE hoc actu S. Doctor nonnulla inquit i. 1. quæst. 12. per quinque articulos. Articulus 1. quærit an intentio sit actus intellectus, vel voluntatis, respondetque esse actum voluntatis, quod probat, quia intendere, vt ipsum nomen sonat, est in aliud tendere, in aliquid autem tendit & actio mouentis, & motus mobilis, sed hoc quod motus mobilis in aliud tendit, ab actione mouentis procedit. Vnde cum voluntas moueat alias omnes potentias animæ ad finem, vt infra dicetur, hinc fit vt intentio primò & principaliter pertineat ad voluntatem.

Nota 1. intentionem interdum vocari oculum: non quòd formaliter sit cognitio, sed quia supponit cognitionem ostendentem quo tendendum sit. Non etiam intentionis est ordinare media ad finem, sed tendere in finem per media ad eum ab intellectu ordinata.

Nota 2. nos per volitionem velle finem absolute, per fruitionem vt in eo quiescamus, per intentionem vt eam per aliqua media acquiramus. Sic ægrotus dicitur intendere sanitatem, quatenus eam optat consequi per potiones, &

alia media ad id ordinata.

Art. 2. quærit, an intentio sit tantum ultimi finis, & respondet negatiue, quia intentio respicit finem secundum quod est terminus motus voluntatis. In motu autem potest accipi terminus dupliciter, vno modo ipse terminus ultimus in quo quiescitur, qui est terminus totius motus; alio modo aliquod medium, quod est principium vnius partis motus, & finis vel terminus alterius; vnde et si intentio semper sit finis, non tamen ultimi finis. Breuius & clarius dici potest, voluntatem posse intendere id quod per se bonum est & amabile, siue sit finis ultimus, siue non ultimus, si per aliqua media comparari potest.

Vbi aduerte illud poni à S. Thoma vt resp. ad 3. discrimen inter fruitionem, & intentionem, quod fruitio importat quietem in fine, quod pertinet solum ad finem ultimum, intentio verò non importat motum in quietem, sed in terminum. Verum ex dictis art. præcedenti constat, fruitionem imperfectam esse de fine non ultimo, qui in se delectationem quandam habet.

Art. 3. quærit, an quis possit duo simul intendere, & Respondet affirmatiue, siue agatur de pluribus inter se subordinatis, vt dum quis vult medicinam propter sanitatem, siue etiam de pluribus non subordinatis. Nam potest homo vnum præ alio eligere, quia ad plura valet, adeoque hæc plura simul intendere; vt si quis malit habere pecunias, quam arma, quia pecuniis poterit cibos & vestes emere, aliaque necessaria comparare.

Nota 1. cum ait S. Thomas plura posse simul intendi, per vocem *simul* non solum intelligi id fieri posse eodem tempore, sed etiam co-

dem actu, agendo de pluribus inter se subordinatis. Id patet tum ex responsionibus ad argumenta, tum ex art. 4. ubi disertè ait, eundem esse motum quo volo medicinam propter sanitatem, quia finis est ratio volendi ea quæ sunt ad finem: idem autem actus cadit super obiectum, & super rationem obiecti; sicut eadem visio est coloris & luminis.

Nota 2. quod spectat ad plures fines non subordinatos, S. Thomam docere in resp. ad 2. ut simul, seu eodem actu intendantur, eos debere considerari ut sunt quid vnum secundum rationem, vel quia concurrunt ad integrandum aliquid vnum, sicut ad sanitatem concurrunt calor & frigus inter se commensurata; vel quia continentur sub vno communi quod potest esse intentum, ut acquisitio vestis & vini sub lucro continentur. Ex quibus patet fines illos non considerari à Doctore Angelico per modum plurium, ita ut quilibet per se habeat rationem integri finis, sed per modum vnius, adeo ut ex iis ut ex partibus bonum aliquod commune integretur.

Nota 3. id non impedire quin possint simul plura, ut plura, intendi, ut manifestum est cum quis Romam proficiscitur, tum ut loca sacra inuisit, tum ut beneficium aliquod obtineat; ita quidem ut vel propter alterum ex his finibus illud iter susciperet, etsi alter abesset. Licet autem illa duo simul seu eodem tempore intendantur, non tamen eodem actu, quia cum obiecta integra & totalia plura sint, plures actus ad illa tendere necesse est.

Articulo 4. quærit, an idem actus possit ferri in finem, & in media ad finem; de quo videntur quæ diximus cap. præcedenti art. 4. neque opus est ut in iis diutius immoremur. Art.

verò 5. inquit, an intentio conueniat brutis, & respondet cum distinctione, nam si intendere late sumatur pro eo quod est in aliquid tendere vt ab alio motum, sic bruta intendunt finem, quia instinctu naturali ad illum moueatur. Si verò proprie sumatur pro eo quod est ordinare suum motum in finem: hoc modo bruta non intendunt finem, cum non cognoscant se per motum posse consequi suum finem: ad hoc enim oportet cognoscere proportionem inter motum & finem, quod solius rationis opus est.

ARTICVLVS III.

De mediocrum electione.

Sanctus Thomas 1. 2. quæst. 13 agit de electione per varios articulos. Et quidem art. 1. quærit an sit actus voluntatis, vel rationis, responderque actum illum. quia perficitur in motu quodam animæ ad bonum: quod per ordinem rationis eligitur, materialiter esse actum voluntatis, formaliter autem actum rationis; sicut actus fortitudinis qui exercetur propter Dei amorem, materialiter quidem est actus fortitudinis, formaliter verò actus charitatis.

Quæ verba ita intelligenda sunt, vt electio quoad suam entitatem & substantiam, procedat quidem realiter à voluntate, habeat tamen rationem electionis ab actu intellectus, quo comparantur media cum fine & inter se, ostenditurque quodnam ex illis aptius sit ad finem consequendum: sine hac enim directione actus voluntatis non habebit rationem electionis, sed tantum simplicis volitionis.

Art. 2. quærit an electio competat brutis ani-

malibus & respondet negatiuè, quia cum electio sit acceptatio vnius præ alio, necesse est vt sit respectu plurium quæ eligi possunt; & ideo in his quæ penitus sunt determinata ad vnum, electio locum non habet: at bruta per appetitum sensitium sunt determinata ad vnum particulare, secundum ordinem naturæ; quare electio non est in illis, sed tantum in voluntate, quæ et si ad bonum commune sit determinata, est tamen indeterminata respectu particularium bonorum.

Nota, quod bruta acceptent vnum præ alio, vt canis offam non lapidem, id non oriri ex electione, sed ex instinctu naturæ, quo determinantur ad vnum amplectendum, & aliud reiciendum. Cuius rei non leue indicium est, quod omnia bruta quæ sunt eiusdem speciei, similiter operantur.

Art. 3. quærit an electio sit solum eorum quæ sunt ad finem, vel etiam quandoque ipsius finis. Et respondet ex Philosopho 2. Ethic. electionem non esse nisi de mediis idque probat, quia electio sequitur sententiam vel iudicium, quod est sicut conclusio syllogismi operatiui, vnde illud cadit sub electione, quod se habet vt conclusio in syllogismo operatiuo; finis autem in operabilibus se habet vt principium, & non vt conclusio, eo quod rationes eorum quæ sunt ad finem ex fine sumuntur, vt tradit S. Doctor 1. 2. quæst. 14. art. 2. vnde finis in quantum huiusmodi, non cadit sub electione.

Addit tamen contingere interdum, id quod est finis respectu quorundam, ordinari ad alium finem; sicut etiam id quod est principium vnius demonstrationis, est conclusio alterius: & ideo id quod accipitur vt finis in vna inquisitione, posse accipi vt medium ad finem in alia inqui-

sitione, sicque de eo esse consilium & electionem. Exempli causa in operatione medici, sanitas se habet ut finis, adeoque circa illam non est consultatio, nec electio, sed ea consideratur ut principium unde oritur consultatio de mediis, eorumque electio. Verum quia sanitas corporis ordinatur ad sanitatem animæ, hinc sic ut de ea à medico spiritali consultatio fieri possit, per ordinem ad finem illum nobiliores. Vide quæ de hac ipsa difficultate resolvimus cap. præcedenti art. 4. quæsitio 2.

Art. 4. quærit, an electio sit tantum eorum quæ per nos aguntur, & respondet affirmatiue, quia electio mediorum debet respondere finis intentioni, at finis quem intendimus, vel est actio aliqua à nobis pendens, vel res circa quam nobis aliquid agendum est: ergo idem de electione dici debet. Confirmatur, nam electio non est nisi de iis de quibus consultamus, at non consultamus nisi de iis quæ aliquo modo sunt in nostra potestate; ergo nec nisi ea eligimus, ut etiam tradit Arist. 3. Ethic. cap. 2.

Art. 5. quærit, an electio sit tantum possibile, & respondet affirmatiue, quod probat etiam dictis, nam electio non est nisi de iis quæ per nos aguntur, at quæ per nos aguntur sunt nobis possibile. Confirmatur, nam ea tantum eligimus, quibus possumus finem intentum consequi: at finem non possumus consequi nisi per media possibile, ergo electio non est nisi possibile.

Nota 1. non opus esse ad electionem, ut medium verè sit possibile, sed saltem ut tale existimetur. Nam sicut voluntas fertur in finem non bonum, quem intellectus bonum existimat; ita potest eligere media impossibilia, quæ ratio iudicat esse possibile. Nec refert quod ex præscripto 5.

pro S. Benedicti, inferior debeat tentare an possit exequi quod impossibile est, si ipsi à superiore iniungatur, vnde videtur sequi electionem versari etiam circa impossibilia, quæ vt talia cognoscuntur. Non enim id sequitur, eo quod non debet inferior suo iudicio definire, an id quod præcipitur sit possibile, vel non, sed in hoc præcipientis iudicio stare, vt tradit S. Doctor in resp. ad 3.

Nota 2. etsi electio, cum sit volitio efficax, non possit esse nisi possibilium, volitionem tamen simplicem & inefficacem posse versari circa impossibilia; vt patet cum quis de peccatis commissis ita dolet, vt vellet non peccasse, quamuis id iam sit impossibile.

Art. 6. quærit, an homo ex necessitate eligat, an liberè, & respondet eum eligere liberè, quia cum ratio possit apprehendere vt bonum, non solum velle, aut agere, sed etiam non velle, & non agere; & rursus in omnibus particularibus bonis possit considerare rationem boni alicuius, & defectum alicuius boni, quod habet rationem mali, sicque quodlibet ex iis bonis apprehendere vt eligibile, vel repudiabile, hinc fit vt voluntas possit etiam eligere hoc, vel illud; itemque illud eligere, aut non eligere. Vt autem ista melius percipiantur,

Quæritur 1. an ex duobus bonis propositis possit voluntas eligere illud quod minus bonum apparet. Respondeo affirmatiuè, ex communi sententia quam manifestissima experientia confirmat, possumus enim pro libertate ex duobus cibis, vestibus, &c. id eligere quod minoris est pretij, minúsque commodum iudicatur. Videmus etiam plerosque sectari media faciliora, etsi minús vtilia siue ad scientias assequendas, siue ad salutem comparandam, iis ne-

glectis quæ non dubitant esse longè vtiliora & securiora. Imò qui præceptum Dei, ob aliquod commodum violat, probè scit se bonum longè minus negligere pro minori, quia si crederet actum peccati esse maius bonum quàm obseruationem præcepti diuini, eo ipso esset hæreticus. Vnde collige à fortiori ex duobus bonis æqualibus, liberum esse homini alterum eligere, alio relicto.

Obiicies 1. minus bonum vt sic, habet rationem mali, cùm sit priuatio maioris boni; quemadmodum è contrario minus malum vt sic, habet rationem boni, quia est priuatio maioris mali: atqui malum vt malum, non potest à voluntate eligi, ergo neque minus bonum, vt sic. Respondeo hoc totum posse concedi, nobisque non officere, quia non dicimus voluntatem posse amplecti minus bonum, vt est minus bonum, sed præcisè vt est bonum: quia sic est conueniens & appetibile, neque mali rationem habet. Vnde ex duobus mediis inæqualiter ad finem assequendum vtilibus, potest voluntas eligere minus vtile, non quidem vt minus vtile, sed præcisè quatenus vtile.

Obiicies 2. vt voluntas vnum bonum alteri præferat, oportet vt ab illo efficacius trahatur; at non potest efficacius trahi à minori bono, imò neque ab æquali, ergo nec minus, nec æquale bonum eligere potest. Respondeo maiorem falsam esse, si intelligatur de efficaciori tractione tenente se præcisè ex parte boni amati, quia cùm voluntas sit libera ad non amplectendum quodcunque bonum siue paruum, siue magnum sit, quando ex duobus bonis propositis alterum eligit, id non necessario oritur ex maiori tractione illius boni secundum se, sed ex eo quod voluntas pro arbitrio ab illo bono se trahi

finis, siue secundum se magis trahat, siue non.

Quæritur 2. an quâdo vnicum tantum est medium ad finem assequendum, electio illius sit necessaria. Respondeo 1. esse necessariam ex hypothefi quod quis finem efficaciter intendat. Intentio enim efficax finis illa est, cuius vi applicantur media ad illum necessaria: quare si vnicum tantum suppetit medium, necesse est vt illud eligatur, & ad executionem applicetur. Hinc qui efficaciter vult salutem æternam consequi, tenetur fidem Christianam amplecti, & diuina mandata seruare; cum hoc sit medium necessarium ad eiusmodi finem comparandum.

Respondeo 2. eiusmodi electionem non esse necessariam absolute, sed tantum ex suppositione intentionis efficacis finis. Quia in potestate voluntatis est, antequam medium assumat, intentionem mutare; quo ipso nulla erit necessitas eligendi medium. Vnde ipsa electio secundum se spectata est libera, adeoque meritoria, vel demeritoria.

ARTICVLVS IV.

De consilio ad electionem prærequisito.

Sanctus Thomas 1. 2. quæst. 14. agit per varios articulos de consilio, de quo nonnulla breuiter obseruare sufficiet.

Obseruandum 1. consilium hic idem esse ac consultationem & deliberationem, hisque omnibus vocibus significari rationis inquisitionem de mediis ad finem conducentibus; ex qua sequitur iudicium de eligendo tali medio præ aliis, quod est veluti consultationis conclusio, quam electio sequitur.

Observandum 2. consilium non esse nisi de mediis, nam sicut in scientiis speculatiuis non incipit veritatis inquisitio, nisi expositis quibusdam principiis; ita in rebus moralibus, inquisitio de rebus agendis semper supponit finem aliquem esse constitutum, ex quo proceditur ad deliberandum de mediis.

Observandum 3. consultationem non esse nisi de iis quæ sunt in nostra potestate, vel immediate, vel saltem mediate; quia de aliis consultare inutile esset & ridiculum, ut si quis priuatus apud se deliberaret, de modo quo bellum proxima æstate incundum erit.

Observandum 4. non esse tamen consilium de omnibus quæ à nobis fieri possunt, multa enim sunt ab aliqua arte determinata; quæ consultatione non indigent, v. c. vestes tali modo conficiendas esse; alia sunt per se euidentia, ut ex duobus mediis illud quod longè aptius est ad finem, eligendum esse, &c. sunt etiam res aliquæ tam parui momenti, ut nihil intersit an hoc vel illo modo fiant; unde nec in illis necessaria est consultatio, ut non deliberamus an pede dextro an sinistro deambulatio inchoanda sit: an hoc vel illo cultro omnino simili utendum, &c.

Observandum 5. processum consilij esse secundum ordinem resolutorium: quia quamuis resolutio & compositio propriè reperiatur tantum in toto & partibus, eò quod totum ex partibus componitur, & in eas resoluitur; in fine tamen & mediis proportionem quadam reperi potest, quatenus ut finis existat, requiruntur media per quæ acquiratur; quemadmodum ut totum existat, necessariae sunt partes ex quibus componatur. Seruatur ergo in consultatione ordo resolutorius, quatenus à fine intento pro-

cedimus ad media proxima, & remota, ut à toto ad partes. Contra verò in executione proceditur ordine compositionis, quia postquam consultatio terminata est per sententiã & iudicium, primò applicamus media remota, tum proxima, & tandem finem consequimur: hoc enim perinde est ac partem parti adiungere, & ex iis totum componere.

Vterque iste processus intelligi potest in eo qui domum construere intendit, finis enim constructionis est arcere à pluvia, frigore, aliisque aëris iniuriis, adeoque intentio debet primò ferri in constructionem tecti, tum in constructionem murorum quibus tectum innitatur, ac denique in constructionem fundamentorum quibus tectum & parietes fulciantur. In ordine verò executionis modo opposito procedendum est, iacienda enim prius sunt fundamenta, deinde erigendi parietes, ac denique tectum iis imponendum.

Observandum postremò consilium non procedere in infinitum, siue ex parte principij, siue ex parte termini. Cùm enim, ut dictum est, non sit consultatio de fine, sed fine supposito inquirantur media ad eum acquirendum necessaria, inuentis mediis omnibus proximis, & remotis ad finem necessariis, tunc finitur consultatio, & iam incipit executio; adeo ut id quod est ultimum in intentione, sit primum in executione, & quod est primum in intentione, sit ultimum in executione.

ARTICVLVS V.

De Consensu.

Sanctus Thomas 1. 2. quæst. 15. agit de Consensu de quo quatuor docet: 1. consensum esse actum virtutis appetitiuæ potius quam apprehensiuæ, siquidem consentire est simul sentire, & sic importat quandam coniunctionem ad id cui consentitur; & ideo voluntas, cuius est tendere ad ipsam rem, magis proprio dicitur consentire.

Nota consensum sæpe sumi pro actu intellectus, & significare conformitatem in iudicio, ut cum dicimus Philosophos, vel Theologos communi consensu aliquid docere: hic tamen accipi pro actu quo voluntas acquiescit iudicio intellectus, aliquid ipsi tanquam bonum & amplectendum proponentis; quo sensu Theologi sæpe dicunt post Augustinum, cap. 2. art. 3. relatum, consentire vel dissentire vocationi diuinæ propriæ voluntatis esse.

Docet 2. consensum non conuenire brutis animalibus; Rationem affert, quia consensus importat applicationem appetitiui motus ad aliquid ad agendum, eius autem est applicare appetituum motum ad aliquid agendum, in cuius potestate est appetitiuus motus; at bruta non habent in sua potestate appetitiuū motum, sed talis motus est in eis ex instinctu naturæ: quare consentire non competit brutis, sed tantum naturæ rationali quæ habet in sua potestate motum appetituum, potestque illum applicare, vel non applicare.

Nota ad consensum non sufficere determina-

tionem appetitus ad vnum, sed requiri determinationem liberam qualis non est in brutis. Item operis executionem non tantum sequi ex consensu, sed etiam ex naturali impetu, ut est in brutis.

Docet 3. consensum non esse de fine, sed de mediis ad finem necessariis. Ratio est, quia consensus proprie est applicatio appetitui motus ad determinationem consilij, unde cum consilium non sit nisi de iis quæ sunt ad finem, consensus etiam non nisi circa illa versatur.

Nota primus actum voluntatis, qui sequitur deliberationem intellectus perfectam, esse consensum, secundum verò electionem; inter quos actus illud est discrimen, quod consensus dicit simplicem affectum mediij ab intellectu propositi ad finem consequendum, electio verò dicit actum quo ex pluribus mediis propositis, vnum præfertur alteri: unde potest esse consensus fine electione, ut cum media proposita placent quidem voluntati, sed ea veluti suspensa manens, nondum aliquod ex illis eligit.

Docet 4. consensum pertinere solum ad superiorem animæ partem. Ratio est, quia finalis sententia semper pertinet ad superiorem iudicem; at consensus in actum est finalis sententia de agendis, ergo spectat ad iudicem superiorem: iudex autem superior est ratio superior, cum de sensibilibus per rationem inferiorem iudicemus, & de pertinentibus ad res humanas, per rationes diuinas quæ ad superiorem rationem pertinent. Vnde nullum iudicium rationis humanæ habet rationem finalis sententiæ, quamdiu incertum est an illud sit rationibus diuinis consentaneum, vel dissentaneum.

Nota in anima poni duas partes secundum rationem tantum distinctas, quarum alia dicitur

superior, alia inferior. Superior ea dicitur quæ consulit rationes diuinas, vt dum quis iudicat ab homicidio abstinendum esse, quia Deus illud prohibet; inferior verò quæ ad rationes humanas attendit, vt si quis iudicet homicidium non esse patrandum, quia homicidæ morte plesti solent.

ARTICVLVS VI.

De Vsu.

Sanctus Thomas sequenti quæst. 16. totidem tradit de Vsu. Docet 1. vti esse actum voluntatis, quod probat, quia vsus rei alius importat illius applicationem ad opus, spectat autem ad voluntatem applicare potentias animæ siue internas, siue externas ad operandum, vt intellectum ad intelligendum, oculum ad videndum, manum ad percutiendum. Quare, vti, primò & principaliter est voluntatis vt primi mouentis, rationis vt dirigentis, & aliarum potentiarum vt exsequentium.

Nota operationem potentiae voluntati subordinatæ esse vsum talis potentiae, v. c. intellectum esse vsum intellectui, locutionem esse vsum linguae, non tamen ita vocari respectu ipsius potentiae à qua immediate elicitur, sed per ordinem ad voluntatem, quatenus fit ex imperio illius: vnde duplex vsus distinguendus est; actiuus & passiuus; actiuus est actus quo voluntas mouet potentiam aliquam ad operationem suam, passiuus verò est illa potentiae operatio, vt fit ex motione voluntatis.

Docet 2. vti non conuenire brutis animalibus, quod probat, quia vti est applicare aliquod

principium actionis ad actionem, sicut consentire est applicare motum appetituum ad aliquid appetendum; applicare autem aliquid ad alterum non est nisi eius quod habet super illud arbitrium, quod non est nisi eius quod scit referre aliquid ad alterum, quod ad rationem pertinet, & ideo solum animal rationale consentit & utitur. Vnde etsi animalia aliquid per sua membra agant instinctu naturæ, non tamen proprie dicuntur ea applicare, vel iis uti, quia non cognoscunt ordinem membrorum ad illas operationes.

Docet 3. usum non esse ultimi finis, sed eorum tantum quæ sunt ad finem, quod probat, quia usus dicit applicationem alicuius ad aliquid, quod autem applicatur ad aliud, habet rationem eius quod est ad finem; unde usus est semper eius quod est ad finem. Confirmatur, nam ea quæ sunt fini proportionata, utilia dicuntur, & realiqua dicimur bene uti, quando ad finem debitum illam applicamus, abuti verò quando ad finem indebitum eam dirigimus.

Nota 1. usum latius spectatum esse posse respectu ultimi finis obiectivè spectati, quatenus refertur ad possessionem; ut etsi avarus pecunia fruatur, quia in ea finem ultimum constituit, dicitur tamen ea uti, quatenus illam ad possessionem refert.

Nota 2. quod dicitur communiter ex Augustino, non esse fruendis utendum, nec fruendum utendis, ita debere intelligi, ut non liceat amorem æternorum ad temporalia ut ad finem dirigere, nec in amore temporalium ut in ultimo fine sistere, cum sint tantum media ad finem illum assequendum destinata.

Docet 4. usum sequi electionem, si referantur ad idem: Nam electio alicuius mediæ est prior applicatione potentiaæ executivæ, in qua

usus consistit, ut prior est electio medicinæ, quam applicatio potentiarum ad eam conficiendam. Eam tamen præcedere si ad diuersa referantur, quia voluntas utitur intellectu, cumque applicat ad consultandum de mediis, antequam ea eligat.

Nota usum interdum esse actum realiter distinctum ab electione, ut cum quis electo medio non statim procedit ad executionem: nonnunquam verò coincidere realiter cum electione, quando nimirum vi ipsius electionis sine mora applicantur potentiæ ad executionem.

ARTICVLVS VII.

De actibus imperatis à voluntate.

Quæritur 1. quid sentiendum sit de actu imperij. Respondeo S. Thomam 1. 2. quæst. 17. de eo agere per quatuor articulos, quorum 1. inquit utrum imperare sit actus rationis, vel voluntatis, & respondet esse essentialiter actum rationis, præsupposito actu voluntatis. Quod probat, quia imperans ordinat eum cui imperat, ad aliquid agendum, intimando vel denunciando, quod opus est rationis. Verum ratio potest aliquid intimare vel absolute, quod exprimitur per indicatium, ut si dicam alicui, hoc est tibi faciendum; vel mouendo ipsum ad hoc, ut exprimitur per imperatium, fac hoc; sic autem intimare non habet ratio ex se, sed ex virtute voluntatis, quæ est primum mouens ad executionem operis, quia secundum mouens non mouet nisi virtute primi mouentis. Ex quibus patet, imperare cum sit opus rationis, non competere brutis, ut concluditur art. 2.

Art. 3. quærit, an vsus sit imperio posterior, & respondet affirmatiuè, quia vsus nihil est aliud quam executio imperij, quare est illo natura posterior, & interdum tempore. Vnde ille est ordo inter consilium, electionem, imperium, & vsum, quod post consilium seu iudicium rationis, sequitur electio mediij, tum imperium iubens executionem, actandem vsus seu executio. Cæterum quod non prærequiratur ad omnes actus voluntatis imperium aliquod ex parte intellectus, patet ex dictis cap. 3. art. 3.

Art. 4. quærit an imperium, & actus imperatus sint vnus & idem actus, & respondet esse vnum actum humanum, sicut vnum totum compositum ex illis; esse tamen diuersos, sicut partes totius. Quia etsi actus illi secundum suam substantiam sint distincti, tamen quatenus imperatus est ex motione imperantis, sic fiunt quodammodo vnus; eò quod idem est actus mouentis, & moti, vt dicitur in 3. Physic.

Clariùs dici potest actus illos realiter, & quoad naturam distingui, non autem moraliter; quia in vtroque est eadem bonitas, aut malitia; quo sensu voluntas occidendi, & actualis occisio vnum homicidium constituunt. Imò tota series actuum qui ad homicidium patrandum concurrunt, censetur vnum peccatum, nempe intentio occidendi, consultatio de medijs, iudicium de medio eligendo, electio talis mediij, imperium seu voluntas efficax applicandi tale medium, illiusque actualis applicatio seu vsus, ex quo proximè oritur homicidium.

Quæritur 2. quinam actus imperentur. De hoc agit S. Doctor sequentibus articulis. Et quidem art. 5. quærit an actus voluntatis imperetur, & respondet affirmatiuè, quod probat, quia omne quod est in potestate nostra, subia-

cet imperio nostro ; sed actus volūtatīs sunt maximè in potestate nostra , ergo imperantur à nobis. Verūm quia imperium est actus rationis, ille tantū voluntatis actus imperatur qui rationi subditur, cuiusmodi non est primus actus voluntatis indeliberatus.

Nota 1. vnum actum voluntatis non posse imperari , nisi per actum præcedentem eiusdem voluntatis , cū sola ordinatio rationis, seu locutio interna ad imperium non sufficiat. Neque dicas voluntatem velle, eò ipso quòd vult se velle ; licet enim præsentem habeat volitionem imperantem , non tamen imperatam , saltem in illo priori, vt patet cū quis conatur se excitare ad actum perfectæ contritionis, quem nondum habet reipsa, etsi illum velit.

Nota 2. etsi virtutes nobiliores ex natura rei imperent ignobilioribus, vt Theologicæ Moralibus, fieri tamen posse pro arbitrio voluntatis, vt ex amore virtutis ignobilioris imperetur actus nobilioris, ad illius affecutionem conducentis ; vt dum quis se excitat ad amorem Dei, ex intentione obtinendæ castitatis , vel humilitatis.

Art. 6. quæritur an actus rationis imperetur, & respondet cum distinctione. Nam actus rationis dupliciter considerari potest , vno modo quantum ad exercitium actus, & sic actus rationis semper imperari potest ; sicut cū indicitur alicui quod attendat, & ratione vtatur. Alio modo quantum ad obiectum , idque dupliciter, primò quatenus veritatem circa aliquid apprehendit, & sic actus rationis pendet ex aliquo lumine naturali, vel supernaturali, nec est in nostra potestate illum impedire : Secundò quatenus iudicat de re apprehensa , & quidem si illa adeo est perspicua vt intellectus conuincatur,

qualia sunt prima principia, eiusmodi iudicium non est in potestate nostra; si autem res apprehensa non ita convincat intellectum, quin possit assentire aut dissentire, in talibus assensus ipse vel dissensus est in nostra potestate. Verum ad maiorem horum intelligentiam,

Nota 1. quod ait S. Thomas, actum rationis semper imperari posse quoad exercitium, intelligi de actibus qui aliquem libertatis usum supponunt; nam eos qui præcedunt omnem actum libertatis, ut sunt cogitationes illæ primæ, quæ siue ex occurso obiectorum, siue ex illustratione diuina in nobis necessario oriuntur, imperari non posse perspicuum est.

Nota 2. apprehensionem intellectus non esse in nostra potestate quoad obiecti speciem, quia fieri non potest ut hominem aliter apprehendam quam sub ratione hominis, equum sub ratione equi, &c. Idem dico de medio obiecti euidentis, quia non possum iudicare falsum id quod est euidenter verum, v. c. iudicare totum non esse maius sua parte. An autem posito assensu præmissarum, intellectus necessitetur non modo quoad speciem, sed etiam quoad exercitium, ad assensum conclusionis, diximus lib. 3. Logicæ cap. 6. art. 5.

Nota 3. quod spectat ad obiectum obscurum, iudicium de illo quoad speciem esse in nostra potestate, ita ut possimus mox iudicare esse probabilius, modo minus probabile. Non quod voluntas facere possit, ut intellectus iudicet minus probabile, aut falsum id quod per rationem apparet magis probabile: sed quia efficere potest ut id quod est magis probabile, appareat minus probabile, sicque intellectus ei assensum deneget.

Nec refert quod possit quis amplecti opinio-

ratione potest cadere in illos actus laus & meritum, ut si quis temperate comedat, aut ieiunet; & vice versa vituperium & demeritum, ut si cibus se ingurgitet.

Nota 2. idem dicendum de facultate vitali residente in corde, quæ continuum illius, & arteriarum pulsum causat; talis enim motus non subiacet per se & directè imperio voluntatis, cum sit merè naturalis, & sine vlla prævia cognitione aut deliberatione fiat, esto non nisi animalibus competat. Respiratio tamen quæ ad facultatem vitalem refertur, aliquanto tempore contineri potest, sicque voluntati subiicitur.

Nota 3. idem habere locum in sensibus externis, ut in visu, & auditu; quia etsi non possit voluntas directè impedire, quin oculus apertus videat obiectum aliquod in debita distantia constitutum, potest tamen id impedire indirectè, nempe illum claudendo, vel in aliam partem vertendo: siquidem facultas loco motiua obedit voluntati ad nutum, eique despoticè subiicitur.

Art. 9. quærit, utrum actus exteriorum membrorum imperentur, & respondet per distinctionem, nam membra corporis sunt organa quædam potentiarum animæ, unde ut potentiæ animæ se habent ad hoc quod obediant rationi, ita & corporis membra. Quia igitur vires sensitiuæ subduntur imperio rationis, non autem vires naturales, ideo omnes motus membrorum quæ mouentur à potentiis sensitiuis, subduntur imperio rationis, non autem ij qui consequuntur vires naturales.

Verum quia hæc ratio non satis videtur coherere cum ante dictis, de imperio voluntatis in potentias sensitiuas, clariùs dici potest, ideo

corporis membra subdi imperio rationis, quia eorum actus pendent immediatè à potentia loco motiua, quæ voluntati despoticè obedit, nisi adsit aliquod impedimentum; vt cùm quis laborat podagra, vel alio morbo localem motum impediēte.



CAPVT V.

DE BONITATE, ET MALITIA
actuum humanorum.

ARTICVLVS PRIMVS.

An bonitas, & malitia humanorum actuum sumantur ex obiecto.

Præmoneo 1. in actu humano duo esse distinguenda, nempe quod sit actus naturalis, & Moralis; hic autem non agi de bonitate & malitia talis actus in esse naturæ spectati, sed vt constituitur in esse Morali, estque dignus laude, aut vituperio.

Præmoneo 2. dubium non esse apud Catholicos, quin actuum Moralium alij sint boni, alij mali; boni sunt actus fidei, spei, charitatis, religionis, iustitiæ, alique omnes qui fiunt ex præscripto rectæ rationis: mali verò sunt odium Dei, blasphemia, infidelitas, iniustitia, aliaque opera rectæ rationi repugnantia.

Dixi, apud Catholicos, nam hæretici huius temporis contendunt omnes hominis, quantumvis iusti, actiones esse malas, quod aperte

Observandum 2. consilium non esse nisi de mediis, nam sicut in scientiis speculatiuis non incipit veritatis inquisitio, nisi expositis quibusdam principiis; ita in rebus moralibus, inquisitio de rebus agendis semper supponit finem aliquem esse constitutum, ex quo proceditur ad deliberandum de mediis.

Observandum 3. consultationem non esse nisi de iis quæ sunt in nostra potestate, vel immediate, vel saltem mediate; quia de aliis consultare inutile esset & ridiculum, ut si quis priuatus apud se deliberaret, de modo quo bellum proxima æstate ineundum erit.

Observandum 4. non esse tamen consilium de omnibus quæ à nobis fieri possunt, multa enim sunt ab aliqua arte determinata; quæ consultatione non indigent, v. c. vestes tali modo conficiendas esse; alia sunt per se euidencia, ut ex duobus mediis illud quod longè aptius est est ad finem, eligendum esse, &c. sunt etiam res aliquæ tam parui momenti, ut nihil intersit an hoc vel illo modo fiant; unde nec in illis necessaria est consultatio, ut non deliberamus an pede dextro an sinistro deambulatio inchoanda sit: an hoc vel illo cultro omnino simili vtendum, &c.

Observandum 5. processum consilij esse secundum ordinem resolutorium: quia quamuis resolutio & compositio propriè reperiatur tantum in toto & partibus, eo quod totum ex partibus componitur, & in eas resoluitur; in fine tamen & mediis proportionem quadam reperiri potest, quatenus ut finis existat, requiruntur media per quæ acquiratur; quemadmodum ut totum existat, necessariae sunt partes ex quibus componatur. Seruatur ergo in consultatione ordo resolutorius, quatenus à fine intento pro-

cedimus ad media proxima, & remota, vt à toto ad partes. Contra verò in executione proceditur ordine compositionis, quia postquam consultatio terminata est per sententiã & iudicium, primò applicamus media remota, tum proxima, & tandem finem consequimur: hoc enim perinde est ac partem parti adiungere, & ex iis totum componere.

Vterque iste processus intelligi potest in eo qui domum construere intendit, finis enim constructionis est arcere à pluuia, frigore, aliisque aëris iniuriis, adeoque intentio debet primò ferri in constructionem tecti, tum in constructionem murorum quibus tectum innitatur, ac denique in constructionem fundamentorum quibus tectum & parietes fulciantur. In ordine verò executionis modo opposito procedendum est, iacienda enim priùs sunt fundamenta, deinde erigendi parietes, ac denique tectum iis imponendum.

Obseruandum postremò consilium non procedere in infinitum, siue ex parte principij, siue ex parte termini. Cum enim, vt dictum est, non sit consultatio de fine, sed sine supposito inquirantur media ad eum acquirendum necessaria, inuentis mediis omnibus proximis, & remotis ad finem necessariis, tunc finitur consultatio, & iam incipit executio; adeo vt id quod est vltimum in intentione, sit primum in executione, & quod est primum in intentione, sit vltimum in executione.

ARTICVLVS V.

De Consensu.

SANCTUS THOMAS 1. 2. quæst. 15. agit de Consensu de quo quatuor docet: 1. consensum esse actum virtutis appetitiuæ potius quam apprehensiuæ, siquidem consentire est simul sentire, & sic importat quandam coniunctionem ad id cui consentitur; & ideo voluntas, cuius est tendere ad ipsam rem, magis proprie dicitur consentire.

Nota consensum sæpe sumi pro actu intellectus, & significare conformitatem in iudicio, ut cum dicimus Philosophos, vel Theologos communi consensu aliquid docere: hic tamen accipi pro actu quo voluntas acquiescit iudicio intellectus, aliquid ipsi tanquam bonum & amplectendum proponentis; quo sensu Theologi sæpe dicunt post Augustinum, cap. 2. art. 3. relatum, consentire vel dissentire vocationi diuinæ propriæ voluntatis esse.

Docet 2. consensum non conuenire brutis animalibus; Rationem affert, quia consensus importat applicationem appetitiui motus ad aliquid ad agendum, eius autem est applicare appetituum motum ad aliquid agendum, in cuius potestate est appetitiuus motus; at bruta non habent in sua potestate appetitiuum motum, sed talis motus est in eis ex instinctu naturæ: quare consentire non competit brutis, sed tantum naturæ rationali quæ habet in sua potestate motum appetituum, potestque illum applicare, vel non applicare.

Nota ad consensum non sufficere determina-

tionem appetitus ad vnum, sed requiri determinationem liberam qualis non est in brutis. Item operis executionem non tantum sequi ex consensu, sed etiam ex naturali impetu, ut est in brutis.

Docet 3. consensum non esse de fine, sed de mediis ad finem necessariis. Ratio est, quia consensus proprie est applicatio appetitui motus ad determinationem consilij, unde cum consilium non sit nisi de iis quæ sunt ad finem, consensus etiam non nisi circa illa versatur.

Nota primum actum voluntatis, qui sequitur deliberationem intellectus perfectam, esse consensum, secundum verò electionem; inter quos actus illud est discrimen, quod consensus dicit simplicem affectum mediij ab intellectu propositi ad finem consequendum, electio verò dicit actum quo ex pluribus mediis propositis, vnum præfertur alteri: unde potest esse consensus fine electione, ut cum media proposita placent quidem voluntati, sed ea veluti suspensa manens, nondum aliquod ex illis eligit.

Docet 4. consensum pertinere solum ad superiorem animæ partem. Ratio est, quia finalis sententia semper pertinet ad superiorem iudicem; at consensus in actum est finalis sententia de agendis, ergo spectat ad iudicem superiorem: iudex autem superior est ratio superior, cum de sensibilibus per rationem inferiorem iudicemus, & de pertinentibus ad res humanas, per rationes diuinas quæ ad superiorem rationem pertinent. Vnde nullum iudicium rationis humanæ habet rationem finalis sententiæ, quamdiu incertum est an illud sit rationibus diuinis consentaneum, vel dissentaneum.

Nota in anima poni duas partes secundum rationem tantum distinctas, quarum alia dicitur

superior, alia inferior. Superior ea dicitur quæ consulit rationes diuinas, vt dum quis iudicat ab homicidio abstinendum esse, quia Deus illud prohibet; inferior verò quæ ad rationes humanas attendit, vt si quis iudicet homicidium non esse patrandum, quia homicidæ morte plesti solent.

ARTICVLVS VI.

De Vsu.

Sanctus Thomas sequenti quæst. 16. totidem tradit de Vsu. Docet 1. vti esse actum voluntatis, quod probat, quia vsus rei alicuius importat illius applicationem ad opus, spectat autem ad voluntatem applicare potentias animæ siue internas, siue externas ad operandum, vt intellectum ad intelligendum, oculum ad videndum, manum ad percutiendum. Quare, vti, primò & principaliter est voluntatis vt primi mouentis, rationis vt dirigentis, & aliarum potentiarum vt exsequentium.

Nota operationem potentiae voluntati subordinatæ esse vsum talis potentiae, v. c. intellectum esse vsum intellectui, locutionem esse vsum linguae, non tamen ita vocari respectu ipsius potentiae à qua immediate elicitur, sed per ordinem ad voluntatem, quatenus fit ex imperio illius: vnde duplex vsus distinguendus est; actiuus & passiuus; actiuus est actus quo voluntas mouet potentiam aliquam ad operationem suam, passiuus verò est illa potentiae operatio, vt fit ex motione voluntatis.

Docet 2. vti non conuenire brutis animalibus, quod probat, quia vti est applicare aliquod

principium actionis ad actionem, sicut consentire est applicare motum appetituum ad aliquid appetendum; applicare autem aliquid ad alterum non est nisi eius quod habet super illud arbitrium, quod non est nisi eius quod scit referre aliquid ad alterum, quod ad rationem pertinet, & ideo solum animal rationale consentit & utitur. Vnde etsi animalia aliquid per sua membra agant instinctu naturæ, non tamen proprie dicuntur ea applicare, vel iis uti, quia non cognoscunt ordinem membrorum ad illas operationes.

Docet 3. usum non esse ultimi finis, sed eorum tantum quæ sunt ad finem, quod probat, quia usus dicit applicationem alicuius ad aliquid, quod autem applicatur ad aliud, habet rationem eius quod est ad finem; unde usus est semper eius quod est ad finem. Confirmatur, nam ea quæ sunt fini proportionata, utilia dicuntur, & realiqua dicimur bene uti, quando ad finem debitum illam applicamus, abuti verò quando ad finem indebitum eam dirigimus.

Nota 1. usum latius spectatum esse posse respectu ultimi finis obiectivè spectati, quatenus refertur ad possessionem; ut etsi avarus pecunia fruatur, quia in ea finem ultimum constituit, dicitur tamen ea uti, quatenus illam ad possessionem refert.

Nota 2. quod dicitur communiter ex Augustino, non esse fruendis utendum, nec fruendum utendis, ita debere intelligi, ut non liceat amorem æternorum ad temporalia ut ad finem dirigere, nec in amore temporalium ut in ultimo fine sistere, cum sint tantum media ad finem illum assequendum destinata.

Docet 4. usum sequi electionem, si referantur ad idem: Nam electio alicuius medij est prior, applicatione potentiaæ executivaæ, in qua

vsus consistit, vt prior est electio medicinæ, quam applicatio potentiarum ad eam conficiendam. Eam tamen præcedere si ad diuersa referantur, quia voluntas vtitur intellectu, cumque applicat ad consultandum de mediis, antequam ea eligat.

Nota vsum interdum esse actum realiter distinctum ab electione, vt cum quis electo medio non statim procedit ad executionem: nonnunquam verò coincidere realiter cum electione, quando nimirum vi ipsius electionis sine mora applicantur potentiæ ad executionem.

ARTICVLVS VII.

De actibus imperatis à voluntate.

QUÆRITUR I. quid sentiendum sit de actu imperij. Respondeo S. Thomam 1. 2. quæst. 17. de eo agere per quatuor articulos, quorum 1. inquit vtrum imperare sit actus rationis, vel voluntatis, & respondet esse essentialiter actum rationis, præsupposito actu voluntatis. Quod probat, quia imperans ordinat eum cui imperat, ad aliquid agendum, intimando vel denunciando, quod opus est rationis. Verùm ratio potest aliquid intimare vel absolute, quod exprimitur per indicatiuum, vt si dicam alicui, hoc est tibi faciendum; vel mouendo ipsum ad hoc, vt exprimitur per imperatiuum, fac hoc; sicutem intimare non habet ratio ex se, sed ex virtute voluntatis, quæ est primum mouens ad executionem operis, quia secundum mouens non mouet nisi virtute primi mouentis. Ex quibus patet, imperare cum sit opus rationis, non competere brutis, vt concluditur art. 2.

Art. 3. quærit, an vsus sit imperio posterior, & respondet affirmatiuè, quia vsus nihil est aliud quàm executio imperij, quare est illo natura posterior, & interdum tempore. Vnde ille est ordo inter consilium, electionem, imperium, & vsum, quòd post consilium seu iudicium rationis, sequitur electio mediij, tum imperium iubens executionem, actandem vsus seu executio. Cæterum quòd non prærequiratur ad omnes actus voluntatis imperium aliquod ex parte intellectus, patet ex dictis cap. 3. art. 3.

Art. 4. quærit an imperium, & actus imperatus sint vnus & idem actus, & respondet esse vnum actum humanum, sicut vnum totum compositum ex illis; esse tamen diuersos, sicut partes totius. Quia etsi actus illi secundum suam substantiam sint distincti, tamen quatenus imperatus est ex motione imperantis, sic fiunt quodammodo vnus; eò quòd idem est actus mouentis, & moti, vt dicitur in 3. Physic.

Clariùs dici potest actus illos realiter, & quoad naturam distingui, non autem moraliter; quia in vtroque est eadem bonitas, aut malitia; quo sensu voluntas occidendi, & actualis occisio vnum homicidium constituunt. Imò tota series actuum qui ad homicidium patrandum concurrunt, censetur vnum peccatum, nempe intentio occidendi, consultatio de medijs, iudicium de medio eligendo, electio talis mediij, imperium seu voluntas efficax applicandi tale medium, illiusque actualis applicatio seu vsus, ex quo proximè oritur homicidium.

Quæritur 2. quinam actus imperentur. De hoc agit S. Doctor sequentibus articulis. Et quidem art. 5. quærit an actus voluntatis imperetur, & respondet affirmatiuè, quod probat, quia omne quod est in potestate nostra, subia-

cet imperio nostro ; sed actus volūtatis sunt maxime in potestate nostra , ergo imperantur a nobis. Verū quia imperium est actus rationis, ille tantū voluntatis actus imperatur qui rationi subditur , cuiusmodi non est primus actus voluntatis indeliberatus.

Nota 1. vnum actum voluntatis non posse imperari , nisi per actum præcedentem eiusdem voluntatis , cū sola ordinatio rationis, seu locutio interna ad imperium non sufficiat. Neque dicas voluntatem velle , eò ipso quòd vult se velle ; licet enim præsentem habeat volitionem imperantem , non tamen imperatam , saltem in illo priori , vt patet cū quis conatur se excitare ad actum perfectæ contritionis, quem nondum habet reipsa , etsi illum velit.

Nota 2. etsi virtutes nobiliores ex natura rei imperent ignobilioribus, vt Theologicæ Moralibus , fieri tamen posse pro arbitrio voluntatis, vt ex amore virtutis ignobilioris imperetur actus nobilioris, ad illius asssecutionem conducen- tis ; vt dum quis se excitat ad amorem Dei , ex intentione obtinendæ castitatis , vel humili- tatis.

Art. 6. quæritur an actus rationis imperetur, & respondet cum distinctione. Nam actus rationis dupliciter considerari potest , vno modo quantum ad exercitium actus, & sic actus rationis semper imperari potest ; sicut cū indicitur alicui quod attendat , & ratione vtatur. Alio modo quantum ad obiectum , idque dupliciter, primò quatenus veritatem circa aliquid apprehendit , & sic actus rationis pendet ex aliquo lumine naturali , vel supernaturali , nec est in nostra potestate illum impedire : Secundò quatenus iudicat de re apprehensa , & quidem si illa adeo est perspicua vt intellectus conuincatur,

qualia sunt prima principia, eiusmodi iudicium non est in potestate nostra; si autem res apprehensa non ita conuincat intellectum, quin possit assentire aut dissentire, in talibus assensus ipse vel dissensus est in nostra potestate. Verum ad maiorem horum intelligentiam,

Nota 1. quod ait S. Thomas, actum rationis semper imperari posse quoad exercitium, intelligi de actibus qui aliquem libertatis usum supponunt; nam eos qui præcedunt omnem actum libertatis, ut sunt cogitationes illæ primæ, quæ siue ex occurso obiectorum, siue ex illustratione diuina in nobis necessario oriuntur, imperari non posse perspicuum est.

Nota 2. apprehensionem intellectus non esse in nostra potestate quoad obiecti speciem, quia fieri non potest ut hominem aliter apprehendam quam sub ratione hominis, equum sub ratione equi, &c. Idem dico de medio obiecti euidentis, quia non possum iudicare falsum id quod est euidenter verum, v. c. iudicare totum non esse maius sua parte. An autem posito assensu præmissarum, intellectus necessitetur non modo quoad speciem, sed etiam quoad exercitium, ad assensum conclusionis, diximus lib. 3. Logicæ cap. 6. art. 5.

Nota 3. quod spectat ad obiectum obscurum, iudicium de illo quoad speciem esse in nostra potestate, ita ut possimus mox iudicare esse probabilius, modo minus probabile. Non quod voluntas facere possit, ut intellectus iudicet minus probabile, aut falsum id quod per rationem appareret magis probabile: sed quia efficere potest ut id quod est magis probabile, appareat minus probabile, sicque intellectus ei assensum deneget.

Nec refert quod possit quis amplecti opinio-

nem minus probabilem: non enim hoc fit iudicando eam esse magis probabilem, sed iudicando illius probabilitatem, licet alia minorem, sufficere ad peccatum cauendum; vt auctores communiter tradunt.

Art. 7. quærit, an actus appetitus sensitui nostro subsint imperio, & respondet cum distinctione. Nam appetitus sensituius est virtus organi corporalis, adeoque illius actus dependet non solum ex potentia animæ, sed etiam ex dispositione corporalis organi; sicut visio ex potentia visiva, & ex qualitate oculi per quam iuuatur, vel impeditur. Illud autem quod est ex parte potentia animæ, sequitur apprehensionem imaginationis, quæ cum sit particularis, regulatur ab apprehensione rationis quæ est vniuersalis, & sic ex ista parte actus appetitus sensitui subiaceret imperio rationis: at qualitas & dispositio corporis non subiaceret imperio rationis, adeoque ex hac parte motus appetitus sensitui non subsunt totaliter imperio rationis.

Contingit etiam interdum motum appetitus sensitui subito cōcitari ad apprehensionem imaginationis, vel sensus, talemque motum esse tunc præter imperium rationis, quæ tamen potuisset illum impedire, si præuidisset. Vnde ex Philosopho 1. Polit. cap. 3. ratio præest irascibili & concupiscibili, non principatu despotico, qui est domini ad seruum, sed politico seu regali, qui est ad homines liberos, imperio non planè subditos. Quod vt clariùs percipias,

Nota x. causam quare appetitus sensituius non subiaceat totaliter nostræ voluntati, esse quia apprehensio imaginationis non est omnino in nostra potestate; appetitus enim sensituius, cum non sit liber, apprehensionem ima-

ginationis necessario sequitur; adeoque quandiu apprehensio viget, motus, appetitus perseverat; quando alio detorquetur, deperit.

Nota 2. etsi interdum non possit flecti imaginatio, quia propter presentiam obiecti sensibus gratissimi, vel ob magnam spirituum commotionem vehementer trahitur, adeoque appetitus sensitiui actus impediri non possit: semper tamen est in potestate voluntatis; & huic actui non consentire, & impedire, quandiu saltem ratio non absorbetur, ne exterius perficiatur: cum in hoc consistat peccati consummatio, quæ sine voluntatis consensu esse non potest.

Articulo 8. quærit, vtrum actus vitæ vegetabilis imperetur, & respondet negativè, probatque hac ratione, nam actuum quidam procedunt ex appetitu naturali, quidam ex animali, quidam ex intellectuali: omne enim agens appetit finem, appetitus autem naturalis non consequitur aliquam apprehensionem, sicut sequitur appetitus animalis, & intellectualis; at ratio imperat per modum apprehensivæ virtutis, unde actus illi qui procedunt ab appetitu intellectivo, vel animali, possunt à ratione imperari; non autem illi qui procedunt ex appetitu naturali, cuiusmodi sunt actus animæ vegetantis. Verum circa hæc

Nota 1. actus animæ vegetantis non cadere directè sub imperium rationis, indirectè tamen illi subiici, quatenus potest voluntas materiam illi ministrare, vel negare. Unde etsi qui comedit non possit impedire per se & directè concoctionem, nutritionem, & augmentum, potest tamen ista omnia indirectè impedire, nempe vel subtrahendo alimentum, vel aliquid sumendo quod illius effectum impediat; & ea

ratione potest cadere in illos actus laus & meritum, vt si quis temperatè comedat, aut ieiunet; & vice versa vituperium & demeritum, vt si cibus se ingurgitet.

Nota 2. idem dicendum de facultate vitali residente in corde, quæ continuum illius, & arteriarum pulsum causat; talis enim motus non subiaceret per se & directè imperio voluntatis, cum sit merè naturalis, & sine vlla præuia cognitione aut deliberatione fiat, esto non nisi animalibus competat. Respiratio tamen quæ ad facultatem vitalem refertur, aliquanto tempore contineri potest, sicque voluntati subiicitur.

Nota 3. idem habere locum in sensibus externis, vt in visu, & auditu; quia etsi non possit voluntas directè impedire, quin oculus apertus videat obiectum aliquod in debita distantia constitutum, potest tamen id impedire indirectè, nempe illum claudendo, vel in aliam partem vertendo: siquidem facultas loco motiua obedit voluntati ad nutum, eique despoticè subiicitur.

Art. 9. quærit, vtrum actus exteriorum membrorum imperentur, & respondet per distinctionem, nam membra corporis sunt organa quædam potentiarum animæ, vnde vt potentiæ animæ se habent ad hoc quod obediant rationi, ita & corporis membra. Quia igitur vires sensitiuæ subduntur imperio rationis, non autem vires naturales, ideo omnes motus membrorum quæ mouentur à potentiis sensitiuis, subduntur imperio rationis, non autem ij qui consequuntur vires naturales.

Verum quia hæc ratio non satis videtur coherere cum ante dictis, de imperio voluntatis in potentias sensitiuas, clariùs dici potest, ideo

corporis membra subdi imperio rationis, quia eorum actus pendent immediate à potentia loco motiua, quæ voluntati despoticè obedit, nisi adsit aliquod impedimentum; vt cum quis laborat podagra, vel alio morbo localem motum impediēte.



CAPVT V.

DE BONITATE, ET MALITIA
actuum humanorum.

ARTICVLVS PRIMVS.

An bonitas, & malitia humanorum actuum sumantur ex obiecto.

Præmoneo 1. in actu humano duo esse distinguenda, nempe quod sit actus naturalis, & Moralis; hic autem non agi de bonitate & malitia talis actus in esse naturæ spectati, sed vt constituitur in esse Morali, esque dignus laude, aut vituperio.

Præmoneo 2. dubium non esse apud Catholicos, quin actuum Moralium alij sint boni, alij mali; boni sunt actus fidei, spei, charitatis, religionis, iustitiæ, alique omnes qui sunt ex præscripto rectæ rationis: mali verò sunt odium Dei, blasphemia, infidelitas, iniustitia, alique opera rectæ rationi repugnantia.

Dixi, apud Catholicos, nam hæretici huius temporis contendunt omnes hominis, quantumvis iusti, actiones esse malas, quod aperte

repugnat Scripturæ sacræ, quæ innumeris locis præcipit, & laudat aliquas actiones tanquam bonas, & Deo gratas; sicut & alias prohibet, vel vituperat tanquam malas & Deo exosas, ut videri potest apud auctores qui de fidei controversiis tractant.

His præmissis, dubitatur an bonitas, & malitia humanorum actuum præcipuè sumendæ sint ab obiecto. Respondeo ex S. Thoma 1. 2. quæst. 18. art. 2. affirmatiuè: Cuius ratio est, quia bonitas & malitia actionis debent sumi per ordinem ad id quod dat illi speciem, sicut autem res naturalis habet speciem ex sua forma, ita actio habet speciem ex obiecto, sicut motus ex termino: & ideo sicut prima bonitas rei naturalis attenditur ex sua forma, quæ dat illi speciem, ita & prima bonitas actus Moralis attenditur ex obiecto conuenienti: & sicut in rebus naturalibus primum malum est, si res generata non consequitur formam specificam, puta si non generetur homo, sed aliquid aliud loco hominis; ita primum malum in actionibus est ex obiecto disconuenienti, ut est accipere aliena, occidere, &c.

Vbi nota 1. quod ait S. Thomas, primam bonitatem, vel malitiam sumi ab obiecto, id intelligendum esse in genere moris, quatenus etsi actus sint boni, aut mali moraliter, aliunde quam ex obiecto, ut postea dicemus; bonitas tamen & malitia Moralis primò & præsertim sumantur ab obiecto: si enim agatur de bonitate aut malitia naturali, certum est eam esse priorem bonitate aut malitia naturali, vndeunque sumpta; cum genus moris necessariò præsupponat naturam.

Nota 2. dubium esse, quomodo actus possit sumere bonitatem vel malitiam ab obiecto; quia

cùm actus interni obiectum sit actus externus, sequeretur actum externum tribuere bonitatem vel malitiam interno, quod tamen repugnat, cùm potius ex communi sententia, actus internus bonitatem vel malitiam externo communicet. Ista tamen faciliè conciliari possunt, si dicamus ad bonitatem, vel malitiam actus duo requiri, primò libertatem, secundò conformitatem, vel difformitatem cum recta ratione; porro actum internum habere ab externo bonitatem vel malitiam quoad conformitatem vel difformitatem; externum verò ab interno quoad libertatem, qua in re nulla est repugnantia.

Nota 3. actum voluntatis sumere bonitatem & malitiam specificam ab obiecto, siquidem obiectum se habet instar formæ, adeoque tribuit speciem, ut dictum est. Neque refert. 1. quod dici solet bonitatem & malitiam sumi ex obiecto in genere, ibi enim genus sumitur pro specie, ut cùm dicimus genus hominum, genus equorum, &c. Nec refert 2. quod supra bonitatem vel malitiam quæ oritur ex obiecto, alia superadditur ex circumstantiis; hæc enim non aduenit tanquam differentia specifica contrahens genus, sed ut accidentalis, speciem constitutam secundum quid perficiens.

Nota 4. etsi interdum volitionis obiectum sit generale, ut dum quis generatim statuit virtutem amplecti propter illius honestatem, id non impedire quin volitio illa, ut habet suam entitatem realiter existentem, sit in quadam specie infima, cùm nullus gradus genericus sine specifico existat: ad eum modum quo intellectus & voluntas sunt potentiæ specificæ, etsi ferantur in obiecta generalissimè spectata. Vnde actus ille non exigit virtutem aliquam generalem à qua producat, cùm nulla talis sit; sed

cùm sit in ordine naturali, potest ex se elici à voluntate, præsertim cùm non videatur distinguì à simplici complacentia, quamdiu non amplectitur efficaciter aliquod obiectum in specie. Et hoc potest confirmari ex 1. 2. quæst. 56. art. 6. vbi S. thomas docet, cùm per habitum perficiatur potentia ad agendum, tunc potentiam habitu indigere ad bene agendum, quando ad id non sufficit propria ratio potentiæ: propriam autem rationem potentiæ attendi in ordine ad obiectum, cumque obiectum voluntatis sit bonum rationis illi proportionatum, quantum ad hoc voluntatem non indigere virtute perficiente.

Quòd si instes, generale propositum viuendi Christianè non posse elici à sola voluntate per vires naturales, adeoque virtutem aliquam generalem exigere; idemque proportionem seruata dicendum de volitione generali sectandi virtutem Moralem, ob illius honestatem. Respondeo propositum illud posse elici à voluntate per aliquod speciale auxilium gratiæ, adeoque nullam virtutem habituales ad illud esse necessariam; & similiter volitionem naturalem virtutem sectandi, posse elici à voluntate cum solo Dei influxu generali.

Nonnulli addunt, si quædam virtus ad eliciendum prædictum propositum requiritur, ad illud sufficere virtutem aliquâ particularem infusam. Vnde similiter dicunt virtutes particulares Morales posse sufficere, vt eliciatur volitio generalis amplectendi bonum honestum. Neque id mirum videri debet, quia cùm in gradu specifico genericus includatur, non repugnat inquirunt, quod virtus inclinans ad actum, quia est in tali specie honestatis, inclinet ad illum generatim quia honestas est: sicut nil vetat

quòd qui hominem concipit ut animal rationale, concipiat illum præcisè sub rationale animalis.

ARTICVLVS II.

*An bonitas & malitia actus sumantur ex
circumstantiis.*

Præmoneo 1. circumstantias sumi hoc loco pro quibusdam accidentibus, actui Morali in suo esse specifico, per ordinem ad obiectum constituto, aduenientibus, cumque veluti, circumstantibus: ita tamen ut eum quodammodo attingant, & afficiant.

Præmoneo 2. cuiusmodi circumstantias varias esse, & multiplices, hocque versu vulgari comprehendì.

Quis, quid, ubi, quibus auxiliis, cur, quomodo, quando. Per particulam *quis* intelligitur conditio personæ operantis, per *quid* magnum, & paruum in obiecto; per *ubi* conditio loci, per *quibus auxiliis*, media & instrumenta quæ ad aliquid assequendum adhibentur, per *cur* finis actionis, per *quomodo* modus actionis, per *quando* conditio temporis. Quæ omnia latius explicata videri possunt 2. parte Summularum casuum conscientiarum opusculo 1. cap. 2. art. 7. His præmissis, ad propositam difficultatem

Respondéo bonitatem & malitiam actus sumi ex circumstantiis, quia ut ait S. Thomas quæstionis citatæ art. 3. sicut se habet forma substantialis ad res naturales. ita obiectum se habet ad actum moraliter consideratum: at forma substantialis non tribuit totam perfectionem rei quam constituit, sed hæc perficitur & com-

pletur ex accidentibus superuenientibus, adeo ut si aliquod desit ad decentem habitudinem, consequatur malum: ergo similiter obiectum non tribuit totam perfectionem actui Morali, sed tantum substantialem & specificam, quæ per circumstantias compleri debet, ita ut actio sit bona, quæ habet omnes circumstantias debitas, mala, cui aliqua ex illis deest.

Confirmatur, nam quod circumstantiæ aliquid conferant ad bonitatem & malitiam actus, inde manifestum est, quia eo melior est cæteris paribus eleemosyna, quò plus datur, & vice versa eo per se loquendo furtum est peius, quò maior est summa pecuniæ quæ surripitur. Similiter qui ieiunat ex amore Dei, magis meretur quam qui id facit ut Ecclesiæ obediat, vel ex motiuo temperantiæ: contra verò ille peius peccat, qui ieiunium violat ex odio Dei, quam si id præstaret ex contemptu Ecclesiæ, vel ex intemperantia. Ut autem hæc doctrina clarior euadat,

Nota 1. bonitatem & malitiam actus sumi à circumstantiis dupliciter. 1. ita ut circumstantia addat actui speciem bonitatis & malitiæ, distinctam ab ea quæ sumitur ex obiecto; ut dum quis ieiunat ex Dei amore, actus enim ille est in specie temperantiæ, & charitatis; aut dum aliquis furatur in loco sacro, actui enim qui ex se est in specie furti, additur malitia & species sacrilegij, ob violationem loci sacri. 2. ita ut non addat nouam speciem bonitatis aut malitiæ, sed præcedentem accidentaliter tantum augeat, ut dum quis pauperi multum erogat, vel ex valde intenso odio occidit aliquem.

Nota 2. interdum circumstantiam efficere ut actus, qui ex sua ratione est indifferens, sit bonus, aut malus, tuncque circumstantiam tribuc-

re primam speciem Moralem actui : vt patet, nam dare, & accipere, sunt actus de se indifferentes, quod si quis det de suo egenti, illa circumstantia facit actum bonum; si verò accipiat de alieno, hæc circumstantia facit actum malum. Verum in his casibus circumstantia habet rationem obiecti, adeoque prædicti actus non dicuntur boni aut mali ex circumstantiis, sed ex obiecto. Imò quando actus in specie boni, aut mali constitutus, recipit nouam speciem à circumstantia aliqua, hæc dicitur etiam tunc transire in rationem obiecti, nec consideratur vt mera circumstantia respectu actus, quatenus ab illa specificatur, esto sit circumstantia illius, vt in prima specie constitutus est: quemadmodum circumstantia quam interdum diximus tribuere actui primam speciem boni aut mali, dicitur circumstantia respectu actus secundum se, quoad esse naturale spectati.

Nota 3. vt intelligas an circumstantia addat actui nouam speciem boni vel mali, an non, hanc regulam obseruandam esse ex S. Thoma I. 2. quæst. 18. art. 10. & 11. Circumstantia quæ ex se facit vt actus aliquis habeat specialem conformitatem, vel repugnantiam cum dictamine rectæ rationis, constituit illum in specie boni aut mali; quæ verò id non facit ex se, sed tantum quatenus coniuncta est cum alia circumstantia, quæ speciem boni vel mali actui tribuit, ea non tribuit vllam speciem actui, sed tantum bonitatem vel malitiam illius accidentariò auger intra eandem speciem. Exempli causa, circumstantia loci sacri addit nouam speciem furto, quia locum sacrum violare ex se malum est, & rectæ rationi repugnans: at accipere multum, non addit nouam speciem furto, quia non est ex se malum, sed tantum quatenus est de bonis

alienis. Quare prioris generis accidentia sunt formæ Morales speciem actibus tribuentes, posterioris verò sunt tantum quidam modi formarum: sicut albedo & calor sunt formæ accidentales Physicæ, at extensio & intensio sunt tantum formarum modi.

Nota 4. nonnullos existimare, tunc etiam circumstantiam addere nouam speciem, quando facit ut actus ex veniali fiat mortale: at hæc regula admitti non debet, cum ex communi sententia, sit eadem species furti, siue parum, siue multum accipias; adeoque siue furtum sit peccatum veniale, siue mortale.

Nota 5. interdum contingere ut peccatum sit valde graue ratione obiecti, & valde leue ratione circumstantiarum, ut patet in homicidio quod, in vindictam grauis alicuius damni illati, iniuste patitur. Vnde etsi furtum sit peccatum quoad speciem longè leuius homicidio, tanto-
pore tamen augeri potest ratione circumstantiarum, ut euadat grauius homicidio, maioremque pœnam mereatur. Hinc etiam fit ut etsi peccata carnalia sint ex se leuiora spiritualibus, quia vehementius habent impulsuum, nempe concupiscentiam nobis innatam, interdum tamen ob circumstantias sint grauiora, ut ebrietas leui complacentia sui ipsius.

ARTICVLVS III.

An bonitas & malitia sumantur ex fine.

QUæritur I. An actus humanus sit bonus, vel malus ex fine. S. Thomas I. 2. quæst. 18. art. 4. respondet affirmatiuè, & probat, quia eadem est dispositio rerum in bonitate, &

te, & in esse, ita ut quæ non habent esse dependens ab alio, non habeant bonitatem ab alio, quæ verò ab alio dependent quoad esse, ab eo bonitatem accipiant: sicut autem res dependet ab agente, & à forma, ita actus Moralis dependet à fine; quare ab illo bonitatem accipit. Ut autem discursus iste sit adæquatus, probetque non modo bonitatem sed etiam malitiam actus à fine desumi, dicendum est actum humanum pendere à fine siue bono, siue malo, sicque ab eo bonitatem, vel malitiam accipere.

Addit S. Thomas, in actibus humanis quadruplicem bonitatem considerari posse, prima est secundum genus, quæ competit actioni ut actio est, quia quantum habet de entitate, tantum habet de bonitate. Alia est secundum speciem, quæ sumitur per ordinem ad obiectum conueniens. Tertia secundum circumstantias, quasi secundum accidentia quædam: quarta secundum finem, quasi secundum habitudinem ad bonitatis causam.

Ex quo intelligis. 1. discrimen esse inter istas bonitates, quod prima est generica, & naturalis, nec tantum actui bono, sed etiam malo competit: cum ambo conueniant in ratione actus vitalis, à voluntate realiter & Physicè procedentis, tres verò reliquæ sunt morales.

Intelligis 2. non frustra hanc quæstionem à S. Thoma tractari, quia etsi in præcedentibus articulis ostenderit, bonitatem & malitiam sumi ab obiecto, & à circumstantiis, & consequenter à fine, tum quatenus interdum coincidit cum obiecto, tum quatenus inter circumstantias numerari solet: quia tamen finis est præcipua actus Moralis circumstantia, habetque præterea rationem causæ respectu illius, ideo speciatim inquirendum fuit, quam ratione finis bo-

nitatem, & malitiam actui tribuat.

Quæritur 2. an actus varias species accipiat ratione obiecti, & finis, qua in re multiplici distinctione opus est. Nam in primis contingere potest obiectum esse bonum, & finem quoque extrinsecum operantis esse bonum, ut dum quis vult dare pauperi eleemosynam, ex amore Dei. Et tunc dicendum est actum esse in duplici bonitatis specie, ut in exemplo allato, in specie misericordiæ erga pauperem, & charitatis in Deum. Ita Theologi communiter, sumiturque ex Sancto Thoma 2. 2. quæst. 124. art. 2. ad 2. ubi ait, ad actum Martyrij inclinare charitatem, sicut primum & principale motuum per modum virtutis imperantis; fortitudinem autem sicut proprium motuum, per modum virtutis elicientis, indeque Martyrium esse actum charitatis, ut imperantis; fortitudinis verò, ut elicientis. Et ratio est, quia non repugnat quod velim obiectum bonum, & propter honestatem intrinsecam quam habet, & quia est utile ad ulteriorem finem assequendum: sicut possum velle cibum aliquem sumere, & quia gratus est palato, & quia conducit ad sanitatem. Quare nihil impedit quin tunc volitio interna sit in vna specie honestatis, ratione obiecti, & in alia ratione finis extrinseci. Si tamen voluntas non amplecteretur medium illud propter propriam honestatem, sed tantum præcisè, quia est utile ad finem ulteriorem, hoc modo specificatio interni actus non nisi a fine illo externo sumeretur.

Contingit 2. obiectum esse malum, & finem operantis malum, ut dum quis furatur ex intentione patrandi adulterium; & tunc omnium consensu actus habet duplicem speciem malitiæ, puta furti, & adulterij: cum eo tamen dis-

crimine , quod ex sententia Arist. 5. Ethic. cap. 2. qui furatur propter adulterium , magis est adulter , quàm fur : quia scilicet appetit adulterium propter se , & furtum propter adulterium ; quò fit ut ille affectus sit magis in specie adulterij , quàm furti.

Contingit 3. obiectum esse ex se bonum , & finem operantis malum , ut cùm quis vult dare eleemosynam fœminæ indigenti , ex intentione ea abutendi ; & in eo casu dicendum est actum non habere duas species , vnâ bonitatis ex obiecto , & aliam malitiæ ex fine , sed simpliciter in vna mali specie ob finem malum constitui. Quia etsi obiectum in se bonum sit , non tamen hic consideratur ut in se bonum , sed assumitur tantùm quatenus est vtile ad finem malum , quomodo malum est.

Contingit 4. obiectum esse ex se malum , & finem operantis bonum , ut dum quis furatur ex intentione dandi eleemosynam , & tunc actus non habet duplicem speciem , aliam malitiæ ex obiecto , aliam bonitatis ex fine , sed constituitur tantùm in specie malitiæ ob malitiam obiecti. Quia etsi bonum sit secundum se dare eleemosynam , eam tamen dare ex bonis alienis , est simpliciter malum ; adeoque actus ille nonnisi in specie mali constitui debet.

Vnde collige quid respondendum sit ad illam quæstionem quæ à nonnullis proponitur , an bona intentio vitietur per malam electionem , dicendum enim est vitari , ita ut non solum electio sit mala , sed etiam intentio ipsa , alioqui per se bona , ex electione illa malitiam contrahit : quia non solum malum est eligere medium malum , sed etiam intendere bonum per medium malum assequendum ; tunc enim electio mediij mali est circumstantia intentionis voce illa , qui-

bus auxiliis, indicata, quam proinde inficit.

Contingit 5. obiectum esse ex se indifferens, & posse appeti ob bonum, vel ob malum finem; & quidem si appetatur ob bonum finem, ille affectus est bonus, ut si quis velit in horto deambulare, eo fine ut ex arborum, aut florum conspectu in diuinorum contemplationem assurgat: si verò appetatur ex fine prauo, eiusmodi appetitio est in specie malitiæ, ut si quis cultellum acuat animo aliquem vulnerandi.

Quæritur 3. an species boni magis sumatur ab obiecto, quam à fine, aut vice versa. Respondeo cum distinctione, nam si obiectum nullam ex se bonitatem habet, aut si habet, nullo modo intenditur, ut contingit quando operans illud tantum assumit sub ratione mediij utilis ad finem, sic perspicuum est speciem bonitatis sumendam esse totaliter à fine.

Si verò voluntas fertur in obiectum, ob propriam honestatem quam habet, esto illud in aliquem finem bonum externum referat, sic dicendum videtur speciem bonitatis ab obiecto sumptam, in actu volitionis internæ esse intrinsecam, & essentialem; aliam verò quæ sumitur à fine extrinseco, esse extrinsecam, & accidentalem. Ratio est, quia v. c. actus dandi eleemosynam ex natura sua tendit ad subleuandam miseriam pauperis; quod autem referatur ad amorem Dei, hoc est omnino illi per accidens, & fine eiusmodi relatione subsistere potest: ergo species quæ sumitur ex obiecto, est intrinseca & essentialis actui; quæ verò sumitur ex fine extrinseco, est accidentalis. Dico ex fine extrinseco, de quo hic tantum agimus, nam intrinsecus cum ipso obiecto coincidit.

Quo loco aduerte, non tantum affirmare speciem ab obiecto sumptam esse intrinsecam &

essentialē, non autem esse absolutē perfectiorem: quia cū actus misericordiæ tendit ex imperio charitatis, ad amorem Dei, clarum est actum illum esse longē nobiliorem ex relatione ad eiusmodi finem, quā ex proprio obiecto.

Quæritur 4. quomodo inter se comparentur quoad bonitatem, duo actus habentes eundem finem bonum, quorum tamen obiecta sunt inæqualiter bona. Exempli causa, Petrus tribuit centum nummos pauperi ex charitate, Paulus ducentos ex simili motivo, dubium est an illi actus sint æquales quoad bonitatem, & meritum, propter finis æqualitatem.

Respondeo negatiuē, nam tribuere ducentos ex misericordia, duplo melius est per se loquendo, quam tribuere centum ex eadem virtute; ergo si utrobique adiungatur bonitas æqualis ex fine superaddito, prior actus duplo melior manebit quā posterior. Confirmatur, quia aliās quidquid ex eadem intentione eligeretur, esset æquē bonum, quod sine errore affirmari nequit. v. c. non melius esset vouere castitatem, quā matrimonio iungi; nec melius Deum diligere, quā hominem amare, si ista ex intentione salutis assequendæ orirentur.

Nec dicas, in electione mediæ ad finem, non sumi bonitatem à medio, sed tantū à fine: licet enim id verum sit, quando eligitur medium purē vt medium, non tamen quando medium habet in se sufficientem bonitatem, ob quam diligī potest, etiam sine relatione ad ulteriorem finem: tale enim medium idem est ac obiectum actus interni, illiusque finis intrinsecus, adeoque ab illo speciem & bonitatem sumit, esto non sit finis vltimus, sed aliō referatur.

Quæritur 5. an vt actus sit bonus, debeat expressē referri ab operante in finem bonum. Re-

spondeo negatiuè, quia dummodo actus tendat ex se in obiectum bonum & honestum, sic habet finem bonum intrinsecum, quod plane sufficit ad illius honestatem, esto non referatur ab operante ad aliquem finem bonum extrinsecum v. c. eleemosynæ obiectum, & finis intrinsecus est subleuare pauperis inopiam, hic autem finis est bonus & honestus, adcoque sufficiens ad honestandum actum qui in illum fertur, neque vltius requiritur vt talis actus referatur ad alium quendam finem ipsi extrinsecum & accidentarium, sine quo in ratione actus honesti & laudabilis subsistere potest. Confirmatur, quia alias damnandæ essent tanquam malæ, & demeritoria innumeræ omnium fere hominum, etiam iustorum actiones, cum rarò, qui bona edunt, actu expresso & formali ea referant in finem aliquem bonum externum.

Nec refert quòd aliqui obiiciunt, nos teneri ex præcepto Pauli, omnia opera in gloriam Dei referre: negamus enim in primis iis verbis includi præceptum, sed tantum consilium, vt Theologi communiter explicant. Deinde dicimus, quamuis ibi extaret præceptum, illud debere intelligi non de relatione operantis, sed de relatione operis, id est omnes teneri operibus quæ in gloriam Dei cedant, vacare, qualia sunt ea quæ obiectum & finem honestum habent; eò quòd honestas creata est quædam participatio honestatis increatæ, & ad illam ex propria natura vt ad finem vltimum refertur: ad eum modum quo virtutes actiue agentium creatorum sunt quidam veluti radij & effluxus omnipotentia diuinæ, à qua continuo pendent, & conseruantur.

Hinc collige, eos errare qui docent, opera omnia quæ non fiunt ex motiuo perfectæ cha-

ritatis in Deum, esse peccata: inde enim sequeretur omnia opera quæ ante iustificationem fiunt, esse peccata, quod damnatum est in Concilio Trid. sess. 6. cap. 7. sequela patet, quia homo ante iustificationem caret perfecta illa charitate, sicut & gratia sanctificante, ut notum est. Nec audiendi sunt qui errorem illum tribuunt Augustino, cum ille tum alias, tum lib. de bono coniugali cap. 6. expressè doceat, usum Matrimonij, qui pro fine habet generationem prolis, vacare culpa, & peccati tantum venialis damnet eum qui in solam delectationem tendit: tantum abest ut credat nullum opus esse bonum, nisi ex mera in Deum charitate fiat.

ARTICVLVS III.

An bonitas, & malitia sumantur per ordinem ad rationem, seu conscientiam.

PRæmoneo i. bonitatem & malitiam actus pendere aliquo modo à ratione, cum voluntas in nullum obiectum siue bonum siue malum ferri possit, quin illi à ratione proponatur. Est tamen discrimen, quod ratio debet expressius ostendere bonitatem obiecti, quam illius malitiam, eo quod ut voluntas sit bona, non sufficit quod amplectatur obiectum realiter bonum, sed requiritur ut illud amet formaliter sub ratione boni honesti, ut patet quia officio diuino assistere ob delectationem, aut commodum aliquod temporale, non censetur opus moraliter honestum, & meritorium, sed tantum ei assistere propter illius honestatem, seu quia honestum est, & rectæ rationi consentaneum diuinis interesse. Ut autem actus sit mo-

raliter malus, non opus est vt voluntas feratur in obiectum malum, quatenus malum, hoc enim fieri nequit, vt supra ostendimus; sed sufficit quod feratur in id quod reuera malum est, quodque intellectus facile aduertere potest esse malum, etsi fortè de illius malitia actu non cogitet; tunc enim censetur malitia indirectè seu interpretatiuè volita.

Præmoneo 2. cùm idem sit agere contra rationem, & contra conscientiam, nomine conscientiae hic intelligi actum illum intellectus, quo iudicamus, aliquid esse faciendum, aut non faciendum. Vnde cùm synderesis sit habitus quo cognoscimus prima principia morum, vt virtutem esse amplectendam, & vitium fugiendum, conscientia sumitur pro iudicio actuali de conclusione deducta ex eiusmodi principiis, seu quo intimatur quid hic & nunc agendum nobis aut non agendum sit, vt sacrum hodie esse audiendum, tali pauperi eleemosynam largiendam esse, &c.

Præmoneo 3. conscientiam communiter diuidi in rectam, erroneam, dubiam, probabilem & scrupulosam. Recta dicitur, quæ est conformis obiecto, seu quæ iudicat esse bonum quod bonum est; & malum quod est malum; erronea, quæ non est conformis obiecto, seu quæ iudicat esse bonum quod malum est, & vice versa. Dubia, quæ manet veluti suspensa inter assensum & dissensum, ita vt ad neutram partem se determinet; probabilis, quæ fundamento probabili innititur cum aliqua formidine oppositi. Scrupulosa, quæ vni quidem parti inhæret, sed cum anxietate leui fundamento innixa.

Præmoneo 4. dubium non esse, quin ille actus sit bonus qui est conformis rectæ rationi, & ille malus qui non est ei conformis, adeoque

difficultatem hic tantum mouendam superesse, de modo quo bonitas vel malitia actus pendet à conscientia errante, probabili, dubia, & scrupulosa. Itaque

Quæritur I. qualis sit voluntas, quando conscientia errat, seu quando intellectus iudicat aliquid esse bonum, aut malum, præceptum, aut prohibitum quod tale non est

Respondeo & dico I. *Voluntatem discordantem à conscientia errante, esse malam.* Ita S. Tho. I. 2. q. 19. art. 5. & alij communiter. Ratio est, quia cum voluntas sit ex se potentia cæca, ea non fertur in obiectum aliquod vt est in se, sed quatenus per rationem est apprehensum, sicque tantum ab illo specificatur: quare si fertur in obiectum quod ratio iudicat esse malum, ex illo contrahit malitiam; si autem negligit exequi id quod ratio iudicat esse bonum & præceptum, eiusmodi negligentia illi imputatur ad culpam violationis præcepti.

Confirmatur, tum quia cum ratio sit proxima regula agendi, qui ab illius dictamine discrepat, à propria regula dissentit, quod intrinsecè malum est. Tum quia ille haud dubie habet affectum ad malum, qui facit quod iudicat esse malum, aut non facit quod iudicat esse bonum & præceptum.

Dico 2. *Voluntatem quæ concordat cum conscientia seu ratione errante, non esse malam, quando error ille est inculpabilis, esse autem malam quando error est culpabilis.* Itaque S. Thomas loco citato art. 6. Ratio est, quia cum ignorantia inculpabilis à peccato excuset, non autem culpabilis, vt patet ex supradictis, hinc sequitur voluntatem quæ concordat cum conscientia inculpabiliter errante, non esse malam, sed illam tantum quæ concordat cum conscientia, cuius error est culpabilis.

Hinc ille non peccat, qui accedit ad fœminam quam inculpabiliter putat esse suam vxorem, qua ratione excusatur Iacob quod accesserit ad Liam, quam putabat esse Rachelem. Ille verò peccat qui accedit ad vxorem alienam, falsò putans id esse licitum. Et ratio discriminis est, quia in priori casu error oritur ex ignorantia facti, quæ nec directè, nec indirectè est volita, vnde etiam nullo modo est volitum quod ex eo sequitur: cuius oppositum contingit in posteriori, eò quòd error oritur ex ignorantia diuinæ legis, quàm quisque scire tenetur. Venim ad maiorem horum intelligentiam,

Nota 1. quando ignorantia est inuincibilis, qualis est cùm intellectus positis his circumstantiis, non potest prudenter aliud iudicare, eam obligare ad faciendum quod dicat. Vnde qui ex tali errore credit, pecuniam quam apud se habet, ad Titium spectare, tenetur eam illi restituere; & qui inuincibiliter existimat Bertam esse suam vxorem, tenetur ei petenti debitum reddere.

Nota 2. quando ignorantia est vincibilis, eam quidem quamdiu durat, obligare ne quis contra illam agat, non tamen vt iuxta illam operetur. Vnde quamdiu Titius putat ex eo errore, Bertam esse suam vxorem, non potest contra tale dictamen operari, adeoque debitum sine causa negans peccat. Non etiam potest iuxta illud operari, quia cùm ignorantia eum non excuset, peccaret sic agendo. Nec tamen propterea Titius in eo casu absolutè perplexus erit, ita scilicet vt necesse sit illum peccare, quocunque se vertat: potest enim adhibita diligentia errorem deponere, eoque deposito, debitum inculpate negare.

Quæritur 2. an sit peccatum agere contra

conscientiam dubiam. Respondeo cum distinctione, nam duplex est dubium, aliud speculativum, aliud practicum; speculativum est cum quis dubitat an aliquid in genere sit licitum, vel illicitum, ut an liceat bellum gerere, vel non: Practicum verò est cum dubitatur an quando hic & nunc aliquid faciendum est, liceat illud facere, vel non, ut an hoc tempore, & sub his circumstantiis liceat arma capere; Iam

Respondeo & dico 1. *Non esse peccatum agere contra conscientiam speculative dubiam, modo dubium in praxi rationabiliter deponatur, & quis indicet sibi licitum esse hic & nunc agere.* Probatur, quia v. c. quamvis miles ignoret an bellum generativum spectatum sit in se res licita vel illicita, potest tamen iudicare sibi licitum esse sub his circumstantiis ad bellum proficisci, ut quia videt bellum indicia a principe pio & Catholico, illudque ut iustum a plerisque viris doctis probari. Quare cum hoc iudicium practicum sit regula proxima, quam voluntas in suis operationibus sequi debet, hinc fit ut quod ex illius dictamine agitur, sit iustum & licitum.

Nota me dixisse, modo dubium in praxi rationabiliter deponatur, ut contingit in exemplo militis adducto: si enim posito dubio speculativo de iustitia, vel iniustitia belli, nulla occurrit ratio ob quam probabiliter miles iudicet sibi licere hic & nunc ad bellum proficisci, tunc illi minimè bellandum est; quia non potest prudenter dubium illud in praxi deponere.

Dico 2. *Esse peccatum agere contra conscientiam practice dubiam.* Ratio est quia qui facit aliquid dubitans hic & nunc an sit licitum vel illicitum, exponit se peccandi periculo, adeoque peccat. Confirmatur, nam qui cum tali dubio operatur, ipse facto ostendit se interius ita affe-

ctum esse, vt velit agere siue id licitum, siue illicitum sit : hunc autem affectum prauum esse dubitari non potest.

Ex his varij casus resolui possunt. In primis qui bona fide possidens aliquid, dubitare incipit an id legitimo titulo possideat, potest dubium deponere, si adhibita sufficienti diligentia vinci nequit; quia in dubio melior est conditio possidentis.

Deinde, si dubitas an votum emiseris, non teneris illud implere, quia melior est conditio voluntatis tuæ suam libertatem possidentis. Secus si constat quidem de voto, sed dubitas de intentione vouendi, quia cum hæc sit necessaria ad valorem voti, præsumitur adfuisse nisi contrarium probetur. Et similiter si dubitas an votum emissum solueris, teneris illud soluere, nisi dubium ex causa deponas; quia debito certò solutione incerta satisfieri nequit.

Præterea, si dubitas an præceptum tibi à superiore impositum licitum sit, teneris obedire; quia cum ius præcipiendi possideat, possessio stat pro illo, nisi clarè constet illius præceptum esse illicitum.

Denique, vt alia non pauca quæ ex dictis determinari possunt, missa faciam, si dubitas an extet præceptum aliquod, non teneris illud obseruare, si post adhibitam moralem diligentiam dubium superari nequit: quia iudicandum est in fauorem voluntatis tuæ, quæ adhuc libertatem suam possidet quoad præceptum illud.

Quæritur 3. vtrum liceat sequi in praxi opinionem probabilem, neglecta ea quæ probabilius iudicatur. Respondeo affirmatiuè, ex communi sententia quæ ea ratione probatur, quia agere ex opinione probabili, est agere ex iudicio rationabili, dictante licitum esse hic & nunc

agere : at eo modo operari est honestum & licitum.

Confirmatur, nam quod alia opinio mihi videatur probabilior, id ostendit quidem me illam negligendo, non sequi regulam perfectiorem ; at non ostendit me sequi regulam falsam & illicitam, quia alias æquè dicendum esset eum, què neglecto religioso statu, quem nouit esse perfectiorem coniugali, & longe tutiorem ad salutem assequendam, uxorem ducit, operari ex iudicio prauo, & peccare ; quod sine errore affirmari nequit. Quòd si non semper necesse est sequi in praxi, id quòd melius est, & perfectius, cur necesse erit amplecti id quòd apparet verius & probabilius ?

Nota hæc procedere de opinione quæ verè probabilis iudicatur, qualis ea est quæ alicui non leui fundamento innititur, vnde non licet operari iuxta opinionem quæ omnino improbabilis iudicatur, quia tunc nulla suppetit ratio quæ dicet operationem licitè exerceri posse. At neque iuxta illam de cuius probabilitate dubitatur quia qui dubitat an opinio aliqua sit probabilis, eò ipsò dubitat an liceat ex ea operari : quare si agat se exponit peccandi periculo, adeoque peccat.

Ex dictis collige 1. te posse in praxi sequi sententiam probabilem, relictà ea quam iudicas probabiliozem. Quia licet opinio quam sequeris, speculatiuè non tibi videatur vera, potes tamen elicere iudicium practicum, quo prudenter iudices licitum esse eam sequi, ob rationes quibus innititur, vel ob auctoritatem grauium doctorum qui eam amplectuntur.

Collige 2. te posse aliis consilium dare, iuxta sententiam probabilem, dimissa ea quam iudicas probabiliozem. Quia cum cuique liceat

ad propriam directionem operari ex sententia probabili, nulla est ratio cur etiam non liceat alteri consilium dare, iuxta opinionem probabilem.

Collige 3. subditum teneri obedire suo superiori præcipienti aliquid quod probabiliter est licitum, etsi oppositum sit probabilius. Quia cum liceat sequi opinionem probabilem, nulla est ratio cur præceptum iuxta eam latum non obliget.

Collige 4. confessarium teneri dare absolutionem pœnitenti, qui abstinere non vult ab aliqua actione, quam ex probabili sententia licitam putat, etsi confessarius ipse putet illicitam. Cum enim pœnitens tuto sequi possit sententiam probabilem, confessarius non potest ei absolutionem negare ex eo præcisè quòd eiusmodi opinioni deinceps adhærere velit.

Quæritur 4. an liceat agere contra conscientiam scrupulosam. Respondeo affirmatiuè, quia conscientia scrupulosa est cum quis iudicat probabiliter aliquid esse licitum, ita tamen ut ex leui iudicio suspicetur id esse illicitum: at iam diximus licitum esse operari ex sententia probabili, ergo licitum est contra conscientiam scrupulosam agere. Imò id plerumque expedit, quia sic facilius scrupuli superantur ut experientia ostendit. Plura ad hunc articulum spectantia videri possunt in Idea Theologiæ Moralæ lib. I. cap. 3.

ARTICVLVS V.

*An voluntas nostra debeat esse conformis legi æternæ,
& voluntati diuinæ.*

QUæritur I. an bonitas voluntatis nostræ pendeat ex lege æternæ. S. Thomas 1. 2. quæst. 19. art. 4. respondet ab illa pendere, idque magis quam à ratione humana, quod probat, quia cum causa secunda non agat nisi virtute primæ, in omnibus causis ordinatis effectus plus pendet à causa prima, quam à causa secunda: at quod ratio humana sit regula voluntatis humanæ, ex qua eius bonitas mensuratur, habet ex lege æternæ quæ est ratio diuinæ. Vnde manifestum est quod bonitas voluntatis humanæ magis dependet à lege æternæ quam à ratione humana; & ubi deficit humana ratio, oportere ad rationem diuinam recurrere.

Notandum autem ex responsionibus ad argumenta I. etsi vnius rei non possint esse plures mensuræ proximæ, posse tamen esse plures mensuras, quarum vna sub alia ordinetur. 2. Mensuram proximam esse homogineam mensurato, non autem remotam. 3. Legem æternam, etsi nobis sit ignota vt est in mente diuinæ, nobis tamen aliquāliter innotescere per rationem naturalem, quæ ab ea deriuatur vt propria eius imago, vel per aliquā reuelationem superadditam.

Ex quo patet bonitatem voluntatis pendere à lege æternæ, vt à regula tantum mediata & remota; vt autem à regula proximā à ratione naturali, quæ est imago quædam legis æternæ, dictatque faciendum, vel cauendum quod re-

gula illa æterna iudicat esse honestum, vel turpe. Vnde ad bonitatem actionis non est necesse quod obiectum ametur, quia est conforme legi æternæ; neque quod lex æterna per se & immediatè illud proponat voluntati, sed tantum quod fiat proximè ex dictamine rationis naturalis: sic enim est honestum, & conforme legi æternæ.

Quæritur 2. vtrum bonitas voluntatis nostræ pendeat ex conformitate ad voluntatem diuinam. S. Thomas quæst. citata art. 9. respondet affirmatiuè, & probat, quia bonitas voluntatis dependet ex intensione finis: at finis vltimus voluntatis humanæ est summum bonum, quod est Deus: quare ad bonitatem humanæ voluntatis requiritur, quod ordinetur ad summum bonum. Rursus summum bonum primò & per se comparatur ad voluntatem diuinam, vt proprium obiectum eius; at quod est primum in aliquo genere, est mensura & ratio reliquorum illius generis: vnumquodque autem rectum & bonum est in quantum attingit ad propriam mensuram, vnde vt voluntas hominis sit bona, requiritur quod conformetur voluntati diuinæ.

Ex quo discursu intelligitur, voluntatem nostram debere conformari diuinæ ex parte finis, ita vt omnis nostra operatio referri debeat in vltimum finem, seu in summum bonum, quod est Deus, non quidem formaliter & expressè, sed virtualiter & implicite, quod contingit quando voluntas agit ex aliquo bono fine proximo: hic enim ex natura sua in vltimum finem refertur, tanquam quædam illius participatio, vt supra dictum est.

Verum quia intelligi potest voluntatem nostram conformari diuinæ quatuor modis I. secundum finem agendi, de quo tantum loquitur

S. Thomas in art. iam citato. 2. Eo modo quo effectus conformatur suæ causæ efficienti, vel dirigente, quatenus est talis, qualem eiusmodi causa postulat. 3. Secundum principium formale, ita ut omnia velimus ex eadem ratione, qua Deus illa vult. 4. Secundum materiam seu obiectum volitum, adeo ut idem velimus quod Deus vult; hinc difficultas oritur an voluntas nostra ut sit bona, non tantum primo illo modo, sed etiam tribus aliis voluntati diuinæ conformari debeat; Pro cuius resolutione,

Respondeo & dico I. *Voluntatem nostram teneri conformari diuinæ, spectata per modum causæ efficientis, seu dirigentis, quando præcipit ut aliquid velimus, non autem quando se habet tantum ut consulens, & inspirans.* Primum patet, quia nisi præceptis diuinis obtemperemus, peccamus; ergo voluntas nostra ut sit bona, debet conformari diuinæ voluntati aliquid præcipienti.

Secundum ostenditur, quia illud est discrimen inter præcepta, & consilia, quod illa sub peccato tenemur exequi, non ista: quare nemo tenetur per se loquendo statum clericalem, aut religiosum amplecti, quia est tantum de consilio. Quod verum est etiam si quis sentiat se variis inspirationibus moueri interius ad talem statum amplectendum, cum absque errore affirmari nequeat, positis illis motionibus, id quod alias est tantum consilium, induere rationem præcepti. Multo minus tenetur quis per se loquendo, statum matrimonialem, etsi bonum, & à Deo approbatum amplecti; cum Deus illum neque præcipiat, neque consulat.

Dico 2. *Voluntatem nostram aliquo sensu debere esse conformem diuinæ, secundum principium formale volendi, non alio.* Declaratur, nam in primis voluntatem nostram conformari diuinæ quoad

principium formale, nihil est aliud quàm ei conformari in voluto formali, seu in ratione volendi, quæ multiplex assignari potest: vult enim Deus aliquid, quia congruum est naturis rerum, quia rationi consentaneum, quia hominibus utile, quia sibi gloriosum, &c. Deinde hæc conformitas dupliciter contingere potest, primò positiuè, ita vt ob eandem rationem aliquid velimus, quia Deus illud vult, secundò negatiuè, ita scilicet vt aliquid nobis non displiceat, sub ea ratione qua Deus illud vult.

Hoc posito assertio nostra duo continet, primò voluntatem nostram non necessariò debere esse positiuè conformem voluntati diuinæ in omni ratione volendi, sed satis esse quod sit illi conformis in aliqua. Licet enim perfectius sit omnia explicite referre in gloriam Dei, id tamen non est necessarium ad vitandum peccatum, sed ad id sufficit ex motiuo aliquo inferiori bono, & honesto operari, vt dictum est.

Secundò voluntatem nostram debere esse negatiuè conformem diuinæ in ratione volendi. Ratio est, quia si non ita esset conformis diuinæ voluntati, improbarer rationem propter quam Deus aliquid vult, quod sine peccato fieri non posse perspicuum est; cùm Deus nihil velle possit, nisi ex motiuo aliquo bono & sancto.

Dico 3. *Nostram voluntatem non necessariò debere esse conformem diuinæ in obiecto voluto, sed posse illi laudabiliter repugnare.* Probat, nam imprimis quando non constat Deum velle aliquid, quod nobis graue incommodum, vel dolorem acerbum illaturum est, vt mortem parentis, possumus, imò interdum tenemur oppositum velle, adeoque quantum in nobis est, impedire ne parens moriatur.

Deinde, etiamsi voluntas Dei nobis nota esset, possumus interdum oppositum velle, ut patet tum exemplo Davidis, qui nolebat filium suum mori, etsi mors illius per Prophetam ei esset prædicta: tum Sanctorum qui, quæ mala hominibus ex Dei voluntate imminebant, lacrymis & precibus conabantur auertere: sicut etiam Christus ipse de euerfione vrbis Hierosolymitanæ tristatus est, etsi non ignoraret eam à Deo esse decretam.

Nec dicas impium esse velle impedire, ne voluntas Dei impleatur: sæpe enim Deus non vult aliquid voluntate absoluta & efficaci, quæ effectu frustrari nequit, sed conditionata & inefficaci, quæ impediri potest. Imò quamvis constet Deum aliquid velle absolutè, ut mortem hominis naturalem, non tamen peccat qui illud malum tanquam sibi noxium auersatur, ut si fœmina de morte mariti vehementer doleat, aut filius de morte parentis: hoc enim non fit animo impediendi voluntatem Dei, sed ex affectu naturali cuius Deus ipse auctor est, quique proinde non potest non esse conformis voluntati Dei, secundo ex quatuor modis allatis.

Nota, etsi licitè possimus excitare in nobis affectum displicentiæ & doloris, quatenus id quod Deus vult nocumentum aliquod nobis affert, laudabiliter tamen posse nos hac in re voluntatem nostram diuinæ conformare: cum Deus id velit ob causas quas, etsi nobis ignotæ sint, dubitare non possumus esse iustissimas; ex quibus proinde idem velle non potest, non esse honestum & sanctum. Quare probandum non est quod aliqui dicunt, interdum peccatum esse mortale, voluntatem suam diuinæ conformare quoad volitum.

Nec refert quod dicunt, te non posse velle

fine peccato mortali, quod parens tuus damnetur, etsi Deus id velit, quia videt eum è vita excessurum in peccato mortali: hoc enim falsum est, quia velle ut quis damnetur ex hypothefi quod moriatur in peccato mortali, id consentaneum est iustitiæ diuinæ, adeoque charitati minimè repugnat, neque vlllo alio modo est inordinatum. Eò vel maximè quòd voluntas beatorum, in qua nulla est inordinatio, quoad hoc, aliaque omnia, planè est conformis voluntati diuinæ.

ARTICVLVS VI.

De comparatione actus externi cum interno, quoad bonitatem & malitiam.

Quæritur 1. vtrum bonum, vel malum prius inueniatur in actu exteriori, quàm in interiori. S. Thomas 1. 2. quæst. 20. art. 1. respondet cum distinctione, nam si in actu exteriori spectetur bonitas, aut malitia quam habet per ordinem ad finem operantis, ut eleemosyna per ordinem ad amorem Dei, vel ad vanam gloriam, sic bonitas & malitia est prius in actu interiori voluntatis, & ex ipso deriuatur in actum exteriorem: eò quòd actus internus voluntatis per se tendit in finem, externus verò per accidens, & mediante actu interno.

Si verò in actu exteriori spectetur bonitas & malitia quam habet ex obiecto, & circumstantiis, ut apprehenditur per rationem, eo modo bonitas & malitia actus exterioris est prior bonitate & malitia interioris; quia sic actus exterior est obiectum interioris, adeoque prius illo

bonus, aut malus. Secus dicendum si spectetur quoad executionem, quia hoc modo actus exterior imperatur ab interiori, estque illo posterior. Quæ ut clariùs percipias,

Nota 1. bonitatem & malitiam esse primò in actibus externis volitis, & inde derivari ad volitionem internam, ut patet in largitione eleemosynæ, & in furto: ideo enim volitio dandi eleemosynam est bona, quia actualis erogatio eleemosynæ est bona; & ideo volitio furandi est mala, quia actuale furtum malum est.

Nota 2. bonitatem & malitiam volitionis internæ refundi in actum externum, ut actu producitur, licet enim in ordine intentionis, volitio accipiat bonitatem & malitiam ab actu externo, in ordine tamen executionis, actus externus accipit bonitatem & malitiam à volitione, non quidem obiectivam, & materialem quam ex se habet antecederet ad volitionem, sed formalem ob quam est laude aut vituperio dignum: sicut enim actus externus non est ex se liber, sed tantum per denominationem extrinsecam ab actu libero voluntatis, à quo imperatur; ita non est ex se in genere moris, adeoque nec moraliter bonus, aut malus, sed tantum ut fit ex imperio actus interni liberi, in quo formalis bonitas & malitia intrinsecè residet, propter ordinem quem habet ad obiectum à quo specificatur.

Quæritur 2. utrum sit eadem bonitas & malitia actus interioris & exterioris. S. Thomas loco citato art. 3. respondet 1. quando actus exterior est bonus, vel malus solum ex ordine ad finem, tunc esse omnino eandem bonitatem, aut malitiam actus voluntatis, qui per se respicit finem, & actus exterioris, qui respicit finem mediante actu voluntatis.

Respondet 2. cū actus exterior habet bonitatem, vel malitiam secundum se, scilicet secundum materiam, vel circumstantias, tunc bonitatem actus exterioris esse vnam, & bonitatem voluntatis quæ est ex fine, esse aliam.

Respondet 3. bonitatem finis ex voluntate redundare in actum exteriorem, & bonitatem materiæ, & circumstantiarum redundare in actum voluntatis, vt ante dictum est.

Nota 1. certum esse ex fide actus externos esse aliquo modo bonos, vel malos, cū ex Scriptura sacra constet bonis præmia, & malis supplicia constituta esse. Vnde arguitur error Petri Abailardi, qui existimabat actus externos nullo modo esse bonos, aut malos, sed internos duntaxat.

Nota 2. certum etiam esse ex fide, bonitatem & malitiam non consistere solum in actibus externis, sed etiam & maximè in internis, vt patet ex scriptura quæ actus internos charitatis, mentisque puritatem laudat, concupiscentiam verò quæ in illicita fertur, damnat. Ex quo arguuntur Pharisei, qui totam bonitatem & malitiam in operibus externis constituebant.

Nota 3. etsi actus internus, & externus realiter & Physicè inter se distinguantur, moraliter tamen idem numero opus bonum, aut malum constituere. Quia cū actus externus non sit liber, nisi per denominationem extrinsecam ab interno, à quo imperatur, non etiam est moraliter bonus, aut malus nisi per denominationem à formali bonitate, vel malitia illius.

Nec refert 1. quod alio præcepto prohibeatur interna concupiscentia, alio actus externus, priori enim præcepto prohibetur actus internus, quia per se est peccatum; posteriori verò opus completum, constans ex actu interno, & exter-

no, vt furtum, homicidium : non enim dici potest hos actus esse malos & prohibitos, si ab actu interno libero non procedant, vt patet in inmentibus, quos nemo peccati damnat, etsi aliquod furtum, vel homicidium perpetrent.

Nec refert 2. quod actus externus ex se bonus, aut malus est obiectiue, hinc enim sequitur tantum eum ex se habere vt secundum refectionem possit, aut non possit appeti : non tamen eum esse formaliter laude aut vituperio dignum, nisi quatenus pendet ab actu interno libero, estque quoddam illius complementum, innum opus morale cum illo constituens, vt dictum est.

Queritur 3. vtrum actus exterior aliquid addat supra bonitatem, aut malitiam, actus interioris. Respondeo negatiue contra Scotum, quia cum actus externus totam bonitatem aut malitiam formalem quam habet, sumat per denominationem ab interno, repugnat quod illi possit adde- re aliquid bonitatis, aut malitiæ. Quod fit vt volitio interna dandi eleemosynam non minus est bona & laudabilis coram Deo, si ex se sit efficax, & tantum ob impotentiam impediatur, nam eadem volitio iuncta cum actuali largitione eleemosynæ; & similiter non minus peccat qui fornicationem deliberatè concupiscit, quam actu ad illam accedat, vt manifestè etiam colligitur ex verbis illis Christi Matth. 5. *Qui viderit mulierem ad concupiscendum eam, iam mactus est eam in corde suo.*

Nota 1. licet actus externus non augeat per bonitatem, vel malitiam actus interni, eam tamen augere per accidens, quatenus est inter- num occasio vt augeatur, idque tripliciter, vt imitur ex S. Thoma supra art. 4. nempe quia iam operi instamus, actus interni occurrente dis-

ficulatatum, aut voluptatis multiplicantur, intenduntur, & diutius protrahuntur.

Nota 2. actum externum licet bonitatem & malitiam non augeat, multa tamen commoda, vel incommoda posse afferre; nam bonus ædificationem parit, malus scandalum: bonus damnum refarcit, malus infert: bonus pacem conciliat, malus rescindit, &c.

Dices 1. realem susceptionem sacramentorum, cum gratiam & remissionem peccatorum conferat, esse meliorem voluntate interna suscipiendi, quatales effectus non confertur. Respondeo esse meliorem ex opere operato, non ex opere operantis, de quo agimus. Qui enim vult efficaciter sumere Eucharistiam, & a sumptione impeditur tantum ob defectum facultatis, non minus apud Deum eo actu interno meretur, quam si ipsa Eucharistiam sumeret; esto non accipiat eum gradum gratiæ, quem reciperet ex vi sacramenti, si illud actu sumeret.

Dices 2. cum actus externus sit complementum interni, negari non potest quin addat illi aliquam bonitatem vel malitiam. Confirmatur, quia actus internus cum externo iunctus maius præmium aut supplicium meretur, quam internus solus. Respondeo actum externum addere interno complementum aliquod accidentarium, non autem essentiale, quatenus internus concipitur in genere moris, seu ut bonus vel malus formaliter. Vnde ad confirmationem dico, præmium vel supplicium accidentale augeri propter actum externum non autem essentiale; quia hoc respondet actui præcisè ut liber est, quod habet à solo interno.

Dices 3. si hæc vera essent, sequeretur eum qui optaret tot bona opera elicere, quot à Sanctis omnibus patrata sunt, tantumdem unico illo

illo actu interno mereri, quantum omnes Sancti toto vitæ tempore meruerunt, quod ridiculum est. Respondeo negando id sequi ex prædictis, quia quâdo dicimus opus externum non augere bonitatem, vel maliam actus interni, loquimur de actu interno ex se efficaci, ex quo opus externum necessario prodiret, si facultas, aut oportunitas adesset, v. c. de voluntate efficaci dandi eleemosynam, ex qua actualis largitio eleemosynæ necessario oriretur si pauper occurreret; tunc enim existimamus defectum illum non voluntarium, minimè impedire quia volitio efficax dandi eleemosinam tam grata sit Deo, quàm largitio ipsa actualis eleemosinæ illi grata esset; quia vt ait S. Thomas art. 4. sicut inuoluntarium non meretur pœnam, vel præmium in operando bonum, vel malum; ita non tollit aliquid de præmio, vel de pœna, si homo inuoluntariè simpliciter deficiat ad faciendum bonum, vel malum. At non est par ratio in casu qui obiicitur, quia etsi quis velit tot opera bona, quot à Sanctis patrata sunt elicere, ea volitio non potest esse efficax ad talem effectum producendum, sed ad id innumeræ volitiones efficacissimæ ex omni virtutum genere requirentur: quò fit vt Sanctorum omnium operationes bonæ illius volitionis laudem, & meritum infinitis partibus excedant.

ARTICVLVS VII.

An idem actus possit esse bonus, & malus.

QUÆRITUR I. An idem actus externus possit esse bonus & malus. S. Thomas hanc difficultatē proponit quæst. citata art. 6.

Ethica.

L

& respondet cum distinctione, nam nihil prohibet aliquid esse vnum, secundum quod est in vno genere, & multiplex secundum quod refertur ad aliud genus: sicut superficies continua est vna secundum quod consideratur in genere quantitatis, est tamen multiplex secundum quod refertur ad genus coloris, si partim sit alba, & partim nigra. Et secundum hoc nihil vetat aliquem actum esse vnum in genere naturæ, & multiplicem in genere moris; vt ambulatio continua est vnus actus secundum genus naturæ; & potest esse multiplex in genere moris, si nimirum mutetur voluntas ambulantis, quæ est principium actuum moralium.

Ex quibus verbis patet, eundem actum externum qui nunc est bonus, posse postea mutata voluntate, esse malum, sed dubium manet an simul & eodem temporis momento possit esse bonus, & malus; qua in re vnum videtur certum, nempe idem opus externum vt oritur à diuersis personis, posse simul esse bonum, & malum, vt patet in Christi Passione, quæ vt erat à Deo ordinata ad nostram redemptionem, erat bona, vt autem à Iudæis causata, erat mala. Patet etiam in oblatione Sacrificij quæ fit à malo Sacerdote, hæc enim vt fit nomine Christi, & Ecclesiæ est bona, vt autem peragitur à peccatore, est mala. Neque hoc mirum videri debet, cum bonitas & malitia non sit in actu externo intrinsecè, sed tantum per denominationem extrinsecam ab actu interiori à quo procedit, vt dictum est.

Dubitatur autem, an opus externum vt refertur tantum ad vnam personam, ex vna intentione bona, & ex alia mala operantem, sit simul bonum, & malum; vt dum quis vult dare eleemosinam & ex misericordia, & ex vana

gloria. Qua in re nonnulli existimant actum eternum ex vna intentione esse bonum, & ex alia malum, cum ab vtraque informetur.

Verum communis sententia oppositum statuit; quia ille actus non est bonus, cui adiungitur aliqua circumstantia mala: siquidem bonum est ex integra causa, & malum ex quolibet defectu oritur, ut omnes Theologi tradunt ex Dion. at finis est circumstantia, eaque precipua actus; ergo repugnat eum actum esse bonum, qui fit ex fine malo.

Dices 1. si largitio eleemosynæ potest esse bona, & mala, quatenus procedit à duabus personis, cur non idem contingere poterit etsi ab eadem persona procedat? siquidem in priori casu ideo est bona, quia procedit ex bona intentione domini, & mala, quia procedit ex mala serui intentione: at in posteriori potest similiter oriri ex bona, & mala intentione eiusdem personæ; ergo simul bona, & mala esse potest. Respondeo non sequi, & ratio discriminis est, quia cum duæ personæ agunt, intentio mala vnius non est circumstantia intentionis bonæ alterius, adeoque eam non inficit; cuius oppositum euenit quando eadem persona ex duabus intentionibus, altera bona, altera praua operatur. Cum enim possit, & debeat ex praua intentione non agere, sic agens totum opus inficit, etiam si ex alia intentione bona operetur.

Dices 2. potest quis quo tempore dat eleemosynam ex misericordia, de pulchritudine vanè delectari, & tunc illa circumstantia vanitatis non inficit eleemosynam. Potest etiam de eleemosyna bono fine ante erogata gloriari, & neque tunc vanitas impedit quin largitio eleemosynæ simpliciter bona fuerit. Ergo similiter cum datur eleemosyna ex bono, & malo fine, nihil

obstat quin priori respectu sit bona, & posteriori mala. Respondeo negando sequelam, nam in primo casu vana delectatio non est circumstantia spectans ad eleemosynam, sed eam tantum per accidens comitans; quare eam inficere non potest. In secundo verò casu vanitas sequitur eleemosynam, & supponit eam ex bono fine, & cum debitis circumstantiis fuisse erogatam: quare neque sic illius bonitatem minuere potest. Neque refert quod vana gloriatio sit de eleemosyna, hinc enim non fit vanitatem esse circumstantiam eleemosynæ, sed potius eleemosynam esse obiectum vanitatis, quod ad illam deturpandam non sufficit: sicut non inficitur virtus pulchræ mulieris, ex eo quòd ab intemperante turpiter expetatur.

Quæritur 2. an idem actus internus possit esse bonus & malus, vel simul, vel saltem successiue.

Respondeo & dico 1. *Fieri non posse ut simul sit bonus & malus.* Ratio est, quia ut actus internus sit bonus, debet excludere malitiam, ut patet ex dictis; ergo repugnat quod simul sit bonus, & malus. Confirmatur, quia bonitas & malitia sunt formæ oppositæ, quarum vna excludit aliam ab eodem actu interno.

Obiicies, eadem largitio eleemosynæ potest simul esse bona & mala, ex dictis, ergo & eadem volitio interna. Respondeo non sequi, & ratio discriminis est quia largitio eleemosynæ non est bona nec mala per se, sed per denominationem ab intentione à qua pendet: quare cum possit procedere ab intentione bona & mala duorum agentium, consequenter ipsa bona & mala simul esse potest. At verò actus internus est bonus aut malus per seipsum, quod autem tale est non potest esse simul bonum & malum, cum hæc opponantur.

Dico 2. *Non omnes actus bonos posse fieri successivè malos.* Probatur, nam sunt multi actus qui realiter procedunt ab habitu virtutis, illi autem non possunt esse mali, tum quia virtus ad malum inclinare nequit, tum quia nemo virtute malè uti potest, ut docet S. Thomas 1. 2. qu. 55. art. 4. Et idem dic de omnibus actibus supernaturalibus qui ab auxilio gratiæ procedunt.

Quòd si dicas, actum qui oritur ab habitu virtutis, quando bonus est, non amplius ab eo procedere cùm incipit esse malus, iam fateris eum non esse eundem actum entitativè spectatum; cùm repugnet eundem numero actum, qui iam ab vna causa realiter procedit, mox ab alia realiter profluere.

Deinde si actus supernaturalis, qui nunc procedit à gratia, potest postea esse malus, quæro à quo tunc procedat, non à gratia, quia repugnat quod gratia sit principium actus mali. Non etiam à voluntate sola, quia hæc non potest propriis viribus elicere actum entitativè supernaturalem. Et idem dic de quacunque alia causa ordinis naturalis, quare repugnat actum supernaturalem ex bono fieri malum.

Dico 3. *Probabilius videri nullam actum internum voluntatis posse fieri successivè ex bono malum.* Ratio est quia tunc actus entitativè & substantialiter mutatur, quando illius obiectum mutatur, at quando actus internus voluntatis ex bono fit malus, illius obiectum mutatur; ergo actus ille substantialiter mutatur. Maior certa videtur, cùm actus interni specificatio ab illius obiecto petatur; minor verò ostenditur, quia inchoationis actus obiectum est bonum & licitum, prosecutionis verò malum & illicitum; ergo subiectum mutatur, adeoque & actus ipse internus voluntatis mutatur.

Obiicies I. non necessario mutari obiectum actus, quia fieri potest ut actus continuetur ex eodem motiuo honesto ob quod inchoatus est, ut dum quis ex intentione colendi Deum, & iuuandi proximum vult sacrum facere, etiam post notitiam interdicti. Verum hoc gratis dicitur, quia cum recta & prudens ratio sit regula nostrarum operationum, obiectum quod tribuit speciem volitioni internæ, non est illud quod præcisè ex se est honestum, sed illud quod spectatis omnibus circumstantiis proponitur simpliciter ut honestum: at recta & prudens ratio non potest proponere ut simpliciter honestum, obiectum illud quod ut prohibitum cognoscitur, cum sic absolutè sit malum: ergo cognita prohibitione non est amplius idem obiectum, adeoque actus volitionis entitatiuè mutatur.

Instabis, hinc ad summum concludi actum mutari substantialiter, quando obiectum initio proponitur ut bonum, & in continuatione ut malum, ut dum quis ex intentione glorificandi Deum, & iuuandi proximum sacrum inchoauit, post agnitam verò interdictionem celebrationem continuat. Hinc autem non sequitur actum mutari substantialiter, quando culpabiliter ignoratur illius continuationem esse prohibitam, & malam. Licet enim continuatio tunc sit illicita, eo quod ignorantia non excusat à culpa, actus tamen ex eodem motiuo honesto quo inceptus est continuatur, sicque obiecto non mutato, actus ipse substantialiter non mutatur.

Fateor satis probabile videri, actum entitatiuè immutatum in eo casu ex bono fieri malum, quæ tamen dicta sunt etiam in illo locum habent: nam ut censeatur idem actus qui in-

ceptus est continuari, non sufficit quòd idem obiectum honestum proponatur voluntati, sed requiritur ut ea propositio fiat ex prudenti iudicio; qua alioqui volitio illicita & impia hæreticorum, quia in Catholicos sæviunt ex falso religionis zelo, esset eiusdem rationis cum zelo quo pii & Sancti viri hæreticos, & improbos quosque homines insectari solent: quod dici sine errore non potest. Quare cum continuatio actus prohibiti, posita ignorantia culpabili prohibitionis, non proponatur prudenti iudicio ut honesta & licita, hinc fit obiectum formaliter spectatum variari, adeoque & voluntatem per actum realiter à priori distinctum in illud ferri.

Obiicies 2. idem actus voluntatis potest ex indifferenti fieri bonus, ut patet dum quis vult tempore non prohibito comedere carnes ob naturæ commodum, & adueniente prohibitionem ex eodem motivo vult eandem comestionem protrahere: ergo & idem actus voluntatis fieri potest ex bono malus, ob paritatem rationis. Respondeo 'admissio antecedente, negandam esse cōsequentiam, illiusque probationem: & ratio discriminis est, quia potest voluntas ferri in obiectum indifferens, & in malum ex eodem motivo, ut patet manifestè in exemplo allato: qui enim licitè comedit carnes ob commodum naturæ, potest illicitè iis uti ob idem commodum; at fieri non potest ut actus bonus & malus ferantur in idem obiectum sub eadem ratione, siquidem bonus fertur in obiectum ut honestum est, malus autem ut est delectabile, vel utile.



CAPVT VI.

DE NONNVLLIS ALIIS AD
eandem materiam spectantibus.

ARTICVLVS PRIMVS.

Quid sit formalis bonitas actus.

Nonnulli existimant bonitatem formalem actus nihil esse aliud, quam ipsam entitatem & substantiam actus per se spectatam. Sed hoc facile refellitur, quia si bonitas formalis actus, consistet præcisè in illius entitate & substantia, sequeretur posita entitate actus, poni formalem illius bonitatem. Hoc autem absurdum est, cum possit eadem realis entitas actus saluari sine libertate, adeoque sine bonitate formali.

Alij existimant, formalem bonitatem actus dicere positivam aliquam qualitatem, ipsius entitati superadditam. Verùm hoc etiam gratis asseritur, siquidem seclusa quacunque qualitate superaddita, concipis actum aliquem esse formaliter bonum, eò ipsò quòd secundum suam entitatem est conformis regulæ suæ; sicut vice versa censetur formaliter malus, eò ipsò quòd est illi difformis.

Alij docent formalem bonitatem nihil aliud esse quam relationem rationis, qua actus dicitur conformis naturæ rationali. Sed malè, nam relatio rationis non est nisi quando fingitur ab intellectu, actus autem est formaliter bonus nemine cogitante; quare bonitas formalis non

potest consistere in relatione rationis.

Dices, quod alicui aduenit ex libera hominum institutione, est relatio rationis; atqui bonitas Moralis aduenit actui humano ex libera hominum institutione, ergo est relatio rationis. Maior videtur perspicua, & patet exemplo vocis ex arbitrio hominum significatiuæ, ea enim significatio nihil est aliud quam relatio rationis. Minor ostenditur, quia homines præceptis & prohibitionibus efficiunt, ut actus sint formaliter boni, aut mali. Respondeo 1. maiorem non esse veram, nec illius probationem, quod enim vox aliquid significet, id non est quid fictum ab intellectu, ut ex eo manifestum est, quod audita voce aliqua statim intelligimus quid significet, etsi nullam relationem rationis ei assignamus. Vade etsi minor concederetur, inde non fieret bonitatem formalem actus consistere in relatione rationis.

Respondeo 2. minorem non esse generatim veram, ut nec illius probationem, multi enim actus sunt formaliter boni, & alij formaliter mali citra vllum præceptum humanum, ut patet in amore, & in odio Dei: prior enim actus ex se formaliter bonus est, etsi ab hominibus non percipiatur, & posterior formaliter malus, etsi ab iis non prohibeatur. Itaque cum ij actus non possint habere formalem bonitatem, aut malitiam per respectum rationis ex hominum libertate ortum, difficultas superest explicanda per quid eam habeant.

Alij ponunt bonitatem formalem actus in relatione reali ad rectam rationem. Quod etiam dici nequit, nam duplex est relatio realis, alia transcendentalis, alia categorica: bonitas autem formalis in neutra consistere potest, non in transcendentali, quia hæc spectat ad rei essentiam,

nec ab illa separari potest; at bonitas formalis ab actu separari potest, ob defectum libertatis.

Non etiam in categorica, tum quia relata dicuntur ad aliud, actus autem non est formaliter bonus alteri, sed sibi; tum quia relatio categorica non per se intenditur ab agente, sed ex positione fundamenti & termini, præter illius intentionem, resultat; bonitas autem formalis directè intenditur ab agente. Tum denique quia vnum relatum categoricum refertur ad aliud, tanquam ad purum terminum; actus autem bonus non respicit rectam rationem ut purum terminum, sed tanquam causam à qua dependet quoad directionem.

His ergo opinionibus dimissis, eorum sententia amplectenda est, qui docent formalem bonitatem seu honestatem actualem nihil aliud esse, quam consonantiam seu conformitatem actus humani cum recta ratione. Quod ut clariùs percipias.

Nota 1. actum humanum duobus modis considerari posse, 1. quoad entitatem naturalem, quomodo dicit tantum ordinem ad obiectum suum. 2. ut est Moralis, quod habet per respectum ad rectam rationem, quæ est regula morum. Hoc enim secluso ordine, actus potest quidem esse voluntarius, ut patet in amentibus, imò & liber ut constat si quis ex libertate exerceat actum aliquem de se indifferentem, nihil inculpabiliter cogitans de honestate, aut turpitudine morali. Ut tamen actus dicatur Moralis, necessario debet includere ordinem ad regulam suam, quæ est recta ratio.

Nota 2. cum actus Moralis in genere dicat ordinem ad rectam rationem, consequenter omnes actus Morales in specie per eiusmodi ordinem explicandos esse. Quare cum actus Mo-

ralis in specie vel sit bonus, vel malus, vel indifferens, dicendum est actum ut bonum, formaliter consistere in consonantia cum recta ratione; ut malum, in dissonantia à recta ratione; & ut indifferentem, in eo quod nec sit conformis, nec difformis rectæ rationi.

Nota 3. in actu honesto, de quo specialiter hic agimus, duo importari, vnum in recto, & aliud in obliquo; in recto importatur quidquid requiritur ut actus sit formaliter bonus & honestus, ut quod sit voluntarius, quod procedat ex libertate, quod habeat obiectum honestum, &c. In obliquo vero importatur recta ratio, quatenus est proxima regula honestatis, modo superius explicato: quia sine tali respectu actus non esset moraliter honestus, ut antè dictum est.

Obiicies, si actus dicitur formaliter bonus per ordinem ad rectam rationem, hinc sequitur bonitatem illam esse respectiuam, quod suprâ negatum est. Respondeo negando id sequi, nam sicut etsi persona ut genita, connotet personam generantem, non tamen ut sic ad illam dicit relationem categoricam; ita licet actus ut formaliter bonus, connotet rectam rationem, id non sufficit ut dicat relationem categoricam ad illam sed ad summum ut dicat fundamentum, ex quo talis relatio consurgit, quemadmodum quod quis ab alio sit genitus, hoc est fundamentum relationis categoricæ qua ad illum refertur. Nec refert quod rationem bonitatis explicemus per ordinem ad regulam morum, id enim fit defectu vocabulorum, & quia connotatio magnam habet affinitatem cum relatione, etsi verè relatio non sit.

ARTICVLVS II.

Quid sit formalis malitia actus prauis.

P Ræmoneo 1. duplicem esse malitiam, aliam commissionis, qua præceptum negatiuum violatur, vt furtum, homicidium, &c. aliam omissionis, quæ præcepto affirmatiuo repugnat; vt violatio ieiunij, non auditio sacri, &c.

Præmoneo 2. non esse difficultatem de malitia omissionis, cum perspicuum sit eam consistere in priuatione actus debiti, sed totam controuersiam versari circa malitiam commissionis, in quo scilicet constituenda sit, an in priuatione aliqua, an verò in ratione quadam reali & positiua.

Non pauci existimant, malitiam commissionis esse meram priuationem rectitudinis debitæ. Verum hæc sententia, etsi sit communior in Scholis, vix à nobis intelligi potest, & refellitur primò, quia negari nequit quin peccatum commissionis distinguatur specie à peccato omissionis: at oppositum sequeretur si vt peccatum omissionis, ita & peccatum commissionis in mera priuatione formaliter consisteret: quia sic vtrumque haberet eandem formam constitutiua, ac proinde ad eandem speciem peccati pertineret.

Confirmatur, nam qui v. c. sola omissione peccat contra præceptum laudandi Deum, ideo peccat quia omittit laudem diuinam, adeoque peccatum illius consistit formaliter in priuatione talis actus: ergo similiter si peccatum illius qui Deum non modo non laudat, sed etiam blasphematur, consistit formaliter in priuatione

actus debiti, ut plerique auctores existimant, manifestum est eiusmodi peccatum consistere formaliter in eadem priuatione, in qua omissio prædicta posita est; adeoque ambo esse eiusdem speciei, quod sanè absurdissimum est.

Secundò, quia etiam sequeretur duo peccata extrema eidem virtuti, & inter se opposita, ut avaritiam, & prodigalitatem esse eiusdem speciei, quod apertè implicat. Sequela patet, quia si avaritia est formaliter priuatio rectitudinis debitæ, ea non est aliud quàm priuatio liberalitatis: & similiter si prodigalitas tota consistit formaliter in priuatione rectitudinis debitæ, ea nihil est aliud quàm priuatio eiusdem liberalitatis: ac proinde avaritia, & prodigalitas non sunt vitia inter se opposita, sed in eandem peccati speciem planè coincidunt.

Confirmatur, nam liberalitas est virtus simplicissima, quæ per eandem perfectionem indiuisibilem, qua opponitur avaritiæ, opponitur etiam prodigalitati; quo fit ut si avaritia, & prodigalitas formaliter consistant in priuatione liberalitatis, eæ priuent eadem forma indiuisibili, adeoque sint priuationes eiusdem rationis & speciei; quemadmodum eadem est visus priuatio, siue cæcitas inducatur per nimium calorem, siue per nimium frigus.

Tertiò, si peccatum commissionis est priuatio rectitudinis debitæ, quodnam est subiectum talis priuationis? Aliqui dicunt esse actum ipsum realem commissionis, puta actum odij Dei, blasphemiae, &c. sed contra, nam actus odij Dei non est capax vllius rectitudinis Moralis, cum manifestè repugnet Deum rectè & honestè odio haberi; & idem dic de actu blasphemiae, aliisque commissionibus prauis: ergo actus peccati non potest esse priuatio rectitudinis Moralis, siqui-

dem quòd priuatum est aliqua forma, dicit aptitudinem ad illam.

Dices, actum peccati, vt est actus talis speciei, non esse capacem rectitudinis, esse tamen vt est actus liber & humanus, sicque ea esse priuatum. Verùm hoc gratis dicitur, nam si malitia commissionis consistit formaliter in priuatione, vt volunt aduersarij, sanè actus commissionis, sub ea ratione qua est malus, debet dicere priuationem: at non est malus præcisè vt est actus liber & humanus, quia alioqui omnes actus liberi & humani essent mali, sed quatenus est in tali specie actus v. c. odij Dei, aut blasphemiae: ergo actus commissionis debet includere priuationem, vt est actus talis speciei, non autem vt in genere est actus liber & humanus. Quare cum odium Dei, vt sic, non sit capax rectitudinis Moralis, planè repugnat quòd illius malitia in priuatione talis rectitudinis consistat.

Eò vel maximè quia licèt per mentem possimus distinguere in odio Dei, rationem genericam actus, & rationem specificam talis actus; repugnat tamen quòd à parte rei illæ rationes à se inuicem separentur, aut quòd quis exerceat actum aliquem sub ratione generica actus, & non sub specifica talis actus: vnde cum nequeat dari vlla rectitudo odio Dei, vt est talis actus, neque etiam ei conferri potest vt est actus in genere, vel vt est actus liber & humanus.

Alij existimant subiectum priuationis prædictæ esse personam operantem, quia cum elicit actum prauum tenetur illius loco bonum operari. At neque hoc solidè dicitur, tum quia homo non dicitur malus secundum se, sed quatenus elicit actum malum, adeoque malitia non est in homine immediatè, sed mediante actu,

qui proinde per se & immediatè malus est: unde si malitia actus nihil est aliud quàm priuatio, necesse est priuationem illam in ipso actu proximè & immediatè reperiri, & in homine tantùm mediatè.

Tum quia si malitia commissionis consisteret in prima priuatione operis boni, debiti inesse operanti, sequeretur hominem quoties peccatum aliquod commissionis perpetrat, teneri elicere actum oppositum; quod tamen falsum est, cum non semper instet præceptum eliciendi talem actum; ut patet, nam qui odit proximum, tenetur quidem actum illum vitare, non tamen tenetur elicere actum amoris erga illum; & qui peccat contra temperantiam extra dies ieiunij, non tenetur actu ieiunare. In iis ergo aliisque similibus casibus formalis malitia commissionis non potest consistere in priuatione actus oppositi, debiti inesse operanti.

Hac itaque opinione reiecta, dicendum est formalem malitiam peccati commissionis esse aliquid positivum. Probatur I. ex dictis, nam vel illa malitia consistit in priuatione, vel in aliquo positivo, ex omnium sententia: at ostensum est eam non consistere in priuatione, ergo fatendum est eam in entitate aliqua positiva constitutam esse; nimirum in ipsa actuali commissione, quatenus per seipsam est difformis rectæ rationi.

Dices posse cogitari aliquid veluti mediū inter meram priuationē, & entitatem omnino positivam, nimirū aliquid cōstans partim ex positivo, partim ex priuatione, & in illo medio seu potius mixto posse constitui malitiam commissionis. Verū hoc facilè refellitur, tum quia explicandum superest quomodo commissio actualis possit esse partialiter priuatio, cum y. c. actus odij

Dei nullius rectitudinis sit capax, siue ex toto, siue ex parte, vt ex dictis intelligitur. Tum quia si peccatum commissionis, quoad malitiam spectatum, est ex parte quid positium, non apparet cur non ex toto, secundum illam formalitatem aliquid positium esse possit: tum quia dici non potest, quòd differentia rei alicuius, quæ omnino simplex esse debet, constitutur ex duabus rationibus adeo inter se distantibus, qualia sunt priuationum, & positium.

Probatur 2. ex vulgari illa definitione ab Augustino tradita, & à Theologis communiter recepta, *Peccatum est dictum, factum, vel concupitum contra legem Dei*; hæc enim verba vt iacent, non possunt intelligi nisi de peccato commissionis, cum pura omisso nec sit dictum, nec factum, nec concupitum. Quare cum non significant nisi realem entitatem scilicet verborum, operum, & cogitationum, ac positiuam repugnantiam cum lege Dei, hinc perspicue sequitur peccati commissionis malitiam, iuxta mentem Augustini, consistere in entitate reali & positua.

Dices 1. definitionem allatam communiter applicari prauis omissionibus, adeoque ex ea nullum sumi posse solidum argumentum pro nostra sententia. Respondeo id non sequi, non enim ea definitio accommodatur omissionibus, nisi addita triplici negatione, hoc modo; *Peccatum omissionis est non dictum, non factum, non concupitum contra legem Dei*: Quo ipso ostenditur illam seclusis negationibus, & vt traditur ab August. non nisi peccato commissionis competere, & præterea non nisi actus reales & positivos significare.

Dices 2. verba illa, *contra legem Dei*, significare recessum à lege Dei, seu priuationem con-

formitatis cum lege diuina ; sicque peccatum formaliter in priuatione consistere. Verum hoc gratis asseritur, ipsum enim dictum, factum, & concupitum est per suam entitatem positiuam contrarium legi Dei ; cum per illam prohibeatur, ut in sequente probatione expendemus. Vnde contrarietas illa non dicit meram priuationem conformitatis, ut supponitur, sed positiuam dissonantiam cum lege æterna.

Probatur 3. nam illud est formaliter malum, quod directe prohibetur per legem Dei ; atqui actus reales peccati commissionis directe prohibentur per legem Dei ; ergo actus illi reales sunt formaliter mali, adeoque eorum malitia est aliquid reale & positiuum. Maior ex se perspicua est, & aperte sumitur ex definitione allata, peccatum enim esse contra legem Dei, id perinde est ac illud quod repugnat legi diuinæ, seu quod per illam prohibetur, esse formaliter malum : quemadmodum è contra illud est formaliter bonum, quod legi diuinæ est consentaneum. Minor verò ostenditur, nam præceptis non occides, non furaberis, non mœchaberis directe prohibentur actus reales homicidij, furti, & fornicationis. Quare fatendum est eiusmodi actus, quoad propriam entitatem & realitatem spectatos, esse formaliter malos.

Confirmatur, nam duobus modis possumus contra legem diuinam peccare, vel omitendo actum debitum, vel ponendo actum indebitum; priori modo peccamus contra præcepta affirmatiua, ut omissione sacri, contra præceptum audiendi missam; posteriori verò contra præcepta negatiua, ut reali occisione, contra præceptum non occidendi.

Dices, præcepto negatiuo non vetari actum positiuum ratione sui, sed ratione priuationis

adiunctæ. Verum hoc refellitur, tam quia explicari nequit quænam sit illa priuatio, vt patet ex dictis; tum quia sic confunduntur præcepta affirmatiua cum negatiuis, quoad prohibitionem quam includunt; priora enim prohibent omissionem actus debiti, vnde si etiam posteriora non prohibent actum ratione sui, sed ratione priuationis adiunctæ, seu quia caret perfectione aliqua, clarum est iis prohiberi tantum omissionem alicuius actualitatis, quod planè absurdum est. Tum quia Augustinus non dicit peccatum esse priuationem adiunctam dicto, facto, vel concupito contra legem Dei, sed absolute esse dictum, factum, vel concupitum; quæ verba non nisi entitatem realem & positiuam actuum significant. Tum denique quia, seclusa per intellectum quacunque priuatione actui positiuo adiuncta, eo ipso quod concipitur actus realis odij Dei, vel blasphemiae ex deliberatione procedens, intelligitur actus repugnans rationi & legi diuinæ, adeoque formaliter malus.

Instabis, hoc vltimum esse impossibile, quia non potest concipi actus tendens in obiectum legi diuinæ repugnans, quin eo ipso intelligatur actus carens rectitudine debita, nimirum ordine ad obiectum legi diuinæ consentaneum. Sed contra, nam ideo actus caret rectitudine obiecti debiti, quia fertur in obiectum indebitum, adeoque prius est secundum rationem & formaliter, quod actus tendat in obiectum indebitum, quam quod careat ordine ad obiectum debitum: in illo autem priori actus est formaliter malus, quia cum tendat in obiectum malum, non potest non ab eo sumere speciem mali. Quare priuatio rectitudinis debitæ, si quæ ex tali actu oritur, vt instantia gratis supponit, nullo modo

necessaria est vt actus ille in specie peccati constituitur.

Contra hanc sententiam obiicitur I. Scripturam sacram, & sanctos Patres agere de peccato, vt de quadam priuatione, quam explicant per auersionem, recessum & defectionem à Deo, quamque vocant infirmitatem, vacuitatem, defectum, corruptionem boni, & merum nihil. Confirmatur, quia cum Manichæi admitterent duo prima principia, alterum bonum, quod esset bonorum causa; alterum malum, à quo mala orirentur, Patres respondent malum non esse naturam aliquam, sed priuationem quæ nullo indiget principio à quo producat.

Ad obiectionem respondeo, peccatum dici priuationem, non quod formaliter sit priuatio, sed quia varias priuationes causat, vt priuationem gratiæ, meritum, & gloriæ æternæ. Vnde sicut mors est priuatio vitæ naturalis, ita & peccatum dicitur priuatio, quia nos priuat vitam spirituali animæ, quæ in gratia consistit. Et quod hæc responsio solida sit inde patet, quia in Scriptura, & Patribus eiusmodi priuationes non raro inducuntur, cum agitur de peccato: contra verò nullus locus ex iis profertur quo constet priuationem, in qua formalis ratio peccati constituitur, accipi in sensu illo qui ab arguentibus inuectus est.

Ad confirmationem dico, Manichæos ideo posuisse principium aliquod malum, quia existimabant esse aliquas naturas substantiales ex se malas, quarum originem in principium bonum, seu Deum referre non audebant: Patres verò contra illos contendere, nullam eiusmodi substantiam malam dari, sed omnes esse ex natura sua bonas, & in Deum auctorem referri. Et quamuis peccata sint mala, ea non esse sub-

stantias, sed substantiarum vitia creaturarum, vt loquitur Augustinus lib. 1. contra Iulian. cap. 9.

Obiicitur 2. si formale peccati est quid posituum, caueri non posse quin Deus sit causa peccati, cum suo reali influxu ad quamcunque entitatem concurrat, vt nos, ex communi sententia, contra Durandum fatemur. Respondeo hanc obiectionem haud dubie grauem esse, & difficilem habere solutionem; hæc tamen difficultas non minus eos premit qui peccatum ponunt in priuatione, quam alios qui illud in formalitate positua constituunt. Fatentur enim Deum realiter influere ad totam entitatem peccati, ex qua necessario priuationem oriri arbitrantur; at qui est causa realis alicuius entitatis, est consequenter causa priuationis ex ea necessario resultantis; vt manifestum est ex ipso homine, qui non aliter est causa malitiæ peccati, quam quia efficienter concurrat ad entitatem actus, cui talis malitia adiuncta est. Quomodo ergo non ipsi Deum faciunt causam peccati, esto malitiam illius in priuatione positam esse gratis concedatur?

Respondent aliqui ideo Deum non esse causam priuationis, quia illa non sequitur ex entitate peccati, vt est à Deo, sed tantum secundum modum particularem quo procedit ab homine, vt ex eo manifestum est quod tota peccati entitas potest esse in rerum natura, sine malitia peccati; nimirum si homo non liberè ad illam concurrat, licet tunc eodem influxu ex parte Dei indigeat.

Verum nos similiter dicimus, etsi Deus concurrat realiter ad totam entitatem peccati, eam tamen non esse peccatum vt procedit à Deo, sed vt ab homine oritur. Ideo enim illa entitas est peccatum vt procedit ab homine, quia homo

propria sponte & liberè se determinat ad eam eliciendam, contra prohibitionem diuinam: ac Deus, ex munere primæ causæ, tenetur suum concursum exhibere homini actum malum operanti. Vnde idem actus qui est malus vt procedit ab homine, est bonus vt à Deo profluit, sicque Deus non est causa illius, vt peccatum est, esto ad totam illius entitatem concurrat. Ad eum modum quo actus voluntatis, etsi procedat totus realiter ab habitu, & à voluntate, non habet ab habitu quod sit vitalis, sed tantum à voluntate quæ est potentia vitalis.

ARTICVLVS III.

An detur actus aliquis indifferens, seu qui nec sit bonus, nec malus.

QUæritur I. an detur actus aliquis indifferens secundum speciem. Responsio communis est affirmatiua, quam probat S. Thomas I. 2. quæst. 18. art. 8. hac ratione. Actus omnis habet speciem ab obiecto, & actus humanus, qui dicitur Moralís, habet speciem ab obiecto, vt relato ad principium actuum humanorum, quod est ratio. Vnde si obiectum actus includat aliquid conueniens ordini rationis, erit actus bonus secundum suam speciem, sicut dare eleemosynam indigenti; si verò includat aliquid repugnans ordini rationis, erit actus malus secundum speciem, vt furari. Quod si obiectum actus non includat aliquid pertinens ad ordinem rationis, vt leuare festucam, ambulare, &c. tales actus secundum speciem suam sunt indifferentes.

Obiicies I. species actus sumitur ab obiecto,

vt fatetur S. Thomas loco citato , atqui omne obiectum vel est bonum, vel malum moraliter; ergo & omnis actus est bonus aut malus moraliter, adeoque nullus est indifferens secundum speciem. Probatur minor, nam omne obiectum vel concordat cum ratione, vel ab ea discordat: si concordat, est bonum, si discordat est malum. Respondeo negando minorem, & probationem illius, siquidem concordare, & discordare inter se opponuntur contrariè, sicut album & nigrum: quare quemadmodum inter hos colores extremos dantur medij, qui nec sunt albi, nec nigri; ita inter obiectum positivè concordans cum ratione, & obiectum positivè discordans ab illa, datur obiectum aliquod medium quod neutro modo se habet; vt patet in ambulatione per se spectata, hæc enim nec dicit convenientiam positivam cum recta ratione, nec discrepantiam positivam ab illa, sed vtriusque negationem.

Obiicies 2. si dantur actus secundum speciem indifferentes, sequitur actum Moralem in genere diuidi tanquam in suas species in actum bonum, malum, & indifferentem: at hoc, iuxta nostram sententiam dici non potest, cum existimemus nullum dari posse actum indifferentem in indiuiduo; siquidem repugnat dari aliquam speciem, quæ nullū potest habere indiuiduum, vt patet ex dictis in Logica. Respondeo negando sequelam maioris, cum enim dicimus dari actus indifferentes secundum speciem, id non debet intelligi positivè, vt sensus sit dari aliquos actus, qui ex sua differentia positiva sint indifferentes, seu tales vt iis repugnet habere bonitatem, aut malitiam; sed tantum negativè, vt sensus sit dari actus quosdam qui ex se nec sunt boni, nec mali, quibus tamen

non repugnat habere bonitatem, aut malitiam. Ad minorem autem dicimus hoc non repugnare cum sententia postea tradenda; quia etsi non possit dari actus qui sit positivè indifferens quoad speciem, quin simul dari possit aliquis actus qui sit indifferens quoad individuum; ex eo tamen quod possibilis sit actus negativè indifferens quoad speciem, non sequitur dari posse actum qui sit indifferens quoad individuum. Et ratio discriminis est, quia actus in specie consideratur tantum ratione sui obiecti, quod cum ex se possit esse indifferens, actus ad illud tendens potest etiam esse nec bonus, nec malus. At actus in individuo, & quoad exercitium spectatur cum omnibus suis circumstantiis, estque bonus cum habet omnes circumstantias requisitas, malus verò si vel una caret, ut si non fiat ob finem à ratione præscriptum, ut iam dicemus.

Quæritur 2. an possit dari actus indifferens in individuo. Multi affirmant dari posse: sed oppositum traditur à S. Thoma 1. 2. quæst. 18. art. 9. illiusque discipulis ibid. nobisque videtur probabilius, & plerisque aliis non modo Philosophis & Theologis, sed etiam Scripturæ sacræ interpretibus, quorum præcipuas rationes hic breuiter attingam.

In primis id probant aliqui, quia homo ratione utens tenetur in omnibus suis operationibus bonum rationis intendere, quod est bonum honestum; sicut enim Deus ut naturæ auctor, impressit omnibus agentibus naturalibus determinationem naturalem in fines proprios, ita agentibus liberis & rationalibus impressit determinationem moralem seu præceptum tendendi in omnibus actibus suis ad finem naturæ rationali consentaneum. Vnde agentia libera

peccant quoties aliquem actum sine bono & honesto fine eliciunt.

Secundò id probant alij, quia idem est finis actus humani, & naturæ humanæ; sicut est idem finis fructus, & arboris: at naturæ humanæ finis est Deus, ergo & actus humani. Vnde actus carens ordine ad Deum, non est indifferens, sed malus moraliter, cum careat rectitudine quam debet habere.

Tertiò probatur, nam actus qui non fit ob finem honestum, nec explicitè, nec implicitè in Deum ut ultimum finem refertur: at actus qui neutro ex his modo in Deum refertur, sistit omnino in creatura ut in ultimo fine, sicque fruitur utendis, quod planè inordinatum est cum rebus creatis uti tantum debeamus, & solo Deo frui. Vnde Apostolus 1. Cor. 10. *Sine manducatis, inquit sine bibitu, omnia in gloriam Dei facite*, quæ verba apertè indicant etiam actus ex specie sua indifferentes, quales sunt manducare & bibere, saltem implicitè in Deum esse referendos; quod fieri nequit nisi in proximum aliquem finem honestum ab operante ordinentur.

Quartò, & meo iudicio efficacius, probatur hæc sententia ex verbis illis Christi Matth. 12. *Dico autem vobis, quoniam omne verbum otiosum quod locuti fuerint homines, reddent rationem de eo in die iudicij*. At quid est verbum otiosum? Illud, inquit Hieronymus, quod sine utilitate & loquentis dicitur, & audientis: vel, ut ait Gregorius Magnus, quod aut utilitate rectitudinis, aut ratione iustæ necessitatis caret; vel ut ait Bernardus, quod nullam rationabilem causam habet; vno verbo otiosum verbum illud est, quod etsi nulli noceat, & secundum se non sit reprehensibile, caret tamen fine rationabili & honesto. Hinc autem concluditur intentum, nam

nam si verbum otiosum, seu carens fine honesto, malum est, & de eo tanquam de peccato reddenda est ratio in iudicio, vt post S. Hieronymum, aliosque Patres Caietanus, Salmeron, Maldonatus, Cornelius à lapide, Regius, aliiq; scripturæ Interpretes fatentur, quo iure negari potest actum otiosum, seu qui elicitur sine fine honesto, esse moraliter malum, & in Dei iudicio plectendum? Non enim alio titulo verbum otiosum malum est, nisi quia caret debito fine: quare si nostræ cogitationes, & actiones liberæ carent debito fine, non dubium quin etiam sint malæ; nisi fortè quis dicat, hominem quidem teneri verba sua in finem honestum dirigere, non tamen cogitationes suas & actiones voluntatis; quod planè ridiculum est.

Confirmatur, nam nemo negat quin peccatum sit prodigalitatis, bona externa vanè effundere; ergo nemo etiam negare debet, quin ille peccet qui vanè seu ex nullo fine bono operationes suas elicit. Sequela patet, quia cum per actus nostros possimus proficere in virtute, & ad vitam æternam tendere, profectò longè grauior & perniciosior est eorum iactura, quam opum externarum quæ per se tantum ad iuuandam hanc vitam temporalem conducunt.

Obiicies 1. verba illa Hieronymi epist. 89. *Neque enim indifferentia sunt (legalia) inter bonum & malum, sicut Philosophi disputant, bonum est continentia, malum est luxuria, inter utrumque indifferens ambulare, capitis naribus purgamenta prouicere, &c.* Responderi potest 1. Hieronymum hoc loco nihil aliud velle, quam obseruantias legales non esse ponendas inter res indifferentes, sicut Philosophi inter indifferentia ponunt ambulare, & purgamenta eiicere: & hoc posterius non proferre ex propria mente, sed ex sententia Phi-

Ethica,

M

Iosophorum. Responderetur 2. ambulare, & purgamenta eiicere esse actus secundum speciem indifferentes, qua ratione ibi spectantur ab Hieronymo.

Obiicies 2. ambulare ob delectationem aliquam, aut ob commodum naturæ, non esse quidem bonum honestum, quia honestas respicit bonum rationis & virtutis; at neque etiam esse malum, cum id valde consentaneum sit naturæ, adeoque esse medium inter bonum & malum, seu indifferens. Confirmatur, nam si actus ille est malus, ideo est, quia est otiosus, at non est otiosus, cum ad aliquod naturæ commodum ordinetur. Respondeo nos vtrò fateri, deambulationem ob solam naturæ commoditatem susceptam, non esse honestam, vt vel ex eo patet, quia aliàs nullus fere actus esset indifferens quoad speciem, cum omnes eiusmodi actus ad aliquod naturæ commodum ordinentur. Constat etiam neminem laudati, aut præmio dignum iudicari ex eo quòd ambulationem, aliumve actum naturalem, ex intentione iuuandi naturam, suscepit. At negamus quòd actus ille fiat ob commodum aliquod naturæ, id sufficere vt sit non malus: cum enim regula nostrarum actionum sit recta ratio, vt hæc respiciat bonum honestum, hinc fit vt actus qui non sequitur hæc regulam, sed commodum aliquod, aut delectationem naturæ, careat rectitudine debita, adeoque sit moraliter malus.

Confirmatur ex Augustino qui lib. de bono coniugali cap. 6. damnat peccati venialis actum matrimonij ex sola delectatione vsurpatum; *Coniugalis concubitus*, inquit, *generandi gratia*, non habet culpam, *concupiscentia verò satianda*, sed tamen cum coniuge propter fidem thori, venialem culpam habet. Quòd si actus alioqui licitus & honestus,

malitiam contrahit quando fit ob solam delectationem, multò magis credendum est actus ex se indifferentes fieri malos, quando ob delectationem naturalem, aut simile aliquod motuum producantur.

Vnde ad confirmationem obiectionis dicimus, vt actus aliquis non sit otiosus, non sufficere quod fiat ex fine aliquo naturali, sed requiri vt fiat ob finem, ob quem faciendus est. Aliàs nulla essent fere vnquam verba, vel opera otiosa, cum ij qui in jocis & operibus vanis tempus terunt, ea vt plurimum ad aliquam voluptatem, aliumve similem finem referant. Itaque cum homo vtpote ratione præditus, teneatur semper agere ex rationis præscripto, omnes illius actus qui hanc regulam non sequuntur, sed commodam aliquod, aut voluptatem naturæ, censentur vani & otiosi, adeoque moraliter mali.

Obiicies 3. si actus omnes qui carent bono fine in indiuiduo, sunt mali, sequitur singulis diebus infinita committi peccata, etiam à viris iustis & piis, cum innumeri actus fiant ex se indifferentes, quibus nulla additur ordinatio ad bonum finem: sequitur etiam tales actus esse sufficientem materiam confessionis, quæ & similia nimis dura & absurda videntur.

Respondeo 1. hoc argumentum posse retorqueri contra verba otiosa, quæ haud dubie sunt peccata, vt ostensum est: quare si illa quotidie multiplicantur, & clauibus pœnitentiæ vtiliter subiiciuntur, nihil absurdi est quod idem dicatur de actibus otiosis. 2. eiusmodi peccata siue in verbis, siue in actionibus posita, facillè caueri posse si nimirum aliquoties singulis diebus, & vt minimum semel, statuamus omnes nostras actiones in Dei gloriam referre: virtute enim

talis propositi, verba, cogitationes, & operationes omnes ex se non malæ, quæ à nobis eliciuntur, censebuntur virtualiter relatæ ad bonum finem; quod sufficiet ad earum bonitatem. 3. facile etiam prædicta peccata condonari, ut actu interno doloris, amoris Dei, &c. neque esse necesse ad eorum remissionem ut subdantur elauibus Ecclesiæ, etsi id valde utile sit, ut intelligi potest ex Concilio Trid. sess. 14. cap. 5. & piorum hominum praxi. 4. plerumque actus otiosos non imputari ad culpam, quia omittitur finis honestus ex ignorantia, aut inaduerentia inculpabili. Possunt etiam excusari ob probabilitatem oppositæ sententiæ, ut iam dicemus.

Obiicies 4. qui agit ex opinione probabili, non peccat: at opinio docens dari actus indifferentes in indiuiduo, est probabilis, cum plerisque auctores magni nominis habeat, rationibusque non spernendis innitatur: ergo qui iuxta opinionem illam operatur, non peccat, id est qui facit actum aliquem ex se indifferentem, practicè iudicans non esse malum talem actum elicere, eum non referendo ad finem aliquem honestum. Aliunde verò actus non relatus in finem honestum non est bonus, ex communi vtriusque partis sententia. Ergo eiusmodi actus neque est bonus, neque malus, ac proinde est indifferens quoad indiuiduum.

Respondeo hoc argumento tantum concludi, posse dari actum indifferentem in indiuiduo, ex hypothesi quod quis sit imbutus opinione quam impugnamus: verum hoc est per accidens, nam si res per se spectetur, seu ex natura actus, contendimus nullum dari posse actum indifferentem in indiuiduo, ut sufficienter probatum est, adeoque eum peccare qui, extra persuasio-

nem prædictam qua excusatur à peccato, elicit actum de se indifferentem sine aliquo fine honesto: ad eum modum quo ille per se loquendo peccat qui furatur, etsi contingat interdum aliquem non peccare furando, quia probabiliter putat id non esse illicitum. Addo aliud esse, actum esse indifferentem, & non imputari; cum quod à parte rei seu ex se peccatum est, interdum non imputetur. Vnde etsi operanti ex opinione prædicta, actus non imputetur ad culpam, inde non sequitur actum illum in se esse indifferentem, aut non esse malum.

ARTICVLVS IV.

De proprietatibus actuum bonorum & malorum.

DE hac materia agit S. Thomas 1. 2. qu. 21: per quatuor articulos, quorum 1. docet actum humanum vt bonum, habere rationem rectitudinis, & vt malum, habere rationem peccati. Quod in hunc modum, iuxta ipsius mentem, ostendi potest: nam bonum latius patet quam rectum, bonum enim generatim dicitur tam de naturali, quam de morali, & conuenit tam rebus, quam actionibus, consistitque in ratione conuenientiae: rectum verò dicitur tantum de actionibus, quatenus habent debitum ordinem ad finem suum. Malum etiam latius patet quam peccatum, malum enim significat quemcunque defectum, non modo in moralibus, sed etiam in naturalibus; nec tantum in operatione, sed in quacunque re: at peccatum dicit actum qui non habet debitum ordinem ad finem suum. Cæterum debitus ordo ad finem secundum aliquam regulam mensuratur, & hæc regula in iis quæ secundum naturam agunt, est

ipsa virtus naturæ quæ inclinatur in talem finem: in iis verò quæ aguntur per voluntatem, regula proxima est ratio humana, regula autem suprema est lex æterna: unde quando actus procedit à virtute naturali, secundum naturalem inclinationem in finem, tunc servatur rectitudo in actu; quia medium non exit ab extremis, scilicet actus ab ordine principij actiui, ad finem: quando autem à tali fine receditur, tunc ratio peccati competit actui; quo fit ut monstra in Physicis dicantur peccata, in quantum producta sunt ex peccato in actu naturæ existente, ut patet ex resp. ad 1. Et similiter quando actus hominis procedit in finem, secundum ordinem rationis, & legis æternæ, tunc actus est rectus: quando autem ab hac rectitudine recedit, tunc dicitur peccatum. Quare cum omnis actus humanus sit bonus, quatenus concordat cum recta ratione, & lege æterna, & sit malus quatenus ab ea recedit, hinc fit actum humanum ex hoc quod est bonus, vel malus, habere rationem rectitudinis, vel peccati: vno verbo, cum multa sint bona & mala, ea solum bona sunt recta, quæ sunt in actionibus, & ea sola mala sunt peccata, quæ in actionibus reperiuntur. Quo fit ut omnis actio humana, hoc ipso quod est bona, sit recta, & hoc ipso quod est mala, sit peccatum.

Art. 2. docet actum humanum, in quantum est bonus vel malus, habere rationem laudabilis vel culpabilis; quod probatur ex Philosopho cum ait, opera virtutum esse laudabilia, opera autem contraria esse vituperabilia, vel culpabilia: atqui actus boni sunt actus virtutum, quia virtus est quæ bonum facit habentem, & opus eius bonum reddit, ut dicitur in 2. Ethic. actus autem mali sunt iis oppositi; ergo priores actus sunt laudabiles, & posteriores vituperabiles.

Tum quia ex hoc actus aliquis est laudabilis, aut vituperabilis, quod imputatur agenti, nihil enim est aliud laudari, vel culpari seu reprehendi, quam imputari alicui bonitatem, vel malitiam sui actus: atqui omnis actus bonus, vel malus imputatur agenti, quia cum agat per voluntatem liberam, habet dominium in suos actus, ita ut possit eos elicere, vel non elicere, sicque ei imputatur si eos eliciat. Quare omnis actus ut bonus, est laudabilis, & ut malus vituperabilis.

Nota 1. quod sicut bonum & malum latius patent, quam rectum & peccatum, ut dictum est, quia duo posteriora dicuntur tantum de actionibus, priora vero etiam de aliis rebus; ita rectum & peccatum latius patent, quam laudabile & vituperabile, quia illa habent locum etiam in actibus naturalibus, hæc vero duntaxat in actibus liberis, ut ex dictis constat.

Nota 2. eundem tamen actum humanum esse simul bonum, rectum, & laudabilem, quia est consentaneus naturæ rationali, suæque regulæ, pendetque à libertate: & similiter eundem actum humanum esse malum, peccatum, & vituperabilem, quia disconuenit naturæ, à regula aberrat, & à voluntate libera procedit.

Art. 3. docet actum humanum, in quantum est bonus, vel malus habererationem meriti, vel demeriti. Quod probat, nam actus ut bonus, cadere potest in commodum alicuius particularis personæ, aut communitatis, cuius operans est pars, sicque est meritorius, seu dignus præmio: actus vero malus, quatenus cedit in damnum alterius particularis personæ, aut communitatis, ad quam operans spectat, est demeritorius seu poena dignus. Ut autem hoc clarius percipiatur, quædam notanda sunt ex corpore articuli.

Notandum 1. meritum & demeritum dicere ordinem ad retributionem, quæ fit secundum iustitiam: retributionem autem secundum iustitiam fieri alicui, ex eo quòd agit in profectum, vel nocumentum alterius. Verùm hoc non debet generatim & sine limitatione intelligi, quia etsi ex conuentione operans in commodum alterius, debeat ad æqualitatem compensari ex iustitia, aliàs tamen qui commodum recepit, non nisi ex gratitudine compensationem illi debet pro opere præstito. Multò minùs particularis, cui damnum aliquod illatum est, tenetur ex iustitia compensationem exigere, vel pœnam ei irrogare à quo nocumentum recepit; sed id muneris spectat ad superiorem, qui ex iustitia curare tenetur vt damnum alicui illatum resarciatur.

Notandum 2. cùm quis facit aliquid in commodum, vel nocumentum alicuius in societate constituti, id redundare in totam societatem; sicut qui lædit manum, per consequens lædit hominem. Vnde in actum illius cadit dupliciter ratio meriti vel demeriti, nempe quatenus ei debetur retributio, & à singulari persona quam iuuat vel offendit, & à toto collegio. Quando verò aliquis ordinat actum suum directè in bonum vel malum totius Collegij, debetur ei retributio primò quidem & principaliter à toto Collegio, secundariò verò ab omnibus & singulis Collegij partibus. Quæ verba S. Doctoris aliena non sunt à vulgari hominum existimatione, qui illud frequenter in ore habent, cum sibi neminem deuincire qui in communitatem aliquam beneficium confert: esto illi aduersari videantur.

Art. 4. docet actus bonos, vel malos habere rationem meriti, vel demeriti apud Deum.

Quod probat ex ante dictis, nam actus bonus, quatenus refertur ad Deum vt ad vltimum hominis finem, parit illi gloriam & honorem, eo-que titulo est meritorius alicuius præmij apud ipsum peculiariter, & per se spectatum: quatenus verò etiam cedit in bonum communitatis vniuersi, ea quoque ratione meretur apud ipsum, quatenus est rector & gubernator totius vniuersi, & specialiter creaturarum rationalium. Contrà verò actus malus, quia non potest in Deum referri, fitque in damnum communitatis vniuersi, pœnam apud Deum ex vtroque illo capite meretur.

ARTICVLVS V.

De merito bonorum operum.

VT quæ dicta sunt illustriora euadant, placeat hic breuiter tractare de merito bonorum operum, ad mentem Theologorum, de quo etiam agit S. Thomas 1. 2. quæst. 13. articulis decem. Itaque

Quæritur 1. quænam conditiones ad meritum sint necessariae. Respondeo has vulgò assignari, nempe ex parte actus meritorij, quòd sit liber, fiatque ex gratiæ auxilio; ex parte operantis, quòd sit in statu gratiæ, & viator; & ex parte Dei, quòd adsit promissio de dando præmio ob tale opus. Explico singula

Ex parte operis meritorij requiritur primò libertas, vt patet tum ex multis quæ suprà diximus, agendo de libertate; ibi enim ostendimus ex Hieronymo, Prospero, & Bernardo ad meritum requiri libertatem, & exclusionem necessitatis; quod ex Constitutione Innocentij X.

aliisque non paucis ibidem traditis, efficaciter confirmari potest. Tum quia qui meretur præmium, aliquid suum dat, at homo nihil potest dare tanquam suum, nisi actum liberum; cum in alia dominium non habeat. Tum denique quia sicut nemo puniri solet pro malo, quod vitare non potest; ita nec præmiari pro bono quod ex necessitate patrauit.

Nota, ad meritum non requiri libertatem quoad specificationem inter bonum, & malum, sed sufficere libertatem quoad exercitium actus, & quoad specificationem inter diuersa bona; vt patet exemplo Christi qui liberè agebat, & merebatur, etsi peccare non posset.

Requiritur secundo auxilium gratiæ, vt colligitur tum ex verbis illis Christi Ioan. 15. *Sine me nihil potestis facere*, id est, vt explicant Patres, sine meo auxilio nihil potestis operari, quod ad vitam æternam conducat. Tum ex Conciliis, & Patribus quorum communis vox est, omnia nostra merita esse Dei dona, eiusque gratia præueniri. Tum quia auxilium gratiæ necessarium esse ad opera pietatis, & ad meritum vitæ æternæ, olim statutum est ab Ecclesia contra Pelagianos. Tum quia debet esse aliqua propositio inter meritum, & præmium: quare cum præmium nostrorum operum sit supernaturale, necesse est vt meritum ex aliquo auxilio supernaturali procedat.

Quod attinet ad operantem, ex parte illius requiritur primò status gratiæ, vt patet tum ex Paulo 1. Corinth. cap. 13. vbi fusè docet opera nostra sine charitate, nullius esse pretij: at gratiæ status necessariò includit charitatem. Tum ex Concilio Trid. sess. 6. cap. 16. vbi, in titulo, meritum vocatur fructus iustificationis; & in discursu docetur, vitam æternam esse merce-

dem bonis operibus filiorum Dei reddendam, id est iustorum, qui filij Dei adoptivi dicuntur ratione gratiæ sanctificantis, quæ est perfecta quædam participatio naturæ diuinæ. Tum quia valor operis non tantum sumitur à conditione & natura ipsius operis, sed etiam à circumstantia personæ operantis, ut patet experientia, & satis ex eo intelligitur, quod Deus prius respexit ad Abel, deinde ad munera eius, Genes. 4. Quare ut quis mereatur (saltem de condigno) apud Deum, non sufficit quod opus bonum ex gratiæ auxilio eliciat, sed præterea requiritur ut ipsemet Deo gratus sit, ac proinde sit constitutus in statu gratiæ.

Requiritur secundo status viatoris, ut colligitur ex variis scripturæ locis, addita Patrum, & Theologorum expositione: ut cum dicitur 2. ad Timoth. 5. *Omnes nos oportet manifestari ante tribunal Christi, ut referat unusquisque prout gessit in corpore suo, siue bonum, siue malum.* Et ad Gal. 6. *Cum tempus habemus, operemur bonum ad omnes &c.* Ratio autem sumi debet ex ordinatione Dei, qui non aliis quam viatoribus promisit præmium: cum enim multa opera existentium in Purgatorio, & in cælo sint bona, libera, & supernaturalia; nulla ratio est cur ea non sint meritoria, nisi quia Deus nullum præmium promissit eiusmodi operibus.

Tandem ex parte Dei requiri promissionem ex iam dictis perspicuum est, & præterea probatur, tum quia qui meretur aliquid de condigno, acquirit verum ius ad habendum præmium: at non potest homo verum ius acquirere in gloriam æternam, sine promissione Dei: sicut nequit operarius laborans in vinea patris-familias, habere ius ad obtinendam mercedem ex bonis illius, nisi promissio aliqua, aut pactum inter

illos intercesserit. Tum quia ne quidem ipsa Christi opera fuere meritoria, citra promissionem Dei; aliàs cum ex se haberent dignitatem infinitam, ratione personæ operantis, Christus omnibus hominibus de factò obtinuisset immensam gratiam, & gloriam.

Neque refert quòd opera supernaturalia hominis iusti habeant ex se proportionem quandam cum præmio eiusdem ordinis; in illis enim ratio meriti completur per promissionem Dei, licèt extrinsecam; eo quòd sine illa operans, non potest habere ius ad bona diuina.

Quæritur 2. quænam præmia cadant sub merito. Respondeo 1. peccatorem non mereri de condigno gratiam sanctificantem. Probatum, tum quia antè diximus ad meritum requiri statum gratiæ: quare qui illa caret, eam mereri non potest maximè, quia cum in peccato mortali versetur; Deo est exosus. Tum quia Concilium Trid. sess. 6. cap. 8. docet nos gratistâ Deo iustificari, cuius rationem reddit, quia nihil eorum quæ iustificationem præcedunt, siue fides, siue opera, ipsam iustificationis gratiam promeretur.

Vbi nota hoc procedere de merito, quod vocant condignum; si enim agatur de merito congruo, quod non inducit obligationem, sed congruitatem aliquam seu decentiam, sic fatendum est peccatorem posse mereri gratiam sanctificantem. Quia si per actum contritionis, vel amoris Dei super omnia ad illam, ut potest, se disponat: pietatem Dei maximè decet ut illum in gratiam suam recipiat, eique peccata remittat.

Respondeo 2. iustum posse mereri de condigno augmentum gratiæ sanctificantis. Probatum tum ex Concilio Trid. sess. 6. can. 12. ubi

anathema dicitur ei qui negauerit, iustificatum bonis operibus mereri augmentum gratiæ. Tum quia opus hominis iusti potest habere omnes conditiones ad meritum condignum necessarias, de quibus supra: adeoque vel omnino negandum est dari tale meritum, quod repugnat fidei; vel fatendum id operibus bonis hominis iusti competere, quibus nullum congruentius præmium assignari potest, quàm gratiæ augmentum.

Atque hæc intellige etiam de actibus habitu gratiæ & charitatis remissioribus; siquidem Tridentinum tribuit meritum generatim bonis operibus iusti, quæ ab eo per Dei gratiam & Christi meritum fiunt; cuiusmodi sunt non modò opera bona habitu gratiæ intensiora, sed etiam remissiora.

Deinde, meritum condignum fundatur in dignitate specifica & substantiali operis, quæ petenda est ex ordine ad obiectum illius: ex intensione verò in se spectata, sumi potest tantum quidam accidentarius valor operis. Quòd autem actus sit intensior, aut remissior habitu charitatis, id planè impertinens est ad dignitatem moralem illius: quia aliàs sequeretur actum ut quatuor, esse meritorium in habente gratiam ut tria; actum verò ut nouem, nihil mereri in habente gratiam ut decem, quod certè ridiculum est.

Respondeo 3. iustum non posse mereri siue de condigno, siue de congruo, perseverantiam strictè & adæquarè sumptam. Probatur, nam per perseverantiam sic sumptam, intelligimus omnia auxilia efficacia iusto, à puncto iustificationis collata, quibus à peccato mortali præservatur toto vitæ decursu: at nequit iustus omnia illa auxilia mereri, siue de condigno, siue de

congruo, cùm ad sic merendum prærequiratur auxilium efficax, quod sit causa meriti; ac proinde quod sub illud, saltem de lege ordinaria, non cadat.


Non tamen negamus iustum, iam præuentum auxilio efficaci, posse bene operando aliud auxilium efficax de congruo mereri, & per hoc tertium, sicque deinceps obtinere perseverantiam veluti per partes, & successiue. Dico de congruo, quod enim id non mereatur de condigno, inde patet, quia sic iustus esset certus de sua perseverantia, quantumuis vita illius protrahenda esset: quod admitti non debet.

Ex his collige, non posse iustum de condigno mereri reparationem post lapsum. Quia si non potest sic mereri quandiu iustus est, ne labatur in peccatum mortale: quomodo mereri poterit ut, si in illud labatur, ab eo liberetur? Maximè quia eo ipso quòd lethaliter peccat, omnia illius bona opera ante elicitam mortificationem, ita ut nullum habeant pro eo statu proximum ius iustitiæ apud Deum.

Respondeo 4. probabile esse hominem mereri de condigno primam gloriam per actum contritionis, vel amoris Dei super omnia, quo extra Sacramentum ultimè disponitur ad iustificationem. Probatur, quia alias sequeretur nullum beatum totam gloriam ex meritis consequi, quod parum durum videtur, nec satis cohereret cum Concilio Trid. sess. 6. can. 32. statuente, iustificatum bonis operibus mereri augmentum gratiæ, vitam æternam, & augmentum gloriæ: ibi enim per vitam æternam, non nisi primam gloriam essentialem commodè intelligere potest, cùm eam distinguat ab augmento gloriæ

Nec dicas hoc esse opus peccatoris, etsi enim

tale sit, vt naturâ antecedit gratiam habitua-
lem; vt tamen in sequenti signo naturæ coniun-
ctus est cum illa, & ab ea formatur, sic videtur
habere omnes conditiones ad meritum de con-
digno primæ gloriæ necessarias.



CAPVT VII.

DE PASSIONIBVS IN GENERE.

ARTICVLVS PRIMVS.

De natura passionum.

NOmne passionum hic intelligimus quos-
dam motus seu affectus appetitus sensi-
tium, ex imaginatione boni vel mali ex-
citatos, cum aliqua extraordinaria corporis
commotione, præsertim cordis in quo appeti-
tus prædictus residet: vnde motus illi passiones
appellantur, non quod verè non sint actus qui-
dam, iique vitales, sed quia cum aliqua passio-
ne, seu cōmotione spirituum & sanguinis con-
iunctæ sunt: quo fit vt quia ex tali commotio-
ne interdum ratio turbatur, frequenter pertur-
bationes appellentur. Ad maiorem autem ho-
rum perspicuitatem,

Nota 1. nomen passionis variis modis sumi
apud Philosophos, vt alias monuimus, 1. pro
rei proprietate, quomodo risibilitas dicitur ho-
minis passio. 2. pro mera receptione alicuius
qualitatis, vel alterius rei, quomodo receptio
lucis in aëre dicitur passio, quo etiam sensu in-
telligere, & sentire sunt quoddam pati; quia in-

tellectio recipitur in intellectu, & sensatio in sensu à quo fluit. 3. pro tertia specie qualitatis parum durante, quomodo rubor ex verecundia ortus dicitur passio. 4. pro motu quodam appetitus sensitui, quales sunt amor, gaudium ira, &c. quomodo sumitur à Philosophis Moralibus, & à Theologis quando de Passionibus tractant.

Nota 2. passionem non esse actum cognitionis siue intellectiue, siue sensitue, vt quidam arbitrati sunt: siquidem amare, gaudere, tristari non sunt cognitiones, sed affectiones seu appetitiones, quæ supponunt quidem præuiam cognitionem proportionatam, ab appetitu tamen efficienter eliciuntur.

Nota 3. sicut duplex est potentia cognoscitiua, alia intellectiua, alia sensitua, duplicem quoque esse appetitum, alium intellectiuium, qui voluntas dicitur, alium sensituium; & in utroque hoc appetitu similes excitari motus, seu affectiones amoris, gaudij, tristitiæ, &c. quæ vt oriuntur ab appetitu rationali, dicuntur affectiones, non autem passiones, quia sunt actus omnino spirituales, qui perficiuntur sine organo corporeo; vt autem ab appetitu sensituiuo procedunt, dicuntur propriè passiones, quia sic commotionem aliquam in corpore causant.

Vnde cum amor, gaudium, & alia huiusmodi tribuuntur Deo, & Angelis, ea significant simplicem actum voluntatis, cum similitudine effectus absque passione, vt monet S. Thomas 1. 2. quæst. 22. art. 3. idque probat ex August. lib. 9. de Ciuit. cap. 5. cum ait, Sancti Angeli & sine ira puniunt, & sine miseriæ compassione subueniunt; & tamen istarum nomina passionum consuetudine locutionis humanæ, etiam in eos vsurpantur, propter quandam operum

similitudinem, non propter affectionum infirmitatem.

ARTICVLVS II.*De diuisione passionum.*

Passiones diuiduntur duobus maximè modis, primò ratione subiecti, quomodo diuiduntur in concupiscibiles, & irascibiles; quarum priores dicuntur ferri in obiectum vt est bonum, vel malum sensibile absolute, posteriores verò vt est bonum, vel malum arduum & difficile.

Vbi obseruandum 1. iuxta S. Thomam 1. 2. quæst. 23. art. 1. passiones appetitus concupiscibilis specie distingui à passionibus irascibilis, cuius rationem affert, quia diuersarum potentiarum actus sunt specie diuersi, vt videre, & audire; sed irascibilis, & concupiscibilis sunt duæ potentiæ diuidentes appetitum sensitiuum, vt supponit ex 1. p. quæst. 81. art. 2. ergo cum passiones sint motus appetitus sensitiui, passiones quæ sunt in irascibili erunt aliæ secundum speciem, ab iis quæ sunt in concupiscibili. Hæc tamen ratio multis non probatur, cum ex communiori, & probabiliori sententia Philosophorum, appetitus concupiscibilis non sit potentia realiter distincta ab irascibili.

Obseruandum 2. quando dicimus passiones concupiscibiles versari circa bonum, vel malum absolute, irascibiles verò circa bonum vel malum difficile & arduum, hoc posterius non ita intelligendum esse, vt sensus sit difficultatem ipsam appeti; hæc enim habet rationem quandam inconuenientis & mali, adeoque non po-

test esse per se obiectum appetitionis, sed potius auersionis. Itaque sensus est per passiones appetitus irascibilis tolli difficultates, quæ in boni persecutione, vel mali propulsatione reperiuntur.

Obseruandum 3. passiones diuidi per concupiscibiles, & irascibiles, non quod non alius sit actus appetitus quam concupiscere, & irasci, sed quia res nominantur secundum quod nobis innotescunt, concupiscentia autem & ira magis nobis innotescunt quam aliæ passiones: quare non mirum est quod ab iis potius quam ab aliis passionibus appetitus concupiscibilis, & irascibilis denominentur, ut monet S. Thomas 1. 2. quæst. 25. art. 2. & 3. ad 1.

Secundò passiones diuiduntur ratione obiecti, quod aliæ versentur circa bonum prosequendum, aliæ circa malum fugiendum. Quod ita accipiendum est, ut inter passiones appetitus concupiscibilis aliæ sint quæ bonum appetant, aliæ quæ malum fugiant; & similiter inter passiones appetitus irascibilis, ut postea declarabitur. Vnde S. Thomas 1. 2. quæst. 23. art. 1. ait ad cognoscendum quæ passiones sunt in irascibili, & quæ in concupiscibili, assumendum esse obiectum vtriusque potentiae; obiectum autem concupiscibilis esse bonum, vel malum simpliciter acceptum, quod est delectabile, vel dolorosum: obiectum verò irascibilis esse bonum, vel malum quatenus habet rationem ardui vel difficilis.

Quo loco duo aduertenda sunt ex art. 2. quæstionis iam citatæ, 1. in passionibus concupiscibilis esse contrarietatem secundum obiecta tantum, nam obiectum concupiscibilis est bonum, vel malum sensibile absolutè, bonum autem ut bonum non potest esse terminus ut à

quo, sed tantum ut ad quem, quia nihil refugit bonum ut sic, sed omnia appetunt ipsum; similiter nihil appetit malum ut malum, sed omnia fugiant ipsum, adeoque malum ut sic, non habet rationem termini ad quem, sed tantum termini à quo: unde amor, desiderium, & gaudium quæ tendunt in bonum, distinguuntur tantum ratione obiecti ab odio, fuga, & tristitia quæ in malum feruntur.

Aduertendum 2. in passionibus irascibilis esse contrarietatem, non modo secundum obiecta, sed etiam secundum accessum, & recessum ab eodem termino. Siquidem obiectum irascibilis est sensibile bonum & malum, non absolute, sed sub ratione difficultatis vel arduitatis: bonum autem arduum siue difficile habet rationem ut in ipsum tendatur, in quantum est bonum, quod pertinet ad passionem spei, & ut ab ipso recedatur, in quantum est arduum & difficile, quod pertinet ad passionem desperationis. Similiter malum arduum habet rationem ut vitetur, in quantum est malum, & hoc pertinet ad passionem timoris, habet etiam rationem ut in ipsum tendatur, sicut in quoddam arduum, per quod scilicet aliquid euadit subiectionem mali, & sic tendit in ipsum audacia. Unde in passionibus irascibilis inuenitur contrarietas, tum secundum rationem boni & mali, ut inter spem & timorem; tum secundum accessum & recessum ab eodem termino, ut inter audaciam & timorem.

Verum contra id quod iam ex S. Thoma supposuimus, passiones irascibiles versari in arduis obiici potest homines plerumque irasci ob causam facile superabilem, ut cum superior irascitur inferiori, quem sine ullo negotio in officio continere potest. Respondeo hoc posse concia-

liari cum sententia S. Thomæ, quia cum ait passionibus irascibiles versari in arduis, id non debet ita intelligi, ut semper & in omni euentu versentur in arduis, sed quod repellere malum, & de eo vindictam sumere, sit ex suo genere quid difficilius, quam simpliciter bonum amare, vel malum odio prosequi.

ARTICVLVS III.

De numero passionum,

VNdecim passiones vulgò assignantur, quarum sex priores spectant ad appetitum concupiscibilem, & quinque posteriores ad irascibilem. Prima est amor, secunda odium, tertia desiderium, quarta fuga, quinta gaudium seu delectatio, sexta tristitia, septima spes, octaua desperatio, nona audacia, decima timor, vndecima ira. Quarum omnium numerus sufficienter sic colligi potest.

In primis, quod spectat ad sex passiones appetitus concupiscibilis, quæ versantur circa bonum vel malum, earum sufficiens distributio hoc modo ostenditur. Bonum tribus modis apprehendi potest, vel absolute & secundum se, abstrahendo à præsentia, vel absentia illius, vel ut præsens, vel ut futurum. Si spectetur secundum se, sic amor in illud fertur; si ut præsens, gaudium; si ut futurum, desiderium. Et similiter odium est de malo secundum se spectato, tristitia de præsentem, & fuga de futuro, iamque imminente.

Nec refert quòd interdum gaudeamus de bono præterito, tunc enim bonum non consideratur ut præteritum est, sed ut sit præsens per

cogitationem : quo etiam modo triftari poffumus de malo præterito , vt de peccatis præteritis, & per pœnitentiam remiffis; quatenus fiunt nobis præfentia per cogitationem.

Quod verò attinet ad quinque paffiones appetitus irafcibilis , earum numerus in hunc modum concluditur. Bonum arduum vel apprehenditur vt poffibile , vel vt impoffibile , primo modo generatur fpes, fecundo desperatio. Et fimiliter fi malum arduum apprehenditur vt facile euitabile , generatur audacia; fi vt difficile euitabile , timor. Quòd fi malum iam fit præfens, & illatum, excitatur ira, feu appetitus vindicandi malum illud, rependendo aliud.

Ex quibus collige , omnes paffiones appetitus concupifcibilis habere contrarium , amori enim opponitur odium , defiderio fuga, gaudio triftitia; itemque quatuor priores paffiones appetitus irafcibilis , nam fpei opponitur desperatio , & audaciæ timor; fupereffe verò vltimam omnium paffionum nempe iram , cui nullum contrarium affignatur.

Neque dicas 1. iræ , quæ eft appetitus reddendi malum pro malo, opponi appetitum reddendi bonum pro bono; etenim velle ei benefacere à quo beneficium acceperis, nihil habet ardui, adeoque non fpectat ad obiectum irafcibilis , fed ad obiectum concupifcibilis reduci debet , poteftque dici defiderium.

Neque dicas 2. patienter ferre malum illatum, effe actum iræ oppofitum, non enim actus ille eft appetitus fensitiui, fed rationalis, ad quem fpectat motiones reprimere fensitiui , & rationem aliquam boni in mali perpeffione diligere, ad quam vires fensitiuæ pertingere nequeunt.

Neque dicas 3. manfuetudinem opponi iracundiæ, nam manfuetudo vel fumitur pro mera

priuatione iræ, sicque non est affectus ei oppositus, cum affectus sit quid reale & positium; vel pro ira remissa, qua ratione mansuetudo non magis opponitur iræ, quam calor remissus intensio.

Quo loco obseruandum est, plures quam vndecim passiones à nonnullis assignari, quæ tamen ad prædictas reduci possunt, v. c. fiducia ad spem, inuidia & misericordia ad tristitiam, verecundia ad timorem, excandescencia ad iram, & sic de aliis.

ARTICVLVS IV.

De moralitate passionum.

Quæritur 1. quomodo passiones se habeant ad bonitatem & malitiam. Respondeo eas ex se neque esse bonas, neque malas, sed quatenus subiacent imperio rationis & voluntatis, posse esse bonas, aut malas. Ita sumitur ex S. Thoma 1. 2. quæst. 24. art. 1. ubi docet passiones dupliciter considerari posse, primò secundum se, seu prout sunt quidam motus irrationalis appetitus; secundò quatenus subiacent imperio rationis & voluntatis: ac primò quidem modo in eis non esse bonum, aut malum morale, quia hoc à ratione dependet; secundo verò modo esse, si enim bonum aut malum morale reperitur in actibus membrorum, quatenus sunt voluntarij, à fortiori dicendum est bonum aut malum morale reperiri in passionibus, quatenus sunt voluntariæ; eo quòd appetitus sensitiuus magis accedit ad rationem & voluntatem, quam membra externa.

Et hoc totum confirmatur, nam in primis

quòd passiones secundum se nec sint bonæ, nec malæ, inde perspicuum est, quia cùm sint actus appetitus sensitivi, nobis sunt communes cum brutis, in quibus nec bonitas, nec malitia Moraliter reperitur.

Deinde quòd passiones, vt subiacent imperio rationis & voluntatis libertati, interdum sint bonæ, manifestum est tum ex verbis illis Psalmi 4. *Ira sumini, & nolite peccare*; tum quia cùm passiones sint naturales, erant in Christo, licet communiter non vocentur in illo passiones, sed propassiones, quatenus passio sumitur in malam partem, pro motu rationem præueniente, & ad malum trahente. At dubium non est quin eiusmodi motus essent in Christo boni & Sancti, vt cùm Matth. 25. cœpit contristari, & mœstus esse; & quando Phariseos circumspexit cum ira, vt habetur Marci 3.

Quòd verò passiones nonnunquam & plerumque sint malæ, id clarius est quàm vt probatione indigeat, cum sæpe ferantur in obiectum malum, nec à voluntate prohibeantur cum insurgere incipiunt, vel quod peius est ab ea imperentur: vt cùm quis ex ira aliquem interficit. Si enim actus externus homicidij, vt fit manu per motionem voluntatis, malus est, à fortiori mala est ira in talem actum voluntarie prorumpens: eo quod appetitus sensitivus magis accedit ad voluntatem, illiusque libertatem participat, quàm manus.

Quæritur 2. an passiones repugnent viro sapienti. Respondeo negatiuè: probatur ex dictis, nam cùm passiones ex natura sua sint indifferentes, eatenus non repugnant sapienti, cumque possint esse bonæ, eo sensu sunt illi consentaneæ. Confirmatur, nam si Christus omnium hominum sapientissimus, & nullius peccati ca-

pax, passiones omnes per se spectatas habuit; quis credat eas Philosopho quantumvis sapiente indignas esse?

Imò sanè ille sapiens non est, qui naturam humanam omnibus affectibus humanis spoliat, quales sunt amare, gaudere, sperare, timere, &c. Eo vel maximè quia si passiones tollantur, eas virtutes morales concidere necesse est, quæ in moderandis passionibus occupantur. Quare sicut corporis sanitas non consistit in extinctione primarum qualitatum, sed in debita earum temperie & proportionem, ita sanitas animi non consistit in expulsionem passionum, sed in debita earum moderatione.

Hinc refelluntur Stoici qui existimabant passiones non cadere in virum sapientem, putabant enim omnes passiones esse malas, ideoque eas vocabant morbos animi, ex quo sequebatur iis affectos non esse sanos, sed insanos seu non sapientes. Verùm etsi consequenter loquerentur, fundamentum tamen cui innitebantur, ruinofum erat, cum passiones ex se nec sint bonæ nec malæ, possintque bonitatem vel malitiam inducere, ut ostensum est.

Vnde S. Thomas quæst. citata art. 2. arguit Tullium, eo argumento reprobantem passionum mediocritatem à Peripateticis assertam, quia omne malum etiam mediocre vitandum est. Nam sicut corpus vel mediocriter ægrum, sanum non est, sic mediocritas morborum, vel passionum animæ sana non est. Hæc enim ratio falsò supponit, passiones esse ex se malas; cum malæ non sint, nisi quatenus carent moderamine rationis.

Ex dictis etiam refelluntur Stoici, quatenus existimabant omnem passionem minuire actus bonitatem: licet enim hoc verum sit, accipiendo passiones

passiones pro motibus inordinatis appetitus sensitui, secus tamen dicendum est de iis per se spectatis, cum sint ut sic indifferentes, & ad bonum flecti possint: qua ratione bonitatem augent, tantum abest ut illam minuant. Quia ut docet S. Thomas art. 3. Cum hominis bonum consistat in ratione, sicut in radice, tanto istud bonum erit perfectius, quanto ad plura quæ homini conueniunt, deriuari potest. Vnde sicut ad maiorem humani boni perfectionem pertinet, quod homo per membra externa bonum operetur, ita & quod ad bonum moueatur secundum appetitum sensituum.

Quo loco aduerte ex resp. ad 1 & ad 3. passionem se habere dupliciter ad iudicium rationis, vno modo antecedenter, qua ratione minuit bonitatem vel malitiam actus; alio modo consequenter, idque vel per modum redundantia, quatenus pars inferior sequitur motum intentum superioris, quomodo passio est signum intensiōis actus voluntatis siue boni, siue mali; vel per modum electionis, quando ex ratione passio excitatur ad facilius operandum; quomodo passio addit aliquid ad bonitatem, vel malitiam actus.

ARTICVLVS V.

De ordine passionum quoad generationem.

Respondeo & dico 1. *Passiones appetitus concupiscibilis per se loquendo, & spectata rei natura, esse priores passionibus appetitus irascibilis.* Probatur, quia illæ passiones sunt priores quoad generationem, quarum obiectum est prius: atqui obiectum passionum concupiscibilis.

Ethica.

N

bilium est prius obiecto irascibilem, siquidem illæ feruntur in bonum vel malum simpliciter, hæ verò in bonum vel malum, sub ratione ardui & difficilis: at prius est & simplicius bonum vel malum simpliciter, quàm bonum arduum & difficile.

Hoc autem indefinitè intelligendum est, ita scilicet ut aliquæ passiones appetitus concupiscibilis sint priores omnibus passionibus irascibilis. Quòd enim non omnes sint priores, inde patet, quia ex boni adeptione oritur gaudium, & ex malo non euitato, tristitia; præcedit autem boni adeptionem spes, ut pote quæ difficultatem illius adipiscendi superavit ut mali præsentiam timor, qui frustra illud declinare tentavit: vnde spes præcedit gaudium, & timor tristitiam.

Dico 2. *Inter passiones appetitus concupiscibilis, eas quæ feruntur in bonum, esse priores illis quæ in malum tendunt.* Et idè dic de passionibus appetitus irascibilis inter se collatis. Prius enim appetitus prosequitur bonum, quàm fugiat malum; cum malum non fugiat, nisi quia priuat bono amato.

Vbi nota, hoc non debere intelligi generatim de omnibus passionibus in bonum tendentibus, sed indefinitè de nonnullis, maximè de amore, qui est aliarum omnium radix. Quòd enim non omnes necessariò præcedant, inde manifestum est, quia sæpe ex amore & desiderio boni, oritur odium erga personam quæ illius adeptionem impedit: esto hoc impedimentum vineatur, & sequatur delectatio.

Dico 3. *Inter passiones appetitus concupiscibilis quæ feruntur in bonum, primam esse amorem, secundam desiderium, tertiam gaudium.* Primò enim appetitus, cognita rei bonitate, amat illam, deinde illius possessionem desiderat, ac tandem de ea

adepta delectatur. Quia ut docet S. Thomas 1. 2. quæst. 25. art. 2. omne quod tendit ad bonum seu finem, primò habet proportionem ad illum, nihil enim tendit in finem non proportionatum; secundò mouetur ad finem, ut illum consequatur; tertio quiescit in fine post eius consecutionem. Ipsa autem aptitudo siue proportio appetitus ad bonum, est amor, qui nihil est aliud quàm complacentia boni; motus autem ad bonum est desiderium vel concupiscentia; & quies in bono est gaudium, vel delectatio. Et ideo amor præcedit desiderium, & hoc delectationem.

Atque idem ordo statuendus est inter passionem concupiscibiles his oppositas, quæ in malum feruntur. In primis enim malum apprehensum excitat odium, tum fugam, ac tandem tristitiam. Quia prius spectatur secundum se, deinde ut absens, ac ultimò ut præsens.

Dico 4. *Inter passionem irascibiles, quæ in bonum tendunt, primò numerari spem, secundò desperationem.* Sicut enim amor per se est prior odio, ita spes est prior desperatione, quia ut ait S. Thomas art. 3. spes est motus in bonum secundum rationem boni, quod ex sua ratione est attractivum, & ideo est motus in bonum per se. Desperatio autem est recessus à bono, qui non competit bono secundum quod est bonum, sed secundum aliquid aliud, unde est quasi per accidens: at quæ sunt per se, sunt priora iis quæ sunt per accidens, adeoque spes est prior desperatione.

Dico 5. *Inter passionem irascibiles, quæ in malum tendunt, primo loco ponendam esse audaciam, secundo timorem, tertio iram.* Siquidem audacia sequitur spem victoriæ, & timor desperationem vincendi, ut ait S. Thomas ibid. quare sicut spes

desperationem præcedit, ita & audacia timori præmittenda est. Denique cum malum per timorem vinci non potest, insurgit ira ad vindictam de malo immisso sumendam.

Verum hic aduertendum est, quæ hætenus dicta sunt intelligenda esse de ordine generationis, qui passionibus spectata rei natura, & per se loquendo magis congruus videtur. Quod non impedit quin per accidens, ut variis modis obiecta occurrere possunt, non raro eueniat ordinem illum non seruari: ut v. c. cum quis ex ira incitatur ad amorem, & desiderium obtinendi alicuius boni, ad vindictam sumendam necessarij: aut cum tentato audaciter aliquo periculo, sperat se non modo illud euasurum, sed etiam bono eximio, quod illi innotescere incipit, potiturum. Sic enim ira est causa amoris, & desiderij, & audacia spei ac delectationis; cuius tamen oppositum, spectata rei natura, iuxta resolutiones allatas contingere solet.

ARTICVLVS VI.

De ordine perfectionis inter passiones.

Respondeo & dico I. *Passiones appetitus concupiscibilis esse, per se loquendo, perfectiones passionibus appetitus irascibilis.* Ratio est, quia hæ ad illas ordinantur, ut ex eo constat, quia eo fine difficultates quæ bonum circumstant, per appetitum irascibilem amouentur, ut concupiscibilis in illius possessione suauiter quiescat. Ex qua ratione illud saltem colligitur, quasdam passiones appetitus concupiscibilis esse præstantiores omnibus passionibus appetitus irascibilis.

Dico 2. *Passiones appetitus concupiscibilis, quæ consistunt in prosecutione boni, esse us præstantiores quæ in auersione mali posita sunt.* Ratio est, quia ille actus per se loquendo est præstantior, qui nobilius habet obiectum: at passiones quæ versantur in boni prosecutione, habent nobilius obiectum, quàm ex quæ malum effugiunt: ergo sunt præstantiores. Minor probatur, quia priores passiones directè tendunt in bonum propter se, posteriores verò malum fugiunt, quia est priuatio boni: at bonum est obiectum nobilius quàm priuatio boni.

Confirmatur, nam illud est perfectius, in quod appetitus per se loquendo, ardentius fertur; at appetitus ardentius tendit in bonum, quàm recedat à malo, vt colligi potest ex motu rerum naturalium, quæ ideo velocius mouentur in fine motus, cum accedunt ad terminum sibi conuenientem, quàm in principio cum recedunt à termino sibi disconueniente: quia vt obseruat S. Thomas 1. 2. quæst. 35. art. 6. natura magis tendit in id quod est sibi conueniens, quàm fugiat id quod est sibi repugnans.

Dico 3. *Inter affectus concupiscibilis in bonum tendentes, eos videri perfectiores qui proximius se habent ad obiectum.* Siquidem alij ad eos ordinantur, vt amor ad desiderium, & vtrumque ad delectationem. Confirmatur, nam vt in motu, ita in progressu passionum tria considerari debent, in primis principium motus, secundo motus ipse ad terminum, tertio quies in termino. Et quidem amor se habet vt principium motus, quia sicut lapis per suam grauitatem naturaliter inclinatur ad motum deorsum, ita appetitus per amorem, vt per pondus aliquod, impellitur ad desiderium rei amata; at desiderium se habet velut quædam tendentia, & excursus seu motus

in bonum amatum; delectatio verò est veluti quies in termino iam adepto, seu in possessione rei amatae & quaesitae. Itaque sicut quies in termino est perfectior motu, & principio motus, ita delectatio est perfectior desiderio, & amore.

Dico 4. *Affectus in malum tendentes eundem inter se ordinem habere, quem affectibus in bonum concessimus.* Probatur ob paritatem rationis, nam sicut se habet amor ad desiderium, & desiderium ad delectationem; ita proportionem seruata se habet odium ad fugam, & fuga ad tristitiam: quare sicut amor cedit desiderio, & desiderium delectationi; ita odium cedit fugae, & fuga tristitiae.



CAPVT VIII.

DE PASSIONIBVS IN SPECIE.

ARTICVLVS PRIMVS.

De amore, & odio.

QVaritur 1. quid sit amor. Respondeo amare ex Arist. 2. Rhetor. cap. 4. & ex S. Thoma 1. 2. quaest. 26. art. 4. nihil aliud esse quam velle alicui bonum: vnde colligitur amorem esse actum quo volumus alicui bonum. Verum cum hic praecipue agatur de amore, ut est passio appetitus concupiscibilis, qua ratione nomen volitionis non nisi improprie illi competit, congruentius ij loqui videntur, qui amorem eo modo sumptum definiunt, actum appetitus sensitiui quo animal fertur in bonum absolute spectatum.

Dicitur 1. actus, quomodo distinguitur à mera passione seu receptione; amare enim est vitaliter agere, seu actum vitæ elicere. 2. dicitur actus appetitus sensitivi, qua ratione distinguitur ab actibus aliarum omnium potentiarum, etiam ab amore voluntatis. 3. dicitur versari circa bonum, quomodo distinguitur ab iis actibus appetitus sensitivi qui in auersione mali consistunt. 4. denique illius obiectum dicitur bonum absolute spectatum, ut distinguitur ab aliis actibus eiusdem appetitus in bonum tendentibus: quædam enim feruntur in bonum ut absens, alia in bonum ut præsens, amor verò in bonum simpliciter, abstrahendo ab illius præsentia, vel absentia. Verum ne à communi more discedamus, de amore latius spectato nonnulla scitu digna in sequentibus quæsitis subiicimus. Itaque

Quæritur 2. quotuplex sit amor. Respondeo varias à nonnullis hic afferri amoris diuisiones, prima est in amorem diuinum, angelicum, humanum, animale, & naturalem; sumpta diuisione ex variis subiectis in quibus amor reperitur. Amor diuinus ille est qui Deo, angelicus qui Angelis, humanus qui hominibus, animalis qui animalibus & naturalis valde improprius, qui rebus cognitione carentibus competit.

Vbi obserua varia discrimina inter amorem naturalem, & sensitiuum. 1. quod naturalis sequitur formam naturalem, sensitiuus verò formam cognitione apprehensam. 2. quod naturalis non est actus elicitus, amor enim quo lapis fertur in centrum suum, non est quid distinctum ab illius grauitate; amor verò sensitiuus est actus elicitus ab animali, & ab illius appetitu realiter distinctus. 3. quod res naturales eadem inclinatione quatendunt in bonum suum, fugiant malum sibi contrarium, ut lapis eodem

pondere quo fertur in locum inferum, discedit à loco superno; animalia verò cum ex præiacente cognitione operentur, sicut bonum sibi conueniens apprehendendo, in se excitant actum prosecutionis & amoris; ita cum malum sibi disconueniens apprehendant, actum auersionis & odij ab amore realiter distinctum eliciunt.

Secunda diuisio est in amorem amicitiae, & amorem concupiscentiae, quæ sumitur ex S. Thoma 1. 2. quæst. 26. art. 4. ubi ait, cum amare sit velle alicui bonum, motum amoris in duo tendere, scilicet in bonum quod quis vult sibi, & in illud cui vult bonum; & ad illud bonum quod quis vult alteri; haberi amorem concupiscentiae; ad illud autem cui aliquis vult bonum, haberi amorem amicitiae.

Verum hæc non est diuisio amoris in duos actus realiter distinctos, sed eiusdem actus penes duos respectus ad diuersa obiecta partialia, duasque denominationes inde ortas: amare enim est velle alicui bonum, quo ipso idem actus amoris terminatur ad bonum volitum, & ad personam amatam: quia quisquis vult bonum, illud vult alicui, vel sibi, vel alteri; & vice versa quisquis amat aliquem, eo ipso vult illi bonum: vnde idem realiter amoris actus habet habitudinem ad personam amatam, sicque dicitur amor amicitiae, & ad bonum volitum, qua ratione est amor concupiscentiae.

Tertia diuisio amoris est in amorem affectiuum, & effectiuum; amor affectiuus est interna volitio boni quod alicui optatur, amor verò effectiuus est illius volitionis effectus: Qua ratione dici potest eum amare Deum effectiue, qui seruat illius mandata: verum hæc diuisio est valde impropria, cum amare sit velle bonum, non autem aliquid externum facere, adcoque

omnis amor sit propriè affectiuus, vtpote in affectu voluntatis consistens.

Quæritur 3. quænam sint causæ amoris. Respondeo quatuor illius causas afferri à S. Thoma 1. 2. quæst. 27. quarum primam tradit art. 1. vbi docet bonum esse causam amoris; quod probat, quia cum appetitus sit potentia passiva, obiectum comparatur ad ipsum, vt causa motus seu actus ipsius: quare oportet vt illud sit propriè causa amoris, quod est obiectum amoris: amoris autem proprium obiectum est bonum, quia amor importat quandam connaturalitatem & complacentiam amantis ad amatum, vnicuique autem bonum est id quod sibi est connaturale & proportionatum.

Vbi nota 1. hanc rationem non ita intelligi debere, vt appetitus sit potentia merè passiva respectu passionum, eas enim effectiue in se producit, sed eo sensu dicitur potentia passiva, quia trahitur quodammodo ab obiecto, quod habet vim in eo varios passionum motus excitandi, non Physicè, sed moraliter, seu per modum finis.

Nota 2. ad hanc causam posse reduci pulchrum, siquidem pulchritudo magna est amoris conciliatrix: vnde amor per eos sensus maximè se insinuat, quibus pulchritudo percipitur, nempe per visum, & auditum: eorum enim obiecta pulchra dicuntur, puta colores pulchri, musica pulchra, quia in iis quædam gratia & venustas deprehenditur. Cuius oppositum contingit in obiectis aliorum sensuum; vnde non dicimus pulchros odores, vel sapores, sed suaves, gratos, &c.

Neque dicas nihil amari nisi bonum, pulchrum autem à bono distingui: non enim distinguitur ab illo nisi per rationem, vt monet S.

Doct̃or in resp. ad 3. Cū enim bonum sit, quod omnia appetūt, de ratione boni est, quod in eo quiesceret appetitus : de ratione verò pulchri est, quod in eius cognitione appetitus quiescat : quare pulchrum non excludit rationem boni, sed supra illam addit quendam ordinem ad vīm cognoscitiuam ; quo fit vt cū amatus pulchrum, bonum etiam diligatur.

Secundam affert art. 2. vbi docet, cognitionem esse causam amoris, quod probat, quia bonum est causa amoris per modum obiecti, bonum autem non est obiectum appetitus, nisi prout est apprehensum: quare etiam boni apprehensio est causa amoris : vnde Aristoteles ait lib. 9. Ethic. cap. 5. & 12. visionem corporalem esse principium amoris sensitiui, & similiter contemplationem spiritualis pulchritudinis, vel bonitatis esse principium amoris spiritualis.

Verū hęc ratio non ita debet intelligi, vt cognitio sit propriè causa amoris, sed tantū vt sit conditio pręrequisita ad amorem ; quia nihil volitum quin aliqua ratione pręcognitum, vt vel ipsa experientia constat. Dico aliqua ratione, nam etsi cognitio aliqua pręcedere debeat amorem, non tamen necesse est vt æqualem habeat intensiōem ; vt ex eo patet quod multi in hac vita valde exiguam de Deo cognitionem habent, qui tamen illum intensè diligunt.

Tertiam tradit art. 3. vbi ait, similitudinē esse causam amoris, quod probat, quia ex hoc quod aliqui duo sunt similes, quasi habentes vnā formā, sunt quodam modo vnum in forma illa: sicut duo homines sunt vnum in specie humanitatis, & duo albi in albedine, & ideo affectus vnius tendit in alterum, sicut in vnum sibi, & vult ei bonum sicut & sibi, sicque si-

similitudo est causa amoris.

Hoc tamen ita intelligendum est, ut morum, studiorum, officiorum similitudo amorem per se loquendo conciliet, nam interdum per accidens contingit, ut similitudo invidiam & odium generet, ut faciliè euenit quando bonum vnius ab alio impeditur: quo refertur vulgatum illud, *figulus figulo inuider.* Et sanè cum homines plerumque magis ament seipsos, quam alios, eo quod quisque sibi vnus est in substantia, alteri vero in similitudine alicuius formæ duntaxat, mirum videri non debet quòd quis alium odio habeat, si impropria similitudo quæ est inter illos, causa est cur ipse proprium bonum non consequatur, ut monet S. Doctor eodem art. 3. ante citato.

Quartam affert art. 4. vbi ait, aliquam aliam passionem esse posse causam amoris alicuius, licet non vniuersalem omnis amoris. Quod probat, quia omnis alia passio importat motum in aliquid, vel quietem in aliquo; vtrumque autem ex quadam connaturalitate vel coaptatione procedit, quæ pertinet ad rationem amoris; vnde impossibile est quod aliqua alia passio sit causa omnis amoris. Contingit tamen aliquam aliam passionem esse causam amoris alicuius, ut cum aliquid amatur ob delectationem; & cum quis ex desiderio habendi pecuniam, eum amat à quo pecuniam recipit. Tunc enim delectatio & desiderium, etsi ex amore aliquo procedant, sunt causa alterius amoris.

Potest addi quinta, eaque satis nota amoris causa, nempe amor: vix enim fieri potest ut eum non redames, à quo te amari nosti; quia ut ait præclare Aug. nulla est maior inuitatio ad amandum, quam præuenire amando, & nimis durus est animus, qui si amorem non vult im-

pendere, nolit rependere. Vnde amor dicitur
magnes amoris, quia sicut magnes ferrum, ita
amor amorem excitat, & ad se trahit, iuxta il-
lud Senecæ epist. 9. *Monstrabo tibi amatorium sine*
venedimento, sine ullius venefica carmine: si vis ama-
ri, ama: Et illud Martialis

Hoc non fit verbis Marce, ut ameris, ama.

Quæritur 4. quinam sint amoris effectus. Re-
spondeo eos esse multiplices, & traduntur à S.
Thoma loco citato quæst. 28. per varios arti-
culos. Et quidem art. 1. docet vnionem esse ef-
fectum amoris, quatenus amans aliquem eo
amore impellitur vt desideret, & quærat præ-
sentiam illius, quasi aliquid sibi conueniens, &
ad se pertinens. Vnde distinguenda est triplex
vnio in amore ex resp. ad 2. quarum prima est
vnio similitudinis, secunda vnio per coopta-
tionem affectus, tertia vnio realis qua amans
realiter coniungitur rei amatae. Et inter has v-
niones prima est causa amoris, vt patet ex di-
ctis: secunda est amor ipse, siquidem amare ali-
quem est illi coniungi per affectum, & amor est
formaliter quidam nexus, & vinculum inter
amantem & amatum; vnde & communiter di-
citur vis vnitiua, potius tamen vniciens dici de-
bet, cum amor sit actus vitæ, amantem cum a-
mato actualiter coniungens. Tertia denique
vnio est amoris effectus, quia qui alicui per af-
fectum iunctus est, optat etiam realiter illi con-
iungi, fruendo eius præsentia, & colloctione.
Verum hæc vnio realis iam pertinet ad gau-
dium vel delectationem, quæ sequitur deside-
rium, vt patet ex S. Doctore quæst. 25. art. 2:
ad 2.

Articulo 2. docet mutuam inhesionem esse
effectum amoris, ita scilicet vt per amorem fiat
non solum personam amatam esse in amante,

sed etiam amantem in amata. Est quidem per amorem persona amata in amante, quatenus amans perpetuò cogitat de illa, & ex intimo cordis affectu complacet in illa, sicque eam intra se habet per cogitationē & amorem. Amans verò est in persona amata, quatenus singula quæ ad illam spectant, diligenter scrutatur, illiusque bona, & damna inspicit tanquam sua, & illam tanquam seipsum: ita ut veluti idem factus cum illa, iisdem bonis, vel malis affici videatur.

Vbi nota hoc procedere de amore, etsi nulla sit redamatio ex parte personæ amatæ: quod si persona amata amantem redamet, sicque inter illas vera sit amicitia, tunc mutua inhaesio inter illas facilius intelligitur; quatenus qui se mutuò amant, de se etiam mutuò cogitant, sibi que invicem bona optant, & procurant.

Art. 3. docet ecstasim esse effectum amoris, ille enim dicitur ecstasim pati, qui extra se ponitur, siue per vim apprehensivam, siue per appetitivam: hoc autem contingit in amore, nam qui alterum intensè amat, de illo frequentius quàm de seipso cogitat, bonum etiam illius non minùs quàm proprium diligit & curat, sicque quodammodo extra se positus videtur. Verùm hic effectus sic explicatus non satis videtur distinguì à præcedenti, ut consideranti patebit. Quare per ecstasim intelligendam puto quandam insolitam abstractionem à sensibus, ortam ex nova admiratione bonitatis, aut pulchritudinis rei amatæ, qua fiat ut amans velut è seipso prodiens, nihil cogitet, aut velit præter rem amatam; sicque spiritibus & calore ad cerebrum auocatis, potentiæ interiores propriis functionibus nonnisi languide, & imperfectè vacent.

Art. 4. docet zelum esse effectum amoris in-

senſi, quia quāto aliqua virtus intenſius tendit in aliquid, tantō fortiùs repellit quidquid ſibi contrarium eſt: at qui amor eſt quidam motus in amatum, quare cū intenſus eſt, intendit excludere omne id quod ſibi repugnat. Et hic effectus remouendi contraria amori, vocatur zelus. Vnde viri dicuntur zelare proprias vxores, quando repellere conantur quidquid earum quietæ poſſeſſioni opponitur; & ille dicitur zelare pro amico, qui repellere ſtudet quæ contra bonum illius fiunt.

Art. 5. docet amorem formaliter ſpectatum, vt eſt actus appetitiuæ virtutis, non eſſe læſiuum, quia ſic dicit coaptationem quandam ad bonum ſibi conueniens. Spectatum tamen materialiter, quatenus coniunctus eſt cum corporis immutatione, læſionem aliquam in amante cauſare poſſe. Siquidem ex nimio amore oriri morbum ictericum, aliasque ægrotudines, & interdum inſaniam, ac mortem denique ipſam, vel ipſa experientia ſatis ſuperque comprobatur.

Notat tamen in reſp. ad argumenta, quatuor eſſe effectus amoris formaliter accepti, ſecundum habitudinem virtutis appetitiuæ ad obiectum, nempe liquefactionem, cui opponitur congelatio, delectationem ſeu fruitionem, triftitiam ſeu languorem, & feruorem. Per liquefactionem enim cor emollitur, vt aptum fiat ad amatum intra ſe recipiendum, ex quo colligit congelationem eſſe diſpoſitionem amori repugnantem, vtpote per quam cor duratur & conſtringitur, ne quid facile intra ſe admittat. Quod ſi res amata eſt præſens, cauſatur delectatio ſeu fruitio; ſi abſens, cauſatur triftitia ſeu languor, & feruor, ſeu intenſum deſiderium conſequenti illam. Verū addit S. Doctor in paſſione

amoris produci quosdam effectus his proportionatos, secundum immutationem organi.

Tandem art. 6 concludit generatim, amorem esse causam omnium quæ amans agit, quia omne agens agit propter finem aliquem, finis autem est bonum desideratum, & amatum vnicuique, unde sequitur omne agens quidquid agit agere ex aliquo amore. Hoc autem non debet intelligi de amore, ut est passio, quia certum est hominem non agere quidquid agit, ex passione, cum alia ex electione, alia ex ignorantia efficiat, sed generatim de amore secundum se, ut complectitur omnem amorem.

Quæritur 5. quid dicendum sit de odio quoad naturam, diuisionem, causas, & effectus illius.

Respondeo & dico 1. *Odiū esse passionem appetitus sensitī, quæ malum respicitur simpliciter ut malum est, id est quatenus est aliquid disconueniens appetitui, non autem quatenus est præsens, vel absens.* Quia ut ait S. Thomas 1. 2. quæst. 29. art. 1. sicut amor est consonantia quædam appetitus ad id quod apprehenditur ut conueniens, ita odium est dissonantia quædam appetitus ad id quod apprehenditur ut repugnans & nocium; & quemadmodum omne conueniens, ut sic, habet rationem boni, ita omne repugnans, in quantum huiusmodi, habet rationem mali; & consequenter sicut amor fertur in bonum, ut in proprium obiectum, ita odium in malum.

Dico 2. *Duplex esse odium, aliud abominationis, aliud inimicitie.* Illud dicitur odium abominationis, quod rem aliquam ut nobis malam seu noxiam auersamur, etsi nullum ei malum optemus, quomodo à tormentis, morte, &c. abhorremus. Vocatur autem odium inimicitie affectus ille, quod alicui qui nobis nocet, malum

volumus, quo sensu homines se mutuò odio prosequuntur. Ex quo patet allatam descriptionem odij competere maximè odio abominationis, cum obiectum illius sit malum à quo auer titur affectus.

Est autem difficultas, an etiam competat odio inimicitiae. Respondeo ei minimè competere, quia eiusmodi odium non consistit in fuga & auersione, sed potius in prosecutione, qua intendimus alicui malum inferre: quare non habet proprie rationem odij, siue feratur in malum tantum materialiter siue formaliter, quia odium proprie dictum in fuga & auersione consistit.

Quonam autem modo odium inimicitiae feratur in malum dubitari potest, & ratio dubitandi est, quia cum sit prosecutio ut diximus, & prosecutio semper in bonum feratur, obiectum formale odij inimicitiae non videtur esse malum, quod intendimus alicui inferre, sed bonum quod ex ea mali illatione resultare existimamus; nimirum impedire ne malus nobis amplius noceat.

Nec refert quòd, ex communi sententia, odium inimicitiae feratur in malum, sub ratione mali; hoc enim intelligi potest de ipso malo illato præcisè, quod in odio non infertur sub ratione boni & iusti, sed quatenus malum est. Cuius oppositum contingit in ira, hæc enim in ipso malo quod infert, respicit aliquam rationem boni & iusti, nempe compensationem cum malo recepto. Verum quia bonum est, malo malum inferri, eo fine ut nocere desinat, hinc nonnulli probabiliter dicunt, malum quod appetitur in odio inimicitiae, esse obiectum illius materiale duntaxat, bonum verò consequens ex illatione mali esse obiectum illius formale.

Dico 3. *Ex causis, & effectibus amoris facile colligi posse causas, & effectus odij.* Quia contrariorum contrariæ sunt rationes, atqui amor & odium sunt affectus contrarij; quare contrariæ causæ, & contrarij effectus iis assignari debent. Quod intellige ex S. Doctore loco cit. art. 2. ad 2. quando amor & odium accipiuntur circa idem, nam quando sunt de contrariis, non sunt contraria, sed se inuicem consequentia. Ex eo enim quod aliquid amamus, illius contrarium odio habemus, sicque amor est causa odij.

ARTICVLVS II.

De desiderio, & fnga.

QUæritur 1. quid dicendum sit de desiderio seu cupiditate, vel, ut alij loquuntur, concupiscentia.

Respondeo & dico 1. *Desiderium esse passionem appetitus concupiscibilis, quæ fertur in bonum, quatenus absens.* De hoc agit S. Thomas 1. 2. quæst. 30. duobus primis articulis, ex quibus tria notanda sunt.

Nota 1. desiderium seu concupiscentiam, vt est passio appetitus sensitiui, ferri in delectationem secundum sensum, & distingui à desiderio seu concupiscentia partis rationalis; quia hæc vt sic, fertur in delectationem quæ reperitur in bono intelligibili, seu secundum rationem; vt cum quis appetit scientiam, aliave bona spiritualia.

Nota 2. desiderium congruentius dici de superiori appetitu, quia dicit simplicem motum in bonum rationis desideratum, concupiscentiam verò de inferiori, qui est affixus corpori

cū enim hic appetitus feratur in delectationem secundum sensum, & sensus sit virtus totius coniuncti, hinc fit vt delectatio secundum sensum sit delectatio totius coniuncti, adeoque appetitus qui in illam fertur, sit appetitus sensitivus qui simul ad animam, & corpus pertinet.

Nota 3. diuersitatem specificam passionum non esse sumendam ex obiecto, secundum naturam spectato, sed secundum diuersitatem in virtute agendi; vnde cū delectabile aliter secundum se, aliter vt præsens, aliter vt absens moueat appetitum, nam primo modo appetitum sibi quodammodo adaptat, & causat amorem, secundo modo facit illum in seipso quiescere, tertio modo facit ad seipsum moueri, hinc fit vt concupiscentia sit passio specie distincta ab amore, & delectatione.

Dico 2. *Concupiscentias alias esse naturales, alias non naturales, vt tradit S. Doctor art. 3.* Nam concupiscentia fertur in bonum delectabile, dupliciter autem aliquid est delectabile, vno modo quia est necessarium ad vitam, & conseruationem animalis, vt cibus & potus, & concupiscentia talis boni dicitur naturalis: alio modo, quia est conueniens animali secundum apprehensionem, vt pecuniæ, honores, & alia quæ ad vitam non sunt necessaria, appetuntur tamen vt bona & delectabilia, & hæc appetitio dicitur non naturalis.

Quo loco aduerte 1. illud esse discrimen inter dictas concupiscentias, quod naturales sunt communes hominibus, & aliis animalibus; quia vtrisque est aliquid conueniens & delectabile secundum naturam, vt cibus & potus; aliæ vero sunt propriæ hominum, nec aliis animalibus competunt, quia soli homines possunt aliquid apprehendere tanquam delectabile & conue-

niens, præter id quod natura requirit. Unde priores appetitiones dicuntur irrationales, quia eliciuntur ex impetu naturæ; posteriores verò rationales, quia per considerationem rationis particularis, quæ pertinet ad æstimationem, excitantur.

Ex quo intelligis, cur concupiscentiæ istæ innaturales sint hominum propriæ, etsi in appetitu sensitivo, qui etiam brutis competit, excitentur. Causa enim discriminis est, ex S. Thoma in resp. ad 2. quod in parte hominis sensitiva est cogitativa, seu ratio particularis per quam motus illi excitantur; bellæ verò ratione & discursu carent, adeoque eiusmodi motus in se excitare nequeunt.

Aduerte 2. ex articulo 4. aliud esse discrimen inter concupiscentiam naturalem, & non naturalem, quod naturalis non potest esse infinita in actu, natura enim non intendit actu infinitum cibum, vel infinitum potum; potest tamen esse infinita in potentia, ita ut post vnum cibum adeptum, alium expetat, & post hunc tertium, & sic cōsequenter: concupiscentia verò non naturalis est omnino infinita, quia sequitur rationem quæ potest in infinitum procedere.

Hoc tamen cum exaggeratione dictum videtur, quia credibile non est ullam quantumvis magnam diuitiarum, honorum, voluptatum, aliorumque bonorum copiam posse hominis appetitum explere, nisi sit absolute & categorematicè infinita: cum homo talis infinitatis non sit capax, adeoque minimè illi conueniens esse possit.

Aduerte 3. S. Thomam non obscure affirmare art. 3. ad 2. concupiscentiam naturalem, & non naturalem inter se specie distingui, idque probare, quia concupiscentia naturalis cau-

fatur ex simplici apprehensione, nonnaturalis verò ex deliberata. Verùm hæc ratio non videtur concludere, quia ex communi sententia, apprehensio non est ratio formalis obiecti appetitus, sed tantum conditio: unde diuersa apprehensio non sufficit vt concupiscentiæ inter se formaliter & specificè distinguantur, sed ea diuersitas desumenda est ex parte obiecti; ita vt eæ concupiscentiæ specie distinguantur, quæ habent obiecta formaliter distincta, seu quæ feruntur in obiecta sua, sub diuersis rationibus formalibus: quomodo potest distinctio specifica inter concupiscentias naturales, & non naturales constitui; quatenus appetitus fertur in illas, vt naturæ necessarias. in istas verò sub aliis rationibus, quas quisque sibi fingit.

Quæritur 2. quid dicendum sit de fuga seu abominatione, quæ est passio innominata, seu proprio nomine carens. Respondeo hanc passionem esse motum appetitus concupiscibilis, auersantis malum absens: unde opponitur concupiscentiæ, quia vt ait S. Thomas prædicta quæst. art. 2. ad 3. ita se habet ad malum, sicut concupiscentia ad bonum. Distinguitur tamen à timore, qui etiam est mali absentis, quia fuga est mali futuri absolutè, timor verò mali futuri, quod non nisi ægrè caueri potest.

Verùm S. Doctor aduertit ibid. loco fugæ poni interdum timorem, sicut & cupiditatem loco spei, quia quod est paruum bonum, vel malum. quasi non reputatur; & ideo pro omni motu appetitus in bonum, vel in malum ponitur spes, & timor quæ respiciunt bonum, vel malum futurum.

ARTICVLVS III.

De delectatione seu gaudio.

Quæritur I. quid & quotuplex sit delectatio seu gaudium.

Respondeo & dico I. *Delectationem esse passionem seu motum appetitus concupiscibilis, quo fertur in bonum sensibile, ut præsens & possessum.* Vt enim notat S. Thomas 1. 2. quæst. 31. art. 1. illud est discrimen inter res naturales, & animales, quod res naturales, cum iam sunt affectuæ id quod ipsis conuenit secundum naturam, nullum huius boni sensum habent; animalia verò quando in eo constituuntur, quod ipsorum naturæ congruit, id sentiunt, & eo sensu causatur in ipsis quidam motus animæ in appetitu sensitivo, qui est delectatio

Obiicies, delectationem immerito dici motum appetitus concupiscibilis, quia cum versetur circa bonum iam adeptum, supponit quidem motum, sed in motu non videtur consistere. Respondeo delectationem & supponere motum desiderij, & consistere in quodam motu, quia etsi dum bonum adeptum est, cesset illius prosecutio, & quoad hoc motui prosecutionis succedat quies in bono adepto; adhuc tamen viget quædam immutatio appetitus à præsentia obiecti causata, hæcque dicitur delectatio, ut tradit S. Doctor ad 2.

Dico 2. *Vt concupiscentias, de quibus supra: ita & delectationes alias esse naturales, alias non naturales, seu quæ sunt cum ratione, ut habetur art. 3.* Delectamur enim & in iis quæ naturaliter concupiscimus, quando ea consequimur, & in iis

quæ concupiscimus secundum rationem; sed gaudium non habet locum nisi in delectatione quæ consequitur rationem, unde gaudium non attribuimus brutis animalibus, sed delectationem: possumus tamen gaudium habere de omnibus de quibus delectamur, quia possumus cum ratione omnia desiderare quæ secundum naturam concupiscimus, quamvis non id semper contingat; quia interdum delectationes sentiuntur secundum corpus, de quibus non gaudemus secundum rationem.

Nota ex art. 4. delectationem non tantum esse in appetitu sensitivo, sed etiam in intellectu, ut etiam ex dictis colligi potest. Nam delectatio quædam seu gaudium sequitur apprehensionem rationis, ad apprehensionem autem rationis non solum commouetur appetitus sensitivus, per applicationem ad aliquid particulare, sed etiam appetitus intellectivus, seu voluntas: unde aliqua delectatio in utroque appetitu esse potest, sed cum hoc discrimine, quod delectatio appetitus sensibilis est cum aliqua transmutatione corporali, delectatio autem appetitus intellectivi nihil est aliud, quam simplex quidam motus voluntatis. Ex quo intelligis, in nobis esse tum delectationes in quibus communicamus cum brutis, tum illas in quibus communicamus cum Angelis; siquidem appetitum sensitivum habemus communem cum brutis, & intellectivum cum Angelis.

Dico 3. *Delectationes intellectuales esse simpliciter maiores sensibilibus.* Probatur ex art. 5. Nam in primis bonum spirituale est maius bono corporali, magisque dilectum, ut ex eo patet, quod homines etiam à maximis voluptatibus corporalibus abstinent, ne iacturam faciant honoris, qui est bonum intelligibile. Deinde intellectus

est longè nobilior sensu , magisque cognoscitius; ac tandem intimior, perfectior, & firmior est coniunctio inter bonum intellectuale & intellectum , quàm inter bonum sensibile & sensum: intimior quidem , quia sensus in solis exterioribus versatur , intellectus verò vsque ad intimam rei quidditatem & essentiam penetrat; perfectior etiam , quia cognitioni sensus adiungitur motus , qui est actus imperfectus , quò fit vt delectationes sensibiles non sint totæ simul, sed in eis aliquid transít, & aliquid expectatur consummandum; intelligibiles verò motu carent , adeoque sunt totæ simul: ac tandem firmior, quia bona corporalia citò deficiunt , spiritualia autem sunt incorruptibilia. Ex quibus omnibus concluditur, delectationes intellectuales esse simpliciter maiores sensibilibus.

Addit tamen S. Doctor has esse illis maiores & vehementiores quoad nos , tum quia sensibilia sunt nobis notiora quàm intelligibilia, tum quia delectationes sensibiles coniunctæ sunt per se cum aliqua transmutatione corporali; tum quia appetuntur vt quædam medicinæ contra defectus , vel molestias corporales, ex quibus tristitiæ quædam sequuntur; quare iis tristitiis superuenientes magis sentiuntur, adeoque avidius acceptantur, quàm delectationes spirituales quæ eiusmodi molestias non supponunt.

Nota ex art. 6 cùm sensus amentur, & propter cognitionem, & propter vtilitatem, & utroque modo delectationem pariant , delectationem visus ratione cognitionis , esse sensuum omnium maximam; quia scilicet per visum plura cognoscimus & nobiliori modo quàm per alios sensus; si verò habeatur ratio vtilitatis, delectationem quæ per tactum percipitur, alias

excedere: quia cum tactu percipiuntur qualitates elementares, ex quibus animal constituitur, delectatio inde resultans proximius tendit ad conseruationem animalis, adeoque est vtilior. Vnde bruta, quia non capiunt delectationem ex sensibus, ratione cognitionis, sed tantum ratione vtilitatis, non delectantur secundum alios sensus, nisi in ordine ad sensibilia tactus; vt canis non delectatur visu, vel odore leporis, sed comestione, vt dicitur 3. Ethic. cap. 10.

Dico 4. *Unam delectationem esse posse alteri contrariam, vt patet ex arr. 8.* Siquidem delectatio se habet in affectibus animæ, sicut quies in corporibus naturalibus; contingit autem duas quietes esse contrarias, cum nempe sunt in terminis contrariis, vt quies sursum ei quæ est deorsum: quare & duæ delectationes in affectibus animæ possunt esse contrariæ.

Quod si obiicias 1. omnem delectationem ferri in bonum, & bonum non esse contrarium bono, sed malo, respondeo ex S. Doctore ad 1. bonum non esse oppositum bono, si agatur de bono virtutis, esse tamen si agatur de bono aliter spectato, vt patet, quia calor qui est bonus igni, est contrarius frigori, quod est bonum aquæ. Vnde absolutè delectatio potest esse delectationi contraria, etsi id contingere nequeat in delectationibus de bono virtutis, eo quod hæc bona non accipiuntur nisi per conuenientiam ad vnum nempe rationem.

Si obiicias 2. ex quietibus contrariis non bene colligi delectationes esse contrarias; siquidem etsi delectatio rectè comparetur cum quiete naturali, non tamen cum quiete illi opposita, quæ est violenta, huic enim potius assimilatur tristitia, quæ delectationi opponitur. non autem ipsa delectatio. Respondeo delectationem

rem & tristitiam se habere vt quietem naturalem & violentam eiusdem corporis, duas verò delectationes quæ se mutuò impediunt, se habere vt quietes naturales duorum corporum, quarum vna alteri est opposita, quales sunt quies lapidis deorsum, & quies ignis sursum: & hoc posteriori modo discursum S. Thomæ intelligendum esse, vt patet ex resp. ad 2. Quare fa-
teor illum non procedere de contrarietate propriè & strictè sumpta, cum hæc circa idem ver-
fari debeat.

Quæritur 2. quid dicendum sit de causis, & effectibus delectationis.

Respondeo & dico I. *Varias causas delectationis assignari à S. Doctore I. 2. quæst. 32. per octo articulos; ex quibus nonnulla quæ maioris momenti videntur, excerpta sunt.*

Art. I. ait operationem esse causam delectationis, quia ad delectationem requiruntur consecutio boni conuenientis, & cognitio talis adeptionis; ad vtrumque autem requiritur aliqua operatio Nam actualis cognitio operatio quædam est, & similiter bonum conueniens adipiscimur aliqua operatione.

Verum etsi certum sit prærequiri operationem aliquam, nempe cognitionem, ad delectationem, non tamen semper necessaria est operatio aliqua, qua consequamur id in cuius possessione delectamur; tum quia possumus delectari de bonis internis nobis à natura ingentis, tum de bonis ab extrinseco, sine vlla nostra operatione nobis aduenientibus, vt de hæreditate quæ nobis incogitantibus obuenit, de luce à Sole nobis nihil agentibus immissa, &c. Et hoc iis consentaneum est quæ tradit S. Doctor art. 5. vbi ostendit actiones aliorum nobis esse causam delectationis, & eas speciatim quibus no-

Ethica.

O

bis bonum aliquod conferunt , quia bene pati ab alio est delectabile.

Art. 3. docet 1. memoriam & spem esse causas delectationis , quia delectatio causatur ex præsentia boni conuenientis , bonum autem nobis esse præsens , vel secundum suam similitudinem , per cognitionem , vel secundum rem , idque vel actu , vel pōestate ; ac proinde spem & memoriam , quibus bonum aliquo ex iis modis fit nobis præsens , esse causas delectationis.

Docet 2. quia maior est delectatio , quo maior est boni coniunctio , & maior est coniunctio boni secundum rem , quàm secundum similitudinem seu cognitionem , & maior coniunctio rei in actu , quàm in potentia ; hinc sequi maximam esse delectationem quæ fit per sensum , qui requirit actualem præsentiam rei sensibilis , minorem verò delectationem spei , quia res delectabilis coniungitur secundum realem possibilitatem ; & minimam delectationem memoriæ , quia habet solam coniunctionem apprehensionis.

Articulo 4. docet tristitiam dupliciter posse considerari , & utroque modo esse posse per accidens causam delectationis. In primis quatenus est in actu , causat memoriam rei dilectæ , & consequentem inde delectationem : quatenus verò est præterita , causat delectationem propter sequentem mali euasione ; carere etenim malo habet rationem boni. Vnde quanto maius fuit periculum in prælio , tanto maius est gaudium in triumpho , ut ait Aug. lib. 8. confess. cap. 3.

Art. 8. docet admirationem esse causam delectationis. Nam spes consequendi id quod intense desideramus , causat delectationem ex dictis ; atqui admiratio est desiderium quoddam

sciendi, ex eo ortum quòd quis videt effectum, & causam ignorat, habetque adiunctam spem assequendi talem cognitionem: ergo admiratio causat delectationem.

Dico 2. *Quatuor effectus delectationis assignari à S. Thoma quæst. 33. per totidem articulos. Quorum* 1. docet dilationem esse effectum delectationis, idque tum ex parte apprehensionis, quia apprehendens coniunctionem alicuius boni conuenientis, consequenter apprehendit se perfectionem aliquam consecutum, sicque spiritualiter magnificatum, seu dilatatum: tum ex parte affectus, siquidem appetitus in bono adepto quiescens, quodammodo se præbet ei ad illud intra se cupiendum.

Vnde cum dilatio pertineat ad amorem, quatenus se extendit ad curanda quæ sunt rei amata; ea ad delectationem pertinet, in quantum aliquid in seipso ampliatur, & capacius redditur. Et quamuis qui delectatur rem delectantem constringat, vt firmitus ei inhæreat, cor tamen suum ampliat vt perfectiùs obiecto delectabili fruatur.

Art. 2. docet delectationem excitare sitim & desiderium, non quidem prout hæc dicunt appetitum rei non habitæ, cum delectatio sit rei præsentis, sed rei nondum perfecte habitæ: interdum verò generat fastidium. Et quidem desiderium causat dupliciter, primò ex parte rei, quando talis est vt vna vice appetitum non expleat, sed oporteat rursus illam vsurpare; quomodo res omnes creatæ desiderium excitant, vt sumitur ex illo Ioan. 4. *Qui biberis ex hac aqua, sitiet iterum.* Secundò ex parte operationis, quando per eam res delectabilis, etsi in se perfecta, imperfectè & inadæquatè vsurpatur; quomodo delectatio spiritualis, quæ hic capitur de Deo

cognito & amato, excitat sitim seu desiderium melius illum cognoscendi & amandi, quia imperfecte cum cognoscimus & amamus. Fastidium verò causat delectatio, quando exceditur modus in operatione qua quis re optata fruitur, ut cum quis nimium comedit. Et hic est proprius effectus delectationum corporalium, nam spirituales non possunt modum excedere, nisi per accidens ratione alicuius operationis corporalis adiunctæ.

Art. 3. docet 1. delectationem, quæ habetur de ipso actu rationis, ut de contemplatione, non impedire, sed potius iuvare usum rationis; cum faciat ut attentius operemur. 2. delectationes corporales impedire usum rationis, idque tripliciter, primò ratione distractionis, quia ad ea quæ valde delectant multum attendimus, & consequenter ab aliis animus auocatur. Secundò ratione contrarietatis, nam delectationes superexcedentes sunt contra ordinem rationis, sicque corrumpunt existimationem prudentiæ ex 6. Ethic. cap. 5. non autem existimationem speculatiuam: huic enim delectatio non repugnat, cum non impediatur quin intemperans rectè iudicet hominem esse animal rationale. Tertiò quatenus excitant in corpore transmutationem aliquam, qualigatur & perturbatur usus rationis, ut patet in ebriosis.

Art. 4. docet delectationem perficere operationem de qua est, idque dupliciter, primò quatenus superuenit operationi tanquam bonum aliquod eam perficiens, quod importat quietationem aliquam appetitus in bono præsupposito. Secundò quatenus quod fit cum delectatione, fit cum maiori attentione ex dictis, adeoque perfectius. Ex quibus patet delectationes perficere proprias operationes, & extraneas impedire, ut habetur 10. Ethic. cap. 5.

ARTICVLVS IV.

De tristitia seu dolore.

QUÆRITUR 1. quid sit tristitia seu dolor. Respondeo tristitiam esse quandam ægritudinem seu anxietatem in appetitu sensitivo, ex præsentia mali sensibilis excitatam. Quod intellige tam de malo realiter præsentem, quàm de illo quod tantum per imaginationem est præsens: vtrumque enim causat illam animi anxietatem, quam tristitiam appellamus. Intellige etiam de malo inuoluntario, quia quod sponte suscipitur, tristitiam non causat.

Nota 1. dolorem sæpe confundi cum tristitia, esse tamen inter illa quandam distinctionem, iuxta S. Thomam 1. 2. quæst. 35. art. 2. vbi ait, delectationem & dolorem ex duplici apprehensione causari posse. 1. ex apprehensione sensus exterioris, 2. ex apprehensione interiori siue intellectus siue imaginationis, & solam delectationem quæ ex interiori apprehensione causatur, gaudium appellari, & similiter cum dolorem qui ex apprehensione interiori causatur, vocari tristitiam. Et sicut delectatio quæ ex apprehensione externa causatur, delectatio nominatur, non gaudium; ita dolor ex apprehensione externa causatus, dolor nominatur, non tristitia. An autem dolor non modo in appetitu, sed etiam in sensu experiatur, alibi dictum est.

Nota 2. ex art. 3. tristitiam esse contrariam delectationi, quia illa sunt contraria quæ secundum formam opponuntur, forma autem seu spe-

cies passionis & motus sumitur ab obiecto, vel termino: quare cum obiecta tristitiæ & delectationis sint contraria, scilicet bonum præsens, & malum præsens, sequitur dolorem & delectationem esse contraria.

Ista tamen contrarietas non impedit quominus tristitia sit causa delectationis per accidens, siue quia qui ex malo præsentē tristatur, querit delectationem qua ab ea molestia liberetur; siue quia non refugit homo molestias æquo animo perferre, ut per illas ad delectationem perueniat, iuxta illud, *Beati qui lugent, quoniam ipsi consolabuntur.*

Nota 3. etsi dolor ut sic, secundum suam rationem communem, sit contrarius delectationi, quia dolor pertinet ad fugam, & delectatio ad prosecutionem; non tamen semper id contingere, si dolor speciatim inspiciatur, ut fertur in hoc, vel illud obiectum. Nam quamuis sit contrarius delectationi, quando fertur in idem obiectum, sub eadem ratione, recte tamen consentit cum illa, quando fertur in obiectum contrarium; ut cum quis dolet de peccato commisso, & delectatur de illius poenitentia, & remissione. Quod si dolor fertur in vnum obiectum, & delectatio in aliud ei disparatum, tunc dolor, & delectatio sunt motus disparati, ut tristiari de morte amici, & delectari in contemplatione. Ex quo intelligis dolorem & delectationem non posse simul existere, quando feruntur in idem obiectum, posse tamen quando tendunt in obiecta contraria, aut disparata. Atque hic videtur sensus eorum quæ latius prosequitur S. Doctor art. 4.

Nota 4. ex art. 6. appetitum delectationis esse per se loquendo actiorem, quam fugam tristitiæ, quia bonum quod est obiectum delecta-

tionis, per seipsum appetitur, malum autem quod est obiectum tristitiæ, est fugiendum ut est priuatio boni; quod autem est per se, potius est illo quod est per accidens. Cuius etiam signum apparet in motibus naturalibus, qui sunt intensiores in fine, cum acceditur ad terminum naturæ conuenientem, quam in principio cum receditur à termino naturæ non conuenienti. Contingit tamen per accidens quod quis tristitiam vehementius fugiat, quam delectationem appetat; ut cum causa contristans repugnat bono magis amato, quam sit illud in quo delectamur: sicut iis accidit qui metu flagelli ludo abstinent, quia intensius proprium corpus amant, & bonam illius habitudinem, quam delectationem ex ludo perceptam.

Quæritur 2. quotuplex sit dolor & tristitia. Respondeo 1. dolorem à nonnullis diuidi primò in eum qui oritur ex apprehensione sensitiva tali, qualem bruta possunt habere, & eum qui sequitur apprehensionem propriam potentiæ cogitatiuæ, qui est in solis hominibus, & vocatur tristitia. Secundò in dolorem exteriorem, & interiorem, quorum ille causatur ab apprehensione exteriori, iste ab interiori.

Verùm aut istæ diuisiones nullo modo inter se distinguuntur, aut ut clariùs appareat earum distinctio, dicendum videtur dolorem primò diuidi in eum qui sequitur apprehensionem imaginationis, & eum qui sequitur apprehensionem affirmatiuæ: sic enim isti duo dolores sunt manifestè interni, cum tamen in allata diuisione, ut iacet, existimari possit primum illius membrum complecti etiam dolorem ortum ex apprehensione sensus externi; quæ ratione prima diuisio non differt à secunda, ut perspicuum est.

Deinde in communi sententia, quæ contemnit omnem dolorem esse in appetitu, diuisio illa posterior doloris in externum, & internum est valde impropria; cum quidquid est in appetitu internura sit. Potest tamen propriè usurpari, iuxta illos qui nobiscum existimant, dolorem & cruciatum verè sentiri in membris corporis, & in appetitu esse displicentiam de tali obiecto.

Respondeo 2. quatuor species tristitiæ assignari à S. Thoma quæst. citatæ art. 8. nempe misericordiam, inuidiam, anxietatem, & acediam. Misericordia est tristitia de malo alieno, in quantum æstimatur proprium; inuidia est tristitia de bono alieno, in quantum æstimatur malum proprium: anxietas seu angustia est tristitia animum aggrauans, vt non appareat aliquod effugium; acedia verò est quando illa aggrauatio intantum procedit, vt etiam exteriora membra torpeant, & à propriis operationibus impediuntur.

Verùm in resp. ad 2. tres alias addit tristitiæ species, nempe pœnitentiam, quæ est tristitia de proprio peccato; zelum, & Nemefim quas ait sub inuidia contineri, vt explicat 2.2. quæst. 36. art. 2. idque ad mentem Arist. qui ait zelum esse tristitiam de bono alterius, non quia illud habet, sed quia nobis deest: Nemefim verò esse tristitiam de bono temporali alterius, quatenus eo indignus videtur. Ex his autem intellige prædictas species tristitiæ ad appetitum naturalem spectare, non ad sensitium, sicut & pleraque alia quæ in hoc de passionibus tractatu misceri solent.

Quæritur 3. quænam sint causæ, & quinam effectus tristitiæ.

Respondeo & dico 1. *Ad causas tristitiæ reduci*

posse ea omnia quæ ad hoc conferunt, ut bono aliquo optato priuemur, vel ut malum aliquod inuoluntarium sentiamus. Quo fit ut, ex S. Thoma 1. 2. quæst. 36. art. 1. maior potestas cui resisti non potest, sit causa tristitiæ, quando est causa coniunctionis mali alicuius. Cum enim coniunctio mali sit causa doloris per modum obiecti, quod est causa coniunctionis mali, debet poni causa doloris seu tristitiæ, nisi voluntarie illi cedatur. Idem dici potest de maiori potestate, quæ bonum possessum vi aufert, aut impedit ne bonum concupitum adueniat: cum ex ablatione boni amati, & retardatione boni concupiti tristitia oriatur.

Dico 2. Varios esse effectus doloris vel tristitiæ, qui recensentur à S. Doctore quæst. 37. per totam. In primis dolor sensibilis valde intensus, quia ad se maximè trahit intentionem animæ, impedit ne homo aliquid addiscere possit; imò interdum ne possit animo reuoluere quod prius didicit, ut habetur art. 1. Licet autem dolor exterior magis impediat contemplationem, quæ requirit omnimodam quietem, quàm interior: iste tamen si intensus sit, eam vel solus impedire potest, ut patet exemplo B. Gregorij, qui præ tristitia expositionem in Ezechielem prætermisit, ut obseruat S. Doctor in resp. ad 3.

Secundò proprium est tristitiæ, corpus, & animam aggrauare; dicitur enim homo aggruari, ex eo quòd pondere aliquo impeditur à proprio motu: unde malum præsens causans tristitiam, eo ipso quòd repugnat motui voluntatis, aggrauat animam, in quantum eam impedit ne optatis potiatur: aggrauat etiam interdum corpus ipsum, impediendo exteriorem illius motum, ita ut homo fiat stupidus in seipso, ut traditur art. 2.

Tertiò tristitia omnem eam operationem debilitat, quæ cum ea suscipitur: nunquam enim ait S. Doctor art. 3. id quod cum tristitia facimus, ita bene facimus, sicut id quod facimus cum delectatione, vel sine tristitia. Secus tamen dicendum est de operatione quæ fit ex tristitia, talis enim operatio augetur ex tristitia, quia quò causa est intensior & efficacior, eò maior effectus ab ea procedit: ut quò quis intensius dolet de peccatis commissis, eò plures & perfectiores pœnitentiæ fructus edere conatur.

Quartò, inter omnes passiones nulla est quæ magis noceat corpori, quàm tristitia ut traditur art. 4. quia cum humana vita consistat in quadam motione, quæ à corde in cætera membra diffunditur secundum certam mensuram, minùs repugnat vitæ, quòd motio illa procedat ultra mensuram debitam, ut fit in amore, aliisque affectibus prosecutionis, quàm quòd impediatur processus congruus eiusmodi motionis, ut contingit in passionibus quæ consistunt in fuga, & retractione quadam, ut in timore, & desperatione, maxime; verò in tristitia quæ aggravat animam ex malo præsentis, cuius est fortior impressio quàm futuri. Siquidem priori modo passiones repugnant vitæ, secundum quantitatem motus duntaxat; posteriori verò, secundum speciem illius.

ARTICVLVS V.

De spe, & desperatione.

HActenus de passionibus appetitus concupiscibilis, nunc de iis agendum est quæ ex appetitu irascibili oriuntur; ac pri-

mo inquitur quid sit spes. Respondeo spem, vt inter passionem numeratur, & distinguitur a spe quæ est virtus Theologica, esse affectum appetitus irascibilis qui fertur in bonum futurum, arduum quidem, sed possibile ad obtinendum. Ex quo patet quatuor requiri ad obiectum spei, vt tradit S. Doctor 1. 2. quæst. 40. art. 1. in primis vt sit bonum, quia non speramus nisi quod nobis bonum iudicamus. Secundo vt sit futurum, non enim speramus bonum præsens, sed de illo gaudemus. Tertiò vt sit arduum, non enim dicimur sperare quæ facili negotio obtinere possumus; vnde spes spectat ad appetitum irascibilem, & distinguitur a desiderio quod est de bono futuro absolute, spectatque ad appetitum concupiscibilem. Quarto, vt illud consequi sit possibile, non enim sperat quis id quod omnino adipisci non potest.

Nota 1. cum spes sit motus appetitus irascibilis, & talis appetitus sit in brutis, in iis etiam esse passionem spei, vt concluditur art. 7. & confirmatur ex ipsis motibus exterioribus brutorum; si enim canis (inquit S. Doctor) videt leporem, aut accipiter auem nimis distantem, non mouetur ad ipsam, quasi non sperans eam se posse adipisci; si autem sit in propinquo, mouetur quasi sub spe adipiscendi. Et ne quis hinc inferat in brutis esse rationem seu discursum, addit S. Thomas omnem appetitum tam naturalem, quam sensitium, & intellectiui sequi apprehensionem alicuius intellectus; sed cum hoc discrimine, quod voluntas mouetur ex apprehensione intellectus coniuncti, motus vero appetitus naturalis, & appetitus sensitiui brutorum sequuntur apprehensionem intellectus separati, qui naturam instituit, & brutis instinctum naturalem impressit.

Nota 2. etſi obiectum ſpei debeat eſſe arduum, futurum, & poſſibile, non requiri vt ratio ardui, vei futuri ab ipſo ſperante apprehendatur; cūm bruta eiufmodi rationes non apprehendant, vt ſumi poteſt ex art. 3. ad 1. Oppoſitum tamen affirmatur à nonnullis de poſſibilitate, quia vt ait S. Thomas art. 1. ad 1. appetitus eſt principium motionis, nihil autem mouetur ad aliquid, niſi ſub ratione poſſibilis: unde aiunt, quando bruta aliquid ſperant, formare in æſtimatiua conceptum quendam de illius poſſibilitate. Verūm dici poteſt hoc non recte concludi, quia ex vna parte cognoscere aliquid ſub ratione poſſibilis, non minùs videtur ſuperare facultatem bruti, quā illud cognoscere ſub ratione ardui, aut futuri: cūm ad cognoscendam rei poſſibilitatem, requiratur collatio quædam propriarum virium cum difficultate eam obtinendi, quæ in brutis, iuxta communem S. Thomæ ſententiam, quæ iis rationem denegat, admitti non debet. Aliunde verò ſicut ſpes ponitur in brutis, etſi rationem ardui, & futuri non cognoscant; ita poni in illis poteſt, etſi non aduertant rationem poſſibilis: quia ſufficit quòd moueantur ex naturali inſtinctu, ab intellectu ſeparato, qui rationes illas omnes perfectè cognoscit, ipſis indito. Et hoc videtur planè conſentaneum menti S. Doctōris, ſi quæ ex ipſo in præcedenti notabili allata ſunt, attentè inſpiciantur. Quod enim ait de cane leporem inſequentem ſub ſpe conſequenti, id refert in apprehenſionem intellectus ſeparati, non autem in apprehenſionem ipſius canis; quo ipſo indicat bruta non apprehendere res vt poſſibiles, ſed id ad altiorem cognitionem ſpectare.

Nota 3. ſpem, vt delectationem, & deſide-

rium seu concupiscentiam, posse diuidi in naturalem, & non naturalem, seu in irrationalem, & rationalem. Spes naturalis, seu irrationalis illa dicitur, quæ versatur circa obiectum quod est naturæ consentaneum, qualia sunt illa quæ à brutis ad vitæ conseruationem experientur; illa vero spes dicitur non naturalis, seu rationalis, quæ sequitur apprehensionem cogitativæ in homine, vt cum quis sperat aliquem honorem, vel dignitatem: vnde prior spes est communis hominibus cum brutis, cum homines possint sperare quæ ad vitæ statum tuendum spectant: posterior verò est solius hominis, quia licet sit in appetitu sensitivo, non tamen sequitur apprehensionem phantasie, sed æstimationis, quæ ob coniunctionem quam habet cum ratione, quia in eadem anima radicitur, res varias attingere potest, quæ vim sensitivam brutorum excedunt; vt iudicare hunc vel illum honorem esse sibi conuenientem; quando occurrunt aliquæ circumstantiæ per sensus externos notæ, quæ ad tale iudicium aliquo modo excitant; vt cum quis videt alios honorari, & in honoribus delatis valde delectari.

Quæritur 2. quænam sint causæ spei, & quanam illius effectus.

Respondeo & dico 1. *Causas spei generatim* esse tum ea omnia quæ iuuant ad aliquid arduum consequendum, vt fauores, diuitiæ, vires, &c. tum quæ efficiunt vt res sperata iudicetur obtentu possibilis, siue illud iudicium sit verum, siue falsum. Atque ex utroque capite experientia causat spem, vt notat S. Doctor art. 5. ex primo quidem, cum per illam acquirit homo facilitatem aliquid faciendi, quo spectat illud Vegetij, *Nemo facere metuit, quod se bene didicisse confidit.* Ex secundo etiam, quia quæ

aliquid expertus est, iudicat rem similem sibi esse possibilem, quam ante experientiam impossibilem iudicabat. Oppositum tamen interdum contingit, nempe cum homo expertus est sibi aliquid esse impossibile, quod alias possibile iudicabat: tunc enim experientia causat desperationem, & spem extinguit.

Hinc etiam fit iuuenese esse bonæ spei, tum quia cum calore & spiritibus abundant, cor in eis ampliatur, fiuntque animosi, & ad ardua tendunt: tum quia cum defectu experientiæ, impedimenta in suis conatibus experti non sint, facile existimant sibi omnia esse possible. Vnde etiam ebriosi, quia calore & spiritibus abundant, nec pericula considerant, omnia tentant, & sunt maioris spei quam reliqui, vt obseruat S. Doctor art. 6.

Dico 2. *Duos effectus spei assignari à S. Thoma sequentibus articulu.* Et quidem art. 7. ait spem, etsi ex amore nascatur, quatenus respicit bonum speratum, quia non speramus nisi bonum desideratum & amatum; causare tamen amorem, quatenus respicit illum per quem aliquid fit nobis possibile: quia eum amamus tanquam bonum nostrum, per quem nobis, bonum quod intendimus, prouenire posse existimamus. Art. vero 8. ait spem iuuare vt melius fiat operatio, quia existimatio arduitatis quæ est in obiecto, excitat attentionem, & quia iuncta est possibilitati, non retardat conatum; quo fit vt operationem reddat magis expeditam.

Quæritur 3. an desperatio opponatur spei. Respondet S. Doctor art. 4. affirmatiue, idque probat, nam in mutationibus inuenitur duplex contrarietas, vna secundum accessum ad contrarios terminos, qualis reperitur inter passiones appetitus concupiscibilis, vt inter amorem, &

odium : alia per accessum , & recessum respectu eiusdem termini , quomodo inuenitur in passionibus irascibilis. Obiectum autem spei , quod est bonum arduum , habet rationem attractiui , quatenus consideratur ut possibile ; at quatenus consideratur ut impossibile , habet rationem repulsiui , sicque generat desperationem ; quæ proinde opponitur spei , sicut recessus accessui.

Est autem circa hoc difficultas , nam ex vna parte desperatio dicitur consistere in fuga & recessu , quo ipso malum debet esse illius obiectum , quia non fugimus bonum , sed malum ; ex alia verò non aliud illi assignatur obiectum , quam bonum ipsum in quod spes fertur ; hæc autem non satis inter se cohærere videntur. Respondeo ista posse per distinctionem conciliari , nam quia non desperamus simpliciter de bono , sed de bono quod iudicatur obtentu impossibile , defectu facultatis illud obtinendi , hinc dici potest desperationem habere quidem rationem fugæ & recessus , versari tamen circa bonum , non ut sic , sed quatenus iudicatur impossibile ; quomodo induit quandam rationem mali , & potest esse obiectum fugæ. Cæterum etsi desperatio plerumque versetur circa bonum obtentu impossibile , interdum tamen versatur circa malum quod inuitabile iudicatur ; quomodo ludas , damnationem se posse effugere desperans , laqueo se suspendit.

ARTICVLVS. VI.

De audacia, & timore.

QUæritur 1. quid dicendum sit de naturâ, causis, & effectibus audaciæ.

Respondeo & dico 1. *Audaciam, ex S. Thoma, esse motionem appetitus sensitivi, quæ in prosecutione mali terribilis consistit.* Hoc colligo ex 1. 2. quæst. 45. art. 2. vbi statuit primò, omnem motum appetitus esse prosecutionem, vel fugam; & prosecutionem esse vel per se boni, vel per accidens mali, ob aliquod bonum adiunctum: fugam etiam esse vel per se mali, vel per accidens boni ob malum aliquod adiunctum: statuit secundò hæc quatuor pertinere ad quatuor passiones, nam prosecutio boni pertinet ad spem, fuga mali ad timorem; prosecutio mali terribilis pertinet ad audaciam, fuga verò boni pertinet ad desperationem.

Hoc tamen non caret difficultate, quia audacia est motus prosecutionis, quo, neglecto periculo imminenti, opus difficile constanter aggredimur, vt bono optato perfruamur: at motus prosecutionis non versatur circa malum, sed circa bonum. Confirmatur, nam velle labores, tormenta, & mortem ipsam subire ex intentione assequendi gloriam æternam, hoc sine dubio est motus voluntaris prosecutivus, cuius obiectum formale est opus ipsum difficile, quatenus ad finem intentum conducit: ergo idem de passione audaciæ dicendum est.

Neque huic doctrinæ contrarius est S. Thomas, cum ipse expressè dicat prosecutionem mali terribilis pertinere ad audaciam: si enim

audacia est persecutio, in bonum per se ferri debet, ut perspicuum est. Quare cum addit, esse persecutionem mali, id debet intelligi de malo per accidens, cui scilicet bonum aliquod adiunctum est, ut satis ex verbis illius intelligitur. Confirmatur, nam eodem modo cum S. Doctor ait, desperationem esse fugam boni sperati, id debet intelligi de bono per accidens, seu materialiter, quatenus habet aliquam rationem mali, ut supra observatum est.

Neque dicas audaciam non distingui à desiderio, vel à se, si est quædam persecutio boni: hoc enim non sequitur, quia adhuc dici potest, desiderium ferri simpliciter in bonum ut futurum, spem in bonum futurum, quatenus possibile, & secundum se, vel ratione mediorum quibus obtinendum est difficile, etsi nullum malum in illius affecutione subeundum sit: audaciam verò in bonum futurum quod sine graui aliquo labore, aut periculo obtineri nequit.

Dico 2. *Audaciam excitari à spe, & ab iisdem causis qua generant spem.* Prior pars probatur, nam ut ait S. Thomas art. 2. citato, ex hoc quod aliquis sperat superare terribile imminens, audacter insequitur ipsum, adeoque audacia consequitur ad spem, seu ab ea excitatur: ad eum modum quo desperatio sequitur ad timorem, ideo enim aliquis desperat, quia timet difficultatem quæ est circa bonum sperandum.

Posterior pars ostenditur, quia cum audacia ex spe nascatur, hinc fit ut quæ spem generant, audaciam quoque generare possint. Unde cum ea quæ suppeditant auxilium ad aliquid arduum consequendum, & ea quæ efficiunt ut res videretur obtentu possibilis, generent spem, ex supradictis; eadem quoque audaciam generant indubitatum est. Quæ ratio est cur Arist. 2.

Rhetor. cap. 5. sapienter dicat, eos esse audaciores qui recte se habent erga diuina: quia certius sperant auxilium necessarium ad res arduas peragendas sibi non defuturum. Item eos qui iniuria affecti sunt, quia Deus iniusta passis opitulari creditur. Hinc etiam sequitur iuuenes & ebriosos esse audaciores, ut ex dictis intelligi potest.

Dico 3. *Effectum audacia esse afferre tremorem, & frigiditatem membris exterioribus.* Ita habetur art. 4. ad 1. ubi S. Doctor obseruat eundem effectum oriri etiam ex timore, sed cum discrimine, quia in audacia reuocatur calor ad cor, in timore verò ad partes inferiores.

Notandum autem ex corp. eiusdem art. illud esse discrimen inter passionem audaciæ, & virtutem fortitudinis, quod audaces sunt promptiores in principio, cum pericula aggrediuntur, quam in fine; quia audacia sequitur apprehensionem sensitiuam, quæ non est collatiua, nec inquisitiua singulorum quæ rem circumstant sed subitum habet iudicium: quare audaces cum difficultates graues quas non præuiderant, experiri incipiunt, paulatim animos remittunt, fortes verò quia pericula aggrediuntur ex iudicio rationis, quo singula quæ accidere possunt, prudenter expendunt & ponderant, hinc fit ut in progressu sint constantiores & fortiores; quia vel nihil experiuntur quod ab ipsis præuisum non sit, vel agnoscunt non adeo graue esse periculum, quam animo præconceperant.

Quæritur 2. quid sentiendum sit de natura, speciebus, causis, & effectibus timoris.

Respondeo & dico 1. *Timorem esse passionem quâ appetitus irascibilis fugit malum imminens, quod difficile caneri posse existimatur.* Ex quibus patet duo requiri ad timorem, primò quod sit fuga

alicuius mali imminentis; si enim malum concipitur ut valde distans, de eo non est timor: unde homines non timent mortem, quia eam procul abesse existimant, ut monet Philosophus, à S. Doctore 1. 2. quæst. 42. art. 2. relatus. Secundò quòd malum illud imminens difficile caueri possit, aut reipsa, aut secundum existimationem. Cum enim timor ad appetitum irascibilem spectet, non est nisi de malo arduo, seu quod difficile caueri potest. Unde timor est quid medium inter audaciam, & desperationem; nam si malum arduum ut facile vincibile existimetur, excitatur audacia; si nullo modo superabile iudicetur, excitatur desperatio: at quando malum tale est ut nec facile superabile, nec omnino insuperabile credatur, insurgit timor.

Ex quo intelligitur resolutio illius difficultatis, an timor sit de malo culpæ, ad quam S. Thomas respondet art. 3. cum hac distinctione. Malum culpæ duobus modis spectari potest, 1. quatenus omnino subiacet voluntati nostræ, 2. quatenus ab externa causa, cui difficile sit resistere, puta à dæmone, causari potest. Malum culpæ priori modo spectatum non est obiectum timoris, quia sic non habet rationem mali ardui & terribilis; sed posteriori est obiectum illius, ob rationem oppositam. Hinc etiam intelligitur eos qui iamiam morte plectendi sunt non timere, sed tristari, quia mortem veluti inuitabilem & præsentem intuentur.

Dico 2. Sex species timoris assignari à S. Thoma quæst. 41. art. 4. nempe segnitiam, erubescenciam, verecundiam, admirationem, stuporem, & agoniam. Quam diuisionem ita probat. Malum quod est obiectum timoris, dupliciter potest considerari, vel in operatione hominis, vel in rebus exte-

rioribus; In operatione duplex malum potest timeri, primò labor grauans, quomodo generatur segnitie, cum scilicet quis refugit operari, propter timorem excedentis laboris. Secundò turpitudine lædens bonam existimationem, quæ si timeatur in actu committendo, est erubescencia, si in iam commisso, est verecundia. In rebus autem exterioribus malum potest timeri tripliciter, vt excedens facultatem, primò ratione suæ magnitudinis, quando quis aliquod magnum malum timet, cuius nullum exitum inuenire potest, & sic est admiratio; secundò ratione dissuetudinis, vt cum malum occurrit quod ob nouitatem, & inexperience magnum nobis videtur; & sic generatur stupor: tertio ratione impotentie mali futuri auertendi, quomodo fit agonia. Verum ista vocabula aliter alias accipi solent.

Nota ex resp. ad 1. istas species accipi secundum diuisionem propriam obiecti ipsius timoris, quæ verba non obscure indicant omnes predictos timores differre inter se specie & essentialiter. Oppositum tamen dicendum videtur, quia quod malum futurum cui difficulter resisti potest, consideretur in operationibus hominis, vel in rebus illius exterioribus, id non arguit discrimen formale inter timores, sed tantum materiale, aut varios gradus timoris; sicut quod ratio visus disgregatiua reperiatur in lacte, & in marmore, id non infert nisi discrimen materiale inter albedines, aut varios earum gradus. Quare verba S. Doctoris allata de diuisione materiali obiecti timoris intelligi debent.

Dico 3. *Generalem causam timoris esse amorem, & concupiscentiam boni quo priuari timemus.* Ita S. Thomas quæst. 43. art. 1. quod probat tum ex Aug. cum ait, non aliam esse metuendi causam,

nisi ne id quod amamus, aut adeptum amittamus, aut non adipiscamur speratum: tum quia ex hoc quod quis amat aliquod bonum, sequitur quod priuatiuum talis boni sit ei malum, & per consequens quod timeat ipsum tanquam malum. Vt autem hoc clariùs percipiatur,

Nota 1. ex corp. art. obiecta se habere ad passionem, sicut formas ad res quas constituunt, quia speciem sumunt ab illis: quare sicut quod est causa formæ, est causa rei constitutæ per illam; ita quidquid est causa obiecti, est causa passionis, eodemque modo. Potest autem aliquid esse causa obiecti; vel per modum causæ efficientis, vt quod efficit conuenientiam obiecti amoris, vel per modum dispositionis materialis, vt habitus secundum quem res alicui conueniens videtur. Ita ergo id quod potest inferre malum arduum, seu difficile superabile, est causa effectiua obiecti timoris, adeoque ipsius timoris; illud verò per quod quis ita disponitur, vt ipsi aliquid sit malum difficile superabile, est causa timoris per modum dispositionis; quâ ratione amor est causa timoris.

Nota 2. amorem boni præcisè non esse causam timoris, quia cum timor non sit de quocunque malo, opposito bono quod diligimus, sed de malo quod difficile caueri potest, vt timor in nobis exciteretur, non sufficit quod quis intendat nos priuare bono amato, sed præterea requiritur, vt nobis vires non supersint ad ei resistendum. Quare amor, vt per modum dispositionis materialis sit causa timoris, debet esse coniunctus cum propria imbecillitate, qua quis sit impotens ad resistendum, aut saltem se impotentem existimet; quia vt habetur in argumento, sed contra, eiusdem art. *contrariorum contraria sunt cause*; sed diuitiæ, & robur, & mul-

titudo amicorum, & potestas excludunt timorem ex 2. Rhetor. cap. 5. ergo ex horum defectu timor causatur.

Dico 4. *Nonnullos effectus assignandos esse timori, ut patet ex quæst. 44. per quatuor articulos.* In primis timor facit contractionem sanguinis & spirituum, ut traditur art. 1. quia cum oriatur ex malo imminenti, quod difficile repelli potest ob defectum virtutis, quæ quo est debilior, ad pauciora se extendit, hinc fit ut imaginatio talis mali causet aliquam contractionem caloris & spirituum ad interiora: sicut videmus in morientibus naturam sese ad interiora recipere propter debilitatem virtutis; & in urbium obsidione ciues munimentis exterioribus dimissis, ad interiora arcis confugere.

Deinde timor ex 2. Rhetor. cap. 5. facit consiliatiuos, ut habetur art. 2. quod non ita debet intelligi, ut timor præbeat ei cui inest, facultatem bene consiliandi; oppositum enim potius contingit, quia homini timore, aliave passione affecto res aliter apparent, quam sint, sicque ex defectu rectitudinis iudicij, facultas bene consiliandi in eo impeditur. Facit ergo timor homines bene consiliatiuos, quatenus eos excitat ad consilium in magnis periculis quærendum; quia ut ait Arist. 3. Ethic. cap. 3. consiliamur de magnis in quibus quasi nobis ipsis discredimus.

Rursus timoris effectum esse tremorem constat experientia, & probatur art. 3. cum enim in timore fiat contractio caloris, & spirituum ad interiora, hinc fit ut exteriora frigeant, adeoque in iis accedat tremor, qui causatur ex debilitate virtutis, qua membra continentur. Hinc etiam oritur sitis, quia calore interiùs multiplicato, humiditas consumitur. Oritur quoque tremor cordis, quia calore destituitur, & consequentes

tremor vocis, & inferioris mandibulæ; ex quo sequitur dentium strepitus, quia hæc habent connexionem cum pectore, ubi est cor.

Denique quomodo timor impediatur, vel non impediatur operationem explicatur art. 4. impedit quidem operationem externam, ex parte instrumenti, quatenus calorem intus abigit; at ex parte animæ, si timor sit moderatus, operationem iuvat, quia vigilantiam & attentionem acuit; impedit verò, si ita excedat ut rationem perturbet.

ARTICVLVS VII.

De Ira.

QUÆRITUR I. quid sit ira. Respondeo iram esse motionem appetitus irascibilis, quo insurgitur in vindictam de iniuria accepta. Ex quo intelligitur motum iræ tendere in duo, ut tradit S. Thomas 1. 2. quæst. 46. art. 2. primò in ipsam vindictam quam appetit tanquam aliquod bonum, unde de ipsa delectatur. Secundò in eum de quo quærit vindictam, sicut in contrarium & nocivum, quod pertinet ad rationem mali: ad eum modum quo amor tendit in duo obiecta, nempe in bonum quod optat alicui, & in personam cui illud optat; & odium tendit in malum quod vult alicui inesse, & in personam cui vult inesse.

Notat tamen S. Doctor inter illas passionem esse discrimen, quod vtrumque obiectum amoris est bonum, vult enim bonum alicui qui sibi est conueniens; & vtrumque obiectum odij est malum, quia illum cui vult malum, tanquam sibi inimicum, & malum reputat. Ira vero respicit

vindictam, quam appetit, sub ratione boni; & hominem de quo vult sumere vindictam, sub ratione mali & nociui. Vnde ira est passio quodammodo composita ex contrariis passionibus.

Nota 1. ex art. 3. iram, cum sit passio appetitus irascibilis, aliquam arduitate requirere in utroque obiecto suo antè memorato: ira enim non insurgit circa illa quæ nihili ducuntur, vt sumitur ex 2. Rhet. cap. 2.

Nota 2. ex art. 4. iram esse cum ratione, ira enim est appetitus vindictæ, at vindicta dicit collationem pœnæ infligendæ cum nocumento illato. Ex quo sequitur iram non esse propriè in brutis, cum careant ratione, & proportionem pœnæ cum nocumento percipere non possint. Nisi dicamus cum S. Thoma in resp. ad 2. sufficere quod bruta ducantur instinctu naturali per rationem diuinam directo, vt etiam supra vbi de spe, ex eodem obseruauimus.

Nota 3. ex art. 5. iram ex parte obiecti minùs esse naturalem, quàm concupiscentiam cæbi & venereorum, quia hæc sūt magis naturalia quàm vindicta: at ex parte subiecti, inquantum homo qui irascitur, vel concupiscit est rationalis, sic ira est naturalior concupiscentia, quia magis coniuncta est cum ratione. Idem dic si homo consideretur, vt est tale indiuiduum ex propria complexione dispositum ad iram, & concupiscentiam: quia cum cholera citiùs moueatur quàm alij humores, complexio disponens ad iram, promptiùs effectum suum producit, quàm temperamentum disponens ad concupiscentiam. Vnde ex Philosopho 7. Ethic. cap. 6. ira magis traducitur à parentibus in filios, quàm concupiscentia.

Nota 4. ex art. 6. odium esse peius ira, nam species passionis, & ratio ipsius ex obiecto pensatur,

fatur, at quamvis odium & ira malum appetant, id fit cum discrimine; quia odium appetit malum alicui sub ratione mali, ira vero sub ratione iusti vindicatiui. Vnde odium est per applicationem mali ad malum, ira vero per applicationem boni ad malum. Constat autem velle malum sub ratione iusti, esse minus malū quam velle malum simpliciter; cum illud interdum ex virtute oriri possit, si nimirum fiat ex præscripto rationis. Confirmatur, nam odium quia appetit malum alterius, secundum se, nulla mensura satiatur; ira vero quia non appetit nisi sub ratione iustæ vindicationis, quando hanc iustitiæ mensuram attigit, miseretur, ut habetur in resp. ad 1.

Quæritur 2. quot sint species iræ. Respondeo tres assignari à S. Doctore eiusdem quæst. art. 8. nempe fel, maniam, & furorem. Quod probat, quia species iræ sumuntur secundum ea quæ dant iræ aliquod augmentum, quod contingit tripliciter; primò ex facilitate ipsius motus, & hæc ira vocatur fel, quia citò accenditur. Secundò ex parte tristitiæ causantis iram, quæ diu in memoria manet, & hæc inde sumpto nomine vocatur mania. Tertiò ex parte vindictæ quam iratus appetit, & hæc pertinet ad furorem qui nunquam quiescit donec puniat. Vnde Ari. 4. Ethic. cap. 5. eos qui primi generis ira affecti sunt, vocat acutos, qui secundi, amaros: qui tertij, difficiles.

Nota ex resp. ad 1. omnia illa per quæ ira recipit aliquam perfectionem, non omnino per accidens se habere ad iram, & ideo nihil prohibere secundum ea species iræ, assignari. Ex quibus verbis patet S. Thomam etsi dicat fel, maniam, & furorem non omnino per accidens se habere ad iram, non propterea velle esse pro-

Ethica.

P

prias & distinctas iræ species, sed quosdam iræ gradus ex diuersis subiecti dispositionibus sumptos, quorum alij sunt magis, alij minus intensi, vel extensi. Quod etiam colligitur ex verbis illius ante relatis cum ait, species iræ sumi secundum ea quæ dant iræ aliquod augmentum; constat enim rei augmentum neque esse omnino per accidens ad illam, neque etiam addere illi nouam speciem propriè dictam, sed aliquam perfectionem materiale, & entitatiuam.

Quæritur 3. quænam sint causæ iræ. Respondeo eas esse varias tam ex parte irascentis, quàm ex parte illius qui ad iram prouocat. Ex parte quidem irascentis monet S. Thomas 1. 2. quæst. 46. art. 1. iram ex concursu multarum passionum generari, non enim insurgit motus iræ nisi propter aliquam tristitiam, de malo illato conceptam, & nisi adfit desiderium, & spes uiciscendi. Vnde si fuerit multum excellens persona quæ nocumentum intulit, adeo ut non sit spes vindictæ, non insurgit ira, sed tantum tristitia. Atque hoc sensu S. Doctor art. 3. ad 3. explicat iram componi ex tristitia, & desiderio, iuxta Gregorium Nyssenum, & Damascenum, non sicut ex partibus, sed sicut ex causis.

Ex parte verò illius qui ad iram prouocat, derisio, contumelia, detractio, bonorum ablatio, aliaque eiusmodi quibus iniuria, vel incommodum infertur, inter causas iræ numerari possunt. Verum S. Thomas quæst. 47. art. 2. contendit omnes causas iræ reduci ad paruipensionem seu contemptum, quod probat, quia non irascimur nisi ob iniuriam iniuste acceptam, at tripliciter potest nobis iniuria inferri, scilicet ex ignorantia, ex passione, & ex electione seu malitia deliberata: quod autem sit ex ignorantia, vel passione non magnam habet rationem in-

inriæ, sed quod fit ex electione seu malitia, quia id ex contemptu procedit. Vnde maximè in eos, qui hoc tertio modo nobis nocent, irascimur; in alios verò non irascimur, aut minùs irascimur.

Ex dictis collige 1. quò quis in gradu excellentiori constitutus est, eò magis illum ad iram, ob acceptam iniuriam prouocari; quia tunc maior est contemptus. Interdum tamen oppositum contingit, nam videmus homines defectibus subiacentes, faciliùs lædi, & contristari, & consequenter magis ad iram prouocari: quò fit vt infirmi faciliùs irascantur, quàm fani; senes, quàm iuuenes; mulieres, quàm viri, vt sumitur ex art. 3.

Collige 2. quò qui paruipendit, vilior est, eò maiorem per se loquendo iram in offenso excitari; quia vt traditur art. 4. indigna despectio est maximè prouocatiua iræ: at sicut quò aliquis est maior, eò indignius despicitur, ira & quò aliquis est minor, eò indignius despicit: & ideo nobiles grauiter irascuntur, si despiciantur à rusticis, domini à seruis, sapientes ab insipientibus.

Quæritur 4. quinam sint effectus iræ Respondeo quatuor afferri à S. Doctore, quæst. 48. per quatuor articulos, in quorum primo statuit iram causare delectationem, quod probat quia ex Philosopho 7. Ethic. cap. 12. delectationes maximè corporales & sensibiles sunt medicine quædam contra tristitiam, & ideo eò delectatio magis percipitur, quò per illam adhibetur remedium maiori tristitiæ, vel anxietati, vt patet quòd eò delectabilior est potus, quò magis quis sitit. Ira autem insurgit ex aliqua iniuria accepta contristante, cui remedium adhibetur per vindictam, & ideo ad præsentiam

vindictæ delectatio sequitur, eoque maior quò maior fuit tristitia.

Art. 2. docet iram causare feruorem circa cor, quod probat, quia corporalis transmutatio, quæ est in passionibus animæ, proportionatur motui appetitus: at quilibet appetitus etiam naturalis, fortius tendit in sibi contrarium, si fuerit præsens, vt patet in aqua, quæ cum calefacta est, magis congelatur. Ira autem causatur ex aliqua iniuria illata, sicut ex quodam contrario præsentem, adeoque vehementer accenditur ad repellendam talem iniuriam. Et quia motus iræ non est per modum retractionis, cui proportionatur frigus, sed per modum infecutionis, cui calor proportionatur, consequenter ira causat quendam feruorem sanguinis & spirituum circa cor.

Vnde in resp. ad 1. notat illud esse discrimen inter feruorem amoris, & iræ, quod prior est cum quadam dulcedine & lenitate, est enim in bonum amatum, & ideo assimilatur calori aëris & sanguinis; propter quod qui temperamento sunt sanguineo, ad amorem magis sunt proclives; feruor autem iræ est cum amaritudine ad consumendum, quia tendit ad punitionem contrarij; vnde ira assimilatur calori ignis & cholæræ, imò procedit ex euaporatione fellis, & ideo fellea nominatur.

Art. 3. docet iram maximè impedire vsum rationis; Quia etsi ratio non vtatur organo corporeo in suo proprio actu, quia tamè indiget ad agendum quibusdam viribus sensitiuis, quarum actus impediuntur corpore perturbato, hinc fit vt perturbationes corporales iudicium rationis impedian, sicut patet in ebrietate, & somno. Quare cum ira excitet maximas perturbationes corporales circa cor, inde sequitur eam ma-

ximè inter omnes passiones impedire iudicium rationis. Nec refert quòd ira sit cum ratione, vt supra diximus, hoc enim intelligitur de iræ initio, siquidem post excitatam nimiam caloris commotionem, iudicium rationis perturbatur.

Art. 4. docet taciturnitatem ab ira causari, quia perturbatio iræ vsque ad exteriora membra perducitur, & maximè vsque ad illa in quibus expressius elucet vestigium cordis, sicut in oculis, in facie, & in lingua. Vnde sicut ait Gregor. à S. Thoma art. 2. relatus, *Lingua se praepedit, facies ignescit, exasperantur oculi.* Potest ergo esse tanta perturbatio iræ, vt omnino impediat lingua ab usu loquendi, & tunc sequitur taciturnitas. Quod non obstat quominus ira non adeo vehementer commoti, multa verba effutiant. Imò in Euangel. Matthæi cap. 5. notantur varij iræ gradus, per varia verba contumeliosa quæ in proximum iactantur.





LIBER III.

DE VIRTVTIBVS

Moralibus.

Suppositis iis quæ in Metaphysica dicta sunt de habitibus in genere, reliquum est ut hoc loco de virtutibus moralibus differamus. Ac primò earum rationem generatim expendemus, tum verò de speciebus virtutis moralis, videlicet Prudentia, Iustitia, Fortitudine, & Temperantia sigillatim verba faciemus.

CAPVT PRIMVM.

DE NATVRA, ET CAVSIS

virtutum moralium.

ARTICVLVS PRIMVS.

De nomine, existentia, & essentia virtutis Moralis.



P RÆMONEO I. Nōmine virtutis interdum significari quamcunque vim & facultatem agendi, quo sensu agunt medici de virtutibus herbarum, & medicamentorum: hic verò strictiùs sumi pro quadam perfectione potentiis rationalibus su-

peraddita, qua homo inclinatur ad operationes rectæ rationi seu honestati consentaneas; quomodo iustitia, & temperantia dicuntur virtutes morales.

Præmoneo 2. non dubitari de existentia virtutis moralis; constat enim Iustitiam, Fortitudinem, Temperantiam, similesque virtutes quæ morales appellantur, non in solis libris extare, sed homines non paucos reperiri quos meritò iustos, fortes, temperantes, &c. nuncupamus, quòd ab iis eiusmodi virtutum actus frequenter, & cum facilitate eliciantur. His positis

Quæritur 1. sub quo rerum genere virtus moralis constitui debeat. Respondeo eam constitui sub genere habitus. Probatur ex 2. Ethic. cap. 5. vbi Philosophus ostendit virtutes neque esse actus, neque facultates seu potentias, vnde concludit necessariò esse habitus. Confirmatur, quia virtus non est quid citò transiens, sed post actum permanet, etiam in dormientibus; aliàs virtutis opus intermittentes illico à virtute exciderent, quod non contingit. At non est substantia hominis, vel aliqua illius potentia naturalis, quia iis omnibus remanentibus virtus destrui potest. Superest ergo vt sit quidam habitus potentiis superadditus, quo in bonum honestum inclinentur.

Obiicies, virtus, & vitium ex Arist. 7. Physic. tex. 17. sunt ad aliquid, seu dicunt relationem; ergo non sunt de genere habitus, sequela patet, quia habitus est qualitas, non relatiq. Respondeo hoc argumento nihil concludi, quia vel agitur eo loco de virtute propriè sumpta, vt de ea hic agimus, vel de virtute latè & impropriè spectata, vt significat bonum habitum corporis, qualis est sanitas: si ibi agitur de virtute priori modo, sic virtus dicit relationem

transcendentalem, quatenus intrinsecè tribuit subiecto inclinationem ad actum honestum; at relatio transcendentalis vagatur per omnes categorias, adeoque bene cohærere potest cum habitu. Si verò Arist. tractat de virtute posteriori sensu, obiectio allata adhuc minùs vrget contra nos, cum agamus de virtute animi, & præterea virtus illa corporis, non sit formaliter relatio, sed consistat in certa partium dispositione, ex qua oritur quædam habitudo seu relatio inter illas.

Quæritur 2. quænam sit differentia qua virtus moralis in se formaliter constituitur, & ab aliis habitibus distinguitur. Respondeo differentiam virtutis moralis constitutiuam & distinctiuam esse, vt rectè afficiat hominẽ in ordine ad actum honestum eliciendum. Sicut enim virtus sumpta generatim pro facultate agendi, rectè afficit subiectum ad eliciendas operationes suæ naturæ consentaneas; & speciatim sumpta pro virtute intellectuali, est habitus disponens hominem ad eliciendas operationes homini, vt est intellectu præditus, congruentes; ita sumpta strictè pro habitu morali, hominem rectè disponit ad actiones, iuxta dictamen rectæ rationis seu honestatis eliciendas.

Vnde virtus moralis definiri potest, habitus tribuens homini inclinationem ad rectè & secundum honestatem operandum. Et per priorem particulam virtus moralis distinguitur ab iis omnibus quæ non sunt habitus, etsi fortè inclinent ad bonum honestum; quo sensu ex communi sententia, sunt in natura hominis implantata quædã semina honestatis moralis, etiam secluso quocunque habitu. Per posteriorem verò distinguitur ab omnibus aliis habitibus acquisitis, cum alij ad malum, vt habitus vitiosi,

alij ad verum, vt intellectus, sapientia, scientia, prudentia, & ars; alij modo ad verum, modo ad falsum, vt fides humana, & opinio inclinens.

ARTICVLVS II.

Quadam corollaria continens.

EX dictis intelligis 1. allatam definitionem virtutis non multum discrepare ab iis quæ ex Arist. circumferuntur, quarum prima, sumpta ex 2. Ethic. cap. 6. ita habet; *Virtus est quæ bonum facit habentem, & opus eius bonum reddit.* Hoc enim rectè virtuti morali competit, quatenus hominem, in quo est, inclinât ad actus bonos & honestos eliciendos.

Secunda sumitur ex eodem capite, sicque concipitur, *Virtus est habitus electiuus, in mediocritate quoad nos positus, prout recta ratio & vir prudens præscripserit.* Dicitur 1. *habitus electiuus*, quia voluntatem, cuius proprium est, ob innatam libertatem eligere, mouet ad rectè eligendum.

Dicitur 2. *in mediocritate positus*, quia cum vitia à mediocritate excedant, vt patet in auaritia, & prodigalitate, virtus in mediocritate consistit, vt neque deficiat, neque excedat; vt in liberalitate perspicuum est.

Dicitur 3. *quoad nos, &c.* quia cum mediocritas, quam virtus sectari debet, non sit ex natura rei definita, imò quod respectu vnus excedit, in alio deficiat, vt patet in cibo & potu, cuius mediocritatem temperantia amplectitur; hinc fit vt mediocritas illa iuxta rectam rationem, & prudentis arbitrium, spectatis circumstantiis determinari debeat. Et per has particulas declaratur, quodnam sit illud bonum honestum

stum in quod virtus moralis, iuxta nostram definitionem inclinatur; quod scilicet in mediocritate prudenter præscripta constitutum est.

Intelligis 2. virtutem moralem ita per se tendere ad bonum, ut nequeat habere actum malum, adeoque virtute neminem posse malè uti, ut ait Aug. lib. 2. de libero arb. cap. 19. Quod non tantum ita intelligendum est, ut actus malus formaliter qua malus, non possit à virtute procedere, sed etiam ita ut ne quidem actus malus materialiter spectatus, ab ea fluere possit, unde cumque malus sit; ut si actus liberalitatis ad vanam gloriam tendat. Et hoc aperte sumitur ex S. Thoma I. 2. quæst. 55. art. 4. ad 5. cum ait, virtute posse aliquem malè uti tanquam obiecto, ut cum malè sentit de virtute, cum odit eam, vel superbit de ea; non autem tanquam principio usus, ita scilicet quod actus virtutis sit malus.

Ratio autem est, quia cum virtus moralis sit habitus ex se extrinsecè inclinans ad actum bonum & honestum, repugnat quod sit causa effectiva actus pravi & inhonesti; cum ad talem actum non possit voluntatem inclinare, nec vllum actum cauere nisi illum ad quem inclinatur. Confirmatur, quia habitus non inclinatur nisi ad actus iis similes à quibus productus est; at virtus moralis non potest produci nisi per actus bonos, ergo nec nisi ad actus bonos tendere potest. Quare non sufficit quod actus aliquis dicatur malus tantum ex circumstantia, talis enim actus nequaquam bonus est, sed est simpliciter malus, adeoque virtutis partus esse non potest.

Intelligis 3. cum sit de essentia virtutis moralis, hominem inclinare ad bonum honestum, rectæque rationi consentaneum, eos decipi qui putant hoc illi non competere nisi accidentario,

ita vt idem habitus qui fertur in bonum, possit ferri in malum, & vice versa; & consequenter habitus bonus in malum, & malus in bonum flecti possit, mutato respectu illius accidentali siue conformitatis, siue difformitatis ad rectam rationem. Hoc enim manifestè ex dictis refellitur, siquidem essentiæ rerum immutari non possunt; quare cum quilibet habitus essentialiter inclinet ad actus iis similes à quibus productus est, repugnat quòd qui per bonos actus productus est, inclinet ad malos, aut qui per malos genitus est, ad bonos inducat; adeoque quòd fiat mutatio habitus è bono in malum, aut contra è malo in bonum.

Nec refert quòd ille qui, ex erroneo iudicio, acquisiuit per varios actus habitum abstinentiæ, possit facilè postea abstinere ex prudenti rationis dictamine: hoc enim non inde oritur, quòd idem ille habitus abstinentiæ, quem ex errore comparauit, eum moueat & inclinet ad abstinendum ex recta ratione; sed ex eo quòd subiugatis per priorem temperantiam motibus intemperantiam impellentibus, sicque aliquo modo iam dispositus ad abstinendum, faciliùs acquirit nouum habitum ad abstinendum bene, quàm qui nullo modo abstinens est: sicut ille qui antè fuit prodigus, faciliùs acquirit habitum liberalitatis, quàm qui auarus erat.

ARTICVLVS III.

De causis virtutum moralium formali, & materiali, seu subiectina.

QUæritur I. quænam sit causa formalis virtutum moralium. Respondeo nullum esse posse dubium de hac causa, quia cum

virtus fit in genere habitus, & habitus in genere qualitatis, omnisque qualitas fit forma accidentalis subiecti quod afficit, hinc sequitur nullam esse propriè causam formalem virtutis moralis, cum non detur forma formæ.

Quia tamen essentia rei interdum dicitur forma intrinseca illius, hinc dici potest virtutis moralis formam intrinsecam esse quidditatem & essentiam illius: & quia habitus sumit etiam speciem per ordinem ad obiectum, quod propterea habet quandam rationem formæ, addi potest obiectum in quod tendit, esse formam illius extrinsecam.

Quæritur 2. quænam sit causa materialis seu subiectiua virtutum moralium, quod non debet intelligi de subiecto quod, seu mediato, cum constet eiusmodi subiectum esse hominem, sed de subiecto quo, seu de potentia naturali cui virtus immediatè inhæret.

Respondeo & dico 1. *Prudentiam qua inter virtutes morales nominatur, esse in intellectu.* Probat, nam omnes habitus intellectuales resident in intellectu, cum intellectuales dicantur, quia in intellectu residet, siue quia intellectum effectiue iuvant ad intelligendum, quo ipso debent esse subiectiue in intellectu; sicut species intelligibiles in eodem resident, quia intellectionem effectiue cum illo producant. Atqui prudentia inter habitus intellectuales constituitur, ut patet ex dictis de habitibus in Metaphysica: & breuiter confirmatur, quia est virtus qua homo dirigitur in actibus suis; at hominem dirigere in actibus suis non spectat nisi ad habitum cognoscitium, adeoque in intellectu existentem: ergo prudentia est subiectiue in intellectu.

Obiicies, prudentia est virtus moralis, at virtus moralis debet residere in voluntate, quia

hæc est principium actuum moralium; ergo prudentia est in voluntate. Respondeo virtutem dupliciter dici moralem, primo quatenus per se & intrinsecè inclinat ad eliciendum actum moralem; secundo quatenus extrinsecè ordinat & dirigit actum moralem: virtus quæ est moralis priori modo, debet residere in voluntate, quæ verò posteriori, cuiusmodi est prudentia, in intellectu.

Dico 2. *Alias virtutes morales nempe iustitiam, fortitudinem, & temperantiam esse in voluntate.* Id omnes concedunt de iustitia, quæ propterea definiri solet, *Constans & perpetua voluntas ius summi cuique tribuendi.* Maior autem est difficultas de aliis, quia nonnulli ponunt illud discrimen inter iustitiam & illas, quod iustitia, cum hominem ordinet ad alium, illius bonum procurando, debet residere in voluntate; aliæ verò, quia hominem ordinant ad seipsum, passionibus illius frænando, in appetitu sensitivo, qui est sedes passionum, reponi debent.

Oppositum tamen est probabilius, quia illa potentia eget habitu ad aliquem actum, quæ experitur difficultatem in actu illo eliciendo: atqui voluntas experitur difficultatem in operibus fortitudinis, & temperantiæ; ergo indiget iis virtutibus ad superandam eiusmodi difficultatem, adeoque in ea reponi debent. Maior patet ex dictis de habitibus in genere, minor verò suadetur, quia experientia satis constat nos in bonum sensibile vehementer propendere, & à malo sensibili quam maxime abhorrire, adeoque non sine gravi difficultate à bonis sensibilibus temperare, & mala sensibilia aggredi: quare ad superandas istas difficultates indigemus habitibus temperantiæ, & fortitudinis, quorum auxilio à voluptatibus sensibilibus abstinere

mus, & mortis pericula subeamus.

Nec dicas satis esse, quod habitus illi constituantur in appetitu sensitivo, quia difficultas oritur ab illo, non à voluntate, cum bona sensibilia huius non sint obiectum, sed illius. Ne inquam id dicas, quia etsi bona sensibilia non sint obiectum voluntatis, ut est facultas spiritualis, sunt tamen quatenus voluntas est appetitus universalis hominis, qui in totum illius bonum tam sensibile, quam non sensibile fertur. Quare etsi ponendus sit aliquis habitus in appetitu sensitivo, ad reprimendam illius difficultatem, id non impedit quin alius sit constituendus in voluntate, iisque nobilior; eò quod voluntas quia sequitur ductum rationis, potest ferri in obiectum sub ratione boni honesti, non autem appetitus sensitivus, qui cum sola phantasia ducatur, in sola obiecta sensibilia ferri potest. Quò fit ut habitus qui ponitur in appetitu sensitivo, non sit propriè virtus, sed ille tantum qui in voluntate constituitur; eò quod de ratione virtutis moralis est, ut feratur in obiectum quatenus honestum. Accedit quod ad voluntatem spectat regere appetitum, illiusque passiones comprimere: quare eget distincto habitu, eoque excellentiori, quemadmodum eques eget habitu nobiliori ad regendum equum, quam equus ad sequendum equitis imperium.

Quod si instes, equitem per se non indigere freno ad equitandum necessario, sed arte & dexteritate ad regendum equum, frenum verò esse necessarium tantum ex parte equi, ut sessoris iussa capeat: & similiter solum appetitum indigere freno virtutis, ut ad arbitrium voluntatis flectatur, & ad voluntatem sufficere quòd ex arte & rationis præscripto appetitum moueat: Respondeo non esse quoad hoc parem ratio-

nem in equite, & voluntate, nam eques non ita iunctus est equo, ut id totum velit in quod equus fertur: si enim equus vult se in foueam præcipitem agere, id ipsum non vult sessor, qui proinde non eget freno, sicut equus: at tanta est connexio & sympathia inter voluntatem & appetitum sensitivum, ut illa auidè feratur in bonum sensibile quod iste amplectitur. Quare ne contra rationis dictamen aliquid eligat, in quod ille propendit, si frenum virtutis moralis, quo eiusmodi periculum euadat, ipsi necessarium est.

Obiicies 1. ex Arist. 3. Ethic. cap. 10. fortitudinem, & temperantiam esse in parte irrationali; at pars irrationalis non est voluntas, sed appetitus sensitivus. Responsio communis est, per partem irrationalem, à Philosopho intelligi voluntatem, eo quod illa per se caret cognitione & ratione. Quod ex eo confirmatur, quia Arist. lib. 1. magnorum Moral. cap. 5. ponit etiam iustitiam in parte irrationali, quam tamen omnes in voluntate collocant.

Obiicies 2. actus fortitudinis, & temperantiæ complentur in appetitu sensitivo; ergo ibi debent poni earum habitus. Respondeo hoc argumento æquè posse probari, virtutes fortitudinis, & temperantiæ residere in membris externis, cum in illis consummentur: Quare dico actus elicitos istarum virtutum perfici in voluntate, imperatos verò in appetitu sensitivo, vel in membris corporis.

ARTICVLVS IV.

De causis virtutum moralium effectina, & finali.

Quæritur I. quænam sit causa efficiens virtutum moralium.

Respondeo & dico I. *Virtutes morales non esse nobis à natura congenitas.* Probatum tum ex Arist. 2. Ethic. cap. I. tum quia si essent à natura congenitæ, non esset necesse illas per actuum repetitionem comparare: cum tamen experiamur nos eiusmodi virtutibus carere, nisi sedulo per multiplices actus in earum studium incumbamus: sicut enim nemo euadit Philosophus, aut pictor, nisi rebus Physicis, & picturæ gnauiter operam dederit; ita vt quis sit fortitudinis, vel temperantiæ habitu præditus, debet fortiter, & temperatè se gerere.

Tum quia si virtutes nobis essent à natura congenitæ, non possemus eas abiicere, & habitus vitiorum oppositos comparare: at experientia constat multos abiectis virtutibus moralibus, vitia opposita sectari: ergo signum est habitus virtutum moralium non esse nobis à natura congenitos.

Ex quo patet virtutes morales non esse nobis naturales, si per naturale illud intelligatur quod est à natura congenitum, aut etiam quod sponte & sine vlllo labore naturæ aduenit. Quamquam secus dicendum sit, si illud dicatur naturale, quod naturæ conueniens est, aut ad quod natura inclinatur; quo sensu dici solet semina quædam virtutum esse nobis naturaliter inserta, quatenus principia generalia morum per lumen rationis cognoscimus, per voluntatis inclina-

tionem in amorem virtutis propendimus, & etiã per naturale corporis temperamentum ad hanc, vel illam virtutem facîle acquirendam aptamur. De quo videri potest S. Thomas 1. 2. quæst. 63. art. 1. vbi concludit, virtutes morales, de quibus hic agimus, esse nobis à natura secundum aptitudinem, & inchoationem, non autem secundum perfectionem: virtutes verò Theologicas nempe fidem, spem, & charitatem esse nobis totaliter ab extrinseco; quia cùm sint ordinis planè diuini & supernaturalis, non nisi à Deo per infusionem haberi possunt.

Dico 2. *Virtutes morales per multorum actuum repetitionem in nobis produci.* Probatum experientia, nam post elicitos multos actus fortitudinis, & temperantiæ, experimur nos magnam facilitatem consequi ad similes actus deinceps eliciendos; ea autem facilitas non potest oriri nisi ex acquisitione fortitudinis, & temperantiæ habitualis; ergo eiusmodi virtutes eo modo acquiruntur. Confirmatur, nam cùm per actus acquiramus habitus aliquos, vt omnes fatentur, & patet ex dictis vbi de habitibus in genere, & speciatim constet nos per actus prauos contrahere habitus vitiosos, non potest negari quin actus temperantiæ, & fortitudinis sint ex se apti ad habitus similes generandos; adeoque quin illos generent. Alias cum habitus illi non sint nobis innati. si per actus nostros acquiri non possent, dicendum esset eos diuinitus infundi, sicque essent virtutes infusæ, non acquisitæ, contra communem omnium sententiam.

Nota 1. ex S. Thoma quæst. citata art. 2. cùm bonum hominis secundum aliquam regulam consideretur, & duplex sit regula boni humani, nimirum ratio seu lex diuina, & ratio humana, quarum illa est superior, & ad plura

se extendit, ita vt quidquid regulatur ratione humana, reguletur etiam lege diuina, non e contra; virtutem hominis ordinatam ad bonum, quod determinatur secundum regulam rationis humanæ, posse per actuum repetitionem causari, quatenus eiusmodi actus procedunt à ratione, sub cuius potestate & regula tale bonum consistit: virtutem verò ordinantem hominem ad bonum, quod determinatur per legem diuinam, & non per rationem humanam, non posse causari per actus humanos quorum principium est ratio, sed causari solum in nobis per operationem diuinam.

Nota 2. his verbis tradi diuisionem virtutum moralium in acquisitas, & infusas, quarum illæ acquiruntur propriis actibus, hæ verò diuinitus infunduntur; & de istis posterioribus intelligendum esse S. Augustinum cum addit in definitione virtutis, *quam Deus in nobis sine nobis operatur*, vt S. Doctor statim obseruat. Vnde refellit eorum obiectionem qui, vt probent nullam esse veram virtutem propriis actibus comparatam, opponunt illud Pauli, *Omne quod non est ex fide, peccatum est*; & illud Augustini, vel Prosperi, *Omnis infidelium vita peccatum est, & nihil est bonum sine summo bono, ubi deest cognitio veritatis, falsa est virtus, etiam in optimis moribus*, docetque ista non debere intelligi nisi de virtute diuinitus infusa. Ex quibus habes vnde eos arguas qui valde torquentur, vt ex quibusdam verbis Augustini perperam intellectis, probent nullam esse virtutem nisi in fide fundatam, & à Deo infusam, & omnia infidelium opera esse peccata; quorum errorem iamdiu Ecclesia proscripsit in Bulla contra Michaelé Baium, ab Urbano VIII. superioribus annis contra Iansenium Episcopum Iprensensem renouata; nosque de eo nonni-

hil diximus in Defensione S. Augustini, & in primo examine Theologiæ recentis gallicè concripto.

Nota 3. S. Doctorem præter fidem, spem, & charitatem, quæ virtutes Theologicæ vulgò dicuntur, quia ordinant hominem ad Deum, vt ad finem supernaturalem, agnoscere quasdam virtutes morales per se infusas, vt patet ex art. 3. quæstionis citatæ. Cuius rei rationem affert, quia oportet effectus esse suis principiis proportionatos; at omnes virtutes tam intellectuales, quam morales, quæ ex nostris actibus acquiruntur, procedunt ex quibusdam naturalibus principiis in nobis præexistentibus, quorum loco conferuntur nobis à Deo virtutes Theologicæ, quibus ordinamur ad finem supernaturalem. Vnde oportet quod his etiam virtutibus Theologicis proportionaliter respondeant alij habitus, diuinitus causati in nobis, qui sic se habeant ad virtutes Theologicas, sicut se habent virtutes morales, & intellectuales ad principia naturalia virtutum.

Cuius discursus vis in eo consistit, quod homo eodem modo, proportionem seruata, ordinari debet ad finem supernaturalem, quo ordinatur ad naturalem: at ita ordinatur ad finem naturalem, vt non modò habeat naturalem cognitionem felicitatis, & inclinationem ad illam, sed etiam possit sibi comparare virtutes morales, quibus rectè se habeat ad media felicitati naturali assequendæ necessaria: ergo ita debet ordinari ad finem supernaturalem, vt præter virtutes Theologicas, quibus rectè ordinatur ad Deum, qui est finis supernaturalis, dentur illi etiam virtutes morales infusæ, quibus rectè disponatur ad alias materias, quæ sunt media ad illum finem assequendum necessaria.

Quod adhuc confirmari potest ex antedictis, nam v. c. materia temperantiæ, vt per rationem diuinam regulatur, & conducit ad finem supernaturalem, habet rationem formalem obiecti distinctam a temperantia, vt regulatur per rationem naturalem, & ad finem naturalem conducit; est autem assignanda aliqua virtus infusa quæ eiusmodi rationem formalem attingat, cum virtus naturaliter acquisita ad eam non possit pertingere. Quare præter temperantiam acquisitam danda est alia infusa, quæque ab ea sit specie distincta: idemque dicendum de aliis, vt disertè traditur a S. Thoma art. 4. eiusdem quæstionis.

Quod si dicas, ad hæc omnia sufficere charitatem, quia hæc potest omnia virtutum opera implere, vt colligitur ex illis verbis 1. Cor. 13. *Charitas patiens est, benigna est, &c.* Respondetur ex S. Doctore quæst. 65. art. 3. ad 1. ad hoc vt actus inferioris potentiæ sit perfectus, requiri quod non solum adsit perfectio in superiori potentia, sed etiam in inferiori, vt patet, quia etiam agens principale sit rectè dispositum, non sequitur actio perfecta, nisi etiam instrumentum bene sit dispositum. Vnde vt homo bene operetur in his quæ sunt ad finem, non solum debet habere charitatem, qua bene se habet circa finem; sed etiam virtutes morales, quibus bene se habet respectu eorum quæ sunt ad finem.

Quæritur 2. quænam sit causa finalis virtutis moralis. Respondeo duplicem esse finem virtutis moralis, vnum proximum, & alium remotum: finis proximus est operatio recta & honesta, remotus verò & vltimus est hominis beatitudo: virtutes enim, vt patet ex iam dictis, sunt media quibus homo rectè disponitur ad beatitudinem assequendam, tanquam vltimum finem in quem tendunt.

Duplex autem insurgit circa hoc difficultas, altera, an ad virtutis honestatem sufficiat prior finis, aut necessario requiratur etiam posterior; ita ut ea non sit proprie & essentialiter virtus, quæ tendit in opus honestum, rectæque rationi consentaneum, qualia sunt opera iustitiæ, & temperantiæ, nisi ulterius referatur explicitè ab operante in Deum, ut summè per veram charitatem dilectum. Verùm quod relatio illa non requiratur ad virtutem moralem, sufficienter colligitur ex supra dictis, ubi de bonitate actuum humanorum.

Altera difficultas est, an virtuti morali possit addi finis malus, ex intentione operantis, ita ut elici possit actus veræ virtutis ex pravo fine. Verùm quòd id fieri non possit, ex ante, & alibi dictis evidenter concluditur; quia cum virtus essentialiter tendat in opus bonum, non potest ab ea prodire nisi opus bonum: at quod fit ex malo fine non est bonum, sed simpliciter malum, cum vel vnica circumstantia mala, maximè finis, totum opus vitiet: Ergo tale opus à virtute prodire non potest, quemadmodum motus sursum non potest oriri à gravitate lapidis, quia hæc essentialiter inclinat lapidem ad motum deorsum.





CAPVT II.

DE MEDIO VIRTVTVM
Moralium, earumque connexione,
& æqualitate.

ARTICVLVS PRIMVS.

An virtutes Morales in medio consistant.

PRæmoneo 1. cùm medium sit illud quod inter extrema positum est, multiplex communiter distingui medium; aliud per participationem extremorum, quomodo color viridis dicitur medius inter albedinem, & nigredinem; aliud per negationem extremorum, quomodo liberalitas est media inter avaritiam, & prodigalitatem, vtramque excludens.

Deinde aliud dicitur medium rei, seu Arithmeticum; aliud rationis, seu Geometricum: medium rei dicitur quod æqualiter distat ab extremis, vt numerus quaternarius à binario, & senario; & centrum à circumferentia circuli: medium verò rationis, seu Geometricum illud vocatur, quod non petitur per ordinem ad extrema, sed per respectum ad suam regulam, ita vt neque eam excedat, neque ab ea deficiat: vt cùm cibi distribuuntur iuxta cuiusque complexionem & temperamentum, adeo vt tantum detur cuilibet, quantum indiget. Quare hoc medium habet aliquam latitudinem, cùm aliud sit prorsus indiuisibile.

Præmoneo 2. virtutem duobus modis spe-

etari posse, 1. substantialiter seu entitatiuè, 2. effectiuè, seu quoad proprium actum ad quem inclinatur; & utroque hoc modo inuestigari posse, an virtus in medio posita sit. Addunt aliqui modum tertium, scilicet ex parte obiecti, sed id non videtur necessarium, cum nulla sit actus mediocritas in virtute morali, nisi obiectum sit mediocre, ut patet in liberalitate, quæ non potest habere mediocritatem ad actum virtutis requisitam, nisi pecunia quæ distribuitur mediocritatem attingat. His positis

Quæritur 1. an virtutes omnes morales consistant in medio quoad substantiam, seu entitatiuè, ita ut inter duos habitus vitiosos sint constitutæ. Respondeo omnes virtutes morales, excepta iustitia, in eiusmodi medio consistere. Probatur inductione, nam prudentia est media inter calliditatem, & imprudentiam: fortitudo inter audaciam, & timiditatem; temperantia inter stupiditatem, & intemperantiam: liberalitas inter auaritiam, & prodigalitatem, &c.

Obiicies 1. non omnes has virtutes in medio vitiorum consistere, cum certum sit liberalitatem magis ad prodigalitatem, quam ad auaritiam accedere: siquidem auaritia retinet, liberalitas verò & prodigalitas tribuunt. Respondeo 1. spectare etiam ad liberalitatem retinere, qui enim omnia effunderet, nec retineret quæ sibi sunt necessaria, non liberalis, sed prodigus esset: quare potest liberalitas ex eo capite dici media inter auaritiam, & prodigalitatem.

Respondeo 2. virtutem aliquam materialiter spectatam posse magis ad vnum, quam ad aliud extremum vergere, sicque non esse præcisè in medio illorum; non tamen si formaliter spectetur, quia sic inclinatur ad actus formaliter, ut rationi consentaneos, adeoque ut medios

inter duo extrema, quorum alterum per excessum, alterum per defectum rationi repugnat. Vnde quod supra diximus, liberalitatem esse mediam inter auaritiam, & prodigalitatem per negationem extremorum, non debet intelligi de extremis materialiter spectatis, quia sic aliquid de iis participat, sed formaliter, quatenus sunt vitia rationi & honestati opposita.

Obiicies 2. quasdam esse virtutes contra quas per nullum excessum peccari potest; tales sunt virginitas, cuius est ab omnibus carnis voluptatibus abstinere; magnificentia, quæ in maximis sumptibus versatur: & magnanimitas, quæ maximos honores prosequitur. Respondeo in iis etiam peccari posse per excessum, vt si quis nimis obstinate virginitatē seruare vellet, etiam contra bonum commune Reipublicæ, cum sine alicuius personæ matrimonio in magno discrimine versaretur; & multo magis si accederet præceptum summi Pontificis, aut Dei. Vnde cum primi parentes fuerint creati ad propagandum genus humanum, sine dubio peccassent, si ex amore virginitatis à complexu perpetuo abstinuissent. Eodem modo ille peccat contra magnificentiam, aut magnanimitatem, qui in sumptibus faciendis, aut honoribus inquirendis modum non ponit, spectata sui status conditione.

Nota me cum communi sententia, ex illa lege virtutum moralium exemisse iustitiam; quia etsi contra illam possit peccari per defectum, detrahendo nempe, aut denegando ius alienum, non tamen per excessum, vt patet in tribus speciebus iustitiæ, nempe commutatiua, distributiua, & vindicatiua. Si enim emptor dat sponte aliquid vendenti, supra iustum pretium, ille excessus non violat iustitiam, cum nemini sit

fit iniuriosus. Si verò dux in distributione spoli-
 orum, tribuit alicui militi maius præmium
 quàm mereatur, non peccat contra iustitiam,
 quatenus excedit præcisè in largitione præmij,
 sed quatenus dat minus aliis, quàm æquitas po-
 stulet. Et iudex decernens reo plures plagas
 quàm meritis fit, peccat quidem eo excessu
 contra clementiam, & actum crudelitatis exer-
 cet: est autem iniustus, quatenus eo excessu pla-
 garum, abripit reo ius quod habet ad proprii
 corporis conseruationem. Vnde cum contra
 alias virtutes morales peccetur directè per ex-
 cessum, non tamen contra iustitiam peccatur
 nisi indirectè, & per accidens, quatenus exces-
 sus ille defectum iniuriosum coniunctum habet.

Quæritur 2. an virtutes morales consistant in
 medio effectiue seu causaliter, adeoque etiam
 obiectiue. Respondeo affirmatiue, cuius ratio
 est, quia vt ait S. Thomas 1. 2. quæst. 64. art. 1.
 bonitas virtutis Moralis sumitur ex conformi-
 tate ad regulam rationis, sicut bonitas rei artifi-
 cialis in eo consistit, vt sit conformis regulæ ar-
 tis; è contra verò malum in virtutibus, & arte-
 factis contingit per hoc quòd discordent à sua
 regula, vel mensura; quod dupliciter euenire
 potest, vel ita vt mensuram excedant, vel ita vt
 ab ea deficient: quare cum inter excessum, & de-
 fectum media sit conformitas, & æqualitas cum
 regula, hinc fit vt virtus moralis in medio con-
 sistat causaliter, & obiectiue; adeo vt actus ab
 ipsa profluens in sua materia versetur modera-
 te, sicut debet iuxta præscriptum rationis; vt
 patet in liberalitate, quæ ad mediocrem largi-
 tionem pecuniarum inclinat, ita vt nec plus,
 nec minus detur quàm oportet, spectatis circun-
 stantiis occurrentibus.

Notandum autem ex Art. 2. quòd etsi omne
Ethica.

Q

medium virtutis moralis dici possit medium rationis, non quidem ita ut in ipsa ratione sit positum, sed quatenus ratio medium præscribit omnibus virtutibus: interdum tamen contingit medium rationis esse simul medium rei, ut patet in iustitia quæ dat unicuique quod debet, non plus, nec minus; quia versatur circa res alterius, in quibus rectum institui debet simpliciter, & secundum se. Interdum verò medium rationis non est medium rei, ut in aliis virtutibus moralibus; quia cum versentur circa passionnes interiores, in quibus non potest medium rei constitui, ob diuersam hominum dispositionem, earum rectitudo & medium debet constitui per respectum ad nos, prout variè secundum passionnes affecti sumus. Vnde temperantia non omnibus præscribit eandem cibi & potus mensuram, sed aliis maiorem, aliis minorem, iuxta vniuscuiusque necessitatem.

ARTICVLVS II.

An virtutes intellectuales, & infusa in medio consistent.

Respondeo & dico I. *Constare ex art. 3. questionis citata virtutes intellectuales in medio consistere.* Cuius ratio ibi affertur, quia medium virtutis sumi debet ex conformitate ad suam regulam, ut dictum est; regula autem virtutis intellectualis, ut iudicium fert de re aliqua, est res ipsa cognita; quia ex eo quod res est, vel non est, veritas est in oratione, & in opinione. Ab hac autem regula receditur per excessum, affirmando aliquid esse quod non est, & per defectum, negando esse quod est: quare

cum virtutes intellectuales hæc extrema caveant, & iudicium ferant rei consentaneum, consequenter dicendum est eas in medio consistere.

Dico 2. *Paulò aliter loqui S. Thomam art. 4. de virtutibus Theologicis.* Duplicem enim in illis assignat mensuram, aliam ex parte obiecti, quod est Deus, qua ratione docet non posse peccari contra illas virtutes per excessum, quia cum Deus sit infinitus, in illum infinitè credere, & sperare, & amore infinito eum prosequi oporteret, si id fieri posset. Aliam ex parte nostra, quia etsi non possimus ferri in Deum, quantum opus esset pro merito ipsius, debemus tamen ferri in illum credendo, sperando, & amando secundum mensuram nostræ conditionis; qua ratione ait virtutes Theologicas habere medium per accedens respectu nostri.

Quibus postremis verbis illud indicat discrimen inter virtutes morales acquisitas, & Theologicas, quod morales habent medium, non modo ratione circumstantiarum, sed etiam ratione obiecti; quia in illius quantitate peccari potest per excessum, vel defectum: Theologicæ vero non habent medium ratione obiecti, sed tantum attentis circumstantiis conditionis nostræ, sub quibus sapientia diuina statuit modum in actibus, quibus in Deum tendere debemus. Vnde quia virtutum ratio per se pendet ab obiecto, & per accidens à circumstantiis: hinc simpliciter & per se tribuit medium virtutibus moralibus, per accidens verò Theologicis.

Dico 3. *Virtutes morales infusas habere medium eodem modo ac acquisitas.* Probatur, nam quemadmodum acquisitæ usurpant materias morales, iuxta præscriptum rationis humanæ; ita & infusæ, iuxta dictamen rationis diuinæ: vnde per

excessum contra illas peccatur, quando usurpatur quod non debet; ut si quis priuata auctoritate, caremonias quasdam addat sacrificio Misæ: vel quando non usurpatur quod debet, ut si quis aliquem ex ritibus præscriptis sciens omitat. Quare cum virtutes morales infusæ eiusmodi extrema caueant, hinc fit ut non secus atque acquisitæ in medio consistent.

ARTICVLVS III.

An virtutes omnes Morales sint inter se connexæ.

Loquor de virtutibus Moralibus, quia intellectuales nullam connexionem necessariam inter se habent, cum possit quis scientiam habere sine prudentia, vel arte; & vnâ scientiam, sine alia: quamuis nulla possit scientia haberi sine habitu intellectus. Loquor etiam de virtutibus communibus, seu quæ ad communem hominum statum spectant, cuiusmodi sunt Iustitia, Temperantia, & similes. Nam quæ certo hominum statui conueniunt, non sunt inter se connexæ: quales sunt magnificentia, quæ Regibus, & Principibus conuenit; & paupertas voluntaria, quæ Religiosis.

Difficultas ergo procedit de virtutibus Moralibus, quæ communiter ad omnes homines spectant, & quia illæ considerari possunt in triplici statu, quorum primus est imperfectus, & dicitur continentia seu nouitiorum, in quo occurrunt multæ & vehementes perturbationes superandæ, & virtus admodum debilis est ad resistendum; secundus perfectus, qui dicitur temperantia, & est proficientium, in quo virtus maiorem firmitatem habet, & non nisi leuibus

passionibus quas facile superat, pulsatur. Tertius est heroicus, qui est perfectorum, in quo homo est omnino liber à passionibus, nullamque difficultatem experitur in operibus bonis; controuerti solet an virtutes morales, in his omnibus statibus spectatæ, sint inter se connexæ; ita vt qui vnā habet, omnibus præditus sit. Itaque

Respondeo & dico 1. *Prudentiam non posse haberi in gradu perfecto vel heroico, sine aliis virtutibus; posse tamen in imperfecto.* Prior pars probatur, quia perfectæ prudentiæ munus est rectè iudicare de agendis, in materia virtutum moralium; at fieri nequit vt quis prudenter in omnibus iudicet, nisi Fortitudine, Temperantia, aliisque virtutibus moralibus præditus sit. Cum enim quisque, prout affectus est, iudicet, fieri non potest vt qui ignauus, aut intemperans est, rectum iudicium ferat, saltem vt plurimum, de periculis obeundis, aut de voluptatibus contemnendis.

Atque hoc modo intelligendus est S. Thomas 1. 2. quæst. 65. art. 1. cum ait, prudentiam non posse haberi nisi habeantur virtutes morales; quia cum prudentia sit recta ratio agibilium, procedens ex finibus agibilium, ad quos aliquis se recte habet per virtutes morales, tanquam ex principiis, hinc sequitur prudentiam non posse haberi sine virtutibus moralibus, sicut scientia speculatiua haberi nequit sine intellectu principiorum. Patet enim hoc debere intelligi de prudentia perfectâ, nam quod spectat ad imperfectam, ea non requirit consortium aliarum virtutum; cum non repugnet actus aliquos prudentiæ elici, & per illos inchoationem quandam prudentiæ habitualis comparari, antequam appetitus rectè sit dispositus ad sequendum dictamen illius. Maxime cum necesse sit aliquos prudentiæ actus præcedere omnes actus alia-

rum virtutum Moralium.

Dico 2. *Nullam virtutem moralem haberi posse sine prudentia.* Ratio est, quia virtutes morales non comparantur nisi per actus bonos, & dicantur rectæ rationis consentaneos: at eiusmodi actus necessario supponunt aliquam prudentiam, cum prudentia iudicet & dicet quid secundum rectam rationem sit faciendum, nullumque opus censeatur moraliter bonum & honestum, nisi prudenter factum sit. Confirmatur, quia iuxta definitionem superius ex Arist. allatam, *Virtus est habitus electivus in mediocritate, quoad nos, positus, prout recta ratio & vir prudens prescripserit.*

Dico 3. *Nullam virtutem moralem, in gradu heroico vel perfecto spectatam, esse posse sine omnibus aliis, posse tamen in gradu imperfecto.* Prior pars probatur, quia illa virtus est in gradu heroico vel perfecto, quæ in exercitio suorum operum nullas, aut valde leves experitur difficultates, quas facile superare potest; at nulla virtus moralis ad tantam perfectionem pertingere potest, sine aliarum virtutum satellitio; eo quod in cuiuslibet bonæ operationis exercitio plurimæ difficultates, ex diuersis passionibus exurgere possunt, quarum alia ab hac, alia ab illa virtute comprimi debet. Quare nulla potest reperiri virtus in gradu heroico vel perfecto, quam non aliarum omnium virtutum chorus comitetur. Confirmatur, quia ad rectum iustitiæ exercitium requiritur ut iudex sit liberalis, ne muneribus corrumpatur; generosus, ne ministerceatur; temperans, ne voluptatum illecebris ab æquitatis tramite deiciatur. &c.

Nec dicas eas omnes difficultates à iustitia superari posse, non enim aliqua virtus respicit nisi impedimenta quæ ex propria illius materia

emergunt; at difficultates ex auaritia, & ex voluptatibus ortæ, non spectant ad materiam iustitiæ; sed illa pertinet ad materiam liberalitatis, hæc ad materiam temperantiæ; quare eas difficultates tollere non spectat per se ad iustitiam, sed tantum quatenus liberalitatem, & temperantiam sibi adiunctas habet. Ex quibus intelligis vnā virtutem iuuare aliam, non illius actum exercendo, sed remouendo difficultatem qua posset à suo officio retardari.

Posterior pars ostenditur, quia non omnes virtutes morales simul acquiruntur, sed aliæ post alias; & singulæ per actus diuersos ab actibus quibus aliæ producantur. Vnde fieri potest & sæpe contingit, vt quis studeat operibus vnius virtutis, & alias negligat, sicque acquirat habitum illius tantum in qua se exercet, non reliquarum. Et sic videmus multos in bello fortiter se gerere, qui tamen nec iustitiam, nec temperantiam, vllamve aliam virtutem colunt. Videmus etiam, inquit S. Thomas 1. 2. quæst. 65. art. 1. aliquem ex naturali complexione, vel ex aliqua consuetudine esse promptum ad opera liberalitatis, qui tamen non nisi ægrè opera castitatis exercet.

ARTICVLVS IV.

De connexionē virtutum supernaturalium sensus infusarum.

Hic difficultati satisfieri potest ex iis quæ tradit S. Thomas 1. 2. quæst. 65. per varios articulos. Nam art. 2. docet virtutes morales, prout sunt operatiuæ boni, in ordine ad finem qui non excedit facultatem na-

Q. iiii

turalem hominis, posse per opera humana acquiri, & sic acquisitas sine charitate esse posse, sicut fuerunt in multis gentibus. Secundum autem quod sunt operatiuæ boni, in ordine ad vltimum finem supernaturalem, non posse sic humanis actibus acquiri, sed infundi à Deo; & huiusmodi virtutes non posse esse sine charitate, quia non sunt sine prudentia infusa, vt colligitur ex supradictis, nec prudentia illa sine charitate, eo quod ad rectam rationem prudentiæ multo magis requiritur, quod homo bene se habeat circa vltimum finem, quod fit per charitatem, quam circa alios fines, quod fit per virtutes morales: sicut recta ratio in speculatiuis maximè indiget primo principio indemonstrabili, quod est, *contradictoria non esse simul vera.*

Vbi nota, quod ait S. Doctor de primo principio indemonstrabili, non videri satis consentaneum communiore sententiæ, quæ statuit primum principium non esse illud quod ab eo assignatur, sed potius istud, *impossibile est aliquid simul esse, & non esse.* vt patet ex dictis in Idea Metaphysicæ.

Art. 3. statuit omnes virtutes morales simul infundi cum charitate, quod probat, quia Deus non minùs perfectè operatur in operibus gratiæ, quam in operibus naturæ: sic autem videmus in operibus naturæ quod non inuenitur principium aliquorum operum in aliqua re, quin inueniantur in ea quæ sunt necessaria ad huiusmodi opéra perficienda: sicut in animalibus inueniuntur organa, quibus perfici possunt opera ad quæ peragenda anima habet potestatem. Manifestum est autem quod charitas in quantum ordinat hominem ad finem vltimum, est principium omnium bonorum operum quæ in vltimum finem ordinari possunt. Vnde oportet

quod cum charitate simul infundantur omnes virtutes morales, quibus homo perficit singula genera bonorum operum. Ex quo etiam sequitur illum qui per peccatum mortale amittit charitatem, amittere omnes virtutes morales infusas.

Si obiicias, multos habere charitatem, qui magnas experiuntur difficultates in exercitio bonorum operum; ex quo sequi videtur in iis esse charitatem, sine virtutibus moralibus infusis. Respondetur id non sequi, quia ut monet S. Doctor ad 2. difficultas illa potest oriri ex causa aliqua extrinseca, sicut enim habens habitum scientiæ patitur difficultatem in intelligendo, propter somnolentiam, vel aliquam infirmitatem; ita habens habitus virtutum infusarum, patitur interdum difficultatem in operando, propter aliquas dispositiones contrarias ex præcedentibus actibus relictas: cuius oppositum accidere in virtutibus moralibus acquisitis, quia per actuum exercitium quo acquiruntur, tolluntur etiam contrariæ dispositiones.

Art. 4. docet fidem, & spem esse posse sine charitate, non tamen sine illa perfectæ virtutis rationem habere. Cum enim fidei opus sit credere Deo, credere autem sit alicui propria voluntate assentiri, si non debito modo velit, non erit fidei opus perfectum, quod autem debito modo velit, hoc est per charitatem quæ perficit voluntatem. Et similiter actus spei est expectare futuram beatitudinem à Deo, qui quidem actus perfectus est, si fiat ex meritis quæ quis habet, quod non potest esse sine charitate. Si autem hoc expectet ex meritis, quæ nondum habet, sed proponit in futurum acquirere, erit actus imperfectus, & hoc potest esse sine charitate.

Art. 5. statuit charitatem non posse esse sine

Q. v.

fide, & spe, idque probat, quia charitas non solum significat amorem Dei, sed etiam amicitiam quandam ad ipsum, quæ quidem super amorem addit mutuam redamationem, cum quadam communicatione & societate mutua, quæ hic inchoatur per gratiam, & in futuro perficietur per gloriam, quorum utrumque fide, & spe tenetur. Vnde sicut non posset quis cum aliquo amicitiam habere, si discredere, vel desperaret se posse habere aliquam societatem vel familiarem conuersationem cum ipso; ita non potest quis habere charitatem ad Deum, nisi credat, & speret se societatem cum illo habiturum; sicque charitas non potest esse sine fide, & spe.

ARTICVLVS V.

De aequalitate virtutum.

SToici olim existimabant omnes virtutes esse inter se æquales; sed oppositum tenendum est, cum communi sententia Philosophorum, & Theologorum, ut patet ex variis capitibus vnde virtutum inæqualitas sumi potest.

Nam in primis negari nequit quin eæ virtutes sint nobiliores, quæ præstantius habent obiectum, cum specificatio & dignitas earum maximè ex obiecto sumi debeat; quò fit ut virtutes Theologicæ, quæ directè in Deum ferantur, sint alijs omnibus virtutibus perfectiores.

Deinde ad perfectionem virtutis concurrunt excellentia motiui; vnde ex communi sententia, qui ieiunat ex motiuo charitatis, longè melius & præstantius opus edit, quàm qui ieiunat ex motiuo obedientiæ, vel temperantiæ.

Rursus inter virtutes eiusdem speciei potest reperiri magna inæqualitas, secundum gradus intensiōis, ita vt virtus aliqua in vno sit valde intensa, in alio verò remissa: hæc autem inæqualitas multum confert ad inæqualitatem valoris & meriti. Vnde & operibus inæqualibus ex charitate elicitis, respondebit inæqualis gradus gloriæ in alia vita.

Nec dicas virtutem consistere in reſtitutione, seu in conformitate cum recta ratione, nihil autem dari posse rectius eo quod rectum est. Istud enim verum est, quando reſtitutio est indiuisibilis, vt in linea; non autem quando habet aliquam latitudinem moralem, vt hic contingit: nam etsi omnes virtutes sint rectæ rationi conformes, vna tamen est illi conformior alia, ob nobilius obiectum, aut motiuum, aut propter conatum intensiorem, aliudve eiusmodi.



CAPVT III.

DE PRVDENTIA.

ARTICVLVS PRIMVS.

De nomine, & natura Prudentia.

PRæmonet nomen Prudentiæ tripliciter sumi. 1. Pro naturali quadam sagacitate, quo sensu serpentes dicuntur prudentes in scriptura. 2. pro sagacitate humana, qua homo cautè procedit in actionibus suis, siue bonis, siue malis; qua ratione filij huius sæculi dicuntur sapientiores, seu prudentiores filiis lucis. 3. pro

Qvj.

virtute Morali qua homo dirigitur in actionibus suis, vt quæ rationi congruunt operetur, quæ verò ei sunt aduersa fugiat: quomodo hic à nobis sumitur. Et de Prudentia sic spectata

Quæritur quid sit. Respondeo. Prudentiam hoc ultimo modo spectatam, vulgò definiri ex Arist. *Habitu cum vera ratione actiuum, circa ea qua homini bona, vel mala sunt, vt diximus in Metaphysica vbi de habitibus in genere: ab aliis verò clariùs definiri, Virtutem intellectus qua in quouis negotio occurrente nouimus quid honestum sit, quid turpe.*

In primis dicitur *virtus intellectus*, quia nosse quid honestum, quid turpe sit, non nisi ad intellectum, & ad habitus qui in intellectu resident, spectare potest; quod vel ex ipsa voce prudentiæ indicatur, cum prudens idem sit ac porro videns, seu perspicax, & incertorum casus intuens; indeque sumptum sit nomen prudentiæ, ad denotandum illum mentis habitum, quo homo proximè actiones suas dirigit ad vitæ honestatem. Et quia talis habitus non potest non esse honestus, cum per ordinem ad illum tanquam ad suam regulam, virtutes omnes voluntatis honestatem suam accipiant, hinc fit vt ille maximè inter virtutes numerari debeat.

Secundò dicitur *virtus qua nouimus quid honestum, aut turpe sit*, non quidem tantum vt quid tale sit cognoscamus, sed vt quod honestum esse nouimus amplectamur, quod turpe fugiamus. Prudentia enim est habitus practicus, qui non sistit in nuda cognitione honestatis, & turpitudinis, sed eiusmodi cognitionem ad opus refert, dirigendo & urgendo voluntatem in electione boni, & fuga mali, & potentiam executricem in operis executione.

Tertiò ad prudentiam requiritur, vt. non tam

tum in hoc vel illo casu, sed in omni negotio quid amplectendum, aut fugiendum sit rectè indices: licet enim ille dicatur prudens secundum quid, qui in certa materia nouit præscribere modum, quo actus aliquis honestè fieri potest; ad prudentiam tamen perfectam & absolutam necesse est ut in omni materia virtutum, adeoque in singulis actionibus particularibus sciat quis determinare circumstantias necessarias, ut opus fiat honeste: v. c. quantum comedendum sit, ut seruetur temperantia; quo loco & tempore teneatur quis se periculis exponere, ut exerceatur actus fortitudinis, &c.

Ex quibus intelligis prudentiam, etsi subiectiue sit virtus intellectualis, non tamen immerito reponi inter virtutes morales. ratione obiecti, effectus, & finis: siquidem honestatem amplecti, & turpitudinem fugere est obiectum, quod à prudentia consideratur, effectus qui ex illius directione & impulsu peragitur, & tandem finis in quem proximè tendit: ad eum modum quo pingere est obiectum, effectus, & finis artis pingendi.

ARTICVLVS II.

Quanam sint officia Prudentia.

Respondeo prudentiæ officia esse inquirere, consultare, & iudicare. Siquidem vir prudens, proposito sibi aliquo fine honesto, inquit media ad illum assequendum necessaria; deinde illa media discutit, & inter se variè comparat, ut quænam fini assequendo finitiora dignoscatur; ac omnibus diligenter & accuratè, prout rei momentum exigit, perpen-

sis, quid, quo modo, loco, & tempore agendum sit, iudicat.

Ex quo patet, proprium esse prudentiæ præscribere medium virtutibus moralibus : cum enim per inquisitionem deprehendat, quid secundum regulam rectæ rationis agendum sit, adeoq; quænam operationes morales siue temperantiæ, siue aliarum virtutum medium teneant inter excessum, & defectum, eatenus illis ostendit & assignat medium quod amplecti debeant, ne à regula rationis desciscant.

Hic autem difficultas occurrit, an inter functiones prudentiæ numerari debeat actus quidam imperij distinctus à iudicio, quo prudentia imperet voluntati ut hoc faciat. Aliqui affirmant, existimantes hoc imperium esse necessarium ut voluntas agat, eoque posito illam necessario agere. Verum talis actus imperii ut minime necessarius, & libertati parum consentaneus supra reiectus est. Quare cum prudentia dicitur opus virtutis præcipere, id accipiendum est valde improprie, non modo quia nemo sibi proprie imperat, sed alteri, eique subdito; verum etiam quia id fit per actum iudicii, non præcisè ut est iudicium, quia ille non est prudens qui rectè iudicat, si iuxta rectum iudicium non operatur, sed quatenus res in iis circumstantiis proponitur per iudicium, ut voluntas de facto illius ductum sequatur: adeo ut præceptum non addat aliquid ex parte intellectus, distinctum à iudicio, sed tantum connotet operationem ex parte voluntatis.

ARTICVLVS III.

Quanam sint partes subiectiua prudentia, seu species in quas diuiditur.

Respondeo duo de hac re dici posse. Nam in primis iuxta sententiam S. Thomæ superius traditam, de virtutibus Morali-
bus infusis, dici potest aliam esse prudentiam naturalem seu acquisitam, aliam supernaturalem seu infusam. Naturalis seu acquisita est illa, quæ per actus ordinis naturalis acquiri potest supposita notitia primorum principiorum practico-
rum, quæ dicitur Synderesis; supernaturalis vero, seu infusa dicitur, illa, quæ viribus naturæ haberi non potest, sed tantum per infusionem diuinam, sicut & omnes aliæ virtutes supernaturales.

Secundò prudentia diuiditur in personalem seu solitariam, & gubernatricem; personalis est illa qua quis seipsum dirigit in propriis actionibus rite obeundis, gubernatrix verò qua quis rectè aliis imperat, eorum bonum intendens, hæcque est quadruplex vt patet ex S. Thoma 2. 2. quæst. 50. Oeconomica, qua rectè familia regitur; civilis seu politica, qua ciuitas seu respublica secundum leges rectas administratur. Legislatrix seu regnatix, qua principes, leges ad bonum commune necessarias condunt; & tandem militaris, qua bellum prudenter administratur. Licet enim administratio exercitus ars quædam videatur, quatenus milites rectè disponit ad prælium, & habet regulas quasdam, rectè vtendi quibusdam rebus exterioribus, puta armis, & equis; habet tamen rationem pru-

dentia & virtutis, quatenus ordinatur ad bonum commune, & curat ut milites munus suum fortiter, & secundum rationem obeant, ut colligitur ex S. Thoma quaest. citata art. 4. ad 1.

Huius autem diuisionis sufficientia ex eo colligitur, quod cum spectet ad prudentiam bonum hominis procurare, dirigendo illius operationes ad bonum honestum, eaque procuratio fieri possit aut directe procurando bonum proprium, vel familiae, vel ciuitatis, vel regni; aut indirecte armis praeueniendo, vel amouendo mala quae haec bona impediunt; hinc oritur species illa quintuplex prudentiae ante assignata.

Nota ex S. Doctore art. 2. prudentiam politicam poni in subditis per ordinem ad suos superiores, quatenus ita aguntur ab illis per praeceptum, ut seipsos agant per liberum arbitrium: quo fit ut in iis requiratur quaedam rectitudo regiminis, per quam seipsos dirigant superioribus obediendo. Hoc tamen non caret difficultate, quia alij communiter ex Arist. per prudentiam politicam non intelligunt eam virtutem subditorum, qua legibus obediunt; sed eam quae est in superioribus, ad rempublicam recte administrandam.

ARTICVLVS IV.

Quanam sint partes integrantes, & potentiales prudentia.

Respondeo & Dico 1. *Partes integrantes prudentia dupliciter posse constitui.* Primo ita ut prudentia non sit habitus quidam simplex, sed compositus ex multis partialibus habitibus, quorum alio Iustitia, alio Fortitudo,

alio Temperantia dirigatur; eo modo quo alibi diximus habitum Physicæ constare ex multis habitibus partialibus, quorum vnus ad hunc, alius ad alium assensum inclinet. Et sanè cùm constet dari habitum prudentiæ particularis, quo quis optimè se gerit v.c. in materia iustitiæ, non autem in materia fortitudinis, vel temperantiæ, hinc manifestè sequitur habitus prudentiæ esse multiplicandos, iuxta varietatem virtutum quæ ab illa dirigi debent, sicque ex multis habitibus partialibus prudentiam perfectam & absolutam integrari.

Secundò S. Thomas 2. 2. quæst. 49. vocat partes integrantes prudentiæ, quasdam actiones necessarias ad perfectum vsum prudentiæ, nempe memoriam, intellectum, docilitatem, solertiam, rationem, prouidentiam, circumspectionem, & cautionem. Itaque art. 1. exigit memoriam, quo nomine intelligit multorum experimentorum, & exemplorum recollectionem. Art. 2. intellectum, seu rectam æstimationem alicuius extremi principij, id est minoris propositionis, quam oportet esse singularem in syllogismo prudentiæ, vt ipsemet declarat in resp. ad 1. vnde aperte decipiuntur qui putant per intellectum ab eo hic intelligi habitum primorum principiorum practicorum, aut cognitionem præsentium; licet enim vtrumque ad prudentiam necessarium sit, non tamen de illis modò S. Thomas loquitur.

Art. 3. exigit docilitatem, quia quis paratus sit addiscere a senibus & expertis, qua ratione in his & illis circumstantiis particularibus oporteat se gerere. Art. 4. solertiam, qua quis proprio Marte rectè, & celeriter excogitat quid agendum sit. Art. 5. rationem seu ratiocinationem, requiritur enim maximè ad prudentiam.

quod homo rectè ratiocinandi vi polleat, vt possit applicare principia vniuersalia ad particularia, quæ varia sunt & incerta. Art. 6. Prouidentiam, qua voce non intelligit considerationem futurorum euentuum, qui possent sequi ex opere, etsi hæc sine dubio ad perfectam prudentiam requiratur, sed rectam mediorum idoneorum ordinationem ad finem honestum.

Art. 7. circumspectionem, qua quis videat num media apta sint ad finem propositum assequendum, non modo secundum se, sed etiam quatenus coniunguntur cum talibus circumstantiis. Sicut, inquit, ostendere signa amoris alicui secundum se consideratum, videtur esse conueniens ad alliciendum eius animum ad amorem; sed si contingat in animo illius superbia, vel suspicio adulationis, non erit hoc conueniens ad finem intentum. Art. 8. cautionem, qua quis sibi caueat ab iis, per quæ actus virtutum impediri possunt.

Dico 2. *Tres partes potentiales prudentiæ à S. Thoma assignari quæst. 51.* Nempe Eubuliam, quæ est habitus rectè consultandi; synesim, quæ est habitus rectè iudicandi de consultatis, per communia principia practica; & gnomen, quæ est habitus iudicandi ex æquo & bono; quod fit quando aliquid ex iudicio prudenti definitur contra verba legis, non tamen contra mentem legislatoris. Vt cum quis iudicat eum qui se inuadentem occidit, non esse reum mortis, etsi lex simpliciter statuatur, vt qui occidit, occidatur. Porro habitus in voluntate respondens tali iudicio, vulgò dicitur *Εμπειρία*. Vide quædam alia de his prudentiæ partibus in Idea Metaphysicæ, vbi de habitibus.

ARTICVLVS V.

Quot modis contra prudentiam peccari possit.

Respondeo duobus modis: primò per defectum eorum quæ ad prudentiam requiruntur, secundò per excessum, seu per quandam similitudinem falsam prudentiæ, aut abusum eorum quæ ad prudentiam spectant, vt tradit S. Thomas 2. 2. quæst. 53. in præfat. Et ratio est, quia cùm prudentia deliberando, & iudicando feratur in eadem objecta in quæ aliæ virtutes propendent, eaque objecta in medio consistent, hinc fit vt duobus illis modis generatim contra prudentiam peccari possit.

Itaque priori modo contra prudentiam peccatur, primò per præcipitationem, quod contingit quando quis à summo animæ, quod est ratio, ad imum operationis externæ per impetum voluntatis, vel passionis descendit, gradibus mediis prætermiſſis; nempe memoria præteritorum, intelligentia præsentium, solertia in considerandis futuris euentibus; aliisque eiusmodi ad rectam & maturam deliberationem spectantibus, vt optimè S. Doctor similitudine à motu corporali accepta explicat art. 3.

Secundo per inconsiderationem, quod contingit vt patet ex art. 4. quando aliquis in rectè iudicando deficit, ex hoc quòd contemnit vel negligit attendere ad ea ex quibus rectum iudicium procedit, cuiusmodi sunt negotij de quo agendum est circumstantiæ. Ex quo colligit hoc vitium à præcedenti in eo distingui, quòd præcedens consistit in defectu deliberationis, hoc verò in defectu iudicij.

Tertiò per inconstantiam S. Doctor art. 5. intelligit defectum præcepti, circa ea quæ sunt consiliata seu deliberata, & iudicata. Verùm quia in nostra sententia, de qua supra, præceptum non addit ex parte intellectus actum quendam distinctum à iudicio, dicendum est iuxta hoc, peccatum inconstantiae in eo consistere, quòd quis rebus deliberatis, & iudicatis non inhæret, sed ex leui causa sententiam mutat.

Quartò negligentiam versari circa actum præcipiendi traditur à S. Thoma quæst. 54. art. 2. aliter tamen quàm inconstantiam. Nam inconstans deficit in præcipiendo, quasi ab aliquo impeditus, negligens autem per defectum promptæ voluntatis, vt habetur in resp. ad 3. clariusque explicatur art. sequenti in corp. vbi S. Doctor ait, negligentiam prouenire ex quadam remissione voluntatis, per quam contingit quòd ratio non vrgetur, vt præcipiat ea quæ debet, vel eo modo quo debet.

Vbi nota, quòd etsi negligentia, vt hic sumitur, oriatur à voluntate, est tamen in intellectu, cum opponatur prudentiæ quæ ad intellectum pertinet; & in eo consistit, iuxta illos qui nobiscum reiiciunt præceptum à iudicio distinctum, quòd ratio non sufficienter vigilet, quantum requiritur ad virgendam executionem operis deliberati.

Posteriori modo contra prudentiam peccatur multis modis, quos tradit S. Thomas qu. 55. primò per carnis prudentiam, quæ tunc est; ex art. 1. cum quis vltimum suum finem in bonis carnis constituit; quod ita intellige, vt cum vera prudentia, quæ est regula virtutum moralium, quærat & assumat media proportionata ad opera virtutum; prudentia carnis e contra

inquirat & vſurpet media, quæ conducunt ad opera carnalia exequenda.

Secundò per aſtutiam, qua quis excogitat falſa & ſimulata media, ad finem aliquem ſiue bonum, ſiue malum conſequendum, vt explicatur art. 2. vnde aſtutia diſtinguitur à prudentia carnis, quatenus hæc ordinatur ad finem qui non eſt verè bonus, ſed apparens.

Tertiò per dolum, qui eſt aſtutiæ executio facta, tum præcipuè verbis, quia hæc primum locum tenent inter ſigna, quibus aliquid ſignificatur alteri: tum etiam factis, quia dolus non tantum eſt in verbis, ſed etiam in factis, vt docetur art. 4. ad 2.

Quartò per fraudem, quæ in eo diſtinguitur à dolo, quòd dolus pertinet vniuerſaliter ad executionem aſtutiæ, ſiue fiat per verba, ſiue per facta; fraus autem magis propriè pertinet ad executionem aſtutiæ per facta, ex Art. 5. Ex quibus patet dolum & fraudem non diſtingui propriè ab aſtutia, ſed eſſe actus externos illius.

Quintò per nimiam ſolicitudinem temporalium, quæ tripliciter poteſt eſſe illicita ex Art. 6. Primò ſi temporalia tanquam finem quaeramus, ſecundò ſi ſtudium ſuperfluum in iis acquirendis impendatur, tertiò ſi nimium timeamus ne nobis in neceſſitate deficient.

Sexto per ſolicitudinem futurorum, cum enim vnicuique negotio ſuum competat tempus & oportunitas, vnicuique etiam ſua competit ſolicitudo interna, vt æſtati ſolicitudo metendi, & autumnò ſolicitudo vindemiandi. Quare illi imprudenter agunt qui ſolicitudinem futuri temporis ſuperfluè præoccupant, vt ſi in æſtate nimium ſoliciti ſunt de vindemia, vt habetur art. 7.



CAPVT IV.

DE IUSTITIA.

ARTICVLVS PRIMVS.

De nomine, & natura Iustitia.

PRæmoneo nomen Iustitiæ ambiguum esse, variisque modis accipi. In primis iustitia interdum sumitur pro gratia habituali seu sanctificante à qua quis denominatur iustus. Deinde iustitia nonnunquam accipitur pro virtutum omnium concentu & complexione, quò refertur vulgatum illud, *Iustitia in sese virtutes continet omnes*. Tertiò tandem sumitur pro vna ex quatuor virtutibus moralibus, quæ cardinales appellantur, quo sensu de ea hic agimus, illiusque naturam inquirimus.

Iustitia hoc tertiò modo accepta communiter definitur, *Perpetua & constans voluntas ius suum cuique tribuendi*; seu vt explicat S. Thomas 2. 2. quæst. 58. art. 1. *Est habitus secundum quem aliquis constanti & perpetua voluntate ius suum cuique tribuit.*

In primis iustitia non est ipsa potentia voluntatis, sed habitus in ea receptus. Secundò iustitia est virtus quæ versatur circa alterum, importat enim æqualitatem quandam, vt ipsum nomen demonstrat; quia vt aduertit S. Thomas 2. 2. quæst. 57. art. 1. ea vulgò dicuntur *iusti* quæ adæquantur; æqualitas autem est ad

alterum, cum nihil sibi sit æquale, sed alteri. Tertiò iustitia est virtus ius suum cuique tribuens, id est reddens unicuique quod ei strictè debetur, idque ad æqualitatem, seu spectato iure integro quod in illud habet. Quarto ad iustitiam requiritur quod voluntatem inclinet ad ius suum cuique constanter & perpetuò tribuendum, quia ille iustus non censetur qui in hac tantum vel illa occasione ius suum cuique reddere intendit.

Ex quibus patet 1. iustitiam distingui à temperantia, & à fortitudine, quòd virtutes istæ versentur circa passiones, ut nimirum eas iuxta rationis præscriptum moderentur. Vnde hominem rectè disponunt respectu sui ipsius, iustitia verò hominem disponit ad alterum, quia versatur circa actiones quibus homines inter se communicant, aliquid sibi tribuendo, vel subtrahendo, ut iuxta æqualitatem perfectam reddat alteri, quod ipsi ex iure debitum est. Quare cum temperantiæ officium sit inclinare hominem ad modum ponendum in voluptatibus, & fortitudinis ad tenendum medium inter timorem, & audaciam; iustitia per se ista non curat, sed directè in id tendit ut cuique reddat quod illi debitum est.

Patet 2. iustitiam distingui à quibusdam aliis virtutibus quæ se habent ad alterum, ut à religione, pietate, & observantia. Nam religio respicit obsequia parentibus & patriæ debita; observantia verò fertur in cultum & honorem quem debemus superioribus ac magistris. Constat autem ex Arist. nec Deo, nec parentibus, nec magistris reddi posse æquivalens: at iustitia respicit proximum, quatenus illi æquale rependi potest.

ARTICVLVS II.

Quot sint Species Iustitia.

Respondeo Iustitiam à nonnullis primò diuidi in legalem seu vniuersalem, & particularem. Deinde hanc subdividi in distributiuam, & commutariuam. Ex quo patet tres ab iis admitti species iustitiæ, nempe legalem, distributiuam, & commutatiuam. Cuius diuisionis hæc ratio afferri potest, nam species iustitiæ multiplicantur iuxta habitudines, quas homines in communitate constituti inter se habent; eæ autem sunt tres, prima totius ad partem, secunda partis ad totum, tertia partis ad partem: & iustitia distributiuæ ordinat totum ad partem, quatenus facit vt communitas, seu illius vices gerens distribuat onera communia inter ciues, iuxta proportionem Geometricam, ita vt quo quis merito alij est superior: eo digniora officia accipiat. Iustitia autem legalis ordinat partem ad totum, quatenus facit vt ille qui est membrum alicuius communitatis, paratus sit ad omnia exequenda, vel sustinenda quæ ob bonum commune statuta sunt. Vnde eo titulo communis boni, hæc iustitia dicitur generalis, licet verè sit virtus quædam particularis, quæ in bonum commune fertur. At iustitia commutatiua ordinat partem ad partem, quatenus constituit æqualitatem in actionibus, quibus membra eiusdem Reipublicæ inter se communicant.

Verum probabilius est non esse tres illas species iustitiæ inter se planè condistinctas, quia cum iustitia æqualitatem respiciat, non possunt

possunt multiplicari species Iustitiæ, nisi inquantum multiplicatur illa æqualitas : at non potest seruari à Iustitia nisi duplex æqualitas, alia secundum proportionem Geometricam, alia secundum Arithmeticam; ac proinde non nisi duæ species Iustitiæ assignari debent, nempe distributiva, quæ priorem æqualitatem seruat, & commutativa quæ posteriorem.

Ex quo sequitur, vel iustitiam legalem non esse propriam speciem iustitiæ, vel ad alteram illarum reducendam esse, nempe ad commutativam, quatenus cuius per illam exhibet tantum obsequij Reipublicæ, quantum illi debet. Vnde iustitia potest primò diuidi in distributivam, & commutativam; & hæc rursus subdividi in eam quæ est partis ad partem, & eam quæ est partis ad totum. Vnde plura de natura & speciebus iustitiæ lib. 4. Theologiæ Moralis cap. 8.

ARTICVLVS III.

De partibus potentialibus Iustitiæ.

PArtes potentiales Iustitiæ vocantur virtutes illæ quæ magnam cum iustitia strictè sumpta consensionem habent, illius tamen perfectionem non attingunt. Eiusmodi autem virtutes sunt octo ex S. Th. 2. 2. qu. 80. nempe religio, pietas, obseruantia, gratia seu gratitudo, vindictio, veritas, liberalitas, & amicitia, seu affabilitas. Inter quas illud ponit discrimen, quod tres priores deficiunt à ratione iustitiæ, quia non possunt reddere æquale : aliæ verò ab ea recedunt, quia in iis non intercedit debitum legale, seu ad quod quis lege astringitur, sed tantum morale, seu id quod ex virtutis honestate debetur; siue id debitum simpliciter necessa-

Ethica.

R

rium sit ad virtutis honestatem, ut in veritate; homo enim tenetur sub peccato, talem se alteri exhibere in verbis, & factis, qualis est; siue tantum requiratur ad maiorem honestatem, ut in liberalitate, & amicitia: non enim semper tenemur sub peccato opes liberaliter effundere, amicitiae signa exhibere.

Religio est virtus Moralis, per quam homines debitum cultum & honorem Deo, tanquam supremo omnium domino, exhibent. Quod ita intelligendum est, ut religio non respiciat immediate Deum, hoc enim spectat tantum ad virtutes Theologicas, sed cultum qui Deo debetur. Cæterum de natura huius virtutis, de actibus illius tam internis, quam externis, & de vitiis siue per excessum, siue per defectum illi oppositis latè egimus libro citato Theologiæ Moralis cap. 1. & sequentibus, ut opus non sit in iis hoc loco diutiùs immorari.

Pietas est virtus qua colimus parentes, quatenus nobis post Deum sunt præcipui ortus, & educationis auctores. Et quia patria etiam ad hoc conducit, tum quia parentes nostros fovet, tum quia necessaria ad ortum & educationem subministrat, hinc fit ut pietas etiam ad patriam extendatur. Imò iuxta S. Thomam 2. 2. quæst. 101. art. 1. in cultu parentum includitur cultus omnium consanguineorum, quia consanguinei ex hoc dicuntur, quod ex iisdem parentibus processerunt, ut patet ex Philosopho 8. Ethic. cap. 12. In cultu autem patriæ intelligitur cultus omnium concivium, & omnium patriæ amicorum.

Observantia est virtus qua cultus deferitur superioribus, quia sunt auctores nostræ gubernationis; sicut enim pater participat rationem principis, quæ præsertim Deo competit; ita su-

perior participat rationem patris, quatenus est principium nostræ institutionis & educationis. Quare sicut pietas quodammodo includitur sub religione, ita & obseruantia sub pietate continetur vt tradit S. Doctor quæst. 102. art. 1.

Nota 1. obseruantiam diuidi in politicam, & religiosam: politica est quæ cultum & honorem exhibet Principibus, Magistratibus, aliisque personis in seculari dignitate constitutis; religiosa verò quæ honorem exhibet personis cultui diuino dicatis, vt Sacerdotibus, regulariis, sanctis. Atque hæc posterior subdividitur in duliam, qua generatim colimus Sanctos, vt nostros superiores, & in hyperduliam qua cultus exhibetur Sanctis præcellentioribus, vt B. Virgini, propter specialem ordinem quem habent ad Deum.

Nota 2. duo in superioribus considerari, vt præclare aduertit S. Doctor quæst. 102. art. 2. nempe excellentiam status cum quadam potestate in subditos, & ipsius gubernationis officium; ac ratione quidem excellentiæ deberi illis duliam, seu honorem qui est recognitio excellentiæ alicuius; ratione verò officij gubernationis deberi illis cultum, qui in quodam obsequio consistit, dum scilicet quis obedit eorum imperio. Ex quo patet & duliam, & obedientiam esse partes obseruantię.

Gratia seu gratitudo hic sumitur pro virtute, quæ hominem inclinat vt particulari benefactori gratiarum actionem, obsequium, vel cultum pro beneficio accepto debitum exhibeat. Vnde gratitudo est specialis virtus à prædictis distincta, iisque posterior; primò enim sumus debitores Deo; secundo parentibus; tertio superioribus, ac tandem particularibus benefactoribus. Quare post religionem, qua debitum cultum

Deo impendimus, pietatem qua colimus parentes, obseruantiam qua superiores reueremur, est gratitudo quæ priuatis benefactoribus gratiam rependit, vt optimè aduertit Doctor Angelicus quæst. 106. art. 1.

Vindicatio est virtus, qua inclinamur ad reddendam peccanti poenam debitam pro iniuria, sicut gratitudo est virtus quæ voluntatem inclinât ad reddendam benefactori gratiam, pro beneficio accepto.

Nota vindicationem fieri posse ex multiplici fine. 1. vt ei qui læsit malè sit, quomodo est actus odij. 2. vt peccans corrigatur, quomodo ad charitatem spectat. 3. vt per punitionem malefactoris fiat quadam iniuriæ reparatio, eique tantumdem detrahatur quantum iniuste assumptum, & læso restituatur quod ab illo abstulit, qua ratione vindicatio est virtus specialis spectans ad iustitiam. 4. iuxta nonnullos, quia poena ipsi malefactori debetur, vt quod à recto ordine excessit ad illum reducatur. Hoc tamen durum videtur, quia hinc sequeretur quandam fieri iniuriam ipsi peccanti nisi puniretur, quod dici non potest.

Veritas hic sumitur pro virtute, quæ inclinât ad seruandam veritatem in dictis, & factis, ita vt & verba & alia signa quæ ad conceptus nostros aliis detegendos assumimus, cum mente nostra consentiant. Vnde patet eam esse partem potentialem iustitiæ, cum versetur circa ea quæ sunt ad alterum.

Liberalitas est virtus, quæ nos inclinât ad expendendas pecunias, iuxta rectam rationem. Ex quo patet ad hanc virtutem spectare, vt affectum diuitiarum comprimat & moderetur, quia sine hac moderatione non facîle propendebit voluntas ad liberalem pecuniarum effu-

tionem. Requiritur etiam ad illam, ut erogatio pecuniarum fiat eo fine, quia id honestas in vita ciuili & sociali postulat: quæ enim fit intuitu egestatis, vel amicitia, vel gratitudinis ad alias virtutes pertinet.

Amicitia complectitur mutuam beneuolentiam in peculiari quadam communione siue officij, siue eruditionis, siue consanguinitatis, siue religionis, &c. fundatam: interdum verò amicitia sumitur pro affabilitate, qua quis in exteriori conuersatione se habet tam in dictis, quàm in factis ad singulos homines, prout decet, ut ex Arist. obseruat S. Thomas quæst. II. 4. art. 1. verùm hæc non est propriè amicitia, cum possit esse sine amore: affabilis enim non ideo benignè cum aliquo tractat, quod eum diligat, sed quia talis modus agendi vitæ sociali est valde consentaneus.

Nota 1. amicitiam communiter diuidi in vtilem, iucundam, & honestam; utilis est quæ in utilitate ex ea percepta, iucunda quæ in bono delectabili, & honesta quæ in bono honesto seu virtutis fundatur.

Nota 2. amicitiam honestam esse aliis longè excellentiorem, tum quia habet motiuum nobilius, tum quia cum virtuti innitatur, firmior est quàm quæ lucro, aut voluptate ducitur; tum quia ea sola est amicitia proborum hominum, cum aliæ ad improbos spectent.

Nota 3. licitum esse pro amico, ex motiuo virtutis vitam exponere, quia licet minus bonum postponere maiori; at vita corporalis est minus bonum, quàm virtus: ergo licet pro amico vitam exponere ex motiuo virtutis, maximè charitatis, iuxta illud Christi Ioan. 15. *Maiorem dilectionem nemo habet, quàm ut animam suam ponat quæ pro amicis suis.*



CAPVT V.

DE FORTITVDINE.

ARTICVLVS PRIMVS.

De nomine, & natura Fortitudinis.

PRæmoneo nomen Fortitudinis tripliciter accipi 1. pro robore corporis, quomodo Leo, & Taurus dicuntur fortiores homine. 2. pro firmitate animi ad exercenda quælibet opera bona, quomodo vt monet S. Thomas 2. 2. quæst. 123. art. 2. vel est virtus generalis quoad obiectum, etsi sit specialis essentia & habitû; vel est conditio omnis virtutis, singulæ enim virtutes, saltem si sint in statu perfectio, faciunt vt voluntas firmiter earum obiecto inhæreat. 3. pro firmitate voluntatis in sustinendis & repellendis iis, in quibus maximè difficile est firmitatem habere, scilicet in grauibus periculis, vt tradit S. Doctor ibid. quomodo hic agimus de Fortitudine.

De qua quæritur, quid sit. Respondeo esse virtutem quæ timorem, & audaciam in grauibus periculis moderatur. In primis hæc virtus moderatur timorem, & audaciam; timidos impellens ad res difficiles aggrediendas, & sustinendas; audaces verò & temerarios retinens ne citra præscriptum rationis periculis se exponant. Quare medium locum tenet inter timorem, & audaciam tanquam inter duo vitia extrema, quorum illud per defectum, hoc verò per excessum peccat.

Verſatur etiam hæc virtus in grauibꝫ periculis, ſicut enim non egemus magno corporis robore, ad incedendum per viam planam, vel ad leuem iſtum ſuſtinendum, ſed ad progrediendum per loca aſpera, & ad validum impulſum ſuſtinendum; ita non egemus virtute in rebus facilibus, ſed in iis in quibus difficile eſt rationis clauum tenere, quales ſunt graues morbi, & mortis pericula. Vnde Ariſt. 3. Ethic. cap. 6. ait, eum non eſſe abſolutè fortem iudicandum, qui in minoribus periculis non terretur, vt ſi flagellis cædendus confidat. Quod intelligendum puto, niſi ex circumſtantiis malum, quod alias leue eſſet, notabiliter augeatur; vt ſi vir probus & honeſtus publicè cædendus eſſet, tunc enim magna haud dubie opus eſſet animi Fortitudine, vt adeo indignè habitus mediam rationis normam inter timorem, & audaciam teneret.

Ex quibus collige, duo eſſe officia Fortitudinis, nempe ſuſtinere, & aggredi pericula, non vtcunque, ſed ſecundum ordinem rationis, & ex fine honeſto. Quo fit vt ij propriè non ſint fortes, qui contra rationis præſcriptum, aut ob finem prauum pericula ſuſtinent, vel aggrediuntur, vt plerumque fit in bello.

Notat autem S. Thomas 2. 2. quæſt. 123. art. 6. ad 1. ſuſtinere eſſe difficilius quàm aggredi, triplici de cauſa, primò quia qui ſuſtinet, ſe habet vt debilior reſpectu inuadentis, qui aggreditur tanquam fortior; at difficilius eſt pugnare cum fortiori, quàm cum debiliori. Secundò quia ille qui ſuſtinet, iam ſentit pericula imminetia, qui verò aggreditur ea conſiderat vt futura; difficilius autem eſt non moueri à præſentibus, quàm à futuris. Tertio quia ſuſtinere importat diuturnitatem temporis, ſed aggredi poſteſt aliquis ex ſubito motu; difficilius autem eſt

diu manere immobilem , quàm subito motu moueri ad aliquid arduum. Verùm hoc intelligendum cæteris paribus , nam interdum oppositum contingere potest , vt si longè maiora sint adiumenta ad sustinendum , quàm ad aggrediendum.

ARTICVLVS II.

Quanam sint partes Fortitudinis.

Respondeo & dico 1. *Nullas esse partes subiectiuas fortitudinis.* Ratio est, quia si quædam essent partes subiectiuæ fortitudinis, sequeretur fortitudinem esse genus respectu illarum , at non est genus, sed species infima, cùm versetur circa mortis pericula, quæ sunt eiusdem rationis, vt colligitur ex S. Doctore quæst. 128. art. 1.


Hoc autem intellige de Fortitudine acquisita, quæ fertur in pericula , eo modo quo virum ratione præditum decet : nam si agatur de infusa, quæ prudentiæ supernaturalis ductum sequitur, hæc eadem pericula adit, & sustinet quia Christianum decet : quare propter diuersitatem motiui est diuersæ speciei ab acquisita , adeoque fortitudo ex se abstrahens ab vtraque est genus respectu illarum , eæque sunt species subiectiuæ respectu illius.

Dico 2. *Assignari posse quasdam partes integrantes fortitudinis improprie sumptas.* Ita scilicet dictas, non quòd habitum ipsius fortitudinis integrent & component, sed quia ad plenam & integram illius functionem sunt necessariae. Ita sumitur ex S. Thoma art. citato, vbi monet duplicem esse fortitudinis actum, nempe sustinere, & aggredi:

ad actum autem aggrediendi duo requiri, nempe fiduciam qua quis promptus sit ad aggrediendum, & magnificentiam qua exequatur quod inchoavit. Et similiter ad sustinendum duo requiri, nempe patientiam ne quis rei difficultate frangatur, & perseverantiam ne ex diuturna perpeffione animo cadat. Ex quo sequitur quatuor illas virtutes fiduciam, magnificentiam, patientiam, & perseverantiam esse partes integrantes fortitudinis, quando versantur in propria illius materia, nempe in periculis mortis.

Dico 3. *Quatuor virtutes iam enumeratas esse sub alio respectu partes potentiales fortitudinis, ex S. Thoma ibid.* Nempe si spectentur in materiis minus difficilibus, quam sint pericula mortis: sic enim fortitudinem aliquatenus imitantur, eique adiunguntur sicut virtutes secundariæ principali, & eatenus dicuntur partes illius potentiales. Itaque fiducia tribuit promptitudinem animi in rebus eiusmodi aggrediendis, magnificentia splendide se gerit in earum executione, patientia difficultatem earum præsentem tolerat, & perseverantia facit ut opus usque in finem perducatur.

Observandum autem circa hanc & præcedentem assertionem, quatuor virtutes prædictas non esse omnes inter se distinctas quoad habitum; siquidem ad eandem virtutem spectare videtur, quod quis habeat fiduciam in aggrediendis rebus difficilibus, & quod in earum executione magnifice se gerat. Item perseverantia cum non dicat nisi durationem patientiæ, ab ea distingui non videtur nisi aliqua connotatione.



CAPVT VI.

DE TEMPERANTIA.

ARTICVLVS PRIMVS.

De nomine, & natura Temperantia.

PRæmoneo nomen Temperantiæ ambiguum esse, vt patet ex S. Thoma 2. 2. qu. 141. art. 2. primò enim Temperantia late sumitur pro moderatione quæ in actionibus humanis seruatur; quomodo omnis virtus Temperantia dici potest, cum nulla sit quæ modum non seruet in operationibus humanis, vt patet ex supra dictis. Secundo sumitur pro moderatione affectus in voluptatibus corporeis, quomodo est virtus specialis ad hunc locum spectans.

De qua quæritur, quid sit. Respondeo esse virtutem quæ in voluptatibus gustus, & tactus moderandis versatur. Vt enim ait S. Doctor quæst. citata art. 4. ita se habet Temperantia circa concupiscentias; sicut fortitudo circa timores, & audacias; fortitudo autem est circa timores, & audacias respectu maximorum malorum, quibus ipsa natura extinguitur, quæ sunt pericula mortis. Vnde similiter oportet quòd Temperantia sit circa concupiscentias maximarum delectationum. Et quia delectatio sequitur operationem connaturalem, tanto aliquæ delectationes sunt vehementiores quanto consequuntur operationes magis naturales. Maxime

autem naturales sunt animalibus operationes quibus conseruatur natura indiuidui per cibum & potum, & natura speciei per coniunctionem maris & foeminae : & ideo circa delectationes cibus & potus, ac venereorum est propriè temperantia.

Ex quo intelligis 1. non spectare ad virtutem istam Temperantiæ, moderari delectationes spirituales, quales sunt illæ quæ ex scientiis percipiuntur, neque delectationes corporeas ex visu, auditu, vel odoratu perceptas, nisi ad voluptatem aliorum sensuum referantur, sed eas quæ gustu, & tactu percipiuntur. Quò fit vt ij non dicantur intemperantes, qui nimis auidè delectationes ex mentis operatione consequentes sectantur, aut qui coloribus, sonis, vel odoribus immodicè delectantur; nisi quatenus hæ delectationes ad voluptatem gustus, vel tactus ordinantur.

Intelligis 2. proprium munus temperantiæ esse, ponere modum in voluptatibus gustus, & tactus, non tantum quoad opus externum, sed etiam quoad affectum internum: sicut enim fortitudo animum interius firmat in grauibus periculis, & firmitatem illam in opere externo profert, ita Temperantia modum ponit in affectu interno voluptatum carnalium, & facit vt exterius iuxta præscriptum rationis vsurpentur illæ quidem quæ ad cibum & potum spectant, quantum requiritur ad vitæ & officiorum necessitatem, quæ verò ad res venereas, quantum id necessarium est ad prolem in legitimo coniugio procreandam.

Intelligis 3. Temperantiæ opponi intemperantiam, & stuporem seu insensibilitatem: intemperantia dicitur cum quis in vsu voluptatum excedit, eas vsurpando modo, tempore;

loco indebito, & plusquam necessarium sit ad finem ob quem institutæ sunt: stupor verò contingit quando quis intantum omnem refugit voluptatem, vt etiam ab iis absteineat quæ sunt ad vitam tuendam necessaria.

ARTICVLVS II.

De partibus temperantiæ.

Sanctus Thomas 2. 2. quæst. 143. art. 1. triplices partes assignat temperantiæ, nempe integrales, subiectiuas, & potentiales. Integrales sunt duæ, nempe verecundia per quam aliquis refugit turpitudinem temperantiæ oppositam, & honestas per quam aliquis amat pulchritudinem temperantiæ. Nam quamuis pulchritudo conueniat cuilibet virtuti, maximè tamen competit temperantiæ, vt traditur quæst. 141. art. 2. ad 3. primò quidem secundum communem rationem temperantiæ, ad quam spectat conueniens quædam & moderata proportio, in qua consistit ratio pulchritudinis: secundo verò, quia ea à quibus refrenat temperantia, sunt infima in homine, eique conueniunt secundum naturam bestialem, ex quibus proinde homo consequitur maximè deturpari. Quare cum temperantia tollat eiusmodi sceditatem, consequenter pulchritudo ei præcipuè competit.

Partes verò temperantiæ subiectiuas plures facit, partes enim subiectiuæ alicuius virtutis sunt species eius, quæ diuersificari debent secundum diuersitatem materiæ, vel obiecti. Est autem temperantia circa delectationes tactus, quæ diuiduntur in duo genera, nam quædam ordinantur ad nutrimentum, & in his quantum ad

cibum est abſtinentia, & quantum ad potum, ſobrietas. Quædam verò ordinantur ad generationem, & in his quantum ad delectationem principalem, eſt caſtitas; quantum verò ad alias minus præcipuas, attenditur pudicitia.

Denique partes potentiales temperantiæ multiplices ſtatuit, quæ nimirum in aliqua materia minus difficili cum proportionem verſantur, ſeu quæ appetitum refrænant, & moderationem in affectibus quocunque ferantur ſtatuant, eo modo quo temperantia motus appetitus circa delectationes tactus coercent. Itaque moderatio poteſt requiri tum in internis animi affectibus, tum in motibus corporis, tum etiam in rebus externis.

In internis motibus moderatione indigentibus, præternimium affectum voluptatum, quæ temperantia refrænât, occurrit primùm motus voluntatis ex impetu paſſionis ortus, quem refrænât continentia. Deinde motus ſpei, & conſequens audaciæ quem humilitas reprimit. Tertiò motus iræ in vindictam tendens, quem refrænât manſuetudo ſeu clementia.

Circa motus externos moderationem facit modeſtia, quæ tres partes complectitur, nempe bonam ordinationem eorum quæ aguntur, ordinatum qui decentiam obſeruet in iis quæ fiunt, & auſteritatem qua in colloquiis decorum obſervatur, iuxta perſonarum conditionem.

Tandem circa exteriora dupliciter moderatio eſt adhibenda, primò vt ſuperflua non requirantur, & quoad hoc ponitur parcitas. Secundò vt non nimis exquiſita requirantur, ſicque ponitur moderatio, vel ſimplicitas, quæ etiam modeſtia in cultu vocari ſolet, vt diſtinguatur à modeſtia morum, quæ actus externos corporis rectè componit. Plura de hac, aliisque

398 ETHICÆ LIBER III.
virtutibus Moralibus videri possunt apud S.
Doctorem quæstionibus citatis, aliisque se-
quentibus; adeoque hæc pauca pro nostro in-
stituto sufficiant, ut finis tandem imponatur
Philosophiæ nostræ quadripartitæ, quam non
sine speciali Dei auxilio, hucusque perduximus.

*Domino Iesu Christo, æterni Patris coæterno Filio, nec
non purissima ipsius matri sit laus & gloria
in perpetuas æternitates. Amen.*

FINIS.





T H E S E S

PHILOSOPHIÆ

M O R A L I S,

S E V E T H I C Æ.

E X P R O O E M I O.



ETHICA ad rectam morum institutionem tota tendit, adeoque hoc nomine, seu disciplina Moralis vulgò appellatur.

Ethica non est sapientia, nec intellectus, nec mera opinio, multo minùs inter habitus erroneos numeranda, nec etiam est ars propriè dicta, sed est verè & propriè scientia.

Habitus Ethicæ non distinguitur realiter à prudentia, saltem partialiter, & inadæquatè spectata. Versatur enim circa operationes honestas in genere: Prudentia verò iudicat quid hic & nunc agendum sit in particulari: Potest autem idem habitus ad vtramque hoc munus interdum sufficere.

Actiones humanæ sunt obiectum materiale Philosophiæ Moralis, eademque vt dirigibiles ad bonum Morale seu ad honestatem,

sunt illius obiectum formale.

Ethica debet annumerari inter partes Philosophiæ.

Ethica est scientia practica, quæ versatur circa obiectum suum, modo practico & operabili; quamvis autem nonnulla speculatiue tractet, id non impedit quin absolutè sit practica, quia eiusmodi tractationes adduntur ad maiorem eorum illustrationem, quæ proximè ad praxim spectant.

Philosophia Moralis reliquis Philosophiæ partibus longè est vtilior, adeoque in ea addiscenda enixius est incumbendum: Potestque non incongruè definiri in hunc modum: Est scientia practica quæ versatur circa actus voluntatis vt dirigibiles ad bonum Morale.

Philosophia Moralis vulgo diuiditur in Monasticam, seu solitariam, Oeconomicam, seu domesticam, & Politicam seu ciuilem, quæ diuisio quamuis à quibusdam recentioribus non probetur; quamvis item Aristoteles non adeo accuratè tres illos status distinxerit nec expresso, de Oeconomica tractarit non tamen est reprobanda, cum dubitari nequeat, quin separatim possint tractari quæ spectant ad vitam hominis priuatam, sine ordine ad societatem vllam, siue Oeconomicam, siue Politicam.

EX CAP. I. LIBRI I.

Art. I.

EX sententia veterum relata ab Aristotele, bonum est quod omnia appetunt. Quous autem sensu accipiatur illa definitio siue de summo bono, siue de bono in communi, &c. Plerumque iudicatur imperfecta, etiam ab Authoribus qui eam admittunt, quia non sumitur ab essentia boni, sed à quadam illius proprietate. Quare bonum melius definitur, id quod cuique conueniens

est, quam id quod omnia appetunt.

Nonnullæ definitiones boni possunt afferri, quarum 1. tribuitur Diogeni stoico, qui dicebat id esse bonum quod natura est absolutum, seu quod est secundum naturæ perfectionem. 2. Platoni dicenti id esse bonum, quod sibi satis est, nec aliud quidpiam expetit, nec alio refertur. 3. Plotino afferenti, bonum esse primi boni participationem & delibationem, reiiciendæ tamen: Et standum primæ.

In plantis rebusque inanimatis non est proprius & formalis appetitus, est tamen illis propensio quædam naturalis, quâ inclinantur in proprium bonum, quæ à Philosophis appetitus innatus vocari solet. *Art. 2.*

Voluntas non potest ferri in malum, ut malum, sed sub aliqua ratione boni: fertur verò in minus bonum, non quatenus dicit malum, seu priuationem maioris boni, sed quatenus in se bonum & amore dignum: nec non & bonum necessario amplectitur, quoad specificationem, non quoad exercitium: quod ad libertatem & ad meritum sufficit.

Bonum tribus præcipuè modis diuiditur. In primis bonum aliud est Metaphysicū, seu transcendens, aliud Physicum, seu naturale, aliud Morale. 2. diuiditur in honestum, iucundum & utile. 3. bonum ita diuiditur ut alia sint bona animi, alia corporis, alia ab extrinseco aduenientia. *Art. 3.*

Bonitas naturalis non videtur distincta à transcendentali, nisi quoad voces: Bonitas autem Moralis distinguitur à transcendentali, seu naturali.

Bonitas transcendentalis est ex se inuariabilis, bonitas verò Moralis pendet à libertate, & innumeris modis mutari potest.

Quamuis 2. loco allata boni diuifio poffit competere bono communiffimè fumpto, negari tamen non poteft quin ea fit magis propriè diuifio boni humani, feu quod ab homine appeti poteft.

E X C A P. I I.

Art. 1.

NOmen finis valde eft ambiguum multaque fignificat. Vt plurimum verò, faltem apud Philofophos, finis dicitur id quo mouetur agens ad operandum, quo fenfu finis definiri folet, id cuius gratia aliquid fit.

Finis exercet caulalitatẽ fuam circa actum voluntatis, quo intenditur & amatur, non tantum circa electionem mediorum.

Finis caufat fub ratione boni & cõuenientis.

Cum voluntas non feratur in incognitum, ea non trahitur à fine nifi fub ratione boni.

Finis non caufat fecundum eſſe intentionale quod habet in mente, fed fecundum eſſe reale quod in fe habere poteft, vel reipſa, vel fecundum noſtram apprehenſionem. Hoc autem intelligitur de fine à cognitione diſtincto.

Dubium non eſt quin ratio cauſandi finis bono honeſto & delectabili conueniat, non autem vtili.

Bonum & finis non reciprocantur.

Finis non eſt obiectum adæquatum voluntatis terminatiuum & materiale, eſt tamen illius adæquatum obiectum motiuum & formale.

Art. 2.

Finis variæ tradi ſolent diuiſiones. Prima in finem cui, & finem cuius gratia. 2. in finem qui in ſola actione conſiſtit, & eum, qui aliquod opus externum relinquit. 3. in finem operis & finem operantis. 4. in obtinendum & faciendum. 5. in proximum, feu interme-

dium, & remotum seu vltimum. 6. in finem vltimum secundum quid, seu in certo genere, & finem vltimum simpliciter, seu in omni genere. 7. in finem vltimum materiale, & formale. 8. in obiectiuum & formale.

Homini conuenit agere propter finem.

Art. 3.

Non immerito finis dicitur principium in operabilibus, cum sit omnium causarum prima.

Actio aliqua dicitur voluntaria vel quia imperatur, vel quia elicitur à voluntate: actus autem à voluntate elicitus non potest esse vltimus finis.

Etiā irrationalia agunt propter finem.

In operatione Dei duo sunt consideranda. Nempè ipse actus internus diuinæ voluntatis, & opus externum ab eo procedens: Certum est autem opus Dei externum vltimo ad Deum tendere, vt ad causam suam finalem; circa vero opus internum duo statuenda sunt. 1. Deum non agere propter finem, vt finis sumi solet pro causa, eaque ab efficiente realiter distincta. 2. Deum improprie agere propter finem.

Duplici sensu dici potest esse finem aliquem vltimum humanarum actionum. 1. vt in qualibet serie actionum assignari possit aliquis finis, qui dicitur vltimus negatiue. 2. ita vt omnes omnino actiones, cuiuscunq; generis sint, referantur ad eundem finem vltimum, qui proinde sit vltimus positiue. *Art. 4.*

Homo nō potest operari propter plures fines vltimos. Omnes autē homines habent eundem finem vltimum generatim & formaliter spectatum, non verò speciatim & formaliter.

Idem est hominis & aliarum creaturarum finis vltimus, quantum ad rem, non autem quantum ad consequutionem, & adeptionem.

Art. 1. **E**X Aristotele tres sunt magis insignes & notæ vitæ formæ , quæ omnes non sine ratione in eo conueniunt vt beatitudinem collocandam putent in re aliqua ad vitam humanam spectante , etsi in re illa designanda inter se non consentiant. 1. est vulgaris quæ tota in consecrandis corporeis voluptatibus versatur. 2. civilis seu Politica , quæ in rebus gerendis ad Rempublicam spectantibus occupatur. 3. denique in contemplatione posita est. Primum vitæ genus beatitudinem in voluptate constituit. 2. in honore qui rebus bene gestis in Republica acquiritur. Refelluntur autem ambo ab Aristotele. de 3. nihil; aut pauca.

Art. 2. Beatitudo obiectiua non potest consistere in diuitis externis neque etiam in potestate, gloria, honore, aliisque bonis externis.

Art. 3. Beatitudo non consistit in bonis corporis, puta in pulchritudine, valetudine, robore, delectationibus sensuum , &c. neque verò etiam in naturalibus animi bonis, puta in virtute aut scientia.

Ea est felicitatis conditio , vt sit stabilis & firma , habeatque rationem finis vltimi , qui nempe ad aliquid vlteriùs non ordinetur ; hoc item illius proprium , vt eum qui illa potitur summè beet , eius animum ingenti lætitia perfundat , omnemque ab eo miseriam excludat.

Art. 4. Beatitudo obiectiua in Deo constituenda est.

Obiectum beatitudinis in solo Deo constituendum est : condiciones enim illius nulli quam Deo competere possunt.

EX communi sententia, beatitudo formalis non consistit in quodam illapsu diuinæ substantiæ in ipsum beatum. *Art. 1.*

Beatitudo non est constituenda in essentia animæ per illapsum Dei in illam.

Opinio antiqua quæ docet formalem beatitudinem consistere in visione ipsa increata, quâ Deus seipsum videt, ita vt hæc visio communicetur homini, & per eam fiat formaliter beatus, iamdiu è Scholis ablegata est & refellitur, quia si homines formaliter sunt beati per visionem increatam Dei, ergo omnes sunt æqualiter beati, at consequens est absurdum & repugnans Scripturæ sacræ, ergo & antecedens. *Art. 2.*

Beatitudo formalis consistit in aliqua operatione ipsius beati: Includit enim vitam actualem ipsiusmet beati, quæ non potest intelligi sine aliqua eiusdem beati actione, dicit item illa beatitudo perfectissimam coniunctionem beati cum obiecto quæ necessario inuoluit aliquam beati actionem. *Art. 3.*

Beatitudo formalis non est possessio in actu primo obiecti beatifici, sed in actu secundo: talis autem possessio non consistit in quodam iure operandi circa obiectum, sed in actuali operatione.

Præmium non semper consistit in actione præmiantis, sed interdum in actione illius qui præmio donatur: vnde quod beatitudo formalis in operatione ipsius beati constituatur, id non impedit quin rationem præmij habere possit.

Beatitudo formalis non consistit in vlla operatione partis sensitiuæ, sed in operatione aliqua partis intellectiuæ. *Art. 4.*

Art. 5. Beatitudo formalis duobus modis spectari potest. Primo essentialiter ut comprehendit tantum eum actum qui est de essentia illius, & quo intellecto subsistit essentialis beatitudo, etsi de aliis non cogitemus. 2. integraliter & completiue, prout includit quicquid ad felicitatem hominis integrandam concurret.

Formalis beatitudo primo modo spectata in solo actu intellectus consistit, non verò siue totaliter siue partialiter in actu aliquo voluntatis.

Art. 6. Formalis beatitudo huius vitæ consistit in ea cognitione, quam de Deo in hoc statu assequi possumus. Duplex huius vitæ beatitudo potest assignari, altera naturalis, altera supernaturalis. Posterior quæ solis Christianis conuenit, est longè perfectior priori, quæ omnibus hominibus ratione vrentibus communis est.

Non modo beatitudo naturalis huius vitæ est valde imperfecta, sed etiam supernaturalis. Formalis beatitudo alterius vitæ in clara Dei visione consistit.

Clara Dei visio excedit statum huius vitæ, viresque naturales, nec nisi virtute aliqua extraordinaria, & supernaturali obtineri potest.

Ad claram Dei visionem assequendam non sufficit remotio impedimentorum quæ ex parte corporis obstant, ne animus humanus ad illam assurgere possit, sed præterea requiritur ut animus positiue iuuetur ad videndum Deum, per auxilium aliquod ordinis supernaturalis. Quo fit ut neque animæ separatæ, neque Angeli ipsi etiam perfectissimi per vires naturæ perspicuam Dei cognitionem assequi possint.

Art. 7. Certum est hominem de facto creatum esse ob æternam beatitudinem, quæ in visione clara Dei consistit; In dubio autem, an potuerit

Deus creare hominem sine ordine ad claram ipsius visionem, quamuis nonnulli negent oppositum cum communi tamen sententia tanquam certum tenendum est: unde

Possibilis est status ille, quem vocant puræ naturæ in quo scilicet homo producat sine gratia & peccato, & cum iis tantum perfectionibus aut defectibus, qui illi naturaliter competunt, siue ex parte animæ, siue ex parte corporis, adeo ut ad beatitudinem tantum naturalem, qualis sine auxilio supernaturali, & indebito obtineri potest, ordinetur.

E X C A P. V.

Delectatio requiritur ad beatitudinem. *Art. I.*
 Quadrupliciter autem aliquid requiritur ad aliud. 1. Sicut præparatiuum & præambulum ad illud. 2. sicut perficiens. 3. sicut coadiuuans extrinsecus. 4. sicut concomitans; & hoc ultimo modo, ex S. Doctore, delectatio requiritur ad beatitudinem.

Delectatio nihil est aliud quam quies in bono adepto; & causatur ex quiete non quidem in genere causæ efficientis, sed in genere causæ formalis.

Quantum est discrimen inter beatitudinem huius & futuræ vitæ, tantum est inter vtriusque delectationem.

Ex clara Dei cognitione sequitur necessario amor illius etiam quoad exercitium, & ex amore gaudium, seu delectatio.

Deum videntes immediatè & de Deo ipso, & de ipsa visione delectantur.

Rectitudo voluntatis requiritur ad beatitudinem perfectam alterius vitæ. *Art. 2.*
 Hæc autem rectitudo voluntatis est effectus ipsius beatitudinis qui ex ea necessario profluit, ita ut qui videt essentiam diuinam non possit Deum non

amare , & consequenter non habere rectam voluntatem.

Ex vi visionis beatificæ oritur necessario actualis Dei amor , isque intensissimus , cum quo peccatum stare non potest , sicque beatus ex vi istius visionis impeccabilis est.

Art. 3. Nihil repugnat ex rei natura quin anima humana à corpore separata beatitudine perfui possit , si aliunde non impediatur.

De facto animæ iustorum post mortem fruuntur clara visione diuinæ essentiæ , neque earum beatitudo essentialis vsque ad corporum resurrectionem differtur.

Art. 4. Essentialis animæ beatitudo non minuitur , nec intensiue augetur ex consortio corporis : Augetur autem extensiue ex coniunctione cum corpore.

Bona corporis dispositio requiritur ad beatitudinem corporis omnibus modis perfectam , tum antecedenter , tum consequenter.

Homines resurrecturi sunt cum natiua effigie , ita vt quilibet discernere possit ex vultu eos quos hic nouit , etsi in beatis futuri non sint defectus corporis quos à natiuitate , vel aliunde contraxerunt. Resurrecturi autem sunt ea ætate qua Christus resurrexit , habituri que sunt eandem corporis quantitatem quam natura non errante habuissent , vnde sicut inter illos erit vultuum dissimilitudo , ita & quantitatis inæqualitas.

Beati omnes resurrecturi sunt cum quatuor eximiis dotibus , claritatis , impassibilitatis , agilitatis , & subtilitatis.

Art. 5. Ad beatitudinem huius vitæ requiruntur bona externa , non autem ad felicitatem alterius vitæ.

EX

Actionum quæ ab homine fiunt, eæ *Art. 1.*
 propriè dicuntur humanæ, quæ sunt
 propriæ hominis in quantum est homo.

Differt homo à Creaturis irrationalibus in
 eo quòd est actuum suorum dominus: unde
 illæ solæ actiones vocantur propriè huma-
 næ, quarum homo est dominus: cumque ho-
 mo sit dominus suorum actuum, per ratio-
 nem, voluntatem, seu per liberum arbitrium,
 hinc sequitur eas actiones dici propriè huma-
 nas, quæ ex voluntate humana seu ex libero
 arbitrio procedunt.

Falluntur hi qui liberum confundunt cum *Art. 2.*
 voluntario ita vt ad libertatem actionis ex eo-
 rum sententia sufficiat quod voluntariè, seu
 sponte facta sit.

Hallucinantur & ij qui voluntarium vice
 versa confundunt cum libero, adeo vt nullum
 voluntarium admittant præter id quod perfe-
 ctè liberum est, id est quod fit cum indifferen-
 tia ad vtrumlibet.

Voluntarium ita comparatur cum libero vt
 latius pateat.

Non omnis actio voluntaria potest dici Mo- *Art. 3.*
 ralis.

Non est idem formaliter actionem esse Mo-
 ralem & esse liberam.

Actus Moralis constituitur in ratione Mo-
 ralis per ordinem ad suum obiectum moraliter
 spectatum.

Voluntati potest inferri violentia quoad ac- *Art. 4.*
 tus imperatos, non quoad actus elicitos, quod
 postremum intelligendum est de violentia po-
 sitiva, non de priuatiua. Quod autem volun-
 tas possit violentiam pati in actibus imperatis,
 id non sic est accipiendum, vt aliquis actus

possit esse simul & à voluntate imperatus, & voluntati violentus, sed vt actus illi possint fieri per violentiam, qui aliàs à voluntate imperari solent.

Violentia causat inuoluntarium.

Art. 5. Quæ ex metu fiunt, sunt mixta ex voluntario & inuoluntario, ita tamen vt simpliciter sint voluntaria, secundum quid verò inuoluntaria.

Non tantum præcepta Ecclesiæ non obligant in graui metu exterius incusso, sed nequidem naturalia, aut diuina affirmatiua.

Art. 6. Concupiscentia non causat inuoluntarium, sed magis facit aliquid voluntarium.

Passio appetitus sensitiui se habet ad liberum arbitrium & antecedenter & consequenter.

Art. 7. Ignorantia eatenus causat inuoluntarium, quatenus priuat cognitione, quæ præexigitur ad voluntarium.

Ignorantia tripliciter se habet ad actum voluntatis. 1. antecedenter. 2. concomitanter. 3. consequenter.

Ignorantia antecedens causat inuoluntarium simpliciter.

Ignorantia concomitans non causat actum, sed tantum illum comitatur: idque duobus modis. 1. ita vt sit antecedens & inuincibilis. 2. ita vt sit consequens & vincibilis.

Ignorantia concomitans antecedens causat non voluntarium; Consequens autem si sit voluntaria, actus cum ea elicitus est voluntarius.

E X C A P. I I.

Art. 1. **L**iberum illud est quod aliquo vinculo exsolutum est: vnde tot sunt libertates, quot sūt vincula à quibus homo liberari potest. Alia est enim libertas à seruitute legis Mosai- cæ, quæ Christianis, alia libertas à peccato,

quæ iustis; alia libertas à corruptione quæ beatis competit : alia libertas naturalis quæ omnibus hominibus à natura indita est, & per quam maximè in suis operationibus à modo agendi brutorum distinguuntur.

Sententia Catholica statuit in homine etiam post peccatum primi parentis, mansisse arbitrium non modo à coactione, sed etiam à necessitate agendi liberum. Duplex est necessitas. Alia antecedens, alia consequens. Prior repugnat libertati propriè sumptæ. Posterior non item.

Duplex est libertas. Alia specificationis seu contrarietatis. Alia contradictionis, seu exercitij. Prior in eo consistit ut possimus aliquid, vel illius oppositum. Posterior ut possimus aliquid velle aut non velle.

Prædeterminatio Physica in eo consistit quod sit entitas aliqua recepta in voluntate antecedenter ad operationem illius, cuius positio ex sola Dei voluntate pendeat, quæ necessaria sit ad omnes actus siue bonos, siue malos materialiter spectatos, & qua posita necesse sit voluntatem operari actum illum particularem, ad quem impellitur, non quidem necessitate antecedente, sed consequente. *Art. 2.*

Prædeterminatio Physica, ut superius intellecta repugnat libertati, adeoque ad liberum arbitrium requiritur absolutio à prædeterminatione Physica.

Ex hoc quod prædeterminatio Physica repugnet libertati in genere, manifestè sequitur eam non posse conciliari cum villo actu libero in specie, cuiuscunque conditionis sit. *Art. 3.*

Nulla est causa qua voluntas determinetur ad actum peccati, & ideo Deus iuste de peccatis vindictam sumit : vnde falsum, est quod *Art. 4.*

aliqui asserunt, hominem ad singulos actus malos à Deo Physicè prædeterminari.

Voluntas hominis ideo est directè causa peccati quia seipsam interiùs mouet & inclinatur ad actum peccati.

Art. 5. Modus naturalis agendi voluntatis, ut est potentia libera, non in eo consistit tantum, ut obiectum repræsentetur ab intellectu sub indifferentia, sed in eo maximè, ut voluntas ipsa sit indifferens ad tale obiectum amplectendum, vel non amplectendum.

Si aliqua præuia determinatio requiritur ex parte Dei ad actus omnes voluntatis, ea sufficit qua voluntas est determinata à Deo ad bonum in communi.

Art. 6. Deus neminem statuit absolutè conuertere, vel saluare per auxilia gratiæ, nisi præuia scientia, qua nouit eum conuertendum & saluandum, si per talia auxilia alioqui repudiabilia vocetur.

Error est dicere primam gratiam expectare consensum naturalem nostræ voluntatis, qui illam aduocet & mereatur: non tamen est error, sed Catholica doctrina, affirmare gratiam, quâ homo iam misericorditer præuentus est, & excitatus ad opus bonum, expectare consensum liberum voluntatis, ut simul cum illa tale opus edat.

Art. 7. Actus peccati non debet reduci in Deum, ut in causam Physicè prædeterminantem, sed ut in causam intimè cooperantem.

Influxus Dei ad operationes causarum secundarum ita attemperatus est, ut non nisi cum earum influxu coniunctus quicquam producere possit. Vnde non potest concipi quòd Deus prius influat ad actus vitales siue bonos siue malos volùtatis creatæ quàm volùtas ipsa.

Libertas, seu liberum hominis arbitrium *Art. 1.*
non dicit actum, sed aliquid per modum
permanentis. Nec refert quod liberum
hominis arbitrium idem sit ac liberum iudi-
cium, aut libera electio, iudicium autem & ele-
ctio, actum dicant, non potentiam, vel habi-
tum, interdum enim nomine actus intelligitur
potentia, & est principium illius.

Libertas non est habitus, sed dicit poten-
tiam, eamque simpliciter actiuam.

Libertas non est formaliter in intellectu, sed *Art. 2.*
in voluntate.

Et si formalis libertas sit tantum in volunta-
te, radix tamen libertatis est in ipso intellectu.

Ad libertatem voluntatis non sufficit quod *Art. 3.*
obiectum proponatur illi ab intellectu sub in-
differentia illud amplectendi, vel non ample-
ctendi.

Vt voluntas aliquid velit, non est necessa-
rius actus præuius intellectus, quo iudicet hic
& nunc spectatis circumstantiis, absolute esse
volendum.

Non debet admitti ad actus voluntatis iu-
diciū aliquod præuium adeo efficax, vt eo
posito voluntas non possit non operari.

Liberum arbitrium fertur tantum in bonum. *Art. 4.*

A nemine negari potest quin liberum arbi-
trium versetur proprie circa media.

Negari non potest quin liberum arbitrium
versetur aliquo modo circa finem.

Absolute dici potest liberum arbitrium non
esse finis formaliter spectati, sed tantum me-
diorum ad finem illum assequendum.

Vnus est & idem motus seu actus volunta-
tis quo fertur in finem, vt est ratio volendi me-
dia, & in media ipsa. Alius vero est actus quo

voluntas fertur in ipsum finem absolutè, imò aliquando præcedit tempore

Non potest dari actus aliquis voluntatis neuter, id est, qui nec sit circa finem, nec circa media.

Art. 5. Reiiicitur sententia quæ afferit actiones tantum futuras, non autem præsentis, esse in potestate liberi arbitrij.

Eodem puncto temporis & prius natura quam voluntas operetur, potest non operari, adeoque pro sua libertate impedire potest ne existat operatio eo ipso momento quo esse incipit. Imò non potest id prius impedire.

Art. 6. Libertas actus est mera denominatio extrinseca à potentia libera, à qua elicitur.

In actu libero nihil reperitur reale quod non possit esse in actu non libero, reperitur tamen aliquid morale, nimirum quod ad meritum vel demeritum imputari possit: hoc autem habet præcisè ex eo quod pendet à causa libera, à qua potuit fieri, vel non fieri.

EX CAP. IV.

Art. 1. **V**olitio est actus, quo amplectimur finem simpliciter, quatenus est nobis bonus & conueniens.

Fruitio est actus potentiæ appetitiuæ.

Fruitio videtur pertinere ad amorem vel delectationem. Non quod fruitio sit æqualiter amor & delectatio: etsi enim amor ad fruitionem requiratur, non tamen est formaliter fruitio, sed tantum causaliter. Delectatio autem est formaliter fruitio.

Frui conuenit naturæ rationali secundum rationem perfectam; conuenit brutis secundum rationem imperfectam: aliis creaturis nullo modo conuenit.

Fruitio est tantum ultimi finis.

Malè Durandus qui contendit non Deum, sed visionem Dei esse immediatum fruitionis obiectum.

Fruitio perfecta est finis realiter habiti, imperfecta vero, habiti tantum in intentione.

Intentio, primò & principaliter pertinet ad voluntatem. Voluntas potest intendere id quod per se bonum est & amabile, siue sit finis ultimus, si per aliqua media comparari potest. *Art. 2.*

Plura inter se subordinata possunt simul intendi, non solum eodem tempore, sed etiam eodem actu; non quidem considerata per modum plurium, sed per modum vnius.

Actus electionis materialiter est actus voluntatis; formaliter autem actus rationis. *Art. 3.*

Electio non competit brutis animalibus.

Electio non est nisi de mediis; contingit tamen interdum id quod est finis respectu quorundam, ordinari ad alium finem.

Electio est ratum eorum quæ per nos aguntur nec non & tantum possibile. Non autem opus est ad electionem, ut medium verè sit possibile, sed saltem ut tale existimetur. Et si electio, cum sit volitio efficax, non possit esse nisi possibile, volitio tamen simplex, & inefficax, potest versari circa impossibilia.

Homo liberè eligit.

Ex duobus bonis propositis potest voluntas eligere illud quod minus bonum est.

Quando vnicum tantum est medium ad finem assequendum, electio illius est necessaria ex hypothesi, quòd quis finem efficaciter intendat. Non est autem eiusmodi electio necessaria absolutè, sed tantum ex suppositione intentionis efficacis finis.

Cònsilium non est nisi de mediis, nec non nisi de iis quæ sunt in nostra potestate: Non *Art. 4.*

est tamen de omnibus quæ à nobis fieri possunt

In consultatione seruatur ordo resolutorius, quatenus à fine intento procedimus ad media proxima & remota, vt à toto ad partes. In executione verò proceditur ordine compositionis

Consilium non procedit in infinitum, siue ex parte principij, siue ex parte termini.

Art. 5. Consensus est actus virtutis appetitiuæ potius quam apprehensiuæ.

Consensus sæpe sumitur pro actu intellectus & significat conformitatem in iudicio.

Consensus non conuenit brutis animalibus: ad consensum enim non sufficit determinatio appetitus ad vnum, sed requiritur determinatio libera, qualis non est in brutis.

Operis executio non tantum sequitur ex consensu, sed etiam ex naturali impetu.

Consensus non est de fine, sed de medijs ad finem necessarijs.

Consensus dicit simplicem effectum medijs ad finem consequendum: electio verò dicit actum quo ex pluribus medijs propositis, vnum præfertur alteri: vnde potest esse consensus sine electione.

Consensus pertinet solum ad superiorem animæ partem.

Art. 6. Vti primò & principaliter est voluntatis, vt primi mouentis, rationis vt dirigentis, & aliarum potentiarum, vt exequentium.

Operatio potentiæ voluntati subordinatæ, est vsus talis potentiæ, non tamen ita vocatur respectu ipsius potentiæ, à quâ immediatè elicitur, sed per ordinem ad voluntatem, quatenus fit ex imperio illius. Vnde duplex est vsus: Actius & passius. Actius est actus quo voluntas mouet potentiam ad operandum. Passius est illa potentiæ operatio, vt fit ex motione voluntatis.

Vti non conuenit brutis animalibus.

Vsus non est vltimi finis, sed eorum tantum quæ sunt ad finem. Latè tamen spectatus potest esse respectu vltimi finis obiectiue spectati, quatenus refertur ad possessionem.

Vsus sequitur electionem si referatur ad idem. Interdum est actus realiter distinctus ab electione, nonnunquam verò coincidit realiter cum electione.

Imperare est essentialiter actus rationis præ- *Art. 7.*
supposito actu voluntatis: Vnde non competit brutis.

Vsus est imperio posterior: vnde ille est ordo inter cōsiliū, electionem, imperium & vsum, quod post cōsiliū, seu iudiciū rationis, sequitur electio mediij, tum imperium iubens executionem ac tandem vsus seu executio.

Imperium & actus imperatus realiter & quoad naturam distinguuntur, non autem moraliter quia in vtroque est eadem bonitas & malitia.

Actus voluntatis à nobis imperantur. Vnus autem actus voluntatis non potest imperari nisi per actum præcedentem eiusdem voluntatis, cum sola ordinatio rationis, seu locutio interna ad imperium non sufficiat.

Actus rationis semper imperari possunt quoad exercitium, intelligendo de actibus quī aliquem libertatis vsum supponunt.

Apprehensio intellectus non est in nostra potestate quoad obiecti speciem: quod vero spectat ad obiectum obscurum, iudiciū de illo quoad speciem, est in nostra potestate.

Ratio præest appetitibus irascibili & concupiscibili, non principatu despótico, sed politico.

Actus vitæ vegetabilis non imperatur; indi-

rectè tamen subiicitur voluntati, quatenus potest voluntas illi materiam ministrare, vel negare. Idem dicendum de facultate vitali residente in corde quæ continuum illius arteriarum pulsus causat. Respiratio tamen quæ ad facultatem vitalem refertur aliquanto tempore contineri potest, sicque voluntati subiicitur. De sensibus externis idem sentiendum ac de actibus vitæ vegetantis.

Omnes motus membrorum quæ mouentur à potentiis sensitiuis subduntur imperio rationis, non autem ij qui consequuntur vires naturales. Ideo autem subduntur quia eorum actus pendent immediatè à potentia loco motiua quæ voluntati despotice obedit.

E X C A P. V.

Art. 1. **B**onitas & malitia humanorum actuum præcipuè sumendæ sunt ab obiecto, quod intelligendum est in genere moris. Ad bonitatem vel malitiam actus duo requiruntur. Primò libertas, secundo conformitas, vel difformitas cum recta ratione: porro actus internus habet ab externo bonitatem vel malitiam quoad conformitatem, vel difformitatem, externus verò ab interno quoad libertatem: quo fit, vt quamvis actus interni obiectum sit actus externus, id non officiat quin actus humanus sumat bonitatem, vel malitiam ab obiecto.

Art. 2. Bonitas & malitia actus sumitur ex circumstantiis. Idque dupliciter: Primò, ita vt circumstantia addat actui speciem bonitatis & malitiæ, distinctam ab ea quæ sumitur ab obiecto. 2. ita vt non addat nouam speciem bonitatis aut malitiæ, sed præcedentem accidentaliter tantum augeat.

Interdum circumstantia efficit, vt actus qui ex sua ratione est indifferens, sit bonus aut ma-

lus, tuncque tribuit circumstantia primam speciem moralem actui. In his autem casibus circumstantia habet rationem obiecti adeoque prædicti actus non dicuntur boni aut mali ex circumstantiis, sed ex obiecto.

Interdum contingit ut peccatum sit valde graue ratione obiecti, & valde leue ratione circumstantiarum.

Actus humanus est bonus vel malus ex fine; *Art. 3.* pendetque à fine siue bono siue malo, sicque ab eo bonitatem vel malitiam accipit.

Quadruplex in actibus humanis bonitas potest considerari. Prima secundum genus, quæ competit actioni, ut actio est. 2. Secundum speciem, quæ sumitur per ordinem ad obiectum conueniens. 3. secundum circumstantias, quasi secundum quædam accidentia. 4. secundum finem quasi secundum habitudinem ad bonitatis causam.

Actus humanus varias species, accipit ratione obiecti & finis.

Bona intentio vitatur per malam electionem: & ita vitatur, ut non solum electio sit mala, sed etiam intentio ipsa alioqui per se bona, ex electione illa malitiam contrahat. Duo actus non sunt æquales quoad bonitatem & meritum propter finis æqualitatem.

Ut actus sit bonus, non debet expressè referri ab operante in finem bonum: Vnde

Errant qui docent opera omnia quæ non fiunt ex motiuo perfectæ charitatis in Deum, esse peccata.

Bonitas & malitia actus pendent aliquo modo à ratione: cum hoc tamen discrimine, quod ratio debeat expressius ostendere bonitatem obiecti quam illius malitiam. *Art. 4.*

Conscientia communiter diuiditur in rec-

tam, erroneam, dubiam, probabilem, & scrupulosam.

Voluntas discordans à conscientia errante, est mala.

Voluntas quæ concordat cum conscientia, seu ratione errante non est mala, quando error ille est inculpabilis; est autem mala, quando error est culpabilis.

Non est peccatum agere contra conscientiam speculatiuè dubiam, modo dubium in praxi rationabiliter deponatur, & quis iudicet sibi licitum esse hic & nunc agere. Est autem peccatum agere contra conscientiam practicè dubiam.

Licet sequi in praxi opinionem probabilem, relicta ea quæ probabilior videtur.

Art. 5. Bonitas voluntatis humanæ magis dependet à lege æterna quàm à ratione humana, & ubi deficit humana ratio, oportet ad rationem diuinam recurrere.

Voluntas nostra tenetur conformari diuinæ, spectatæ per modum causæ efficientis, seu dirigentis, quando præcipit vt aliquid velimus, non autem quando se habet tantum vt consultens, & inspirans.

Voluntas nostra aliquo sensu debet esse conformis diuinæ secundum principium formale volendi, non alio.

Nostra voluntas non necessario debet esse conformis diuinæ in obiecto voluto, sed potest illi laudabiliter repugnare.

Art. 6. Si in actu exteriori spectetur bonitas aut malitia quam habet, per ordinem ad finem operantis, tunc sunt prius in actu interiori bonitatis. Si verò in eodem actu exteriori spectetur eadem bonitas & malitia, quam habet ex obiecto & circumstantiis, vt apprehenditur

per rationem, eo modo bonitas & malitia actus exterioris est prior bonitate & malitia interioris.

Quando actus exterior est bonus vel malus solum ex ordine ad finem, tunc est omnino eadem bonitas aut malitia actus voluntatis qui per se respicit finem, & actus exterioris, qui respicit finem mediante actu voluntatis. Cum vero actus ille exterior habet bonitatem vel malitiam secundum se, tunc illius bonitas externa, & voluntatis quæ est ex fine, est alia.

Bonitas finis ex voluntate redundat in actum exteriorem, & bonitas materiæ, & circumstantiarum redundat in actum voluntatis.

Actus exterior non addit supra bonitatem *Art. 7.* aut malitiam actus interioris.

Opus externum ut refertur tantum ad unam personam ex una intentione bona, & ex alia mala, operantem, non est simul bonum & malum.

Fieri non potest ut actus internus, sit simul bonus & malus.

Probabilius videtur nullum actum internum voluntatis posse fieri successivè ex bono malum.

EXCAP. VI.

Eorum sententia amplectenda est qui docent formalem bonitatem, seu honestatem actualem nihil aliud esse, quam consonantiam seu bonitatem actus humani cum recta ratione. *Art. 1.*

Formalis malitia peccati commissionis, est aliquid positivum. *Art. 2.*

Peccatum dicitur privatio, non quod formaliter sit privatio, sed quia varias privationes causat.

Datur actus aliquis indifferens secundum speciem. *Art. 3.*

Probabilius est non dari actum indifferen-
tem in indiuiduo.

Art. 4. Actus humanus vt bonus, habet rationem
rectitudinis, & vt malus, habet rationem pec-
cati.

Actus humanus in quantum est bonus vel
malus, habet rationem laudabilis, vel culpa-
bilis, meriti vel demeriti, etiam apud Deum.

Art. 5. Ad actum meritorium requiritur, ex parte
ipsius actus, quod sit liber, fiatque ex gratiæ ad-
iutorio: ex parte operantis quod sit in statu
gratiæ, & viator, & ex parte Dei, quod adsit
promissio de dando præmio ob tale opus. Pec-
cator non meretur de condigno gratiam san-
ctificantem. Iustus potest & de condigno il-
lius augmentum promereri. Non autem siue
de condigno, siue de congruo, perseuerantiam
strictè sumptam, sicut nec de condigno repa-
rationem post lapsum.

Probabile est hominem mereri de condi-
gno primam gloriam per actum contritionis
vel amoris Dei super omnia, quo extra Sacra-
mentum ultimæ disponitur ad iustificatio-
nem.

EX CAP. VII.

Art. 1. **P**assiones non sunt actus cognitionis siue
intellectuæ, siue sensitiuæ, sed affectio-
nis seu appetitionis, quæ supponunt qui-
dem præuiam agnitionem proportionatam,
ab appetitu tamen efficienter eliciuntur.

Art. 2. Passiones diuiduntur ratione subiecti, quo-
modo diuiduntur in concupiscibiles, & irasci-
biles: & ratione obiecti, quod alias versentur
circa bonum prosequendum, alias circa malum
fugiendum.

In passionibus appetitus concupiscibilis est
contrarietas, secundum obiecta tantum, in

passionibus vero irascibilis est cōtrarietas, non modo secundum obiecta, sed etiam secundum accessum & recessum ab eodem termino.

Vndecim passionēs vulgò assignantur, quarum sex priores spectant ad appetitum concupiscibilem, quinque vero posteriores ad irascibilem; Plures quidem à nonnullis assignantur, attamen ad prædictas reduci possunt. *Art. 3.*

Passiones ex se neque sunt bonæ, neque malæ, sed quatenus subiacent imperio rationis, possunt esse bonæ, aut malæ. *Art. 4.*

Passiones non repugnant viro sapienti.

Art. 5.

Passiones appetitus concupiscibilis per se loquendo & spectata rei natura, sunt priores passionibus appetitus irascibilis.

Inter passionēs appetitus concupiscibilis, quæ feruntur in bonum, sunt priores illis quæ in malum tendunt.

Passiones appetitus concupiscibilis sunt per se loquendo perfectiores passionibus appetitus irascibilis. Inter has autem quæ consistunt in prosecutione boni sunt iis præstantiores quæ in auersione mali positæ sunt. *Art. 6.*

Inter affectus concupiscibilis in bonum tendentes, ij videntur perfectiores qui proximius se habent ad obiectum.

Affectus in malum tendentes eundem ordinem inter se habet, quem affectus in bonum.

EXCAP. VIII.

Amare nihil aliud est quàm velle alicui bonum: vnde colligitur amorem esse actum, quo volumus alicui bonum. *Art. 1.*

Quatuor sunt causæ amoris. Bonum, cognitio, similitudo, quæcunque alia passio; quibus addi potest quinta, amor ipse.

Multiplices sunt amoris effectus. Vnio, mutua inhæſio, ecſtaſis, zelus, amor denique eſt cauſa omnium quæ amans agit.

Odium eſt paſſio appetitus ſenſitiui, quâ malum reſpuitur ſimpliciter vt malum eſt.

Duplex eſt odium. Aliud abominationis, aliud deſolationis.

Art. 2. Deſiderium eſt paſſio appetitus concupiſcibilis, quâ fertur in bonum quatenus abſens.

Concupiſcentia alia eſt naturalis, alia non naturalis.

Fuga eſt motus appetitus concupiſcibilis auerſantis malum abſens.

Art. 3. Delectatio eſt paſſio, ſeu motus appetitus concupiſcibilis, quo fertur in bonum ſenſibile, vt præſens & poſſeſſum.

Vt concupiſcentiæ, ita & delectationes aliæ ſunt naturales, aliæ non naturales.

Delectationes intellectuales ſunt ſimpliciter maiores ſenſibilibus.

Vna delectatio poteſt eſſe alteri contraria.

Varie ſunt cauſæ delectationis. Operatio, memoria & ſpes, ſenſus externus. Triftitia duplici ſenſu conſiderata: idque per accidens, admiratio, &c.

Quatuor effectus delectationis assignantur. Dilatio, Sitis, & deſiderium, contemplatio, operationis perfectio.

Art. 4. Triftitia eſt quædam ægritudo ſeu anxietas in appetitu ſenſituo ex præſentia tam reali, quam imaginaria mali ſenſibilis excitata.

Dolor ſæpè confunditur cum triftitia: eſt tamen inter illa quædam diſtinctio.

Quatuor ſpecies triftitiæ assignantur. Miſericordia, inuidia, anxietas & accedia.

Ad cauſas triftitiæ reduci poſſunt ea omnia quæ ad hoc conferunt, vt bono aliquo optato

privemur, vel ut malum aliquod involuntarium sentiamus.

Varij sunt tristitiæ seu doloris effectus, in textu explanati.

Spes ut inter passiones numeratur, & distinguitur a spe, quæ est virtus Theologica, est affectus appetitus irascibilis qui fertur in bonum futurum, arduum quidem, sed possibile ad obtinendum. *Art. 5.*

Causæ spei sunt tum ea omnia quæ iuvant ad aliquid arduum consequendum, tum quæ efficiunt ut res sperata iudicetur obtentu possibilis, siue illud iudicium sit verum siue falsum: duo sunt effectus spei, causare amorem & iuvare, ut facilius fiat operatio.

Desperatio opponitur spei.

Audacia est motio appetitus sensitivi, quæ in prosecutione mali terribilis consistit. *Art. 6.*

Audacia excitatur a spe, & ab iisdem causis quæ generant spem.

Effectus audaciæ sunt afferre tremorem & frigiditatem membris exterioribus; Timor est passio, quâ appetitus irascibilis fugit malum imminens, quod difficile posse cauci existimatur.

Sex sunt species timoris. Segnities, erubescencia, verecundia, admiratio, stupor & agonia. Causa generalis timoris est amor, & concupiscentia boni, quo privari debemus.

Varij sunt effectus timoris in textu videndi.

Ira est motio appetitus irascibilis quo insurgitur in vindictam de iniuria accepta. *Art. 7.*

Tres assignantur iræ species. Fel, Mania & furor.

Variae sunt causæ iræ, tam ex parte irascentis, quàm ex parte illius qui ad iram prouocat. Iræ effectus sunt, causare delectationem, &

feruorem circa cor, vsum rationis impedire,
itemque & taciturnitatem causare.

EX LIB. III. CAP. I.

Art. 1. **V**irtus Moralis constituitur sub genere habitus.

Differentia virtutis Moralis constitutiva & distinctiva est, vt rectè afficiat hominem ad actum honestum eliciendum.

Virtus Moralis potest definiri, habitus tribuens homini inclinationem ad rectè, & secundum honestatem operandum.

Art. 2. Virtus ex Aristotele est quæ bonum facit habentem, & opus eius bonum reddit.

Virtus Moralis ita per se tendit ad bonum, vt nequeat habere actum malum, adeoque virtute nemo possit malè vtī.

Art. 3. Nulla est propriè causa formalis virtutis Moralis, dici tamen potest formam illius intrinsecam esse illius quidditatem & essentiam.

Prudentia, quæ inter virtutes Morales nominatur, est in intellectu. Aliæ vero nempe Iustitia, Fortitudo & Temperantia sunt in voluntate.

Art. 4. Virtutes Morales non sunt nobis à natura congenitæ, sed per multorum actuum repetitionem in nobis producantur.

Duplex est finis virtutis Moralis, Proximus & remotus. Proximus est operatio recta & honesta: Remotus est hominis beatitudo.

Virtuti Morali non potest addi finis malus ex intentione operantis, ita vt elici possit actus veræ virtutis ex prauo fine.

EXCAP. II.

OMnes virtutes Morales consistunt in medio quoad substantiam seu entitativè, ita ut inter duos habitus vitiosos sint constitutæ. *Art. 1.*

Virtus aliqua materialiter spectata potest magis ad unum, quam ad aliud extremum vergere, sicque non est præcisè in medio illorum; non tamen si formaliter spectetur.

Virtutes Morales consistunt in medio effectivè seu causaliter, adeoque etiam obiectivè.

Virtutes intellectuales in medio consistunt. *Art. 2.*

Illud est discrimen inter virtutes Morales acquisitas, & Theologicas, quod Morales habent medium non modo ratione circumstantiarum, sed etiam ratione obiecti: Theologicæ vero non habent medium ratione obiecti, sed tantum attentis circumstantiis conditionis nostræ, sub quibus sapientia diuina statuit modum in actibus, quibus in Deum tendere debemus.

Virtutes Morales infusæ habent medium eodem modo ac acquisitæ.

Virtutes intellectuales nullam connexionem inter se habent. *Art. 3.*

Prudentia non potest haberi in gradu perfecto, vel heroico, sine aliis virtutibus, potest tamen in imperfecto.

Nulla virtus Moralis potest haberi sine prudentia.

Nulla virtus Moralis in gradu heroico vel perfecto spectata, esse potest sine omnibus aliis; potest tamen in gradu imperfecto.

Virtutes Morales prout sunt operatiuæ boni in ordine ad finem, qui non excedit facultatem. *Art. 4.*

tatem naturalem hominis, possunt per opera humana acquiri & sic acquisitæ sine charitate esse possunt, sicut fuerunt in multis gentibus. Secundum autem quod sunt operatiuæ boni, in ordine ad vltimum finem supernaturalem, non possunt sic humanis actibus acquiri, sed debent infundi à Deo : & huiusmodi virtutes non possunt esse sine charitate.

Omnes virtutes Morales simul infunduntur cum charitate.

Fides & spes possunt esse sine charitate; non tamen sine illa perfectæ charitatis rationem habent.

Charitas non potest esse sine fide & spe.

Art. 5. Omnes virtutes non sunt inter se æquales.

Inter virtutes eiusdem speciei potest reperiri magna inæqualitas, secundum gradus intensiōis, ita vt virtus vna in vno sit valde intensa, in alio valde remissa.

EXCAP. III.

Art. 1. **P**rudencia vt virtus Moralis spectata vulgo definitur, habitus cum vera ratione actius, circa ea qua homini bona vel mala sunt.

Prudentia etsi subiectiuè sit virtus intellectualis, non tamen immeritò reponitur inter virtutes Morales, ratione obiecti, effectus & finis.

Art. 2. Prudentiæ officia sunt inquirere, consultare & indicare.

Proprium est prudentiæ præscribere medium virtutibus moralibus.

Art. 3. Prudentia primò potest diuidi in naturalem, seu acquisitam : secundò, in personalem, solitariam & gubernatricem.

Habitus prudentiæ sunt multiplicandi iuxta varietatem virtutum, quæ ab illa dirigi debent: sicque ex multis habitibus partialibus prudentia perfectæ & absoluta integratur. *Art. 4.*

Tres partes potentiales prudentiæ assignantur, nempe Eubulia, Synesis, & Gnomē.

Duobus modis contra prudentiam peccatur. 1. per defectum. 2. per excessum. Priori modo peccatur per præcipationem. 2. per inconsiderationem. 3. per inconstantiam, &c. Posteriori multis modis, iisque in textu videndis. *Art. 5.*

EXCAP. IV.

Iustitia ut est vna ex quatuor virtutibus Moralibus quæ Cardinales appellantur, est habitus, secundum quem aliquis constanti & perpetua voluntate ius suum cuique tribuit. *Art. 1.*

Iustitia potest primò diuidi in distributiuam & commutatiuam: & hæc rursus subdiuidi in eam quæ est partis ad partem, & eam quæ est partis ad totum. *Art. 2.*

Partes potentiales iustitiæ vocantur virtutes illæ quæ magnam cum iustitia strictè sumpta consentionem habent, illius tamen perfectionem non attingunt. Eiusmodi autem virtutes sunt octo, nempe Religio, Pietas, &c. *Art. 3.*

EXCAP. V.

Fortitudo est virtus quæ timorem & audaciam in grauib. periculis moderatur. *Art. 1.*
Nullæ sunt partes subiectiuæ fortitudinis: assignari tamen possunt quædam illius partes integrantes impropriè sumptæ. *Art. 2.*

EXCAP. VI.

Art. 1. **T**emperantia est virtus quæ in voluptatibus gustus & tactus moderandis versatur.

Non spectat ad virtutem Temperantiæ moderari voluptates spirituales.

Art. 2. Temperantiæ, opponitur intemperantia & super.

Triplices sunt partes Temperantiæ quæ item in plures alias, in textu videndas subdividuntur.

Finis Thesum Ethicæ.



ERRATA.

Pag. 23. lin. 19. lege, si, p. 25. l. 9. l. propter il-
lud, p. 29. l. 18. & 54. l. frenofactiua, p. 30. l. 18. l.
actiones, p. 34. l. 6. addi non, p. 36. l. 22. l. vlti-
mos, p. 57. l. 31. dele, si, p. 78. l. 21. l. ista, p. 87. l. 8. l.
rectitudinem, p. 98. l. 15. l. puro &, p. 108. l. 9.
post actum, l. humanum, quo se habet, p. 113. lin.
antepen. l. actus, p. 114. l. 29. l. consentaneæ, p. 116.
l. antep. l. non peccare, p. 117. l. 34. l. hinc, p. 119.
l. 20. l. citato, & l. 26. metus, p. 139. l. 25. l. vtrum-
libet, p. 142. l. 25. l. secundum, p. 151. l. 3. post actu
lege homo disponitur ad hoc quod alium, l. 28.
l. posita, p. 157. l. 21. dele non, p. 160 l. 29. post
permissiue l. concurrere, p. 164. l. 2. l. sint, p. 170.
l. 22. l. pari, p. 182. l. 10. l. at, l. 25. vlla, & l. 30. pos-
sint, p. 183. l. 20. l. intentionem, p. 187. l. 31. l. eum,
p. 188 l. 16. l. in, p. 190. l. 5. l. mouentur, p. 194. l.
4. l. maius, p. 198. l. 14. dele ad, p. 200. l. 23. l. in-
tellectus, p. 205. l. 19. l. iudicio, p. 210. l. 33. l. Mo-
rali, p. 212. l. vlt. l. honestus, p. 220. l. pen. l. nos, p.
225. l. 31. l. Ita, p. 227. lin. vlt. l. ipso, p. 237. l. 21. l.
dignus, p. 245. l. pen. l. obiectum, p. 247. l. 4. l.
quia, lin. seq. l. qua, p. 249. l. 15. l. præcipiatur, p.
266. l. 26. l. &, p. 274. l. 25. l. proportio, p. 282. l.
4. l. prosecutione, p. 315. l. 15. l. capiendum, p. 317
l. 19. l. reperiatur, p. 319. l. 3. l. estimatiua, p. 320
l. 31. l. rationalem, p. 345. l. 21. l. recedant, p. 346.
l. 21. l. intrinsecè, p. 350. l. 14. l. isque, p. 383. l. 20.
l. alteri, pag. 384. lin. 18. l. aliis, p. 385. l. 17. l. Vide
plura.











